

**INSTITUTIONES
PHILOSOPHICÆ
AD STUDIA
THEOLOGICA
POTISSIMUM...**

François Jacquier





L. 60



1

**INSTITUTIONES
PHILOSOPHICÆ
AD STUDIA THEOLOGICA
POTISSIMUM ACCOMMODATÆ,**

AUCTORE

FRANCISCO JACQUIER

**EX MINIMORUM FAMILIA
PRIMARIARUM PER EUROPAM
ACADEMIARUM SOCIO,**

**IN LYCEO ROMANO, ET IN COLLEGIO
URBANO DE PROPAGANDA FIDE
PROFESSORE.**

TOMUS SECUNDUS

Metaphysicam cœmplectens.



V. ENETIIS MDCCLXII.

SIMONIS OCCHI CURIS,

Superiorum permissu, ac Privilegio.

AUCTOR LECTORI.

EA est de rebus Metaphysicis male omnino & temere concepta nonnullorum opinio, ut præstantissimæ hujus disciplinæ studiosos viros aspernentur, eosque velut gentem vanissimis cogitationibus & chymæris pastam fastidiose traducant. Eo usque progressa est perniciosissimi erroris audacia ut fere pro injuria atque contumelia habeatur venerandum *Metaphysici* nomen. Verum quod tam male & inique apud plerosque audiat præclarissima hæc scientia, non *Metaphysicæ* sed *Metaphysicis*tribuendum est. Eadem de causa honorificentissimum olim *Sophiste* vel *Sapientis* nomen quod *Sophistarum* cavillationibus deinde viluerat, tandem contemptissimum fuit & a Græcis Philosophis repudiatum. Ego vero Institutiones Metaphysicas traditurus, nulla alia meliori defensione utilissimo huic studio honorem atque dignitatem restituui posse existimo, quam si Metaphysicæ usum atque abusum exponam.

Metaphysica definiri solet *entis in genere & spirituum scientia*. Hinc duæ nascuntur Metaphysicæ partes. 1. Quæ *Ontologia* vel etiam *Metaphysica generalis* appellatur, universalissimas *existentiæ, essentiæ, possibilitatis, substantiæ, attributi* notiones variasque entium relationes generatim considerat. Pars autem altera quæ *Pneumatologia* vel etiam *Metaphysica particularis* vocatur, Deum Optimum, Maximum, spiritusque ab eo creatos contemplatur. Neque me reprehendant superciliosi censores quod in rebus Metaphysicis sola ratione innixis sanctorum Patrum testimonia non raro laudaverim; hanc enim auctoritatem licet impense venerandam

dam non adhibui nisi ratiocinatione aliqua suffultam ; atque autoritatis & rationis pondus simul jungere consultius validiusque judicavi . Jam de Metaphysicæ partibus singulis breviter dicam .

Ontologiæ utilitatem maximam ex ipsa definitione nemo non intelligit ; hæc enim abstractissimas exponit rerum omnium notiones ac proinde universalissima scientiarum omnium principia continet . Et certe quæ a cultioribus Metaphysicis tractari solent de *essentia & attributis*, de *necessario & contingente*, de *finito & infinito* ; de *simplici & composito* in rebus Theologicis, ut alias prætermittam disciplinas, maxime valere si quis divinæ hujus scientiæ imperitus negaverit, is ex tota harum institutionum serie facile refelletur . Verum quantum prodesse potest Ontologia si accuratis definitionibus explicetur, tantum potest nocere si ambiguis verbis laboret . Ex hac ambiguitate factum est ut de rebus etiam obviis & unicuique familiarissimis acriter disputaverint Scriptores aliqui, atque incautis Lectoribus præclarissimi studii fastidium & satietatem excitaverint . De *primo cognitionum nostrarum principio*, de *unitate entis transcendentali*, de *principio individuationis*, de *essentia & existentia*, de aliis quæstionibus plurimis quot altercationes & *logomachiae* quas facile dirimeret accurata definitio ? Eadem de causa fit ut in rebus etiam levissimi vel nullius negotii mutuis injuriis sese aliquando laceessant acerbiores Philosophi & Urbanis viris sese ridendos præbeant, ipsamque etiam Philosophiam ludibrio exponant .

Quod alteram spectat Metaphysicæ partem, *Pneumatologiam* scilicet, totam illius utilitatem, fere dicam, necessitatem fusius exponam . Pneumatologia dividitur in *scientiam de Deo*
sive

sive *Theologiam naturalem* quam Deus per revelationem *sanctificavit*, & in *scientiam de anima*. Quia vero ex animæ nostræ consideratione ad perfectissimum rerum omnium creatorem assurgimus, recta methodus postulat ut scientiam de anima primum explicemus. Anima consideratur vel *in ordine ad se*, vel *in ordine ad corpus*; itaque de animæ spiritualitate atque immortalitate variisque illius facultatibus agendum est, ac tandem de sensationibus tractandum. Verum in hac amplissima rerum utilissimarum copia, multa sunt quæ lectorem monitum velim. Et primum quidem distinguendæ sunt diligenter & accurate tractandæ gravissimæ quæstiones ad ipsam Religionis substantiam pertinentes, neque Philosophicis opinionibus prophana confusione miscendæ. Itaque id summo studio curandum est ut fidei nostræ dogmata cum philosophicis hypothesebus non connectantur, sed talibus demonstrantur argumentis quæ a nullo illibatæ fidei Philosopho negari possint. Totis quidem viribus obstandum est errori periculosisque opinionibus; sed laudandi minime sunt Metaphysici qui religioso quidem sed ardentiori animo, ad probandam animæ spiritualitatem aliamve quamlibet sanctæ Religionis doctrinam, resellendas sibi assumunt varias Catholicorum atque incorruptæ fidei Philosophorum hypotheses; hi quidem dum Religionem prodesse volunt, aliquando nocent plurimum impiisque fidei hostibus arma subministrant.

Itaque Sanctissima Fidei Decreta a Philosophorum placitis secernere religiosissime studebo. Quia vero in rebus Metaphysicis incerta sunt plurima, cognitionum nostrarum vel saltem mearum limites, pro ingenii mei tenuitate, præscribere conabor, atque tandem sæ-

pe sæpius rerum obscuritatem aut meam ignorantiam ingenue fateri non verebor . In hac autem Metaphysicæ parte quæ ad mentis facultates atque actiones spectat , monendi sunt studiosi Adolescentes ut sibimetipsis , animæ scilicet , magis quam libris studeant ; est enim Metaphysicæ pars illa veluti *physica experimentalis* animæ , quæ quidem a vulgari *physica experimentalis* hoc maximo differt discrimine , quod in hac ultima tentari atque institui possint nova & hætenus inaudita experimenta ; at quod animam nostram attinet , experimenta ipsi hominis creationi cœva sunt , mentis nempe operationes in unoquoque homine eadem geruntur , licet non eadem ab omnibus & a multis fere nulla attentione observentur . Quæ cum ita sint , in explicandis animæ operationibus , ipsam sensus intimi & conscientiæ magis quam ratiocinationis philosophicæ autoritatem appellandam mihi esse existimo . Porro intellectum & voluntatem consideraturus , duas scilicet animæ facultates quarum prima ad veritatem , altera autem ad virtutem flecti debet , vel nihil vel leviter attingam quæstiones in Logica aut Ethica convenientius tradendas ; suis enim locis singula tractari doctrinæ ordo postulat .

De scientia animæ *in ordine ad corpus* , sive de sensationibus fusius quam par est , disputare videntur Metaphysici nonnulli qui prolixiorum quæ Medicos magis quam Metaphysicos decet , humani corporis anatomen describunt ; Sensationes , imaginationem , memoriam aliaque id genus difficillima animæ corporisque arcana per spirituum animalium fibrillarumque motum generatim explicare laborant ; quibus quidem auditis explicationibus nihilo doctiorem se quisquam sentiet . Certissimum quidem est sensationes nostras ex organis corporeis pendere ;

(V I I)

dere; at Mechanicam sensationum artem illarumque admirabilem cum subtilissimis minimarum partium motibus connexionem ignotam nobis esse non minus certum est. Itaque pauca quæ hac in re scio, duntaxat afferam; quare brevis ero & fortasse nimius. Quæ pertinent ad diligentiores anatonen utilissima quidem sunt, sed explicandis animalium motibus magis inserviunt, ideoque ea ad Physicam opportunius rejicienda, sicut & alia plurima quæ de sensationum fallaciis tradi solent; ea enim sine Physicæ auxilio commode explicari non possunt. In Pneumatologia de Angelis disserunt plerique Metaphysici; Verum paucissima sunt quæ lumine naturali de sublimiori illo spirituum ordine novimus; quare argumentum illud quod a Philosophis pro dignitate tractari non potest, ad Sacram Theologiam convenientius reservandum judico.

Ultima tandem superest pars Metaphysicæ, Theologia naturalis, præstantissima omnino divinaque scientia, in qua existentiam Dei primum demonstrabimus; deinde attributa divina, quantum ferre potest humanæ rationis imbecillitas, contemplabimur. Nulli divino attributo acrius quam sapientissimæ Dei providentiæ bellum indixerunt Religionis hostes; quamvis ergo de singulis attributis, quantum Philosopho licet, tractaverim, illud tamen primum fidei dogma adversus incredulos vindicare, & oblata variis in locis occasione demonstrare vel maxime studui.

Neque satis est divinam hanc scientiam explicare, & de Deo subtiliter disputare: *Philosophia non est sapientia nisi adjungatur Religio*: ait Lact. Tota quanta hæc doctrina eo tandem refertur, ut rerum omnium creatorem & dominum in omnibus nostris actionibus venerere.

(VIII)

neremur ipsique soli serviamus. Itaque cum Religionis fundamenta contineat Theologia naturalis, ipsam Religionis ideoque etiam divinæ revelationis necessitatem demonstrabo. At impios incredulosque homines ad silentium quidem adigere potest philosophicorum argumentorum vis, de illorum autem pertinacia sola gratia potest triumphare. *Erravi*, inquit S. Augustinus lib. De prædest. Sanct. cap. 3. *putans fidem qua in Deum credimus, non donum Dei, sed a nobis esse in nobis*. Ita loquebatur S. Doct. de errore quo antea laboraverat. Itaque cum eodem S. Doctore concludamus epist. 107. *pro eis qui nolunt credere, nos qui jam credimus recta fide Deum oremus ut velint*.

A P P R O B A T I O .

LEgi equidem lubens, ut Reverendissimo Patri Thomæ Augustino Ricchinio S. P. A. M. jubenti obtemperarem, egregium Opus inscriptum *Institutiones Philosophicæ &c.* Tom. secundus; tantumque absuit, ut quidquam in eo minus pie minusque castigate scriptum deprehenderim; ut contra jacta animadverterim fundamenta Religionis, explicata autem omnia quæ implicata per sese, atque obscura videbantur, tam dilucide, tamque distincte, & quod caput est, tam solide, ut certe a doctissimo viro expectaveram. Quare dignum esse censeo quod publicetur, ut studiosæ juventutis commodo, & utilitati esse possit.

Dabam ex Monasterio S. Mariæ Novæ de Urbe D. ALOYSIUS STAMPA Abbas Olivetanus, Promovendorum ad Episcopatum Examiner, & in Collegio de propaganda Fide Studiorum Præfatus.

INDEX.

METAPHYSICÆ PARS PRIMA.Pag. I

CAP. I. D E principiis Ontologiæ.	3
ART. I. De principio contradictionis.	ib.
CONCL. Principium contradictionis primum cognitionis principium dici potest.	5
ART. II. De principio rationis sufficientis.	II
CONCL. Nihil est in mundo materiali sine ratione sufficiente.	12
CAP. II. De essentia & existentia.	15
ART. I. De notione entis.	ib.
CONCL. Possibilitas rerum absoluta est independens a voluntate divina.	21
ART. II. De identitate & similitudine.	24
ART. III. De ente singulari & universali.	25
CONCL. Principium individuationis est omnimoda determinatio eorum quæ enti actu insunt.	26
ART. IV. De supposito & persona.	28
ART. V. De necessario & contingente.	31
CONCL. Essentiæ rerum & attributa sunt absolute necessaria.	35
CAP. III. De generalibus entis affectionibus.	39
ART. I. De unitate, ubi etiam de quantitate & qualitate.	ib.
ART. II. De ordine, veritate & perfectione.	42
CAP. IV. De variis entium speciebus illorumque mutua relatione.	47
ART. I. De ente composito & simplici.	ib.
ART. II. De ente finito & infinito.	50
ART. III. De causis.	53
METAPHYSICÆ PARS SECUNDA.	61
SECT. I. De mente humana.	62
CAP. I. De mente humana in se spectata.	ib.
ART. I.	

ART. I. De mentis humanæ spiritualitate.	63
CONCL. Mens humana est spiritualis.	64
ART. II. De mentis humanæ immortalitate.	72
CONCL. Mens humana est immortalis.	74
CAP. II. De mente humana in ordine ad corpus.	93
ART. I. Quomodo anima corpori conjungatur.	ib.
CONCL. Ad explicandum commercium mentis cum corpore nulla videtur ratio cur relicta communi sententia de influxu physico, hypotheseſim causarum occasionalium vel harmoniæ præſtabilitæ amplectamur &c.	100
ART. II. De præcipuis ſenſationum legibus & de animæ Sede.	107
CONCL. I. Lex ſenſationum eſt ut producta ab objecto ſenſibili in organo ſenſorio mutatione aliqua, huic in mente reſpondeat ſenſatio &c.	114
CONCL. II. Dum anima ſentit, motus ab objectis ſenſibilibus nervis ſenſoriis impreſſus ad cerebrum uſque propagatur.	117
ART. III. De imaginacione & memoria.	132
CAP. III. De aliis mentis humanæ facultatibus.	142
ART. I. De intellectu & ejus operationibus.	143
ART. II. De voluntate & ejus operationibus.	152
CONCL. I. Anima nihil averſatur niſi ſub ratione mali, nihil appetit niſi ſub ratione boni.	161
CONCL. II. Anima ſeſe ad volendum vel nolendum determinat ſine ratione ſufficiente Leibnitiana.	167
CONCL. III. Humana mens in ſuis volitionibus ac nolitionibus libera eſt.	173
SECT. II. De Deo ſeu Theologia naturali.	181
CAP. I. De Deo in ſe & absolute conſiderato.	182
ART. I.	

(X I I)

ART. I. De existentia Dei.	ib.
CONCL. Existentia Dei demonstratur.	185
ART. II. De divinis attributis.	202
CAP. II. De Deo in ordine ad creaturas.	225
ART. I. De Deo creatore & conservatore.	ib.
CONCL. Creaturæ indigent directâ Dei conser- vatione.	233
ART. II. De Deo primo motore.	237
CONCL. Deus concurrit immediate ad omnes & singulos actus liberos creaturarum.	254
ART. III. De Deo rerum omnium gubernato- re.	264
CONCL. Deus providet rebus omnibus.	ib.
ART. IV. De Deo Domino & ab hominibus colendo.	276
CONCL. Revelationis necessitas demonstratur.	279
APPENDIX. De erroribus Theologiæ naturali adversis.	295

SECUNDA PARS

PHILOSOPHIÆ,

S E U

METAPHYSICA.



Metaphysica definiri potest entis in genere, & Spirituum Scientia. Hinc dividi solet *Metaphysica* in duas partes; quarum prior agit de communibus entium affectionibus, & *Ontologia* dicitur. 2. Vero *pneumatica* vocatur, & ea quæ de Deo, anima, nec non pauca, quæ de Angelis lumine naturæ novimus, complectitur. Utramque partem ita tractabimus, ut nihil quod utile sit prætermittamus, aut si quid prætermitti jubet præscripta brevitas, illa tantum omitemus quæ in Theologia commodius ac uberius explicantur.

METAPHYSICÆ

PARS PRIMA

SIVE ONTOLOGIA

O*ntologia* est Scientia entis in genere, quatenus est ens; dicitur etiam *philosophia prima*, quia prima principia primasque rationes tradit, quæ in ratiocinando usum habent. Quia autem *Ontologia* est Scientia entis in genere, ex Scientiæ definitione patet ea demonstranda esse, quæ in *Ontologia* proponi debent. Sterilis fuit a plerisque Scholasticis usurpata hujus
Jacq. T. II. A Scien-

Scientiæ tractandæ methodus ; etenim ad methodi demonstrativæ formam non satis attendentes confusas tantum obscurasque notiones reliquerunt . At cum in Ontologia demonstrari debeant ea , quæ entibus omnibus sive absolute , sive sub data quadam conditione conveniunt , ad alias Scientias utilissimum esse Ontologiæ studium facile patet . Etenim definitiones , ac propositiones Ontologicæ ad eñia quæcumque in dato quolibet casu transferri possunt , ac proinde si definitiones sint accuratæ & propositiones clare determinatæ , Ontologiæ usus est maximus .

Ontologicis vocabulis sæpe sæpius in communi sermone utimur . V. G. existentie , substantiæ , personæ , æqualitatis , inæqualitatis &c. quibus licet confusam , attamen claram jungimus notionem . Et quidem cum earum definitionem accuratam non possimus asserre , patet vocabulis illis confusas jungi notiones ; quia tamen satis constat quo in casu adhibenda sint , licet nulla definitione utamur , iisdem claras notiones jungamus necesse est . Quare vulgares Ontologicæ notiones confusæ veluti quandam Ontologiæ naturalis speciem constituunt . Quemadmodum ergo Logica artificialis est distincta explicatio Logicæ naturalis , ita explicatio distincta Ontologiæ naturalis dici potest Ontologia artificialis , nempe notiones confusas quæ sunt Ontologiæ naturalis ad distinctas revocat Ontologia artificialis , & propositiones vagas ad determinatas reducit .

CAPUT I.

De principiis Ontologiæ.

ARTICULUS I.

De principio contradictionis.

I. **E**Am experimur mentis nostræ naturam , ut dum judicat aliquid esse , simul judicare nequeat idem non esse. Hinc fit ut naturæ mentis nostræ conscii sine probatione concedamus hanc propositionem terminis generalibus expressam : *Fieri non potest ut idem simul sit & non sit* : Propositio hæc dicitur : *principium contradictionis* : nimirum contradicere sibi metipso dicitur , qui idem simul esse , & non esse pronuntiat . Principium illud Aristoteles , & deinde Scholastici omnes adhibuerunt instar axiomatis maxime generalis . Propositionum contradictoriarum naturam in Logica jam explicavi , quæ ad Metaphysicam pertinent hic adjungam .

II. Ex principio contradictionis hæc alia in scholis vulgatissima axiomata derivantur : *Quodlibet est , vel non est : de eodem secundum idem non possunt verificari simul affirmatio & negatio* : Disputant Scholastici utrum aliquod sit primum cognitionis principium & quodnam illud sit . Quid per primum cognitionis principium intelligent metaphysici , non satis accurate definitum invenio . Primi principii nomine significat Cartesius id primum quod menti occurrit , & primum inter omnia axiomata locum tribuit huic enthymemati : *Ego cogito , ergo sum* : prædictum autem enthymema , tanquam primum principium Cartesio constituere placuit eo , quod nullus dubitare possit se esse , dum cogitat ;

etiamſi cetera omnia falſa eſſe poneret . Cartefiani fere omnes primum cognitionis principium, cum ipſo, quale ab ipſis ſtatuitur, veritatis criterio confundunt, primumque omnium principium eſſe affirmant pro poſitionem hanc : *Quidquid in idea clara rei alicujus comprehenditur, id de ea re poteſt affirmari* . De veritatis criterio jam ſermonem habui in Logica, & quaſtionis ſtatum clare expoſui . S. Thomas Ariſtotelem ſecutus primum principium ſtatuit axioma iſtud : *Impoſſibile eſt idem ſimul eſſe & non eſſe* .

Antequam vero noſtram hac de re ſententiam in ſequenti concluſione aperiamus, obſervandum eſt nullum axioma ratione certitudinis, atque evidentia primū dici poſſe, cum omnes pro poſitiones, quæ axiomatis nomen merentur, & quæ certe ſunt plurimæ, terminis intellectis, ſtatim manifeſtæ eſſe debeant, nulla que probatione indigeant . Neque primus locus tribui poteſt axiomati quod primum menti occurrit ; etenim quodnam ſit axioma illud, nulla ratione poteſt definiri ; imo cum axiomata ſint pro poſitiones univerſales, axiomatibus priores eſſe pro poſitiones ſingulares facile patet ex iis, quæ de univerſalium formatione in Logica explicata fuerunt . Et quidem licet ideas innatas probaverim, res tamen in eo ſenſu intelligi non debet, quo a vulgaribus Cartefianis uſurpatur; idearum innatarum nomine nihil aliud intelligo niſi ideas intellectuales, ex ideis aliis ſingularibus facili ratiocinatione eliciendas, nullam vero pro poſitionem univerſalem ſine aliqua in ideas ſingulares reflexione acquiſitam admitto . Sed de his legantur, quæ dicta ſunt in Logica . Itaque præſens quaſtio intra hos limites reſtringi debet, nempe primi principii nomine intelligimus axioma illud, ad quod tandem reduci poſſunt
Carte-

cætera omnia axiomata, saltem indirecte & per quod possunt probari, si ea ab aliquo pertinaciter negari contigerit. His positis sit

CONCLUSIO.

PRINCIPIUM CONTRADICTIONIS : IMPOSSIBILE EST IDEM SIMUL ESSE, ET NON ESSE : PRIMUM COGNITIONIS PRINCIPIUM DICI POTEST, JUXTA PRÆMISSAM DEFINITIONEM.

Prob. Primum cognitionis principium censi debet axioma ita universale, ut per aliud probari nequeat, per ipsum vero cætera axiomata, si ea negari contigerit, possint demonstrari saltem indirecte; atqui principium contradictionis, has omnes habet conditiones. Ergo.....

Prob. Min. 1. Est axioma, seu propositio Theoretica ex solis terminis manifesta. Cum enim eam esse experiamur mentis nostræ naturam, ut in illius potestate minime sit judicare, quod aliquid sit simul & non sit, principium illud statim ac intelligitur, ab omnibus sine probatione tanquam certissimum admittitur.... 2. Est axioma universalissimum ex notionibus maxime abstractis formatum, quod omnibus convenire potest quæ sunt, vel esse possunt.... 3. Axioma illud per nullum aliud probari potest; nam si negetur, corrumpit omnis humanæ cognitionis certitudo. Et quidem fingamus idem posse esse simul, & non esse. Ergo dum cogitas, seu tui ipsius tibi conscius es, fieri potest ut non cogites, seu tibi conscius non sis tui ipsius. Perit adeo certitudo propositionis, quæ Cartesio de rebus omnibus dubitanti tantæ evidentiae visa est, ut eam omnis evidentiae normam consti-

stituerit. Similiter aliorum quorumlibet axiomatum certitudo tollitur; Si enim concesseris idem posse simul esse & non esse, idem prædicatum eidem subjecto convenire poterit & non convenire, ac proinde omnis propositio vera esse poterit & falsa simul, ideoque incerta, & nullus demonstrationi locus relinquetur; cum demonstratio ex principiis certis fieri debeat; ergo principium contradictionis per nullum aliud axioma demonstrari potest 4. Tandem per idem principium cætera demonstrari possunt axiomata. Si quis enim pertinaciter aliquod axioma negaverit, illud per reductionem ad absurdum ac proinde per nostrum principium demonstratur apogogice. Etenim cum axioma sit propositio ex terminis manifesta, poni non potest subjectum nisi ponatur simul prædicatum; sed qui axioma negat, subjectum ponit, prædicatum vero tollit, ideoque cum sublato prædicato tollatur & subjectum, ponit idem simul esse & non esse; ergo refellitur per principium contradictionis.

Objic. principium contradictionis pendet ab isto alio: *Quodlibet dum est, est*: Ergo non est omnium primum Resp. N. ant. Hoc enim axioma: quodlibet dum est, est: nititur principio contradictionis & ad illud reducitur. Etenim certus esse non possum aliquid esse, nisi certo cognoverim impossibile esse ut idem simul sit & non sit. Et quidem hoc axioma: quodlibet dum est, est: quamvis evidentissimum, per hoc tamen: *impossibile est*: &c. probari posset hoc modo. Si falsum esset axioma illud: quodlibet &c. daretur aliquod ens quod esset simul & non esset, sed impossibile est idem simul esse & non esse, ergo impossibile est ut illud axioma sit falsum: ergo certitudo illius præsupponit certitudinem principii contradictionis.

Inst.

Inst. 1. Hoc axioma: quodlibet dum est, est: est propositio simplex; istud vero: impossibile est idem simul esse & non esse; est propositio composita; sed propositio simplex prior est propositione composita, ergo certitudo hujus axiomatis: quodlibet dum est, est: non deducitur ex certitudine illius: impossibile est &c.

Resp. C. Maj. Dist. Min. propositio simplex prior est composita, quatenus est propositio C. Min. quatenus est principium certitudinis N. Min. Propositio composita majorem aliquando præferat evidentiam quam propositio simplex. Quidquid sit de majori horum axiomatum evidentiâ, in præfenti conclusione nihil aliud volumus nisi propositionem hanc: impossibile est &c. a nulla alia propositione pendere, cæterarum autem propositionum certitudinem pendere a certitudine illius.

Inst. 2. Principium istud: impossibile est &c. est propositio negans; istud vero: quodlibet dum est, est: est propositio affirmans; sed ex propositione negante demonstrari non potest propositio affirmans. Ergo & Resp. Dist. Min. ex propositione negante demonstrari non potest propositio affirmans *directa & ostensiva*. C. Min. *indirecte & apogogice*. N. Min. itaque duplex est demonstrationis genus, aliud directum, aliud indirectum. Demonstratio directa est qua ex no-tione subjecti colligitur prædicatum convenire subjecto. Demonstratio apogogica seu indirecta est qua posita propositione contradictoria tan-quam vera, colligitur quod propositioni veræ contradicit; dicitur quoque reductio ad absur-dum vel ad impossibile. Hoc autem demonstra-tionis genere utimur ad probandam veritatem alicujus propositionis affirmantis per principium i istud: impossibile est &c. De hoc utroque de-monstrationis genere tractavimus in Logica.

8 INSTITUTIONES PHILOS.

Inst. 3. Multa per experientiam certo cognoscimus; sed certitudo eorum quæ per experientiam cognoscimus non pendet ab isto principio: impossibile est &. Ergo Resp. C. Maj. N. Min. Multa quidem per experientiam fieri observamus de quorum veritate nullo modo dubitare possumus; sed hoc certo cognoscimus, quia fieri non potest ut res ita se habeat & simul ita se non habeat. Etenim si fieri possit ut dum rem ita se habere observamus, rem aliter se habere simul observaremus, tum nulla amplius esset certitudo. Unde patet certitudinem eorum quæ per experientiam fieri observamus, innixam esse hoc principio: impossibile est &.

Inst. 4. Istius axiomatis certitudo: *Quidquid in idea clara & distincta alicujus rei continetur, id de ea re certissime potest affirmari*: Non pendet a certitudine illius: impossibile est &. Ergo Resp. N. ant. Etenim ut certi simus de illius veritate, necesse est nos prius cognoscere ideam eandem claram & distinctam non posse esse simul obscuram & confusam; quod quidem esse non potest nisi posita veritate hujus principii: impossibile est &. Quamvis autem non attendamus ad istud principium, illius tamen certitudinem semper præsupponimus. Præterea ut in dato casu adhibeatur principium istud: quidquid in idea &c. necesse est prius efformari notionem rei ad quam principium istud transferre volumus; non possumus autem notionem rei efformare nisi agnoscamus eam esse possibilem seu a contradictione liberam, quod fieri non potest nisi posita veritate principii contradictionis.

Inst. 5. Plures sunt veritates, pluraque axiomata nobis certissime nota, antequam de principio isto universali & maxime abstracto cogitemus,

mus, ergo & . . . Resp. C. Ant. & N. Conf. Non enim contendimus omnem humanam cognitionem ab hoc universali principio incipere, cum e contrario cognitiones nostras a singularibus proficisci jam demonstratum fuerit; hoc unum dicimus, nempe principium contradictionis esse omnium primum eo sensu quod alia omnia axiomata ad illud revocari possint, saltem per demonstrationem indirectam, & quod negato illo principio cætera simul tolli necesse sit.

Quamvis ex hætenus dictis facile intelligi possit quæstionis status, rem tamen a Metaphysicis acrius disputatam in meliori lumine collocare non abs re erit. Itaque principium contradictionis in eo sensu vocari non debet omnium primum, quasi sit omnis cognitionis fons & origo; rectum hujus principii usum explicabo. Ex his quæ dicta sunt in Logica facile patet quatuor distingui posse cognitionum genera. I. Cognitio dicitur *intuitiva* & circa evidentissima axiomata versatur. II. vocatur *demonstrativa*, eaque ratiocinando elicitur ex aliis propositionibus vel evidentibus vel demonstratis. III. dici potest *sensualis* cognitio quæ ex rerum singularium existentia per sensus acquiritur. IV. tandem potest appellari cognitio *testimonialis* quæ factis indubitatis atque authenticis nititur. Porro certissimum est sine principio contradictionis haberi posse prædicta cognitionum genera, hoc est, principium contradictionis non esse necessariam cognitionum illarum originem. Et quidem quod spectat cognitionem intuitivam, nulla probatione indigent axiomata, & qui axioma aliquod pertinaciter negare non dubitat, ipsum quoque contradictionis principium eadem fronte negare audebit. Præterea innumerabiles sunt propositiones sin-

gulares quæ parem cum ipsis universalissimis axiomatibus evidentiae gradum habent. Ita propositio hæc: *Si unitatem ex binario auferas, remanet unitas*: non minus evidens est quam propositio universalissima. *Si ex equalibus, equalia demas, quæ remanent erunt equalia*: Cum igitur cognitio intuitiva ex principio contradictionis necessario non pendeat, evidens est etiam tres alias cognitionis species ex hoc principio non pendere necessario, cum ex aliis principiis æque certis hauriri possint. Ergo, inquiet aliquis, nulla est principii hujus utilitas. En totum hujus principii usum; nempe constituere juvat universalia quædam principia & ab omnibus recepta, ad quæ tandem redigi debent pertinaces veritatis oppugnatores, ita ut nullum ipsis pateat effugium. Hæc principia universalia in rebus theologicis utiliter adhiberi possunt ut obstinati litigiosique homines ad silentium adigantur; nemo tamen dixerit Sacram Theologiam quæ in revelatione tota fundatur ex his principiis pendere iisque innixam esse. Hæc ergo in omnibus disciplinis esse poterit principiorum universalium commoditas, ut nempe pertinaciores viri ad prima principia reducantur & ad veritatem cogantur. Valere etiam potest illorum principiorum usus ad docendam & explicandam disciplinam aliquam. At nullius fere utilitatis esse poterit ad verum inveniendum, quod quidem breviori tutiorque via præstat methodus analytica cujus ope tamquam Sacra clavi intima Scientiarum adyta referarunt atque penetrarunt cultiores Philosophi.

ARTICULUS II.

De principio rationis sufficientis.

I. **P**ER *rationem sufficientem* intelligimus id unde colligitur cur aliquid sit. E. G. ex eo quod triangulum tribus lineis contineatur, intelligere est quod tres habere debeat angulos, ac proinde ternarius laterum numerus in triangulo dicitur ratio sufficientis numeri ternarii angulorum; sufficit enim ut intelligamus cur triangulum habeat tres angulos. Nihilum dicimus cui nulla respondet notio, nisi forte notio fallax quæ eadem est ac nulla.

II. Quoniam fallax & inane est vocabulum cui nulla notio respondet, manifestum est vocabulo inani nihil significari, quia aliquid representare videtur quod revera non representat. Ita sibi videbantur Scholastici aliqui habere notionem vis attracticis magneticæ, de qua tamen nihil noverant, cum vis attractrix nihil revera significaret, & causam tantum mentiretur. Quia vero arbitraria est nominum impositio, causa attractionis magneticæ vis attractrix dici potest; verum quoad causam nullam habes notionem eamque tibi nosse videris, & eam vim attractricem appellas, nihil profecto causæ cognoscis, etsi detur fortasse quædam causa vis attractricis nomine appellanda. Hinc patet cur ex notionibus fallacibus ratio cinantes, nullam eorum quæ sunt, rationem reddant, quamvis eam reddere sibi videantur; notiones enim fallaces representant nihil tamquam aliquid. Hoc vitio non solum aliquando laborat vetus Philosophia scholastica; verum etiam recentiores Philosophi non pauci inanibus vocabulis sibi metipsis fucum faciunt.

Hinc intelligitur vulgare scholarum axioma : *Nihil nulla sunt predicata, vel nulla sunt proprietates*. Si enim de nihilo aliquid prædicari posset, notio aliqua nihilo responderet, ac proinde esset aliquid quod est absurdum. His positis sit

C O N C L U S I O.

NIHIL EST IN MUNDO MATERIALI SINE RATIONE SUFFICIENTE CUR POTIUS SIT, QUAM NON SIT ; ID EST, SI ALIQUID ESSE PONITUR, PONENDUM EST ETIAM ALIQUID CUR POTIUS SIT QUAM NON SIT.

Prob. 1. Si aliquid esse ponitur sine ratione sufficiente cur potius sit quam non sit, nihil est unde intelligitur cur aliquid sit, ergo ideo admittitur aliquid esse quia ipsum nihil esse ponitur, quod est absurdum. E. G. ponamus lapidem qui erat frigidus, factum fuisse calidum; aut datur aliqua ratio per quam intelligi potest cur lapis nunc potius sit calidus quam frigidus, aut nulla datur. Si nulla datur huiusmodi ratio, nihil ponitur in lapide nec extra eandem ad quod actus caloris referri possit, ac proinde admittendum erit vel nihilum in lapide abiisse in calorem, vel nihilum extra lapidem calorem produxisse; quis vero non ultrò largietur hæc esse absurda? Patet autem exemplum illud generaliter accipi posse, cum de ente quocumque eadem ratiocinatio institui possit. Et certe principium rationis sufficientis reipsa omnes ultrò concedere videntur, cum in omni casu nihil admittamus sine ratione sufficiente; in omni scilicet casu prout sumus ad interrogandum cur hoc sit vel non sit. Id.

ani.

animadvertere licet in ipsis etiam pueris, statim ac in iis sese exerit aliquis rationis usus. Hinc naturæ mentis nostræ quasi repugnare videtur ut admittamus sine ratione sufficiente aliquid esse posse.

Objic. Illud admittendum non est quod experientiz contrarium deprehenditur, atqui experientiz contrarium deprehenditur nihil esse sine ratione sufficiente. Ergo &c. Prob. Min. Sit libra lancibus appensis in æquilibrio constituta, deponantur in utraque lance pondera æqualia, æquilibrio non tolli experientia demonstrat; istud autem æquilibrio est sine ratione sufficiente; etenim ideo non tollitur æquilibrio, quia nulla est ratio sufficiens cur tollatur; Si enim esset aliqua ratio, tolleretur; ergo istud æquilibrio est sine ratione sufficiente. Resp. N. min. Etenim si sumatur aliquod phænomenum atque inquiratur ratio sufficiens cur sit, aut rationem illam deprehendamus, aut saltem demonstrare nunquam poterimus nullam adesse: Si autem exemplum nullum afferri possit in quo nullam rationem adesse demonstretur, affirmari non potest principium rationis sufficientis experientiz repugnare. At nemo eorum qui istud rationis sufficientis principium impugnarunt, vel unicum afferre potuit exemplum quod sufficienti ratione destitutum demonstrare valuerit. Et quidem quod spectat exemplum in minoris probatione allatum: in statera habetur æquilibrio quoties distantiz sunt æquales & pondera æqualia, ut demonstratur in Mechanica; ex hac ratione sufficiente intelligitur cur æquilibrio potius sit quam non sit. Licet autem hanc notionem æquilibrii aliquis non noverit, ac proinde & rationem sufficientem afferre non possit, non inde tamen

sequeretur hanc non existere. Quare ut aliquid probetur esse sine ratione sufficiente, ratione aliqua, vel exemplo aliquo ostendi debet nullam esse posse rationem sufficientem; quod quidem nulla ratione, nullo exemplo potest demonstrari.

Inst. Si nihil esset sine ratione sufficiente in mundo materiali, res materiales existerent necessario, falsum consequens, ergo, & ant. *Resp.* N. seq. maj. Etenim res illæ tantum sunt necessariæ quarum ratio sufficiens cur existant in ipsarummet rerum essentia continetur, ut ostendimus deinceps; ratio autem sufficiens cur res materiales existant, non continetur in ipsa rerum essentia, sed tantum in voluntate Divina beneficio cuius existunt, ac proinde non existunt necessario. In hac objectionem de rerum materialium existentia duntaxat sermo est. Quod autem spectat sufficientis rationis principium in actionibus liberis, gravissimam hanc, atque difficillimam quæstionem, deinde examinabimus, postquam scilicet explicata fuerint plurima, quæ ad naturam animæ, illiusque libertatem pertinent. Quare hæc pauca dixisse satis sit, eandem quæstionem opportunitate loco, data deinde occasione, revocabimus.

Cæterum ex dictis patet rationis sufficientis principium confundi non debere cum antiquo Scholasticorum axioma: *Nihil est sine causa*: ita Deus necessario existens nullam habere potest existentia: suæ causam, habet tamen sufficientem existentia: necessaria: rationem, quæ in immensa ejus essentia continetur. Scholastici ad explicandos naturæ effectus plurimos qualitates occultas fingebant, ac proinde causam aliquam adittebant; verum quia nullam causarum rationem reddere poterant, sine ratione sufficiente inexplicabiles causas illas

ad

admiserunt. Sub causæ nomine notum fuit Cartesio rationis sufficientis principium : ita enim in meditationibus de Deo ratiocinatur : *Nulla res existit de qua non possit queri quanam sit causa cur existat . Hoc enim de ipso Deo queri potest, non quod indigeat ulla causa ut existat , sed quia ipsa ejus naturæ immensitas est causa propter quam nulla causa indiget ad existendum : Nullum dubium est quin causæ nomine rationem sufficientem in hoc loco significare voluerit Cartesius.*

C A P U T I I.

De essentia, & existentia entis.

A R T I C U L U S I.

De Notione entis.

ENS dicitur id omne quod existere potest , seu cui existentia non repugnat . Ita arbor in horto efflorescens , sicut & arbor in semine delitescens est *ens* . Hinc quod possibile est , *ens* dici potest ; quod autem impossibile est , *ens* esse nequit ; Itaque notio entis in genere existentiam minime involvit , sed saltem non repugnantiam ad existendum , seu quod perinde est , existendi possibilitatem . *Ens fictum* appellatur id cui existentiam non repugnare ponimus , quamvis revera repugnat , idque fit ex eo quod non advertamus contradictionem in fallace & deteprice notione latentem . Quoniam enim imaginationis vi fingi quædam possunt ; ideo ea sibi invicem minime repugnare nobis videntur , etsi fieri nequaquam possit ut extra imaginationem existant . E. G. Trunco corporis humani jungi-

mus

mus caput bovinum & pedes equinos . Nemo tamen sibi facile persuadebit fieri posse ut istius modi homo existat . Quoniam tamen impossibilitas demonstrari non potest , existentia eadem non repugnare sumitur , atque ideo in entium numerum refertur ; sed cum id perperam fiat , ens fictum appellatur . *Ens imaginarium* illud est quod notione imaginaria exhibetur . Notionem imaginariam eam dicimus , qua , ob quandam similitudinem fingitur quod non est , ut per imaginem quandam veluti præsens oculis sistere valeamus quod in eos non incurrit . Ita in Geometria lineæ rectæ notio imaginaria est , si eam imaginemur tanquam filum subtilissimum ab uno termino ad alterum usque extensum ; Quare differunt entia ficta ab imaginariis . Etenim entibus fictis existentia repugnat , enti autem imaginario non tribuuntur nisi ea quæ enti vero competunt illiusque vices gerunt . Ita in notione imaginariæ exemplo præcedenti , lineæ rectæ possibilitatem concipimus , cum filum quodcumque extendi posse liqueat ; modum metiendi rectam intelligimus , eam in partes æquales & inæquales dividendi possibilitatem , & quæ sunt huiusmodi alia advertimus . Si ergo caveamus de linea recta non nisi ea prædicari posse quæ ad fili longitudinem pertinent , non modo omnem erroris occasionem declinamus , sed etiam longitudini absque latitudine concipiendæ assuescimus , & a notione imaginaria ad realem deducimur .

II. Si ens aliquod concipere volumus , in eo primum considerari debent attributa essentialia inter quæ unum investigari debet , quod primum in ipso ente concipitur . Illud autem primum attributum essentiam appellamus . Cum itaque nihil essentia prius in ente

ente concipiatur, ens per essentiam possibile est, ac proinde essentia entis possibilitatem ejus intrinsecam continet, & ideo essentiam entis intelligit qui possibilitatem ejus intrinsecam agnoscit. Cavendum est autem ne credamus essentiam entis agnoscere, dum idem possibile esse agnoscimus; id enim manifeste absurdum est, cum ens quodlibet sensus obvium a posteriori possibile agnoscamus, etsi essentiam ejus ignoremus. Etenim is tantum entis possibilitatem intrinsecam agnoscit qui a priori demonstrare potest ens esse intrinsece possibile. Ita essentiam trianguli æquilateri tenet qui non solum novit triangulum æquilaterum tribus lateribus inter se æqualibus terminari, sed & vi constructionis intelligit, non repugnare ut tres lineæ rectæ inter se æquales jungantur & spatium comprehendant. Hinc possibilitatem intrinsecam entis ac proinde essentiam intelligimus, dum intelligimus modum quo ens fieri potest.

III. Cur essentia ipsi enti insit, ratio intrinseca nulla datur; est enim primum quod in ente ponitur, ideoque nihil prius concipi potest ex quo intelligatur cur essentia ipsi enti insit. Sic nulla datur ratio intrinseca cur triangulum æquilaterum tria habeat latera æqualia; cur insint attributa propria quæ nempe dato enti unice competunt, ratio sufficiens in essentia continetur; cur insint attributa communia quæ scilicet aliis entibus conveniunt, ratio sufficiens continetur in aliis quibusdam attributis communibus; similiter cur modi inesse possint ratio sufficiens in attributis continetur, cur autem actu insint ratio sufficiens continetur vel in aliis modis, vel in aliis entibus, aut etiam in entibus & modis simul. **Exemplo** totam rem illustrabimus. Ra-
tio

ratio sufficiens æqualitatis angulorum in triangulo æquilatelo est laterum æqualitas; ex hac enim sola demonstrari potest angulos in triangulo æquilatelo æquales esse debere. Porro laterum æqualitas ad essentiam trianguli æquilateri pertinet, angulorum vero æqualitas ad attributa. Ternarius laterum numerus est attributum triangulis omnibus commune; in hoc autem communi attributo continentur attributa alia triangulis omnibus communia. Si ignota sit lapidis essentia, non patet ratio cur calidus fieri possit; ostendunt autem physici ex lapidis attributis calidum fieri posse. Cur autem calor actu insit, ratio in ente alio continetur, veluti in sole cujus radiis expositus fuit. Afferri etiam possent exempla plurima in quibus ratio sufficiens cur modus aliquis insit, continetur in pluribus modis vel pluribus entibus, aut partim in entibus, partim in modis. Hujus generis exempla suppeditant motorum causæ quæ non solum extrinsecæ sunt, sed intrinsecæ quoque corporis dispositiones supponunt.

IV. In essentia entis continetur ratio eorum quæ enti insunt vel inesse possunt. Unde essentia à cæteris quæ enti insunt, probe distinguenda debet; Ipsa enim nullam rationem intrinsecam habet cur enti conveniat; cætera vero quæ insunt aut inesse possunt in essentia, rationem habent. Essentia igitur definiri potest id quod primum de ente concipitur, & in quo continetur ratio sufficiens cur cætera, vel actu insint vel inesse possint, & hæc essentia notio est notioni Philosophorum conformis. Etenim Franciscus Suarez e Societate Jesu Tom. II. Dist. 2. Sect. 4. *essentiam rei id esse dicit quod est primum ac radicale, & intimum principium omnium actionum, & proprietatum quæ rei*

rei conveniunt; & paulo post addit; *Essentiam*
realem esse quæ in sese nullam involvit repu-
gnantiam, neque est mere conficta per intello-
ctum, vel etiam quod sit principium vel radix
realium operationum vel effectuum. Similiter
 Cartesius in principiis philosophiæ part. I. Una,
 inquit, est cujusque substantiæ proprietas, quæ
 ipsius naturam essentiamque constituit, & ad
 quam aliæ omnes referuntur. Cartesii interpres
 Claubergius in *Metaphysica de ente, essentia*
notionem ita explicat: Ex omnibus quæ rei
alicui tribuuntur, unum solemus considerare tan-
quam primum, præcipuum, & intimum rei,
quod reliqua quodam modo complectitur; &
certe eorum omnium quasi radix, & fundamen-
tum est. Hoc ipsum vocamus essentiam rei, &
cum respectu ad proprietates, & operationes in-
de promanantes etiam naturam dicimus. Notio-
 nem naturæ nos suo loco dabimus distinctam;
 ejusque ab essentia differentiam explicabimus;
 cæterum patet allatæ essentiæ definitiones so-
 lis verbis non reipsa differre. Hæc autem om-
 nia conferri debent cum iis quæ de essentia
 demonstravimus in *Logica, art. 2. de materiali*
idearum differentia.

V. *Quod existit id est possibile, principium*
illud Scholasticorum verbis enuntiabimus: Ab
esse ad posse valet consequentia, seu quod
perinde est: Ab existentia ad possibilitatem va-
let consequentia. Sed non viceversa: a posse ad
 esse valet consequentia. Ita Artifex animo
 concipit ideam machinæ, & clare perspicit
 machinam possibilem esse, nec tamen ideo
 machina istius modi existit. Quare patet pos-
 sibilitatem non esse rationem sufficientem exi-
 stentiæ, ac proinde ex eo quod aliquid possibile
 sit a priori, non tamen intelligitur cur existat.

VI. *Existencia definiri potest complementum*
possi.

possibilitatis, dicitur etiam *actualitas*, & ens quod existit: *ens actuale*, vel etiam: *ens actu*: quod vero sufficientem existentiae suae rationem in aliis entibus habere potest, *ens potentiale*, seu *ens in potentia* appellamus. Ita accor in semine delitescens quatenus per entia alia existentia, nempe solum fertile, pluviam, rorem, calorem solis ad actum deduci potest, est *ens potentiale*. Si ens *potentiale* rationem sufficientem existentiae suae habet in entibus actualibus, dicitur: *ens in potentia proxima*: Si autem entia illa nondum existunt, seu non sunt actualia, dicitur, *ens in potentia remota*.

VII. Hic quæri potest an ideo ens sit possibile, quia Deus voluit illud esse possibile. Cartesiani contendunt possibilitatem rerum ita a Deo pendere ut nihil sit possibile nisi quidquid voluit Deus esse possibile, ac proinde nihil tam impossibile excogitari posse a nobis quod non evadat possibile, si Deus voluerit; sicque evadet possibile ut totum non sit majus sua parte. Porro duplex distinguitur rerum possibilitas, *extrinseca* scilicet seu *respectiva*, & *intrinseca*, seu *absoluta*, aut *primaria*. Intrinseca possibilitas est illa qua ens in se consideratum nullam contradictionem involvit; extrinseca autem possibilitas est illa qua ens consideratur sub eo respectu quo, existentiam ab aliqua causa accipere potest. Porro ut aliquid quod est intrinsece possibile, existentiam accipiat, illud pendet a voluntate Divina; contra vero ut illud in se contradictionem non involvat, nullo modo a Dei voluntate pendet. Unde sit

CON-

CONCLUSIO.

POSSIBILITAS RERUM ABSOLUTA ET PRIMARIA, EST INDEPENDENS A VOLUNTATE DIVINA.

Prob. 1. Si possibilitas rerum absoluta penderet a voluntate Divina, ab ea penderet utique, quia Deus potuit velle ut sibi mutuo non repugnent quæ sibi invicem repugnassent, si aliter Deo visum fuisset, sed falsum posterius, ergo verum prius... Prob. min. Si Deus potuisset velle ut res quæ sibi mutuo non repugnant, sibi mutuo repugnarent, res eadem in se spectatæ possent repugnare, & non repugnare, ac proinde possibile esset idem simul esse, & non esse, quod quidem absurdum esse nemo diffiteri potest.

Prob. 2. Si possibilitas rerum absoluta penderet a voluntate Dei, rerum possibilium ideæ potuissent esse in mente Divina ideæ rerum impossibilem, ergo essent mutabiles ideæ quæ sunt in mente Divina, ac proinde non essent necessariae; ergo non essent essentielles Deo, ideoque Deus posset concipi sine ideis rerum possibilium, sed si Deus concipi possit sine ideis rerum possibilium, possibile est ut Deus sit aliquando sine cognitione rerum possibilium, quod repugnat.

Prob. 3. Si possibilitas absoluta rerum penderet a voluntate divina, Deus posset velle quod est impossibile. Porro Deus non potest velle id quod contradictionem involvit; alioquin vellet idem simul esse & non esse, ideoque vellet & nollit simul. Et certe si Deus vellet id quod contradictionem involvit, vellet id cui nulla notio respondere potest, sed id cui nulla
notio

notio respondere potest est nihilum, ergo Deus vellet nihilum, ergo nihilum esset objectum voluntatis divinæ, sed voluntas Dei semper fertur in aliquid reale, ergo nihilum non potest esse objectum illius voluntatis; ergo Deus non potest velle id quod contradictionem involvit, ergo possibilitas rerum absoluta non pendet a voluntate divina.

Objic. Si possibilitas absoluta rerum non penderet a voluntate Divina, minueretur Dei Omnipotentia, ergo &c. Ref. N. seq. ant. Etenim ad omnipotentiam Dei non pertinet ut possit facere ea quæ repugnant, sed tantum ut possit facere quæ non repugnant. Unde non minuitur ejus omnipotentia ex eo quod E. G. non possit facere ut præterita non sint præterita. Imo si possibilitas rerum absoluta penderet a voluntate Divina, ejus omnipotentia non nisi per *circulum* definiri posset, eam scilicet definiendo id per quod Deus facere potest quæcumque facere potest, cum e contra recte definiatur id per quod Deus facere potest quæ non repugnant.

Inst. 1. Nihil potest admitti immutabile, & æternum præter Deum, sed si possibilitas rerum absoluta non penderet a voluntate Divina, admitteretur aliquid immutabile, ergo &c. Resp. N. min. Etenim possibilitas rerum non existit seorsim a Deo, sed tantum in intellectu divino. Unde intellectus Divinus est fons omnis possibilitatis, ita ut si nullus esset Deus, nec quidquam aliud ne intrinsece quidem possibile foret. Etenim res ideo possibles sunt quod impossibile sit ut intellectus Divinus contradictoria sibi repræsentet; ac proinde aliquid est possibile quia ejus idea in intellectu divino datur, & sic pendet possibilitas rerum ab intellectu divino, non vero ab ipsius voluntate; quamvis ergo possibilitas rerum sit immutabilis & æterna.

na, attamen nihil Deo coæternum, & præter
eum immutabile admittitur: Etenim quæ in
intellectu Dei sunt, & ad intellectum ejus per-
tinent, non sunt aliquid quidpiam præter Deum,
sicut ex eo quod ideæ rerum sint immutabiles,
non tamen inde sequitur res ipsas esse immuta-
biles, cum in ideis immutabilibus res ipsæ tan-
quam mutabiles repræsententur.

Inst. 2. Vel possibilitas absoluta rerum pen-
det a voluntate Divina, vel voluntas Divina
pendet ab illa possibilitate, falsum posterius,
ergo verum prius.... Resp. possibilitas absoluta
rerum non pendet a voluntate Divina, sed tan-
tum ab intellectu Divino; quia res ideo sunt
possibiles quod rerum ideæ in intellectu Divi-
no existant; Deus autem quidpiam velle ne-
quit, nisi prius illius ideam in mente conce-
perit, & sic voluntas Dei pendet quodam mo-
do ab ipsius intellectu secundum nostrum con-
cipiendi modum.

Inst. 3. Quod res sit possibilis, id habet a vo-
luntate Dei, ergo possibilitas rerum pendet a
Dei voluntate.....; Resp. Dist. ant. Quod res
sit possibilis, extrinsece id habet a voluntate Di-
vina C. Ant. quod sit possibilis intrinsece N.
A., & pariter distingo consequens. Res igitur
vel concipitur ut creatura, & sic est possi-
bilis extrinsece, pendetque a voluntate Divina
ad recipiendam existentiam; vel consideratur in
ratione entis quod nullam contractionem invol-
vit, & tunc nullo modo pendet a voluntate Di-
vina, licet pendeat ab ejus intellectu.

Inst. 4. Hæc non repugnantia est aliqua per-
fectio, ergo pendet a voluntate Divina... Resp.
dist. Ant. hæc non repugnantia est aliqua per-
fectio non existens nisi in intellectu Divino C.
existens seorsim ab intellectu divino N. Ant.,
& pariter dist. conf. ergo pendet a voluntate

L:-

Divina ut existat seorsim ab intellectu Divino
& a parte rei C. Conf. ut existat in intellectu
Divino N. conf.

ARTICULUS II.

De identitate, & similitudine.

I. **P**ER affectiones entis intelligimus quævis ipsius prædicata, quorum ratio, vel in essentia sola, vel etiam in aliis ab essentia diversis continetur, sive ea intrinseca fuerint, sive extrinseca. Latius itaque patet affectionis quam attributorum & modorum simul sumptorum nomen; cum sub isto nomine comprehendantur etiam prædicata extrinseca quæ relationem quandam entis unius ad alterum involvant, veluti cum unum altero majus, vel minus dicitur.

II. *Eadem* dicuntur quæ sibi invicem substitui possunt, salvo quocumque prædicato, facta nimirum substitutione perinde est ac si nulla facta fuisset; ita ponamus pondus A. cum pondere C. in æquilibrio constitui; Si pondus C. substituas pro pondere A. nec æquilibrio cum pondere C. tollatur, erit pondus C. idem cum pondere A. *Idem numero* dicitur quod de se ipso affirmari potest in singulari. E. G. ponamus homini alicui esse nomen Joannis, Jacobi &c. evidens est in hoc casu Jacobum prædicari posse de Joanne, & vicissim; igitur Joannes idem est numero cum Jacobo. *Diversa* autem dicuntur quæ sibi invicem substitui nequeunt salvo omni prædicato; verum *numero diversa* sunt quorum unum de altero in singulari affirmari nequit.

III. *Similia* dicuntur in quibus eadem sunt per quæ a se invicem discerni debent, ita ut *similitudo* sit identitas eorum per quæ entia a se invi-

invicem discerni debebant. Entibus autem a se invicem discernendis destinantur intrinseca quæ sine alio extra ipsa entia assumpto intelligi possunt; alioqui nec differentia alteri explicari, nec ens obvium a nobis agnosci poterit, nisi detur illud extrinsecum sine quo intelligi nequit; ita figuræ rectilinéæ præter angulos & rectas ex quibus perimeter constat, nihil continent; quamobrem si æquales fuerint anguli, & si latera eandem in pluribus figuris relationem habuerint, figuræ rectilinéæ similes sunt. E G. Si in charta delineentur ædificia duo prorsus similia quorum partes singulæ eandem inter se proportionem habeant, a se invicem discerni non poterunt ædificia illa nisi adhibeatur mensura extrinseca quæ diversarum partium longitudinem exhibeat. Ex his autem contraria ratione intelligitur ea *diffimilia* esse in quibus diversa sunt per quæ a se invicem discerni debent, ac proinde *diffimilitudo* est diversitas eorum per quæ entia a se invicem discerni debent.

ARTICULUS III.

De ente singulari, & universali.

I. **E**NS *omnimode determinatum* dicitur in quo data sunt seu determinata ea omnia, quibus determinatis ponitur individuum. Ita descripto triangulo determinatur numerus angulorum, species, & magnitudo linearum, nec non relatio earundem. Si ergo triangulum sub hoc tantum respectu consideres, nihil in eo concipis quod non sit omnimode determinatum. Ex hac definitione liquet quidquid existit esse omnimode determinatum. Quare cum entia singularia existant, evidens est ens singulare seu individuum esse illud quod omnimode determi-

Jacq. T. II.

B

na-

natum est ; contra vero ens *universale* est quod omnimode determinatum non est, seu quod tantummodo continet determinationes intrinsecas pluribus singularibus communes, exclusis iis quæ in individuis diversa sunt.

II. Per *principium individuationis* intelligitur ratio sufficiens intrinseca individui. Scholasticis idem venit nomine *hæccitatis*. Itaque per principium individuationis intelligitur cur ens aliquod sit singulare, seu ratio sufficiens intrinseca individui. Inter Scholasticos agitari solet quæstio quodnam sit principium individuationis, seu cur Petrus sit a Paulo numero distinctus. Observandum est hic quæstionem non esse quænam sit causa effectrix quæ individuum producit, neque etiam quid sit illud per quod individuum V. G. Petrum distinguimus ab alio individuo V. G. Paulo, sed tantum quæritur unde fit, ut ens tale sit tale ens non aliud, seu cur sit singulare, ut diximus. Unde sit

CONCLUSIO,

PRINCIPIUM INDIVIDUATIONIS EST OMNIMODA DETERMINATIO EORUM QUÆ ENTI ACTU INSUNT.

Prob. Quidquid existit singulare est, seu individuum, sed quidquid existit est omnimode determinatum; ergo quodlibet individuum est omnimode determinatum; sed ex eo quod individuum sit omnimode determinatum intelligitur cur sit individuum; ergo omnimoda determinatio eorum quæ enti actu insunt, est principium individuationis. Et certe individuationis principium debet esse simile illi per quod formantur genera & species, sed genera & species formantur per determinationem; etenim
gene-

genera & species determinantur per attributa speciebus & individuis communia. Nempe species prodit per novam determinationem quæ generi accedit, ita quoque prodit individuum per determinationem eorum quæ in notione speciei non determinantur, ita ut nihil omnino indeterminatum supersit. Si enim aliquid remaneret indeterminatum, species data ad quam refertur individuum, non foret intima, sed intermedia, quod est absurdum. Ergo principium individuationis est omnimoda determinatio eorum quæ enti actu insunt.

Obic. Illud est principium individuationis quod constituit individuum, sed materia constituit individuum, ergo materia est principium individuationis.

Resp. Dist. min. Materia omnimode determinata C. M. Non omnimode determinata. N Min. Equidem materia concurrit ad formando individuum, sed illud non efficit nisi quatenus est omnimode determinata. Idem dici potest de forma.

Inst. I. Materia concipitur ut indeterminata priusquam concipiatur ut determinata, ergo materia omnimode determinata non est principium individuationis.

Resp. Dist. ant. prius materia universaliter accepta concipitur ut indeterminata quam ut determinata. C. A. materia pro ut contracta est in individuo N. A. distinctio patet. Præterea jam antea monuimus per principium individuationis non intelligi id quod primum concipitur in individuo.

Inst. 2. Individuum non potest constitui per accidentia, sed determinatio materiæ est aliquid accidentaliter adveniens materiæ, ergo &c. Resp. Dist. min. Determinatio illa materiæ est quid accidentaliter adveniens materiæ

riæ generatim sumptæ C M. in hoc individuo spectatæ N. Min.

Inst. 3. Existentia materiæ efficit rem singularem & omnimode determinatam, ergo existentia materiæ constituit individuum
 Resp. dist. Ant. existentia materiæ omnimode determinatæ efficit &c. C. A. non omnimode determinatæ N. A. Hinc concipimus V. G. Antichristum tanquam individuum, licet non existat; unde existentia non constituit Antichristum ut individuum, sed ideo concipimus eum ut individuum, quia in eo omnia jam determinata concipimus, & inde exurgit notio individui.

ARTICULUS IV.

De supposito, & persona.

I. **S**ubstantia definitur id quod per se subsistit, nec indiget alio cui inhaereat ut existat. *Suppositum* autem definitur substantia singularis ultimo completa sui juris. Hinc colligitur 1. Suppositum esse substantiam, non modum. 2. Esse substantiam singularem non universalem. 3. Esse substantiam singularem quæ sit principium totale & integrum suarum affectionum, aut operationum, si quas habeat; ita suppositum est *canis*, aut quodvis aliud animal, quod neque est pars alterius animalis neque illi inhaeret. Suppositum dici nequit caput aut crus, quod a toto Cane pendeant in suis operationibus.

II. *Suppositivitas* seu id quo fit ut aliquid suppositum vocetur, dicitur etiam vulgo *subsistentia*, & supposita subsistere affirmantur; contra autem entia incompleta quæ supposita non sunt, subsistentia propria prædita esse negantur; ita caput, pes animalis in se non subsistunt.

stunt sed in animali, quod propria præditum est subsistentia.

III. Alia sunt supposita rationabilia, alia irrationabilia. Suppositum rationabile dicitur *persona*, ita dicimus personas divinas, Angelicas, humanas, non vero personas equinas, Leoninas, sed supposita Equina, Leonina. Persona igitur definitur suppositum intelligens, seu ratione præditum, & suppositum est substantia singularis quæcumque a quacumque alia divisa & separata, nullique alteri addita. Sic gutta aquæ quandiu ab aliis aquæ partibus divisa manet, est suppositum; Est enim totum quoddam ipsique soli tribuuntur omnes effectus qui ab ea pendent, & omnes passionibus quibus afficitur. Si autem eadem gutta ad aliam accedat, ex utraque gutta exurgit novum suppositum.

IV. Subsistentia non tollitur qualibet unione, sed ea solum quæ impedit ne substantia singularis sit principium totale & integrum suarum actionum, vel passionum. Triplex unio esse potest, scilicet vel cum substantia ignobiliore, vel cum substantia æqualis perfectionis, vel cum substantia nobiliori. 1. Si suppositum conjungatur cum nobiliori ita ut in suis operationibus a nobiliori pendeat, suppositum ignobilius definit esse suppositum, quia non terminatur a se, & in se; subjacet nempe alteri, & non est amplius principium totale & integrum suarum operationum. Unde natura humana in Christo non est suppositum seu persona, quia in suis operationibus pendet a divinitate tanquam a principio totali suarum operationum, quidquid enim agit humanitas in Christo, id agit & divinitas, unde Christi operationes dicuntur *theandricæ*, hoc est *divino humane*....

2. Si in illa unione nobilioris substantiæ cum ignobiliore, nobilior pendeat in suis operationibus

bus ab imperfectiori, ut anima hominis a corpore, substantia perfectior non est suppositum; sed suppositum est compositum ex duabus substantiis quarum utraque ab altera pendet, ut Petrus. Sed si nobilior substantia unita cum ignobiliore non pendeat in suis operationibus a substantia minus perfecta, quamvis hæc ab illa pendeat, hoc ipso sola nobilior erit suppositum. Quare natura divina in Christo eo ipso quod a natura humana non pendeat, habet rationem suppositi, seu personæ, non autem natura humana propter contrariam rationem, quia natura humana non habet partem in operationibus mere Divinis verbi sibi uniti; hinc duæ sunt naturæ in Christo, humana scilicet, & divina, sed unica persona, nempe persona divina

3. Si substantia uniatur alteri æqualis perfectionis ita ut a se invicem pendeant, utraque rationem suppositi amittit, quia non habent amplius ambæ rationem totius, sed sunt partes totius alicujus suppositi ex totali earum unione exurgentis, sic ex duabus aquæ guttis, ut dixi, fit unicum totale suppositum.

V. Dissident Metaphisici de natura substantiæ; verum quidquid dicant, observare satis erit substantiam non esse concipiendam tanquam entitatem aliquam vel semisubstantiolam substantiæ singulari superadditam. Certum tamen est, substantiam a substantia saltem per mentem distingui cum *fundamento in re*, ut patet ex utriusque definitionis collatione. Cæterum illæ omnes definitiones in Theologia utilitatis sunt maximæ, ex vocabulorum illorum confusione natæ sunt primis Ecclesiæ sæculis perniciosissimæ & subtilissimæ hæreses.

ARTICULUS V.

De necessario, & contingente.

I. **D**efectus alicujus realitatis quæ esse poterat vel quam existere per se non repugnat, *privatio* dici solet. Quoniam autem defectus istiusmodi actu datur, ideo per modum entis consideratur, & dicitur *ens privativum*. E. G. Visus est realitas quæ homini & animalibus convenit; fieri autem potest ut homo atque animal visu priventur; quare defectus visus appellatur *cæcitas*, & *cæcitas ens privativum* dicitur. Similiter homo vivit, sed idem quoque vita orbari potest, id est mori; mors itaque est privatio vitæ & ens privativum dicitur. Contra verò ens *positivum* dicitur quod est aliquid; ita visus est ens positivum. Quia autem ens positivum & privativum simul esse non possunt, ideo dicuntur privative opposita.

II. *Necessarium* dicitur id cujus oppositum impossibile est, seu contradictionem involvit; Si in re quadam loco unius substitui possit aliud quidpiam, vel si possit iis quæ insunt, aliquid aliud quod non inerat accedere, cæteris quæ in eadem re sunt iisdem manentibus; tum res ipsa, tum illud cujus loco aliud substitui potest, dicitur *mutabile*. Hinc liquet quandonam aliquid actu mutetur; nempe dum non amplius manet idem, vel si sit quod ante non erat, vel si non sit quod ante erat, vel si sit aliud quam ante erat. Viceversa si in re quadam nihil sit cui aliud substitui possit, cæteris iisdem manentibus, nec etiam aliquid accedere queat, erit etiam ea res atque etiam illud cui nihil aliud in eadem re substitui potest, *immutabile*.

III. Quod necessarium est, illud est immu-

tabile. Etenim si attributum aliquod necessario inest subjecto, nihil in locum attributi substituere licet, cæteris iisdem manentibus, ac proinde attributum est immutabile, ideoque & subjectum respectu attributi immutabile est. Viceversa quod immutabile est, illud est necessarium. Etenim ponamus attributum quod inest subjecto, esse immutabile, ergo pro attributo substitui non potest aliquid aliud, salvo manente subjecto, ac proinde attributum necessarium est. Igitur necessitas & immutabilitas ita arcto vinculo cohærent ut sublata una tollatur & altera, posita vero una ponatur & altera. Unde ex immutabilitate concluditur necessitas tanquam ex definitione definitum.

I V. *Contingens* est cujus oppositum nullam contradictionem involvit, seu quod necessarium non est. Ita calor lapidis contingens est, calor enim abesse potest. Hinc patet esse mutabile quidquid contingens est, & viceversa esse contingens quidquid est mutabile.

V. *Res in se aut absolute* spectari dicitur, si non attendamus, nisi ad ejus essentiam. *Sub data autem conditione*, aut *in hypothesis* spectari dicitur, ubi præter essentiam præsupponuntur determinationes aliæ, quæ posita essentia, nondum ponuntur. Hinc quod in se spectatum necessarium est, dicitur *absolute necessarium*; quod vero necessarium non est nisi in hypothesis data seu sub data quadam conditione, dicitur *hypothetice necessarium*. Ad necessitatem contingentem revocatur necessitas, quæ *moralis* dici solet; id nempe *moraliter necessarium* dicitur, cujus contrarium non sine maxima difficultate, & vix unquam contingere potest; frequentius moraliter necessarium vocatur cujus contrarium ab homine sana mente prædico fieri non potest; talis est necessitas, qua homo sui compos inter

ve-

venenum & cibum salubrem libere eligens, illud rejicit, hunc sumit; si enim aliter ageret, non esset sana mente præditus.

VI. Quod absolute necessarium est, contingens esse nequit, cum ejus oppositum in se spectatum sit constanter impossibile. Contra autem, quod hypothetice necessarium est, in se contingens est; etenim ejus oppositum nonnisi in hypothesis data contradictionem involvit; sublata igitur hypothesis, contradictionem non involvit, ac proinde absolute necessarium non est. Hinc patet solam necessitatem absolutam contingentiae repugnare, minime vero hypotheticam. Duplex illud necessitatis genus probe notari debet, ne hypotheticam necessitatem cum absoluta confundamus: hæc omnia non solum in rebus metaphysicis, sed etiam in Theologicis contra Socinianos disputationibus maximæ utilitatis esse possunt. In plerisque Philosophorum libris ambiguum est, nec satis determinatum contingentiae vocabulum; aliqui contingentiam velut omnimodæ necessitati etiam hypotheticæ oppositam considerant; hi autem a vulgari, & recepto loquendi usu recedunt; in quotidiano sermone necessarium dicitur, quod necessitatem dumtaxat moralem importat; aliquando etiam futurum contingens a Deo prævisum vocatur necessarium. Necessitatis notionem ad decentiam quoque, ad quasdam scilicet actiones convenientes transferre solemus; sic loqui familiare est: *A scribenda epistola, ab invisendo amico abstinere non possum*. Varias istas necessitatis species unusquisque novit, licet eas in sermone familiari verbis non distinguat.

VII. Si existentiae ratio sufficiens in essentia entis continetur, ens necessario existit, estque existentia ejus absolute necessaria. Si enim exi-

ſcientiæ ratio ſufficiens in eſſentia entis continetur, ens iſtud ideo exiſtit, quia hanc habet eſſentiam, ac proinde exiſtentia eſt eiſdem entis attributum eſſentiale, ſed attributa ſunt abſolute neceſſaria, ut ex præcedentibus colligitur, & deinde infra fuſius oſtendemus. Ergo exiſtentia eſt abſolute neceſſaria. Hinc ens neceſſarium eſt, cujus exiſtentia abſolute neceſſaria eſt, ſeu quod rationem exiſtentia ſuæ ſufficientem habet in eſſentia ſua, & ens contingens eſt, quod rationem ſufficientem exiſtentia ſuæ in eſſentia ſua non habet. Unde patet omne ens eſſe vel neceſſarium, vel contingens.

VIII. Diſputare ſolent Philoſophi utrum entis nomen ſit *univocum*, ſeu in eodem ſenſu ſumi debeat reſpectu entis neceſſarii & contingens, reſpectu ſubſtantia & modi, & tandem reſpectu ſpiritus & corporis. Tota quaſtio illa, quæ in tres partes fruſtra dividitur, una eademque reſponſione facile ſolvi poteſt. Etenim ſi conſideretur ens generatim tamquam genus ſupremum, abſtractione facta a differentiis quibuſcumque, certum eſt entis nomen ſaltem per abſtractionem univocum fieri reſpectu entium quorumcumque. Verum quia ens per mentem dumtaxat a ſuis differentiis ſeparari poteſt, revera & ſine ulla mentis operatione entis nomen in eodem ſenſu convenire non poteſt viverſis entibus, ac proinde non eſt univocum. Hinc patet controverſiam illam quam nimis ſerio agitant aliqui, meram eſſe logomachiam, ſeu totam in nomine poſitam; maioris utilitatis eſt ſequens conſuſio.

CON-

CONCLUSIO.

ESSENTIÆ RERUM, ET ATTRIBUTA SUNT ABSOLUTE NECESSARIA, IMMUTABILIA ET ÆTERNA; MODI VERO SUNT HYPOTHETICE TANTUM NECESSARII, MUTABILES ET NON ÆTERNI.

Prob. 1. pars. Essentia est id, quod primum in ente concipitur, & sine quo ens existere non potest; sed primum illud attributum, quod primum in ente concipitur, absolute & in seipso consideratur, ergo essentiæ rerum sunt absolute necessaria. Porro attributa fluunt ex ipsa essentia; ergo posita essentia, necessario, & absolute ponuntur attributa, ac proinde & attributa sunt absolute necessaria; sed quæ sunt absolute necessaria ea sunt immutabilia, ergo essentiæ rerum & attributa sunt immutabilia; quæ autem sunt immutabilia, & absolute necessaria, ea perpetuo fuere in intellectu divino; Deus autem est æternus, ergo essentiæ rerum & attributa absolute necessaria, & immutabilia ab æterno fuerunt in intellectu divino, ac proinde essentiæ rerum & attributa sunt absolute necessaria, immutabilia & æterna.

Prob. 2. pars. Ideo modi actu existunt in aliquo subiecto, quia insunt eidem subiecto alii modi, vel etiam propter alia entia ab eodem subiecto diversa, ut antea demonstravimus. Ergo modi non insunt, nisi præter essentiam rei aliquid aliud ponatur: hoc autem posito ipsi modi ponuntur, ergo modi sunt necessarii dumtaxat sub data conditione, seu hypothetice.

Obj. Si essentiæ & attributa rerum essent absolute necessaria, immutabilia & æterna, res

B. 6. dici.

dici non possent creari in tempore, absurdum consequens, ergo, & antecedens.

Resp. Dist. maj. Si essentia rerum, & attributa essent absolute necessaria, immutabilia & æterna quoad existentiam, res dici non possent creari in tempore: conc. maj. Si sint tantum absolute necessaria, immutabilia, & æterna quoad possibilitatem extrinsecam seu meram non repugnantiam, N. M. Itaque sensus quæstionis hujus non est essentias rerum & attributa necessario, immutabiliter, & ab æterno existere a parte rei, & independenter ab intellectu divino; nemo nescit solum Deum existere necessario; sed sic intelligenda est quæstio, quod scilicet essentia, & attributa rerum sint necessaria absolute & intrinsece possible, ita ut hæc possibilitas, seu non repugnantia a voluntate Dei nequaquam pendeat; quod autem necessario possibile est, non ideo tamen existit necessario; dum autem essentia rerum & attributa dicuntur æterna, sic istud intelligi debet, quod scilicet essentia rerum & attributa non sint entia extra Deum existentia, sed quod sint in intellectu divino, ab æterno; unde nihil statuitur Deo æternum, quod non sit in Deo & a Deo.

Inst. 1. Essentia & existentia non distinguuntur ab invicem: ergo si res sunt æternæ quoad essentiam, sunt etiam æternæ quoad existentiam; ergo nullo modo dici possunt creatæ.

Resp. Dist. ant. Essentia prout existit secundum ab intellectu divino non distinguitur ab existentia, transeat ant. essentia prout existit in intellectu divino, N. ant. Itaque quod res talem habeant essentiam, id pendet ab intellectu divino, non autem a voluntate; quod autem existat a parte rei talis essentia, id pendet a voluntate Dei;

Dei, non vero ab intellectu : ergo essentia rei prout est in intellectu divino, distinguitur ab existentia ; & quidem ex eo, quod res sint possibiles intrinsece, non inde sequitur eas revera existere ; quia vero existunt ideo creari dicuntur. Ad antecedens autem dixi *transeat* ; cum enim ens quatenus existens considerari possit a nobis de ejus essentia non cogitantibus, hinc essentiam & existentiam distingui ajunt Scholastici *ratione ratiocinata*.

Inst. 2. Creatio esteductio de nihilo ; sed si rerum essentia & attributa essent ab æterno, res dici non possent educi de nihilo ; ergo res nullo modo dici possent creari.

Resp. Dist. mi. Si rerum essentia & attributa essent ab æterno quo ad existentiam, res dici non possent educi de nihilo. C. mi. Si essent tantum ab æterno quoad possibilitatem intrinsecam & absolutam, dici non possent educi de nihilo, subdistinguo ; dici non possent educi de nihilo, quoad essentiam conc. quoad existentiam N. mi. & similiter distinguo consequens ; non potest dici res esse creatas quoad possibilitatem intrinsecam Conc. consequ. quoad existentiam N. consequ.

Inst. 3. Atqui nullo modo possent educi de nihilo, ergo nulla solutio. Prob. subst. essentia & attributa ab æterno sunt aliquid ; sed res deducuntur, seu componuntur ex essentialibus & attributis : ergo componuntur, seu deducuntur ex aliquo ; ergo non educuntur ex nihilo.

Resp. Dist. ma. Essentia & attributa ab æterno sunt aliquid existens in intellectu divino, concedo ; seorsim ab intellectu divino N. ma., & concessa min. Distinguo similiter consequens. Quare ut res dicantur educi de nihilo, sufficit ut nihil fuerit extra mentem divinam quo usus fuerit Deus ad res efformandas ; non

aut.

autem requiritur ut nihil sit etiam in intellectu divino a quo educantur: alioquin admit-
tendum esset Deum esse sine ideis rerum, juxta
quas res ipsæ productæ fuerunt.

Inst. 4. Si essentia rerum essent ab æterno, res possent dici æternæ quoad principalem sui partem, absurd. Conf. ergo & ant.

Resp. Dist. seq. Id est posset dici essentiam & attributa rerum ab æterno extrinsece in intellectu divino, concedo. Seorsim ab eo N. sequelam, & similiter distincta min. N. Conf.

Inst. 5. Si ideo essentia rerum, & attributa essent æterna, immutabilia, & necessaria, quia illarum idea in intellectu divino existit ab æterno, modi etiam & alia omnia possent dici æterna, necessaria & immutabilia, cum pariter illorum idea sit in intellectu divino; falsum tamen consequ. ergo & ant.

Resp. Dist. Sequelam. Modi & alia omnia possent dici æterna, absolute necessaria & immutabilia, si in eorum conceptu involverent eandem necessariam connexionem quam involvunt essentia & attributa rerum, ita ut etiam per voluntatem divinam mutari non possent C. secus N. Maj. Igitur essentia & attributa possibilitatem rerum intrinsecam constituent, quæ quidem possibilitas intrinseca etiam per Dei voluntatem mutari non potest, ita ut res sine sua essentia vel suis attributis in intellectu divino atque etiam extra ipsum existere impossibile omnino sit. Idem vero dici non potest de modis qui possunt adesse vel abesse, salva sub-
jecti essentia, quoties & quomodocumque Deo visum fuerit, ac proinde modi sunt mutabiles, neque eorum in subiecto aliquo absentia contradictionem involvit, prout etiam repræsentantur in intellectu divino, atque ideo non sunt necessarii nec proinde æterni.

CAPUT III.

De generalibus entis affectionibus.

ARTICULUS I.

De unitate, ubi etiam de quantitate & qualitate.

Essentia rerum sunt prorsus immutabiles, ideoque salvo ente, nihil essentialium tolli, nihil quidquam aliud in eorum locum substitui potest. Porro *inseparabilitas* eorum per quæ ens determinatur, seu ut tale constituitur, *unitas entis* appellatur. Ista autem unitas non modo in essentia communi spectatur, quando nimirum de ente universali sermo est; verum etiam in essentia singulari, cum de ente singulari agitur. Ob hanc unitatem ens omne consideratur tamquam individuum, & entia singularia dicta fuerunt individua; quoniam autem attributa quæ ad ipsam entis essentiam pertinent, separari nequeunt, salvo ente, idest nisi mutetur genus, aut species, aut individualitas, ideo vi unitatis ens omne ita est aliquid ut nihil aliud esse possit; hinc ens omne tum universale, tum singulare est unum; ideoque triplex distinguitur unitas, *generica* scilicet; *specificæ* & *numerica*, cujus quidem distinctionis hic sensus est. Genus hoc vel hæc species tale ens universale est, ita ut impossibile sit aliud ens universale quod cum illo genere vel illa specie idem sit; item tale individuum ita est singulare, ut impossibile sit hoc ipsum individuum aliud esse numero singulare.

II. Quod unitatem jam appellavimus, id aliquando vocatur *identitas*, & eodem modo de-

VI

viditur ; verum de identitate jam sermonem habuimus. In hujus vocabuli usu observari debent ambiguitates aliquæ. Idem fluvius E. G. dicitur aqua hodie per Tyberis pontem fluens & ea quæ heri fluebat ; quæ quidem identitas non est numerica, cum eadem non sit numero aqua ; navis quæ sæpius refecta fuit, eadem dicitur, licet ne tabula quidem superfit ; hæc autem identitas non est identitas *materiæ* sed *formæ*, ob eandem scilicet servatam navis formam. Idem aliquando dicitur mutatis materiæ & forma ; corpora nostra continuis accessionibus & effluviis mutantur, & tamen vulgo eadem dicuntur ; nemo nostrum idem est in senectute qui fuit juvenis ; corpora nostra novam quotidie materiam aliamque formam induunt. Quia tamen in eodem homine eadem numero anima remanet, nulla habita ratione mutationum, quæ in ipso corpore perpetuo contingunt, idem erit homo. Ex his omnibus patet identitatis nomen arbitrariis significationibus plurimis obnoxium esse. Unitati opponitur *multiplicitas* sive *compositio* quæ proinde triplex etiam est. Etenim quæ dividuntur, vel ut plura ejusdem speciei individua considerantur, vel ut plures ejusdem generis species, aut etiam tamquam diversa genera. Prior multiplicitas appellari potest *numerica*, secunda *specificæ*, tertia tandem *genericæ*. Compositio distinctionis fundamentum est, sed de variis distinctionum generibus jam fuscè tractavimus in Logica.

III. Multitudo partium totum aliquod constituentium dicitur *magnitudo*, atque etiam *quantitas*. Si magnitudinem aliquam pro unitate assumamus illiusque ad alteram rationem definiamus, eam *metiri* dicimur. Ita dum lineam rectam metimur, mensuram quam *pedis* nomine designamus, pro unitate adhibemus, & alte-

alterius quam metiri jubemur rationem ad eam investigamus . Hinc autem distincta colligi potest quantitatis definitio : Etenim cum quantitas quælibet data distincte intelligi non possit nisi data ejus ad aliam ratione , quantitas definiri potest *determinatio intrinseca* quæ sine alio adhibito intelligi nequit , hoc est , quæ solis verbis alteri non potest explicari . Etenim si quantitatis alicujus notionem in alterius animo quis excitare voluerit , id efficere nullatenus potest , nisi quantitatem aliquam datam pro unitate assumat , & illius ad hanc rationem definiat .

IV. Hinc patet discrimen inter *qualitatem* & *quantitatem* . Qualitas enim sine alio assumpto intelligi potest . E. G. Coloris rubri confusam dumtaxat notionem habemus , si tamen aliquis dixerit se globum rubrum desiderare , sine alio quodam dato , sine ulla ad rem quamlibet relatione , quid desideretur nemo non intelligit . Color igitur ruber quo superficies globi pingitur , est ejus aliqua qualitas ; quoniam vero nulla in ente aliquo concipi potest determinatio intrinseca nisi quæ vel sine alio assumpto intelligi potest , aut non potest ; evidens est omnem determinationem intrinsecam , vel qualitatem esse vel quantitatem .

V. Qualitates aliæ sunt *primitivæ* quibus scilicet nullæ aliæ priores in ente concipi queunt , ac proinde quarum reddi non potest ratio cur insint . Aliæ qualitates sunt *derivativæ* quarum reddi potest ratio per qualitates alias cur actu insint vel inesse possint . Rursus qualitates derivativæ vel sunt *necessariæ* vel *contingentes* . Necessariæ sunt quæ rationem sufficientem in qualitatibus primitivis habent cur actu insint , contingentes autem dicuntur quæ in primitivis rationem habent dumtaxat cur inesse possint .

possint. Igitur qualitates primitivæ ipsam rei essentiam constituunt, derivativæ necessariæ inter attributa referri debent, derivativæ autem contingentes ad modos pertinent. Prolixius, quam par est, in scholis disputari solet an qualitates a substantia realiter distinguantur; hæc controversia, si qualitatis nomen accurate definiatur, statim evanescit: etenim qualitates primitivas vel etiam derivativas necessarias ab ipsa substantia realiter non distingui evidens est; secus vero si fuerint derivativæ contingentes. Idem etiam querere solent Scholastici de quantitate, utrum scilicet quantitas a substantia corporea distinguatur; verum hæc quæstio conexa est cum alia quam de corporis essentia institunt Physici; quare hac de re in alio opportuniore loco tractabimus.

ARTICULUS II.

De ordine, veritate & perfectione.

1. **O**rdō est certa dispositio qua res inter se ob similitudinem quandam collocantur; ita in bibliotheca libri ordine collocati dicuntur, si unicuique assignatur locus conveniens. Pro varia autem similitudinis ratione varius ordo esse potest; sic libri in eodem loco reponi possunt qui de eodem argumento agunt, vel qui eadem forma gaudent, aut etiam pro alio quem unusquisque sibi fingit similitudinis modo. Ex hac autem multiplici ordinis ratione, unus ordo compositus aliquando formari potest; ita in exemplo præcedenti 1. Libri qui de eadem materia tractant in eodem loco sunt reponendi. 2. Libri eadem lingua conscripti in uno quoque eorum genere sunt conjungendi. 3. Libri ejusdem formæ in suo quoque genere conjungi debent.

4. Li-

4. Liber qui prius prodiit, in sua convenienti serie eum debet præcedere qui tardius lucem aspexit. Alia quælibet dispositio ordini opposita *confusio* appellatur. Ex dictis patet ordinem quemlibet suam habere rationem, ac proinde omnis ordo suas habet regulas. Si regulæ illæ, salva rerum ordinandarum essentia, aliæ esse nequeant, ordo *absolute necessarius* est; contra autem *contingens* est, si manente rerum essentia, regulæ aliæ esse possint.

II. *Veritas* quæ *transcendentalis* appellatur, est ordo eorum quæ enti conveniunt. Unde ens *verum* dicitur in quo datur veritas, & in eo datur veritas, si in iis quæ eidem conveniunt, ordo datur. Hinc colligitur; *omne ens esse verum*: etenim quidquid enti convenit vel est essentia ipsa, vel inter attributa aut modos referri debet. Porro essentia est id quod primum in ente concipitur, ex ipsa essentia fluunt attributa ita ut in essentia contineatur ratio cur singula attributa insint; pariter cur modi inesse possint ratio in attributis continetur; ratio autem cur actu insint, in aliis modis aut in aliis entibus continetur, ut antea demonstravimus; nihil itaque in ente concipi potest cujus ratio reddi non possit, & vi hujus rationis unicuique prædicato conveniens tribuitur locus. Datur ergo in omni ente veritas, ideoque ens omne verum est. Veritatem entis hic consideramus absolute sine ulla ad intellectum ratione, in hoc enim altero casu veritas foret *logica* quæ sita est in convenientia prædicati cum subjecto. Veritatem metaphysicam appellant alii convenientiam rei cum ejus essentia; ita in sermone quotidiano plurima dicimus vera V. G. aurum verum. Hæ autem voces: *verum aurum* sine additione verbi substantivi: *est*: nullum judicium continent, sed significant metal-

tallum cui insunt omnes proprietates quæ constituunt essentiam metalli quod aurum vocamus. Patet autem hanc ultimam veritatis transcendentalis notionem non differre a nostra definitione in qua distincte explicavimus quod confuse duntaxat enuntiarunt Scholastici.

III. *Perfectio* est consensus in varietate, seu plurium a se invicem differentium in unum consensus. Per consensum intelligimus *tendentiam* ad eundem finem obtinendum. Talis perfectio a Scholasticis dicitur: *bonitas transcendentalis*: ita V. G. horologium dicitur perfectum seu bonum propter consensum omnium rotarum quæ ad hoc tantum tendunt, ut scilicet horologium horas accurate demonstret. Contra *imperfectio* est dissensus in varietate, seu plurium a se invicem differentium a proposito fine dissensus; ita horologium imperfectum dicitur, si inter ejus partes aliquis sit dissensus ita ut ad tempus accurate metiendum singulæ non conspirent.

IV. Ex præcedenti definitione patet omnem perfectionem habere quandam rationem generalem, ex qua intelligitur cur ea quæ rem aliquam perfectam constituunt, hoc potius modo se habeant quam alio. Etenim cum rei aliqujus perfectæ partes singulæ ad unum aliquod constituendum tendere debeant, id ad quod tendunt est ratio generalis ex qua intelligi potest cur partes singulæ dato modo se habent, & non alia. Si perfectionis ratio sit unica, perfectio dicitur *simplex*; si autem plures fuerint perfectionis rationes, perfectio *composita* appellatur. Itaque omnis perfectio suas habere debet regulas ex quibus scilicet ipsa perfectio intelligitur. E. G. in architectura civili ad fenestrarum perfectionem præscribuntur

tur regulæ ; duplicem vero perfectionis rationem sibi proponere potest architectus , illuminationis scilicet & prospectus commoditatem ; atque hinc pro illa perfectione composita varias regulas esse oportet . Si plures regulæ ex diversis rationibus compositæ sibi mutuo repugnant , tunc regula generalis *exceptionem* patitur , quæ quidem exceptio in perfectione simplici locum habere non potest , sed tantum in perfectione composita . Ita fenestrarum perfectio composita est , cum pendeat ex illuminationis & prospectus commoditate . Quare in arte architectonica aliæ regulæ prospectus commoditati , aliæ illuminationi debentur ; fieri autem potest ut regulæ illæ sibi mutuo sint contrariæ . Verum si in excitanda fenestra aliqua consideretur sola illuminationis ratio , jam regulæ omnes ad commoditatem ædificii conspirare debent . Ex his omnibus patet exceptionem haberi non posse tamquam imperfectionem nisi *apparentem* : etenim cum impossibilis sit regularum consensus , vitio verti non debet quod ille non servetur consensus qui nullus esse potest . Hæc omnia maximam habent utilitatem ad rerum perfectionem æstimandam .

V. Si ratio perfectionis ex fine primario derivetur , perfectio *primaria* dicitur , secus autem perfectio *secundaria* appellatur . Quare si in exceptione regula una alteri præferenda , ea præferri debet quæ derivatur ex fine primario . Inde etiam intelligitur major minorve perfectio , id scilicet perfectius erit quod paucioribus exceptionibus obnoxium est : Cum enim perfectio sit convenientia cum ipso fine , quo pauciores sunt exceptiones , eo plures sunt regulæ quæ ad finem ipsum tendunt .

VI. Explicata perfectionis vel bonitatis trans-

seen-

scendentalis definitio Scholasticorum definitione
 latius patet. *Bonum* apud Metaphysicos omne
 ens dicitur quod habet quiddam habere debet;
 ut eum usum impleat ad quem a supremo rerum
 omnium conditore destinatum est; quia
 autem in operibus suis falli non potest Crea-
 tor, omnia entia sunt metaphysice bona; illa
 enim bonitas metaphysica est omnino necessa-
 ria; & quidem si ens destinat habere id quod
 in suo genere habere debet ut fini Creatoris
 respondeat, tum definit esse id quod fuit. Sci-
 re datum non est mortalibus quiddam Deus
 in singulorum entium creatione sibi proposuit,
 neque etiam cognoscere licet intimam entium
 substantiam; omnesque eorum proprietates.
 Quare evidens est abstractam & confusam esse
 vulgarem bonitatis metaphysicæ notionem,
 atque ad ipsam duntaxat essentia perfectionem
 pertinere; nostra autem definitio perfectionem
 quamlibet complectitur, non eam duntaxat
 quæ ex attributorum essentialium convenientia
 pendet, sed continet quoque perfectionem *re-*
lativam quæ ex mutua entium relatione va-
 rioque partium ordine constituitur. In eadem
 definitione continetur etiam perfectio seu *bo-*
nitatis. Etenim vita moralis hominis ex libera-
 rum actionum serie & ordine componitur, ea-
 que considerari potest tanquam totum aliquod
 cujus partes sunt actiones singulae. Itaque hu-
 jus totius perfectio consistit in singularum par-
 tium consensu quo nempe fit ut singulae actio-
 nes liberae ad Creatoris fines dirigantur. Hæc
 pauca dicta sint de bonitate morali quæ ad
 præsentem locum non pertinet; Caterum ex
 hæcenus dictis patet, quamlibet perfectionem
 ex certissimis pendere regulis, ac proinde con-
 stantem omnino esse & immutabilem. Persæpe
 tamen fit ut veræ perfectionis notioni mera
 præ-

præjudicia hominumque errores substituantur, atque ita genuina perfectionis notio corrumpatur; spuria autem est & apparens talis perfectio quæ potius imperfectio dici debet.

C A P U T I V.

*De variis entium speciebus, illorumque
mutua relatione.*

A R T I C U L U S I.

De ente Composito & Simplici.

I. ENS *compositum* dicitur quod ex pluribus a se invicem distinctis partibus constat. Si datæ partes dato aliquo modo inter se connectantur, datum aliquod prodit compositum; ac proinde dum intelligimus modum quo totius alicujus partes inter se conjunguntur, ejusdem compositi essentiam intelligimus. Essentia igitur compositi quatenus compositum est, consistit in modo quo partes componentes junguntur inter se, ideoque cum partium nexus inter essentialia entis compositi haberi debeat, hinc evidens est per connexionem partium ejusdemque connexionis modum entia composita reduci ad genera & species. E. G. Horologium est compositum, illiusque essentia in eo posita est, quod totæ cæteræque partes eo artificio inter se jungantur ut ad accuratam temporis mensuram singulæ conferant; illud autem instrumentum ab alia qualibet machina rotis etiam instructa distinguitur per variam rotarum connexionem diversamque singularum partium relationem.

II. *Ex nihilo ori* dicitur aliquid, dum ita existere incipit, ut nihil ejus antea extiterit.

Con-

Contra autem *annihilari* dicitur aliquid, dum ita existere definit ut nihil ejus postea supersit. *Oriri* autem *simpliciter* dicitur quod antea non existeret, sed existere incipit. Contra autem *interire simpliciter* dicitur quod antea existeret, sed existere definit. Itaque dum ens oritur, ex statu meræ possibilitatis ad statum actualitatis reducitur, sive transit a potentia ad actum: dum vero interit, ex statu actualitatis ad statum possibilitatis reducitur, sive ab actu transit ad potentiam; licet enim res actu esse desinat, manet tamen possibilis. Hinc patet composita oriri posse, licet non educantur ex nihilo, nimirum si partes separatae jam existentes conjungantur. Similiter composita interire possunt, licet non redigantur in nihilum, nempe, si partes antea conjunctae separentur.

III. Quoniam in composito quatenus compositum est, considerari non possunt nisi partes & ipsarum partium nexus, in composito id dumtaxat possumus intelligere, vel partes quasdam extrinsecus apponi, vel cæteris interponi, aut nonnullas auferri & transponi, aut omnes simul ex uno loco in alium transferri. Itaque mutationes nullae in composito accidere possunt nisi ratione magnitudinis, figuræ, situs partium, aut etiam ratione loci totius compositi.

IV. Ens *simplex* dicitur quod partibus caret; quia vero ens compositum partibus constat, evidens est enti simplici convenire non posse quæ composito tribuuntur, quatenus est compositum. In vulgari tamen sermone simplex dici solet quod est minus compositum; quoniam autem omne ens vel partes habet vel non, omne ens est simplex vel compositum. Quemadmodum vero compositum dividi potest,
ita

ita e contrario simplex quod nullas habet partes, dividi non posse manifestum est.

V. Ens simplex ex composito oriri nequit. Etenim ponamus, si fieri potest, ens simplex ex composito oriri. Quoniam compositum constat ex pluribus partibus distinctis, quidquid ex composito oritur, hoc est, quidquid existere incipit, illud oriri debet vel facta partium dissolutione, vel nova partium dissolutarum facta connexionem; & quidem nihil aliud his partibus accidere posse evidens est. Si partes dissolutæ novo quodam modo conjungantur, prodit ens compositum, non simplex. Si facta partium dissolutione aliquid prodit, vel existere incipit ens compositum quod antea non existebat, vel si ens simplex prodit, nullum ens existere incipit quod antea non extiterit, ac proinde ens simplex ex composito oriri non potest. Similiter ex ente simplici ens simplex oriri nequit. Etenim ens simplex caret partibus ideoque est indivisibile, ac proinde nihil ab eo separari potest quod extra ipsum existere possit. Cum igitur ens simplex neque ex alio ente composito oriri possit, neque etiam ex ente simplici, ens simplex vel est necessarium & existentia suæ rationem habet in se ipso, vel est contingens & eam habet in ente necessario. Pari ratione evidens est entia simplicia contingentia produci ex nihilo; etenim ortum haberent vel ex ente simplici vel ex ente composito, utrumque autem falsum esse demonstravimus. Superest ergo ut producantur ex nihilo.

VI. *Ortus instantaneus* est qui non fit in tempore, *instant* vero dicitur quod præteriti, præsentis & futuri expers; nimirum partes temporis dividuntur in præteritas, præsentis & futuras. Quemadmodum itaque punctum mathematicum in alia minora puncta dividi non pot-

Jacq. T. II.

C

est,

est, ipsamque lineam non constituit sed terminat, similiter instans in alia *tempuscula* dividinequit, neque temporis partem constituit, sed terminum denotat a quo tempus incipit & in quo desinit. Hac posita definitione evidens est ortum entis simplicis esse *instantaneum*. Etenim ens simplex omni prorsus parte caret, ac proinde in ortu entis simplicis distinguere non licet plura quæ sibi invicem succedant; sed dum existere incipit, totum simul existere debet, ideoque entis simplicis ortus non fit in tempore, sed est instantaneus. Simili ratione si ens simplex intereat, in instanti annihilatur. Etenim cum indivisibile sit, fieri non potest ut existere desinat & ejus pars aliqua existat, quare si intereat, annihilatur & quidem in instanti, cum non nisi totum desinere possit.

ARTICULUS II.

De Ente finito & infinito,

I. **F**initum seu *limitatum* vulgo definitur id quo majus concipi potest; distinctam entis finiti notionem explicabimus. Quodlibet ens finitum variis mutationibus obnoxium esse potest; in eo enim concipere licet modos plurimos qui adesse & abesse possunt. Verum quia modi aliqui aliis sunt contrarii, evidens est modos illos omnes simul esse non posse, ac proinde ens finitum status omnes possibiles simul habere nequit, sed successive; ita E. G. lapis calidus esse potest, aut frigidus, sed calidus & frigidus simul esse nequit. Igitur ens finitum definire possumus in quo omnia simul esse nequeunt, quæ eidem actu inesse possunt; & contraria ratione: ens *infinitum* potest definiri in quo sunt omnia quæ eidem actu inesse possunt.

II. Cum

II. Cum in ente infinito simul sint omnia quæ inesse possunt, nulla in eo actu mutabilia sunt. Per *mutabilia* intelligimus ea quæ actu mutantur; non enim repugnat ea inesse quæ in se mutabilia sunt. Hinc colligitur enti infinito nullos inesse modos; modi enim actu mutabiles sunt; quidquid igitur enti infinito inest, id pertinet ad attributa essentialia, aut si quid inest quod ad modos pertinere videatur, id instar attributi inest. Si aliquid ita se habeat ut illius oppositum enti infinito simpliciter & absolute non repugnet, illud tamen actu inesse repugnet, id instar attributi inest, quamvis ad modos pertinere videatur; ita V. G. Deus libere mundum creavit, ideoque absolute Deo non repugnavit decretum de mundo non condendo. Quoniam tamen Deus libertate usus potius existimavit mundum condere quam non condere, contrarium decretum in Deo numquam fuit.

III. Hæc talia quorum oppositum absolute non repugnat, quamvis actu inesse non possint, *modos apparentes* appellabimus. Tales modi non absolute sed hypothetice tantum sunt necessarii. Etenim eorum oppositum enti infinito absolute non repugnat, ergo non sunt absolute necessarii. Quoniam tamen eos actu existere repugnat hypothetice, ideo hypothetice tantum sunt necessarii. E. G. Decretum de mundo condendo & non condendo simul in Deo dari nequit; quia tamen decretum de mundo non condendo essentia divina non repugnat absolute, decretum de mundo condendo non est absolute necessarium. Impossibile autem est ut in Deo simul sit decretum de mundo condendo & de eodem non condendo; & præterea Deus qui mutari non potest, decretum suum nunquam mutare potuit; igitur decretum de mundo condendo necessarium est in Deo, sed hypotheti-

cani duntaxat necessitatem habet. Hujus distinctionis usus maximus esse potest in Theologia naturali.

IV. Ex ipsa mutabilitate vel mutatione actuali veram finiti notionem colligi evidens est. At si ens limitatum, ut vulgo fit, definiatur *quod habet limites*, vel finitum *quod habet fines*, id omnino nugari est. Cæterum patet in præcedentibus sermonem esse de ente infinito *reali*, non autem de infinito *mathematico*. Infinitum dicunt Mathematici id cujus nulli assignari possunt limites ultra quos augeri non possit. Ita lineam in infinitum producendam sumimus tanquam ens, eique existentiam non repugnare ponimus, talem lineam vocamus infinitam. At magnitudinem quandam infinitam intrinsece repugnare & contradictionem involvere manifestum est. Et quidem numerus omnis ac multitudo, quæcumque illa fuerit, ex unitatibus simul conjunctis & multiplicatis exoritur; numerus autem ac multitudo quælibet novis unitatibus augeri posse concipitur, & nulla prorsus multitudo effingi potest cui numerus alius, unitates aliæ aut alia multitudo adjungi non possint, ac proinde numerus ipse additionibus possibilibus carere non poterit, nec proinde erit vere infinitus. Quæcumque vero de numero aut multitudine dicta sunt, de alio quolibet magnitudinis genere intelligi facile possunt. Quamvis autem impossibile sit infinitum mathematicum *absolutum*, quod scilicet ultra datos limites augeri non possit, existit tamen infinitum mathematicum *relativum*, nempe in magnitudine qualibet finita concipi possunt partes numero infinitæ; sed infinitum illud mathematicum ad Metaphysicam non pertinet.

ARTICULUS III.

De Causis.

I. **C**ausæ nomine intelligitur ens illud quod ad alterius existentiam vel productionem confert & ad ipsum producendum requiritur. Vicissim *effectus* nomine ens illud intelligi debet quod aliqua ratione a causa pendet atque ab illa producitur. Itaque effectus omnis a propria causa distingui, ipsaque posterior esse debet. Hinc veteres ecclesiæ Patres ubi de divinis loquebantur, patrem non *causam* sed *principium* filii appellarunt, quod nimirum filius ipso patre posterior esse non possit, nec ab illo in substantia sive natura distinguatur, sed ipsi coeternus atque consubstantialis sit. Aliquando tamen Græci patres causæ nomen ampliori quodam sensu usurparunt, patremque filii causam vocarunt, sed filium patri consubstantialem esse contra Arianos defenderunt. Itaque quamvis principium & causa aliquando confundi soleant, tamen latius patet principii nomen; *principium* satis apte definitur id unde aliquid est, ac proinde omnis causa est principium, sed non viceversa. Hinc in definitione causæ adjungitur, eam conferre ad alterius entis existentiam; nam, ut jam diximus, pater æternus est persona distincta a filio, sed non est alterius naturæ; est quidem *alius* a filio, non *aliud*, ut loquuntur, *substantive*. Hæc pauca monuisse satis sit quæ quidem fusius explicare ad Theologiam pertinet.

II. Causa a Philosophis omnibus ita distingui solet ut alia quidem *efficiens*, alia *materialis*, alia *formalis*, alia denique *finalis* dicatur. Ens illud quod virtute sua effectum producit il-

lumque transfert a potentia ad actum, efficiens causa vocatur. Quia vero nulla creata vi ens ullum ex nihilo produci potest, efficiens causa operari suumque effectum producere non poterit, nisi subiectum aliquod sive materia reperiatur ex qua effectus ille formatur; ideoque præter efficientem, materialis quoque causa sive materia requiritur. Præterea cum materia sit natura sua prorsus indifferens ut hic potius quam effectus alter ex ipsa producat, præter materiam ipsam formalis insuper causa adiungi debet, quæ materiam determinet ut certus aliquis distinctusque effectus oriatur. Insuper cum res omnes non tenere & inconsulto, sed finis alicujus gratia productæ fuerint & effectus omnis ad finem aliquem dirigatur qui vel a natura constitutus sit; aut ab efficiente causa, si libertate & cognitione prædita fuerit, eligatur, finis ipse vel finalis etiam causa agnosci debet. Tandem quintum aliud causæ genus admitti potest quod causam *exemplarem* appellant, & ea dicitur ad cuius imaginem & similitudinem effectus aliquis producit.

III. Ex variis illis causarum generibus, efficiens, finalis & exemplaris extra effectum ipsum reperiuntur, ideoque *extrinsecæ* vocari solent. Materialis vero simulque formalis causa quæ a Philosophis appellantur *materia* & *forma*, effectum ipsum componunt, intrinsecas ac essentielles ipsius partes constituunt; quin etiam ab effectu ipso sola intellectus operatione distinguere possunt; sic per solum intellectum hominis substantiam a corpore & anima simul conjunctis distinguere posse concipimus. Itaque cum materia & forma veluti intrinsecæ effectus partes spectentur, finalis autem & exemplaris causa ad efficientem referantur; evidens est solam efficientem causam superesse quæ vere & proprie esse-

effectum ipsum producat . Ex his patet de *materia prima* & *forma* a Scholasticis prolixius disputari . Et quidem *materiæ primæ* nomine nihil aliud vulgo intelligitur , nisi *materia* omni *forma* destituta & ad omnes formas indeterminata . Porro talem materiam intelligi nequaquam posse nisi per mentis abstractionem evidens est ; quidquid enim existit determinatum est . Similiter quid *formæ substantialis* nomine intelligi debeat ex dictis obscurum esse non potest ; quemadmodum nempe *materia prima* est subjectum indeterminatum ad formam quamlibet idoneum , ita *forma substantialis* dicitur id quod materiam primam ad certam substantiam determinat . Talem vero formam seorsum consideratam non existere manifestum est , sed instar modi se habet in materia aliqua determinata ; vel etiam aliquando est substantia ; sic in homine anima rationalis *forma substantialis* hominis appellari potest . Hæc autem ita clara sunt ut a nemine in dubium vocari possint .

IV. *Causa efficiens* in varias alias classes distinguere solet , quarum præcipuas earumque discrimina brevissime explicabimus . *Efficiens causa* vel *prima* vel *secunda* esse potest . *Causa prima* vocatur illa quæ cæteris rebus ita dat esse ut ipsa a nullo existentiam receperit , *causa prima* est solus Deus . *Causa vero secunda* dicitur illa quæ alteri quidem dat esse , sed ipsa quoque suum esse ab alio recipit , tales sunt causæ creatæ . *Causa proxima & immediata* dicitur illa a qua effectus ipse proxime producitur , ut filius a patre ; *remota vero vel mediata* est illa inter quam & effectum ipsum intermedia quædam causa intercedit , ut inter avum & nepotem .

Causa principalis vocatur illa quæ virtute sua effectum producit , ideoque ipsi tanquam prin-

cipio veræque causæ effectus tribuitur, ut statua artificii. *Instrumentalis* vero dicitur illa quæ causæ principali tanquam medium ad instrumentum inservit, ipsaque dirigente effectui producendo conferre potest, ut Scalprum, Serra, penicillus.

Causa per se vocatur illa quæ natura sua ad effectum producendum dirigitur, ut ignis ad comburendum; *Causa vero per accidens* censetur illa quæ præter naturæ aut operantis intentionem effectum producit, ut si venator feram jaculo interimere volens hominem occidat. *Causa generalis* dicitur illa quæ plures effectus inter se similes, *particularis* vero quæ unicum effectum producit. *Causa univoca* est illa quæ effectum sibi similem producit, ut planta plantam aliam, *equivoca* vero quæ effectum sibi dissimilem producit, ut artifex statuam. *Causa totalis & adequata* vocatur illa quæ solitarie accepta integrum totumque effectum producit, ut si currus ab uno equo, pondus ab unico homine moveatur. *Partialis* vero vel *inadequata* dicitur, si in producendo effectum cum altera causa jungatur; ideoque effectus ab utraque causa simul operante oritur; ut si pondus idem a duobus hominibus feratur.

V. Denique *effectrix* vel efficiens causa respectu alicujus effectus, aut vere *efficiens*, aut *occasionalis* solum censi debet. Efficiens veræque effectus causa dicitur, si ad effectum ipsum producendum natura sua dirigatur ipsumque virtute sua producat. *Occasionalis* autem vocatur illa quæ licet effectum ipsum minime producat, efficientem tamen causam excitat, illamque ad operandum impellit; ideoque occasionem ipsi præbet ut suam virtutem exerat & effectum producat, qui sublata hujusmodi occasione minime produceretur. Ad hæc ipsa causarum occasio-

nium

lium genera revocantur conditiones illæ quæ
 necessario requiruntur, ut efficiens causa vim
 suam exerat & effectum producat; ita ignis
 comburere novumque ignem producere non po-
 terit, nisi lignum admoveatur. Itaque qui li-
 gnum igni admoverit, occasionalis combustionis
 causa vocabitur, atque ignis proximitas dicitur
conditio sine qua non. Neque prætermittendæ
 sunt causæ illæ quæ non physice vereque effe-
 ctum virtute sua producant, sed *moraliter* so-
 lum, ideoque *morales* causæ vocantur. Ita qui
 homicidium imperat aut consulit, moralis ho-
 micidii causa vocabitur. Unde si leges ipsæ
 morumque regulæ spectentur, eadem prorsus
 in hoc imperio consilioque gravitas reperitur
 ac si vere physiceque hominem perimeret.
 Verum morales causæ quæ ejusmodi ratione
 effectum producant, cognitione & libertate
 præditæ esse debent; alioqui si necessariæ illæ
 forent, neque morales causæ vocari, neque
 actus ille morali bonitate vel pravitate do-
 nari posset. *Libere* autem causæ dicuntur illæ
 quæ ita operantur ut etiam non operari pos-
 sint, positisque omnibus quæ ad effectum ipsum
 producendum necessaria sunt, adhuc indifferen-
 tes sint ut effectum ipsum producant, sive
 ab illo deflectant; atque ubi libere consulto-
 que actum ipsum inceperint, illum abrumpe-
 re & in oppositum actum sese convertere pos-
 sint. *Necessarie* vero causæ vocantur illæ
 quæ ita operantur actumque suum producant
 ut ab illo abstinere aliterque operari non
 possint; Sic ignis necessario calorem produ-
 cit. Sed hæc breviter tantum attingimus, ac-
 curate enim ostenduntur ubi de humana vo-
 luntate ejusque libero arbitrio differendum
 erit.

VI. In æstimandis effectibus physicis re-
 C. 5. ceptum.

ceptum vulgo est principium: *effectus suis causis proportionales esse*: at hic data occasione observabimus, incertum omnino esse, vel saltem superfluum illud principium. Etenim causæ vocabulo nullam notionem claram in physicis jun gere possumus, nisi effectum ipsum a causa productum intelligamus. Effectibus autem cognitis ii. possunt inter se comparari atque æstimari, nec multum curandum est. an effectus causis suis proportionales sit vel non. Et quidem in effectibus physicis fingi possunt duplicis generis causæ, aliæ scilicet quæ ex impulsione aliqua pendent, aliæ autem intrinsecæ quæ sine ulla impulsione agunt. Si primi generis causæ requirantur, nihil aliud esse possunt nisi motus alicujus corporis. aliud corpus impellentis. Si autem causæ aliæ intrinsecæ, & non materiales fingantur, non intelligitur qua ratione causæ illæ comparari inter se possint, ita ut una sit alterius dupla aut tripla; perinde ridiculum foret, ac si sensatio una alterius dupla, vel tripla diceretur. Verum causæ illæ in effectibus. Physicis, quæcumque sint, ex spatiis dato tempore percursis facile cognoscuntur, quod quidem Physicis satis est. Ex ambigua virium & causarum notione ortæ sunt lites plurimæ, quæ rebus mechanicis tenebras densissimas offundunt. Sed de his in Physica.

VII. Ea omnia, quæ de variis entium generibus ipsorumque attributis exposita sunt, *absolute* dicta fuerè; entia enim illorumque indolem, ac naturam solitarie, & seorsim ab aliis consideravimus. At nullum propemodum ens. ab intellectu nostro percipitur, quod natura sua, vel saltem ab intellectu ad ens aliud referri non possit, siue cum alio ente comparari; multus ergo est relationum usus in disciplinis omnibus. Ita E. G. in Arithmetica numeros *in se pri-*

primum consideramus , deinde referimus ad se invicem . Similiter Geometriæ pars maxima in magnitudinum & figurarum relationibus consistit ; Musica in sonorum seu tonorum relationibus . *Relatio* appellatur id quod rei absolute non convenit , sed duntaxat dum ad aliquid aliud refertur . Aliis nominibus appellari etiam solet : *habitus* , *respectus* , *connotatio* . In omni relationum genere tria distingui debent , nempe *subiectum* , *terminus* , ac *fundamentum* . Subiectum relationis vocatur ens illud quod refertur ad aliud . Terminus vicissim est illud ad quod relationis subiectum dirigitur , atque eam ob causam subiectum ipsum ac terminus communi nomine *correlata* dicuntur . Tandem *ratio relationis* , sive id unde intelligitur relationem adesse , fundamentum relationis dici solet . Ita si nix ad lac referatur , simulque nix & lac comparentur , nix erit subiectum , lac terminus , albedo autem similitudinis causa relationis fundamentum dicetur . Itaque juxta varia affectionum genera , quæ duobus entibus inesse possunt , varia quoque relationum fundamenta , ideoque etiam & varia relationum genera distingui debent . Ex his manifestum est relationes vagari posse per omnia *prædicamenta* , hoc est , entia referri posse ad se invicem , tum quoad essentiam , tum quoad qualitatem & quantitatem , tum quoad coexistentiam , tum quoad existentiam successivam &c. varia relationum genera sibi facile repræsentabit quisquis ad ea attenderit , quæ in Logica de Categoriis explicavimus . Satis erit observare relationes alias esse *intrinsecas* , sive *reales* , aut *necessarias* , alias vero *extrinsecas* , sive *reales* , aut *necessarias* , alias vero *extrinsecas* , seu *fictas* & *contingentes* . Intrinseca relatio vocatur illa , quæ ex ipsa rei natura dimanat ; si nempe res illa existere , vel

concipi non possit, nisi cum ordine quodam ad aliquem terminum; ita filius ad patrem: effectus omnis ad causam. Extrinseca relatio dicitur illa, quæ ab intellectu, soloque hominum arbitrio pendet. Ita relatio lauri appensæ ad tabernam: ita relatio vocis ad ideam voce expressam, extrinseca & contingens censeri debet. Præterea relatio dividitur in *increatam*, & *creatam*. Increata sive divina quadruplex est; tot enim sunt in Deo relationes, quot sunt ordines seu respectus. Sunt autem in Deo quatuor ordines seu respectus, *paternitas* nimirum *filiatio*, *spiratio activa* & *spiratio passiva*; nempe paternitas essentialiter refertur ad filiationem, filiatio ad paternitatem, spiratio activa ad spirationem passivam, & vicissim spiratio passiva ad spirationem activam. De fide est contra Sabellianos in divinis realiter distingui relationes, *paternitatem* scilicet, *filiationem* & *spirationem passivam*. Et quidem prima persona distinguitur a secunda quod sit Pater, secunda quod sit Filius, tertia quod sit Spiritus sanctus; sed prima, secunda, tertia persona, sunt Pater, Filius, & Spiritus sanctus per relationes, prima nimirum per paternitatem, secunda per filiationem, tertia per spirationem passivam. Quia autem spiratio activa, nihil aliud est, quam actio productiva Spiritus sancti, non distinguitur realiter a paternitate, aut filiatione, ac proinde quartam rem in Deo non constituit. Unde licet quatuor sint relationes in divinis, sunt tamen dumtaxat tres personæ. Sed hæc ad sacram Theologiam pertinent.

Quod spectat relationes creatas, breviter ostendemus nullam enti realitatem superaddere relationes illas, sed eas in mera *dependentia* unius entis ab alio, in mero respectu positas esse. Etenim dum ens aliquod ad aliud refertur,

tur, nihil consideramus nisi ea, quæ duobus entibus absolute insunt, eaque simul spectamus. Evidens autem est nostrum considerandi modum nullam rebus ipsis superaddere realitatem. E. G. Si Cainus *in se* consideretur, intelligimus eum non esse *a se*, sed genitum ab alio; ideoque ab alio pendere quo ad existentiam; ubi vero refertur ad Adamum, a quo existentiam accepit per generationem, tum nulla ipsi nova realitas additur, sed tantum *denominatio extrinseca*, quæ realem illam dependentiam supponit, seu quæ habet *fundamentum in re*. Ex his paucis clarissima patere arbitror quid sit relatio.

SECUNDA PARS

METAPHYSICÆ

S E U

PNEUMATICA.

HÆC metaphysicæ pars, quæ circa spiritus versatur, Deum, Angelos, mentemque ipsam præstantissima entia contemplatur. Paucissima sunt, quæ lumine naturali de Angelis novimus; hinc tota de Angelis doctrina in sacra Theologia opportunius tractatur. Itaque prætermittis iis, quæ a nonnullis Philosophis, de his sublimioribus spiritibus disputari solent, de mente nostra primum sermonem instituemus; ex hac autem mentis nostræ contemplatione ad spiritum infinitum rerum omnium auctorem & dominum assurgemus. Hanc secundam Metaphysicæ partem, majoris distinctionis causa, in varias sectiones dividemus.

S E

S E C T I O I.

De mente humana.

PRæclarissimam ferunt veteris cujusdam sapientis sententiam : *nosce teipsum* : & re quidem vera , quid prodesse nobis possunt sublimiores scientiæ ? si nosmetipsos ignoremus , si nesciamus quid sit anima nostra , an spiritualis & immortalis , quodnam inter ipsam & corpus commercium intercedat , quæ sint illius facultates . Hæ autem cognitiones omnes , quid nobis profunt ? si animam ipsam perdamus , si ad veram immortalitatem , æternam scilicet beatitudinem consequendam , nostris facultatibus non utamur . Hinc patet tota præstantissimi argumenti divisio . Quæ ad humanam mentem pertinent , sub triplici potissimum ratione considerari possunt ; vel enim mens humana in se & absolute spectatur , vel in ordine ad corpus , vel tandem mentis humanæ facultates aliquæ considerantur .

C A P U T I.

De mente humana in se spectata.

DUO potissimum inquirenda occurrunt . Primum an mens humana sit spiritualis & a corpore distincta . Secundum an sit immortalis .

A R.

ARTICULUS I.

De mentis humane spiritualitate.

I. **M**ens humana est id, quod in unoquoque nostrum cogitat; a Scholasticis vulgo definitur, *Spiritus creatus incompletus*: qua definitione secernitur ab Angelo, quatenus mens humana destinata est informando Corpori, & cum eo apta est constituere totum *substantiale*, nempe hominem.

II. Per *Corpus* seu *materiam* intelligimus substantiam extensam, divisibilem, solidam, ex variis partibus variarum figurarum contextam. Per *spiritualem* vero substantiam intelligimus substantiam expertem *materiæ*, seu quæ extensionem, divisibilitatem, & soliditatem excludat. Quæstio est igitur utrum id, quod in unoquoque nostrum cogitat, sit substantia expertis extensionis, divisibilitatis, soliditatis &c.

III. Inter veteres permulti fuere; qui materialem animam, & veluti quoddam tenuissimum Corpus ex subtilissimis particulis igni, vel aeri similibus celerrimoque motu agitatis conflata fecerunt. Neque etiam hodie desunt increduli perversissimique homines, qui eandem perniciosissimum errorem tueantur. Cum hac nefaria sententia confundi non debet haud satis accuratus loquendi modus a nonnullis Scriptoribus Ecclesiasticis aliquando usurpatus; Aliqui etiam Ecclesiæ patres humanam animam, Angelos, Deum ipsum *corpus* vocarunt, sed alio plane sensu. Etenim cum incorpoream quandam substantiam concipere vix possent, quidquid existeret, & a nihilo distingueretur, corpus vocabant, ita ut corporis nomine entia

na

nihilo fecernere duntaxat intenderent. At corpus illud a materia sive corporea substantia perspicue distinguebant; cum affectiones illas atque attributa quæ corporeæ substantiæ sive materiæ conveniunt, ab ejusmodi corpore sejungerent, ideoque nominis abusu duntaxat errarunt. Ita Tertullianum excusavit S. Augustinus de Genesi ad litt. lib. 10. cap. ult. *Quia corpus esse animam credidit, non ob aliud fecit, nisi quod eam incorpoream cogitare non potuit, & ideo timuit ne nihil esset, si corpus non esset: his præmissis, sit*

C O N C L U S I O.

MENS HUMANA EST SUBSTANTIA SPIRITUALIS, SEU A MATERIA VEL CORPORE DISTINCTA ATQUE DIVERSA.

Prob. 1. Pars, scilicet mentem humanam esse substantiam. Animam dicimus id quod in nobis cogitat; sed id quod in nobis cogitat, est substantia. Et quidem experimur cogitationes in nobis continuo mutari, alias aliis fluxu perpetuo succedere: sed *mutabilia* quæ enti insunt, *modi* dicuntur & sine subjecto esse non possunt, ergo cogitationes sunt modi qui sine subjecto esse non possunt. Illud autem subjectum est id quod in nobis cogitat, quod proinde aliquo ad existendum subjecto non indiget, ideoque substantia est. Etenim si id quod in nobis cogitat, dicatur indigere aliquo subjecto, hoc ipsum subjectum dicemus id quod cogitat. Ergo anima est substantia.

Prob. 2. pars. 1. Principium operationum quæ ad materiam pertinere non possunt, est substantia prorsus distincta a materia ac proinde spiritualis, atqui mens humana est principium operationum.

operationum quæ non possunt ad materiam pertinere; nempe cogitationum quarum quisque sibi conscius est; Ergo mens humana est substantia spiritualis. Prob. min. Si cogitatio pertineret ad materiam, esset intrinseca materię *modificatio*; Cum enim cogitatio sit subiecti cogitantis actio interna per quam res cogitans alio modo se habet ad seipsam, intrinseca est subiecti cogitantis modificatio; atqui cogitatio non potest esse intrinseca materię modificatio; si enim esset intrinseca materię modificatio, esset ipsa materia *modificata*, atqui cogitatio non est nec potest esse materia modificata. Nam si ita esset, cogitatio haberet proprietates materię, esset proinde extensa, divisibilis in partes & figurata, atqui absurdum est dicere cogitationem esse extensam, divisibilem & figuratam. Enim vero quis possit a se obtinere ut credat intellectus actum V. G. assensum vel dissensum, esse certo loci spatio diffusum, posse scindi in duas quatuorve partes, & habere figuram rotundam aut quadratam aut triangularem: ergo cogitatio non potest esse materię modificatio, ac proinde mens humana est principium operationum quæ ad materiam pertinere non possunt.

Prob. 2. Si cogitatio pertineret ad materiam, vel cogitarent singulæ materię particulæ ex quibus componeretur corpus cogitans, vel non. Utrumque absurdum est. Ergo &c. Minoris 1. pars ostenditur. Si cogitarent singulæ corporis particulæ, vel cogitatio esset tota in singulis, vel partim in una partim in altera, neutrum autem dici potest Non 1. alioquin tot erunt substantię cogitantes quot partes. Verum non dubia conscientia novimus, unum aliquid & simplex in nobis cogitare. Præterea si tot essent cogitationes quot par-

partes, de illis singulis partibus eadem quæ de toto corpore cogitante, quæstio semper institui posset, num scilicet singularum illarum partium particulæ in infinitum divisibiles cogitent vel non. Si dicerentur cogitare, ergo essent acta in nobis infinita numero entia actu cogitantia seorsim, quæque proinde separata, dum corpus in pulverem reducitur, etiam cogiterent; ita ut deinde in plantis, in terra, in lapidibus aliisque corporibus in quæ transiret corporis nostri substantia, essent infinite acta particulæ cogitantes, quod est absurdum. Si vero illæ partium cogitantium particulæ in infinitum divisibiles non cogitent; inde etiam illud sequitur cogitationem scilicet esse partim in una parte, partim in altera, quod quidem absurdum est; Etenim cogitatio non ita potest in partes dividi, ut media pars cogitationis dicatur esse in una materiæ parte, media pars in altera. Neque enim extensa est cogitatio, nec concipere valemus mediam aut quartam aut millesimam ullius cogitationis simplicis partem ab aliis partibus separatam. Deinde secta in partes cogitatione, nemo posset affirmare se aliquid percipere, siquidem unaquæque pars non totum aliquod, sed aliquam duntaxat totius partem cogitaret; non ipsa cogitationum partialium collectio totam rem aliquam perciperet, cum una earum nesciret quid perciperet altera. Hæc de 1. minoris parte.

Minoris 2. pars probatur, nempe ex partibus materiæ non cogitantibus numquam fieri posse corpus cogitans. Etenim in earum partium non cogitantium dispositione qualibet, nihil deprehendi potest quod cogitationem producere valeat; illa enim varia partium dispositio fieri non potest nisi per variam partium distantiam, contactum, motum, quietem, figuram &c.,

&c., sed hæc omnia nihil continent quod ullam possit cogitationem producere; nam quomodocumque moveantur corpora, quæcumque sit corporum distantia, figura &c., illa partium non cogitantium varia dispositio numquam poterit esse cogitatio, nec cogitationem poterit continere, effectus autem in sua causa contineri debet, & ex nihilo produci nequit; ergo particulæ materiæ non cogitantes quomodocumque inter se dispositæ, numquam poterunt fieri corpus cogitans.

Prob. 3. Substantia quæ vel uno temporis articulo terræ viscera rimatur, cælum immensum cogitatione percurrit, raptim evolat in sinum Dei, spirituum cætus perlustrat, orbem universum prævadit, objecta immaterialia, incorporea, sensibus impervia percipit, puta virtutis honestatem, vitii sceditatem, æquitatis & justitiæ regulas, numerorum habitudines & proportionales, sensuum ipsorum errores, ignorantie turpitudinem, scientiarum utilitatem ac decus, est vere ac proprie spiritus, non materia; Qui enim intelligi potest substantiam corpoream atque inertem in spatia immensa unico temporis puncto transferri, res immateriales nostrisque sensationibus minime obnoxias percipere? atqui hominis animæ est substantia huiusmodi, ut cuilibet constat intimo conscientiæ testimonio, ergo mens humana est vere & proprie spiritus.

Prob. 4. Sensationum nostrarum varietas, uniformitas, molestæ sensationes in nobis etiam invitis excitatæ, voluntatis imperium in plurimos sensationum effectus; hæc omnia conscientiæ nostræ testimonia certo demonstrant, non solum objecta extra nos, extra mentem ipsam existere, sed etiam objecta illa mentemque nostram essentialiter differre manifeste ostendunt.

Et

Et quidem si mens nostra ab ipso corpore non differret, nulla unquam esse posset illa, quam tamen in nobis sæpe experimur, inter sensationum effectus ipsamque voluntatem discordia & mutua veluti pugna. Objectorum externorum effectus in anima productos, nisi anima spiritualis sit, nulla ratione intelligi posse evidens est. Fingamus animam esse materialem, objecta externa nullam aliam menti nostræ mutationem asferre possunt præter varias motus, loci vel figuræ determinaciones, quod quidem patet & ab omnibus conceditur; sed hæc omnia cum ideis in anima productis nullam relationem habent. Hujus argumenti ut sentiat vis certe maxima & insuperabilis, vocis *Dei* exemplo utemur. Dum auditur vox ista *Deus* latina, vir linguæ latinæ omnino imperitus, audito hoc vocabulo, eundem omnino experitur motum in singulis organi auditorii fibrillis non secus ac si latine sciret. Igitur anima materialis iisdem omnino motibus obnoxia foret in cerebro hominis linguæ latinæ imperiti vel bene docti, ac proinde in utroque casu vocabuli significationem æque intelligeret. Quod autem res aliter se habeat, procul dubio repetendum est ex linguarum institutione mutuaque hominum conventione. Porro mutua hujus conventionis capaces esse non possunt substantiæ mere materiales in quibus scilicet iidem soni eosdem motus producerent, ac proinde & easdem sonorum notiones eandemque vocabulorum intelligentiam; quod experientiæ & rationi repugnat. Illa igitur conventio ad aliam substantiam quæ spiritualis est, necessario pertinere debet.

Objic. 1. Sine ulla ratione negatur cogitationem convenire materiæ, nisi omnes materiæ modos cognoscamus; atqui omnes materiæ modos nec cognoscimus nec possumus cognoscere, ergo

ergo Resp. N. maj. Nam etiam si non cognoscamus omnes materiæ modos, tamen certo scimus materiæ convenire non posse modos contradictorios. Porro si materia cogitaret, ipsi convenirent modi contradictorii; nam cogitatio excludit partes, extensionem, figuram, divisionem & motum. Hæc autem omnia includit materia. Ergo materia haberet proprietates contradictorias, si vi cogitandi prædita esse posset.

Inst. 1. Licet cogitatio non sit extensa, dividua & figurata, tamen potest esse modificatio materiæ. Et quidem motus & quies sunt modificationes materiæ, nec tamen sunt aliquid extensum & divisibile. Ergo materiæ convenire potest cogitatio Resp. N. apt. Ad cujus probationem dico modificationem materiæ duplicis esse generis. Alia est modificatio *extrinseca* sive modus quo res aliqua sese habet ad res alias extra se positas; Alia est modificatio *intrinseca*, sive modus quo res aliqua sese habet ad se ipsam. Porro motus & quies sunt modi quibus corpus se habet ad partes spatii seu ad corpora circumstantia; motus scilicet est modus quo corpus locis pluribus successive respondet; quies vero est modus quo corpus eidem loco permanenter respondet, ac proinde motus & quies sunt modi materiæ pure extrinseci: potest quidem materia habere modificationes pure extrinsecas quæ neque sint extensæ, neque divisibiles, neque figuratæ; nam illæ modificationes non sunt extensæ, neque divisibiles, neque figuratæ, quæ sunt meri respectus, meræ relationes nihil mutantes in ipsa re. At materia non potest habere modificationes intrinsecas quæ neque sint extensæ, neque divisibiles, neque figuratæ; illæ

istæ enim modificationes sunt ipsamet materia in se & absolute spectata. Figura materiæ V. G. quæ est intrinseca materiæ modificatio est absolute & in se ipsa materia, proindeque extensa & divisibilis. Cum ergo cogitatio sit subiecti cogitantis modificatio intrinseca, actio nempe per quam res cogitans alio modo se habet ad seipsam, non potest convenire materiæ, nisi ipsa sit divisibilis & extensa; ergo cum non sit divisibilis & extensa, non potest pertinere ad materiam; pertinet ergo ad aliam substantiam, ad spiritum scilicet.

Inst. 2. Anima easdem habet modificationes ac corpus. Etenim pro variis corporis motibus & effectibus, varias suscipit cogitationes; ergo cogitatio potest esse modificatio materiæ Resp. N. ant. Ad cuius probationem dico, animam quidem pro variis corporis motibus varias suscipere modificationes; ita pro variis sensuum externorum motibus varias habet sensationes; pro varia oculorum commotione varios percipit colores, sonos varios pro vario aurium pulsu, non tamen idcirco anima easdem habet ac corpus modificationes; modificatio enim corporis est motus, figura, situs &c., quas quidem modificationes a cogitatione longe diversas esse demonstravimus.

Inst. 3. Anima læso corpore læditur, ergo operationes animæ sunt modificationes materiæ Resp. dist. ant. Anima læso corpore læditur, sed diverso modo. Esto ant. eodem modo N. ant. & Conf. læditur enim corpus, quatenus nexus partium corporis aut dissolvitur, aut vehementius impellitur; anima vero læditur quatenus ex occasione læsi corporis in ea excitatur, pro legibus conjunctionis animæ cum corpore, sensatio gravis & molesta quæ *pulsus* quod.

quoddam *anime* dicitur. Dixi *Esto antecedens*, quia nonnunquam anima in rei alicujus consideratione sic defixa hæret ut læso corpore nihil doloris sentiat.

Inst. 4. Non desunt Philosophi & quidem primi nominis qui materię Elementa simplicissima omnino esse, invisibilia & inextensa pro certo affirmant, idque multis conantur demonstrare argumentis. Ergo in hac hypothese quæ non solum non repugnat, sed firmissimis læsetur rationibus, statim Philosophis eripiuntur præcipua argumenta quæ ab extensione & partium compositione deduci solent, ac proinde absurdum non est operationes animæ esse modificationes materię Resp. C. A. N. Conf. Quidquid sit de illa hypothese quam strenue propugnant doctissimi quidem Philosophi non pauci, firmissima tamen manent argumenta hætenus explicata. Et certe cum materia ex elementis sive extensis sive inextensis composita sit, ut omnes Philosophi concedunt, totam vim servant argumenta quæ ex materię compositione deducuntur; hac enim ratione argumentari licet: vel cogitarent singula inextensa materię elementa vel non: utrumque autem absurdum esse ex conclusionis probatione facile colligitur. Ergo necessum est ut præter simplicissima materię elementa quibus cogitatio competere non potest, aliæ admittantur diversæ omnino naturæ simplices substantiæ quæ cogitationis capaces sint, illasque solas appellabimus substantias spirituales, parum solliciti de intima corporeorum elementorum natura, quæ quidem quæstio ad præsentem locum non pertinet. Cæterum accurate distingui debet *simplicitas* vel *inextensio* ab ipsa *spiritualitate*, atque ita evidens fiet præcedentes probationes a Philosophis hic hypothesebus non pendere, quod quidem probetur.

be observandum est. Quamvis enim divina revelatione certissime constet animæ spiritualitas, tamen contra incredulos perditosque homines summo studio urgeri debent demonstrationes philosophicæ, neque hæc arma e nostris manibus eripi permittendum est, quod facere conantur infensissimi quidam Christianæ imo & omnis religionis hostes.

A R T I C U L U S II.

De mentis humana immortalitate.

I. **E**Xistentia Dei & immortalitas mentis humanæ sunt duo prima principia quibus universa religio innititur: si enim alterutrum ex illis convellas, jam omni flagitio latissimum referas ostium; si nihil est sperandum vel timendum post hanc vitam, quo jam freno coercere poteris insanas mortalium cupiditates?

II. *Immortalitas* definiri solet perpetua entis viventis duratio, *entis* quidem *viventis*; hoc est, habentis in se actionis alicujus principium; nam etiam si aliqua materia non vivens in æternum duratura esset, dici non deberet immortalis.

III. Immortalitas duplex distinguitur, alia *absoluta*, alia *relativa*. Immortalitas absoluta quæ intrinseca dici potest, convenit enti viventi nullum habenti in se & ex natura sua principium interitus. Immortalitas relativa quæ etiam extrinseca dici potest, convenit enti viventi quod non potest ab alio ente extrinseco destrui vel annihilari.

IV. Soli Deo convenire immortalitatem tum absolutam tum relativam certum est. Nam solus Deus ita necessario existit, ut neque a principio in-

intrinseco, neque ab ulla causa extrinseca destrui possit; unde mens humana & quilibet creatus spiritus non habent immortalitatem relativam in omni sensu; quamvis enim non possint destrui & annihilari ab alio ente creato, possunt tamen absolute annihilari a Deo.

V. Cum ergo quæritur an mens humana sit immortalis, quæstio non est an a Deo absolute annihilari possit, sed quæritur duntaxat 1. an mens humana nullum habeat in se & ex natura sua principium interitus. 2. An nulla in toto mundo existat causa creata extrinseca mentem potens destruere. 3. An Deus nolit eam annihilare, aut eam mutare unquam, ita ut facultates vitales quas in ea deprehendimus, amittat. Hic est status quæstionis, qui quidem probe attendi debet.

VI. Fide certum est mentem humanam non interituram cum corpore, & in æternum duraturam viventem. Hinc Christus Dominus Matth. 10. v. 28. *nolite, inquit, timere eos qui occidunt corpus, animam autem non possunt occidere; & Joan. 12. v. 29.: qui odit animam suam in hoc mundo, in vitam æternam custodit eam*: Innumera alia sunt desumpta ex revelatione argumenta quibus humanæ mentis immortalitas extra omnem dubitationem ponitur; verum ea hic non attingimus, ne in aliam messem falcem injiciamus; non enim auctoritate sed ratione tantum hoc loco agendum nobis est; cumque Lateranense Concilium sub Jul. II. & Leone X. celebratum Philosophos omnes sess. 8. excitet ut ad istam capitalem, in Christiana religione veritatem demonstrandam omnes ingenii vires adhibeant, nostræ sunt partes ex innumeris pene rationibus quas veteres & recentiores Philosophi attulerunt efficaciores in medium proferre.

Jacq. T. II.

D

CON.

CONCLUSIO.

MENS HUMANA EST IMMORTALIS.

Prob. 1. Nullo corruptionis genere mentem humanam interire naturaliter posse. Etenim substantia spiritualis nullo modo perire aut corrumpi naturaliter potest, atqui ex præcedenti conclusione mens humana est substantia spiritualis; Ergo & Prob. maj. Substantia spiritualis est substantia simplex seu nullis constans partibus (ex superiori conclusione,) atqui substantia simplex nullo modo perire aut corrumpi naturaliter potest. Ergo ... prob. min. 1. perire aut corrumpi non potest divisione aut dissolutione, cum sit partium expers & realiter indivisibilis 2. non compositione, quia licet ipsi annectantur vel alia quotlibet corpora aut mentes aliæ, semper in se simplex & eadem remanet. Etenim corpora aut mentes substantiam simplicem alterare aut interius mutare nequeunt; in ea enim nihil transponere, nullum motum internum concipere licet qui excitari, dirigi, augeri aut diminui possit; quemadmodum in compositis contingit, ubi mutatio inter partes locum habet. 3. Denique in substantia simplici intus non latent principia quæ eam annihilare vel destruere possint. Evidens enim est nullam substantiam posse semetipsam in nihilum redigere; etenim nihil in rerum naturâ sibiimetipsi contrarium est, sed res singulæ quæ existunt, habent semper in se rationem qua sunt id quod sunt. Nec minus evidens est substantiam partium expertem non posse nec divisione, nec compositione, nec motu nec alia quacumque ratione sese destruere. Ex his omnibus patet substantiam simplicem neque

que ab ulla causa extrinseca neque ab intrinseca naturaliter posse aut corrumpi aut destrui. Ergo substantia spiritualis ac proinde mens humana nullo corruptionis genere naturaliter interire potest.

Prob. 2. Mentem humanam a Deo nunquam annihilari, nec ita unquam mutari ut facultates vitales amittat, plurima proferuntur argumenta quorum præcipua seligemus.

Primum. Substantia spiritualis semel condita non est deterioris conditionis quam substantia corporea, atqui corpora semel creata Deus non annihilat, ergo nec substantias spirituales. Et certe cum reductio in nihilum ex se tam conceptu difficilis sit quam eductio e nihilo, Philosophis olim visum est *gigni de nihilo nihil, in nihilum nil posse reverti*, ex Persio Satyra 3. Hic igitur ordo ab omnipotente Deo in rebus creatis constitutus videtur ut quas e nihilo semel eduxit creaturas, perpetuo conservet, ideoque fieri non potest manente illo ordine quem in corporibus observari videmus, ut substantia spiritualis pereat. Hunc ordinem observari in mundo intellectuali sicut in materiali probare possemus ex variis Sacræ Scripturæ testimoniis, sed quia hic non revelatione sed ratione tantum naturali utimur, veritatem hanc demonstramus ex præstantia mentis humanæ & ex analogia cum corpore; si enim Deus conservat corpora omnia ita ut tot sint materiæ atomi quot ab initio fuerunt, quomodo fieri posset ut conditor optimus mentem humanam cujus officium est Deo vivere, & finis propter ipsum Deum vivere, destrueret, & æternum annihilaret?

2. Quædam sunt hic a nobis sumenda postulata quæ certe sine iniquitate summa negari non possunt. Primum est: humani generis

D 2

esse

esse initium, quod quidem ex omnium gentium historiis, ex eorum quæ narrant serie, ex artium novitate aliisque certissimis argumentis constat. Secundum est: Causam humana natura præstantiorem humano generi ortum dedisse; nam nihil potest per se e nihilo emergere. Tertium est: a supremo rerum omnium auctore nos hisce in terris positos fuisse; non ut nobis noceret, sed contra beneficeret; quod nobis constat ex omnis generis bonis quibus nos circumdedit beneficentissimum numen. Quartum est: eam esse humani generis constitutionem ut sine extremis malis homines mutuis officiis carere nequeant; quis enim solus in desertis sine ulla ope humana parare sibi poterit subsidia omnia ad vitam commode degendam & ad facultates suas perficiendas necessaria? His præmissis postulatis quæ in dubium vocari nequeunt, nunc fingamus omnia humanitatis officia sibi invicem homines exhibere, ita ut totum humanum genus amice convivere non secus ac cognati iique amicissimi vivere solent. Nihil videretur postea hominibus expetendum nisi ut morbis omnibus carerent; talisque vita æternum duraret; aut saltem, si amittenda esset, alia non deterior succederet. Hinc sequitur tot bona quæ a Deo accepimus, omnia futura esse inania, nisi perpetua felicitate fruamur. Nam quamvis bonis omnibus quæ in hac vita mortali possunt comparari, frueremur, quando iis carendum esset & moriendum, tunc temporis præterita omnia bona veluti in venenum conversa nos acerbissime cruciarent. Jam vero si moriendum esset sine ulla spe futuræ post hanc vitam beatitudinis, beneficum optimumque numen tot bonis videretur nos cumulasse non benefaciendi causa, sed potius ad irritandam nostram cupiditatem
cui

cui tamen nulla ratione satisfactum vellent, ita
 ut aliqua beatitudinis parte veluti nobis osten-
 sa eam subito omnemque spem eriperet, & nos
 ad ultimam desperationem radigeret, quo qui-
 dem crudelius nihil fieri potest. Igitur aut
 eum a quo tot & tanta beneficia collata sunt,
 omnium crudelissimum esse dicendum esset,
 aut ab eo negari beatitudinem quia eam dare
 non potest. Prius impium omnino est & ini-
 quum; Etenim qui nobis tot & tanta dedit
 bonitatis indicia, hunc crudelitatis suspectum
 habere impium simul & iniquum est. Æque
 absurdum est dicere Deum non posse nobis bea-
 titudinem dare; qui enim potuit efficere ut
 esse inciperemus, an non poterit efficere ut
 aut pars nostri post mortem æterna sit, aut
 totus homo etiam denuo vivat? posterius cer-
 te non est priori difficilior. Inde igitur colli-
 gere est Deum & velle & posse nos æterna do-
 nare beatitudine quam nos consequi non possu-
 mus, nisi saltem ea pars nostri quæ intelligit,
 vult, sentit, æternum vivat, ideoque nisi
 mens nostra sit immortalis. Hæc nostra ratio-
 cinatio demonstrat Deum bonitati suæ conve-
 nienter non acturum, si nullam hominibus æ-
 ternam beatitudinem concederet, quamvis al-
 lioquin omnes hujus vitæ bonis fuerentur. At
 multo majoris erit ponderis tota ratiocinatio,
 si quod res est, animadvertamus neminem his
 omnibus bonis frui non solum propter corporis
 infirmitatem aliosque inevitabiles casus, sed
 potissimum propter violatam legem quam na-
 tura ipsa & hominis constitutio nos docent.
 Etenim homines hic in terris a Deo collocati
 sese invicem adjuvare debent, eo miseres
 sunt quo minus sibi mutuo auxilium præbent,
 quo amplius autem eo feliciores. At quotidiana
 experientia notam est plerisque homines

affectibus obcæcatos, sibi invicem quam maxime possunt nocere. Unde aliquando infelicissima fit hæc vita, atque non raro contingit ut qui maxime omnium divinæ voluntati convenienter vivunt, aliosque homines beneficiis amice juvant, ii demum sint mortalium infelicissimi.

Hoc posito, quærendum an ex his quæ de Deo novimus, possimus conficere Deum aliquando tandem eorum habiturum esse rationem qui legem naturæ humanæ ab ipso Deo conditam observant, & tamen vitam infelicem degunt. Et certe qui vitam hominibus dedit non ut iis faceret male, eosque ita constitutos esse voluit ut mutuo auxilio indigerent, idem sine dubio vult ut sese adjuvent, ideoque eorum probat vitam qui id faciunt ad quod sunt a natura sua comparati; Credibile non est eos in hac vita miseros esse, neque post hanc vitam quidquam mercedis accipere; sibi metipsi contradiceret, qui homines ejus voluntati maxime obtemperantes omnium pessime haberi pateretur. Igitur ex miseriis quibus viri probi in hac vita sæpissime torquentur, certissime colligimus mentes esse immortales.

Tertium argumentum multa complectitur, & desumitur ex spiritali & incorruptibili mentis alimento, ipsa nimirum veritate quam sitit esuritque anima nostra, ex præteritorum memoria ac futurorum providentia, ex studio virtutis & famæ perennis consequendæ desiderio, ex conscientia stimulis quibus improbi in articulo mortis lacerantur, & ex conscientia bonæ testimonio quod bonos mira dulcedine & ineffabili quadam æternarum deliciarum prælibatione perfundit, ex consensu præstantissimorum sapientum tum apud gentiles, tum apud Christianos, imo etiam gentium maxime barbararum

rum

rum quibus sancta fuit sepulchrorum cura. Non leve etiam momentum habet consensus ætatum omnium, religio omnium populorum qui inferos timent & colunt. Maximum quoque argumentum est naturam ipsam de immortalitate animarum tacitam judicare, quod nempe *omnibus curæ sunt quæ post mortem futura sunt* ex Tull. lib. 2. Tusculan. quæst. Hæc autem omnia argumenta tantæ sunt evidentiz ut animos quoslibet ingenuos & veri amatores de sua immortalitate invictè persuadeant.

Objic. 1. Mens humana debet interire cum corpore, nascitur enim cum corpore, ergo non est immortalis Resp. N. ant. ad cujus probationem Dist. mens humana nascitur cum corpore, sed modo longe diverso G. ant. eodem modo N. ant. & Conf. Mentem humanam non interire cum corpore variis iisque invictissimis argumentis jam demonstravimus. Equidem anima nascitur cum corpore, sed modo penitus diverso; quippe corpus educitur e materia jam existente, anima vero creatur, seu e nihilo tam sui quam subjecti producitur. Quare non possunt interire mentes humanæ instar corporis per dissolutionem & separationem partium, sed tantum desinere per annihilationem; quod autem interire non potest nisi per annihilationem, immortale est ex natura sua, sed quæstio de origine animæ hic breviter tantum indicanda, quantum ad Metaphysicos pertinet. De mentis origine variæ fuerunt sententiæ, quæ tamen ad tres præcipuas referri possunt. Qui mentem corpoream statuunt, eam a parentibus una cum corpore generari ajunt; alii ab initio mundi eam a Deo sine corpore creatam fuisse dicunt. Alii denique eam a Deo creari & corpori, cum formatum est, immitti sentiunt.

I. Qui mentes corporeas esse, easque instar corporis extraduce propagari contendunt, satis refelluntur ex iis quæ de animæ spiritualitate demonstravimus. Fuere quidem nonnulli patres qui ut facilius peccati originalis transmissionem adversus Pelagianos explicarent, existimarunt quoddam esse veluti semen incorporeum quo animæ a parentibus traducerentur ad posteros, ea quæstione de animæ origine necdum eliquata & definita.

II. Qui animas initio mundi creatas ajunt, id absque ullo fundamento asserunt; Etenim quæ ratio unquam ab illis Philosophis allata fuit vel afferri unquam poterit qua ostendatur humanos animos ante corpora extitisse? Et quidem cum humanus animus regendo corpori accommodatus sit atque destinatus, longe verisimilius est ipsum tunc solum a Deo creari, cum corpori conjungi debet.

III. Per rationem solam demonstrari non potest, vel saltem hætenus demonstratum non est, mentes humanas a Deo creari & corpori conjungi eo momento quo formatum est. Præterea non potest accurate judicari quo tempore formatum sit corpus, neque etiam ratione sola invicte determinatur utrum in corpore imperfecto mens aliquandiu fuerit, nec tandem quo momento corpori perfecto jungatur, potest definiri.

Varias de animarum origine opiniones dubitanter proponit S. Aug. his verbis: *Harum autem sententiarum de anima utrum de propagatione veniant, an in singulis quibusque nascentibus mox fiant, an in corpora nascentium jam alicubi existentes vel mittantur divinitus, vel sua sponte labantur, nullam temere affirmari oportebit; aut enim nondum ista quæstio a divinorum librorum catholicis tractatoribus pro merito sua obscu-*

obscuritatis & perplexitatis evoluta atque illustrata est; aut si jam factum est, nondum in manus nostras hujusmodi litteræ pervenerunt. Verum in hac quæstione quæ sancti Augustini temporibus libere propugnata fuit, hoc hodie de fide certo tenendum est: animas non a parentibus generari, sed a Deo immediate creari, & corporibus quibus junguntur infundi.

Inst. 1. Mens humana pendet a corpore ut existat, ergo perit cum corpore. Prob. ant. mens humana non producit nisi dependenter a corpore, ergo &c. Resp. N. ant. ad cujus probationem Dist. non producit nisi dependenter a corpore tanquam ab occasione C. ant. tanquam a subiecto in quo & per quod existat N. ant. & conf. Si mens produceretur dependenter a corpore tanquam a subiecto in quo & per quod existeret, sicut rotunditas ceræ V.G. producit dependenter a cera in qua recipitur, penderet quidem a corpore ut existeret, ac pereunte corpore ipsa interiret; sed producit tantum dependenter a corpore tanquam ab occasione, quatenus scilicet conformato & organis sufficienter instructo corpore cum quo mens destinata est constituere totum hominem, statim determinatur Deus ad creandam animam huic corpori jungendam. Itaque anima non magis pendet a corpore ut existat, quam paries aliquis pendet ab alio pariete præexistente, ad cujus occasionem construitur ut cum illo domum efficiat.

Inst. 2. Mens humana pendet a corpore ut operetur, ergo ut existat. . . . Resp. Dist. ant. pendet a corpore ut operetur tanquam ab occasione C. ant. tanquam a principio suarum operationum N. ant. & conf. Corpus non cogitat, non percipit, non vult, non sentit, ergo non est principium operationum animæ, sed est

tantum occasio cogitandi, quatenus scilicet propter leges commercii quod est inter illas duas hominis partes tam dispares, mens determinatur ad cogitandum ex occasione motuum qui fiunt in corpore, præsertim in cerebro; corpus enim per se & proprie non agit in animam spirituales. Porro quamvis *occasionis* nomen hic & alibi usurpemus, non tamen intelligendum est quasi *causarum occasionalium* systemati faveamus. Hoc vocabulo nihil aliud significamus nisi conjunctionis legem inter corpus & animam, quæcumque sit lex illa de qua in metaphysices progressu sermonem habebimus.

Inst. 3. Mens non potest operari nisi dependenter a corpore tanquam ab occasione, ergo extra corpus non potest operari. Res. Dist. ant. Mens dum unita est corpori non potest operari nisi dependenter a corpore tanquam ab occasione, esto ant. postquam separata est a corpore. N. ant. & conf. Distingui debet duplex status mentis humanæ, alius cum est unita corpori, alius cum est separata a corpore. In primo statu æquum fuisse videtur ut anima cogitaret dependenter a corpore, excitata scilicet per motus varios in organis sensoriiis impressos, sic nimirum instituyente Deo. In altero autem statu nempe a corpore separata, & carnis quasi compedibus soluta, operari poterit modo longe nobiliore sibi que magis conveniente, per intellectiones puras sine ulla phantasmatum admixtione. Nihil etiam ob stare videtur quominus anima a corpore separata easdem & similes habere possit sensationes eademque percipere phantasmata, non secus ac dum corpori conjuncta est. Etenim quis neget, animam a corpore sejunctam objecta sensibilia eorumque qualitates posse percipere? quandoquidem.

dem etiam dum est conjuncta corpori, ipsa, non corpus percipit, eadem vero causa quæ ex occasione motuum corporis perceptiones animæ producit, easdem similesve perceptiones sine illis motibus producere poterit.

Inst. 3. Mens extra corpus esset in statu violento, ergo naturaliter non potest existere separata a corpore. . . . Resp. 1. permissio antecedente. N. C. quod substantia sit in statu violento, non sequitur eam continuo in nihilum redigi, nisi substantia illa sit corporea cujus partes dissolvi possunt. Unde animæ damnatorum quæ simplices sunt, etiamsi in statu violento versentur, non tamen idcirco pereunt; sed dolori suo in perpetuum vivunt. . . . Resp. 2. N. ant. Equidem animæ violentum est a corpore separari propter naturalem in corpus propensionem; at non probant adversarii eam a corpore separatam esse in statu violento; nam etiamsi anima hujusmodi propensionem servaret, non tamen dici posset in statu violento, in eo saltem sensu quod corporis præsentia carere non possit. Et certe animæ beatæ & intime cum Deo conjunctæ minime sunt in statu violento qui earum obstaret felicitati.

Inst. 4. Saltem anima a corpore separata non poterit ullas sensationes habere, ergo erit in statu violento. Resp. Dist. ant. Non poterit sensationes habere, si per sensationem intelligas perceptionem impressionis alicujus factæ in corpus C. A. si intelligas interiorem affectionem animæ, qualis ipsi advenire solet ex occasione corporis, N. ant. & conseq. Equidem si sensatio sumatur pro perceptione alicujus impressionis factæ in corpus, mens extra corpus nullam sensationem habere potest; cum enim corpori destinat esse conjuncta, illius motibus tanquam occasionibus non afficitur. At si sensatio

sumatur pro interiori ipsius humanæ mentis affectione quæ occasionem habere solet a corpore, certe mens a corpore separata sentire potest; etenim iisdem perceptionibus tunc affici potest, Deo volente, quibus afficitur ubi corpori est sociata, cum eo tantum discrimine quod ubi corpori sociata est, illas perceptiones accipit ab objectis externis *mediate*, scilicet mediante corpore suo; ubi vero a corpore soluta est, easdem aut similes perceptiones ab iisdem objectis poterit *immediate* recipere.

Objic. 2. Mens humana est essentialiter forma corporis, ergo pendet a corpore ut existat... Resp. Dist. ant. Est essentialiter forma corporis secundum *aptitudinem*, C. A. secundum *actua-lem informationem*, N. A. & Conf. Mens ex propria conditione apta est conjungi corpori & cum eo totum substantiale componere; sed cum sit substantia a corpore omnino distincta & extra corpus agere possit, non est de ejus essentia ut corpori jungatur. Hanc difficultatem fusius deinde explicabimus.

Inst. Mens humana est pars hominis, ideoque substantia *incompleta*, ergo de ejus essentia est ut actu conjungatur corpori... Resp. N. conf. Mens humana non dicitur incompleta eo sensu quod sit quasi dimidia substantiæ cui desit aliquid ad rationem substantiæ; sed eo tantum sensu quod sit apta ad corpus informandum, & hominem una cum corpore constituendum.

Objic. 3. Quod crescit, viget, deficit cum corpore, quod omnibus corporis mutationibus est obnoxium, debet dissolvi & interire cum corpore, atqui mens humana &c., crescit enim in pueris, viget in juvenibus, deficit in senibus, sana est in sanis, ægra in ægris.... Resp. Dist. Maj. Si hæc omnia menti realiter non secus ac corpori contingant. C. Maj. Si appa-
ren-

METAPHYS. PARS II. CAP. I. 85

renter tantum & ex occasione corporis N. Maj. D. M. N. C. Illæ igitur mutationes quæ videntur menti humanæ contingere, ipsi revera non accidunt, sed sunt propriæ solius corporis cuius organis mutatis necesse est ut anima videatur mutata, propter arctissimam quam habet cum corpore conjunctionem. Itaque mens non *ratione sui*, sed *apparenter* tantum crescit, viget ac deficit, scilicet quandiu mens conjuncta est corpori, ea videtur esse conjunctio a Deo instituta ut nullæ oriantur in mente cogitationes quas statim non consequantur aliqui spirituum animalium motus in organis corporis & præsertim in cerebro, & vicissim nulli fiant spirituum animalium motus saltem aliqua ratione, quin illico mens ad varias cogitationes pro illorum motuum varietate determinetur. Unde cum imbecilla sint & imperfecta corporis organa; dum nimis molle est ac fluidum cerebrum, non tam facile nec tam constanter mens determinatur ad cogitandum, vel etiam pluribus cogitationibus occupata continuo distrahitur ob levitatem spirituum & delicatorem totius corporis habitudinem. Hinc levitas & inconstantia puerorum qui seriis rebus vix possunt attendere; hinc eorum difficultas & impotentia ideas inter se comparandi & ratiocinandi; quia non satis diu eadem ideæ menti præsentibus retineri possunt, & illorum attentio nimis occupatur, imo tota a vividioribus sensationibus exhauritur. At quo magis explicantur & inter se ordinantur organa cerebri, quo solidiora fiunt ac firmitiora, quo liberior spirituum aditus & fluxus per eorum meatus, eo magis crescere atque vigere ipsa mens videtur, quia facilius, promptius, & fortius determinatur ad cogitandum, tumque diutius retinet easdem ideas quas inter se comparare potest, nec tam facile distrahitur atque

atque idcirco mens in viris firma est; dum vero deficiunt spiritus animales, dum exsiccantur rigescuntque organa humoris defectu atque inopia, vel nimia humoris copia recluduntur organorum meatus, tum ipsa vis cogitandi languere videtur, ut contingit in decrepitis senibus. Ob easdem rationes mens turbatur in ebriis & phreneticis, quia cum abundet ferveatque nimius sanguinis & spirituum æstus, hinc oritur violenta fibrarum cerebri & articularum agitatio, multæque promiscue & tumultuose excitantur ideæ, dum per cerebri vestigia cum impetu & sine ordine currunt spiritus, tumque in musculos fluunt turmatim ad varios motus inconcinnos & convulsivos similes excitandos. Contra in lethargicis suffuso aqueis humoribus cerebro & spiritibus implicatis, vacui laborant residuntque nervi & musculi; unde stupor altus & diuturnus obrepit, totumque corpus occupat. In his autem omnibus casibus aut morbis, non ipsa mens sed cerebrum curatione indiget; nec substantia spiritalis istas in seipsa patitur vicissitudines, sed tantum propter suam cum corpore connexionem a quo pendet tanquam ab instrumento cogitandi male affecto, sicut fere manus scribentis pendet a vitio aut perfectione calami; quapropter mens a corpore soluta nec jam organis ejus obnoxia prorsus immunis erit ab illis mutationibus extrinsecis.

Inst. Ipsa mens humana obnoxia est innumeris mutationibus; Ergo naturaliter interire debet..... Resp. Dist. antec. obnoxia est mutationibus *accidentalibus* Con. Ant.: *substantialibus* N. A. & conf. Equidem mens obnoxia est variis mutationibus quia capax est diversarum operationum & modificationum, sed illæ mutationes sunt mere accidentales, quippe sub-

substantia animæ varias & oppositas suscipiens modificationes, ipsa quidem mutatur, sed totam sui essentiam semper retinet. Præterea quod diligenter animadvertendum est, modificationes oppositæ, volitiones scilicet & nolitiones, amor & odium sibi succedunt in eadem anima, sed sine ulla divisione & separatione partium in subiecto; at modificationes corporis quæ sibi succedunt in eodem subiecto, longe aliter se habent. Igitur diversæ & oppositæ modificationes quæ possunt mutare substantiam ipsam & subiecti corporei interitum importare, idem non possunt in substantiam spiritualem & simplicem, qualis est mens humana.

Objic. 4. Ex animæ spiritualitate non colligitur illius immortalitas; Ergo nulla sunt argumenta quibus animæ immortalitatem demonstrare volumus Resp. N. ant. Etenim substantia partium expers ex natura sua immortalis est. Præterea etiam si permittimus ant. negare tamen possemus consequentiam; non enim solo hoc argumento usi sumus, verum & pluribus aliis; argumentati enim sumus ex consensu hominum, ex conscientiarum stimulis, ex iustitia Dei, aliaque plurima adhibuimus argumenta.

Inst. Quod cogitat est spirituale: sed Brutorum animæ cogitant, ergo sunt spirituales; atqui tamen morte pereunt cum corpore, ergo licet mens humana spiritualis & simplex sit, minime sequitur eam esse immortalem Singulæ hujus argumenti propositiones facile probantur. 1. *Quod cogitat est spirituale*, jam a nobis ipsis fuit fuse demonstrata. 2. *Brutorum animæ cogitant*: ex Brutorum actionibus est manifesta; Innumera enim quotidie videmus a brutis animantibus fieri, quæ sine cogitatione nullo modo explicari possunt; Ita se-
 lium.

lium solertia & dexteritas in capiendis muribus, ita fidelitas Canum erga Dominos, ita ars imitandi in simiis, ita innumera alia omnibus obvia & notissima, quæ fufius persequi superfluum est, sensum & cogitationem in brutis demonstrant, nec mechanice fieri possunt. Hæc altera propositio: *Animæ brutorum cum corpore pereunt*, ab omnibus, si paucos metempsychosis aut harmoniæ præstabilitæ patronos excipias, admittitur. Et quidem si anima Bruti est spiritalis & immortalis, quid agitur de innumeris illis tot animalculorum animabus immortalibus? An de corpore in corpora transmigrant? An entia in mundo inutilia sunt post corporis interitum? Præterea quemadmodum crudelis merito dicitur homo qui hominem occidit cujus anima est immortalis, ita non sine crudelitate summa perirent tot animalia quorum animæ immortales essent.

Respondent Cartesiani negando bruta animantia cogitare aut proprie sentire aut ullam illis esse animam a corpore distinctam, multisque rationibus probare nituntur Deum potuisse facere corpus bruti quale est, ita ut sine ulla anima & per solum corporis *mechanismum* omnes quas in brutis miramur actiones, obiret. Totam, quantam possunt, suæ hypothesei probabilitatem conciliant Cartesiani his aliisque similibus exemplis & rationibus. Ea est hominum industria ut machinas brutis animantibus fere similes fingere potuerint. Fertur Joannes Regiomontanus aquilam ligneam fecisse quæ in aeræ sese recipiens Imperatori Norimbergam tendenti viam demonstravit; muscam quoque volatilem finxisse dicitur. Notissima sunt omnibus quæ narrantur de fictili capite Alberti Magni quod verba quædam protulisse legitur. Nec minus stupenda est structura ferreæ statuæ quæ per varios

an.

anfractus ad Regem perrexit, flexisque genibus & libello supplici oblato, libertatem auctori suo captivo imploravit & eadem via reversa est; sed quidquid sit de illis quæ jactantur artis mechanicæ portentis, certissima est & fere incredibilis artificum quorundam industria quæ tanta fuit ut difficiliores animalium motus imitari fuerint & in variis machinis expresserint. Porro si tantum potuit humana dexteritas, quid non poterit infinita Dei potentia cui certe nulli limites præscribi possunt? Igitur non repugnat soli mechanismo tribui omnes quas miramur brutorum operationes. Porro *natura simplex est*, ut vulgare fert philosophicum axioma, atque *frustra fit per plura quod fieri potest per pauciora*. En speciosissimam Cartesianorum argumentationem.

Respondent vulgo alii, maximum esse inter bruti & hominis animas discrimen. Homo enim ideas abstractas format, veritates necessarias & æternas ac semetipsum actu reflexo cognoscit, ac tandem ratiocinatur; at Bruta sensationibus tantum aguntur, res singulares & corporeas dumtaxat percipiunt, actus reflexos non eliciunt, neque ullo modo ratiocinantur aut unum ex alio deducunt. Unde concludunt brutorum animam non esse spirituales sed materiales. Verum hac ratione convellitur argumentum, quo probatur cogitationem non nisi substantiæ simplici posse convenire, ideoque nulla est ratiocinatio inde deducta ad statuendam mentis humanæ immortalitatem. Et certe fatendum est mentis humanæ spiritualitatem ac immortalitatem aliis plurimis rationibus comprobari quæ ad bruta transferri nequeunt, sed tamen validum illud argumentum elevaretur hoc, si verum esset, Peripateticorum responso. At ipsi facile satisfacere non possunt his questionibus: quomodo concipiant cogitationem inesse

esse posse substantiæ extensæ & partibus compositæ ? Qua ratione statuant bruta nullo modo ratiocinari ? Unde per rationem solam sciant ideas abstractas & ratiocinandi facultatem non posse esse nisi in substantia simplici, ideas vero singulares atque memoriam posse esse in substantia composita & extensa.

Respondent alii, nihil, si rationem solam consulamus, ob stare quominus belluis tribuatur aliqua ratio imperfecta, & substantia spiritualis inferioris ordinis. Qua enim, inquiunt, ratione humana demonstrari potest Deum naturas quasdam intelligentes minus perfectas ac in breve tempus duraturas non creasse ? Sed hac responsione subvertitur principium istud, Deum nullam substantiam annihilare. Si vero animæ illæ brutorum immortales dicuntur, jam vel metempsychosis absurda opinio admittenda, vel respondere coguntur hujus sententiæ auctores gravissimis difficultatibus quæ proponi possunt circa statum earundem animarum postquam a corpore sejunctæ sunt.

Nos vero in hac tanta opinionum varietate, in hac rei ipsius obscuritate dicimus, non ideo neganda esse quæ clara sunt, eo quod obscura quædam evolvere aut mente capere nequeamus ; cum vero argumenta quibus mentis humanæ spiritualitatem & immortalitatem comprobamus, valida certe sint atque perspicua, objectiones ex ignota brutorum natura desumptæ certa & evidentiâ argumenta non labefactant. Igitur his aliisque id genus plurimis quæstionibus non alio respondemus modo, quam candida ignorantiae nostræ confessione, fatemur scilicet hoc nobis esse per solam rationem incognitum ; hic tantum pro anima nostra pugnamus, sed ratione sola, neque omnibus difficultatibus ex incognita belluarum anima satisfacere

facere possumus : argumentum nobis oppositum est ad ignorantiam non ad iudicium ; Contra vero argumenta pro spiritualitate & immortalitate animæ sunt ad iudicium atque desumpta ex ipsius rei natura. Id autem maxime cavendum est ne certissimas demonstrationes philosophicis opinionibus misceamus ; atque religiosissime præsertim servari debet hæc regula , si agatur de sanctissimis fidei nostræ decretis .

Objic. 5. Sapientiz cap. 20. legitur : *post hoc , id est post mortem , erimus tamquam non fuimus Cinis erit corpus nostrum , & spiritus diffundetur tamquam mollis aer ; Ergo mens aura tenuis quæ homine moriente evanescit* Resp. N. Conf. Non ex propria persona Sapiens loquitur ; sed ex persona impiorum , ut capitis initio admonet : *dixerunt impii cogitantes apud se non recte : & vers. 2. subjungit : Hæc cogitaverunt impii & erraverunt nec judicaverunt honorem animarum sanctarum , quoniam creavit Deus hominem inextermabilem , & ad imaginem similitudinis suæ fecit illum .*

Inst. 1. Ecclesiastes cap. 3. v. 19. ex propria persona loquens sic ait : *Unus interitus est hominis & jumentorum & æqua utriusque conditio , sicut moritur homo , sic & illa moriuntur nihil habet homo jumento amplius ; Ergo tam moritur anima hominis quam belluæ* Resp. N. Conf. Nam hæc Scripturæ verba non debent intelligi de mente humana , sed de vita hominis animali , quæ non magis stabilis est , quam bruti cujuslibet . In hoc toto libro declarat Ecclesiastes præsentium & sensibilibum bonorum vanitatem , nosque admonet ut ad vitam æternam & bona increata aspiremus , antequam revertatur pulvis in terram suam unde erat , & spiritus redeat ad Deum qui dedit illum , cap. ult. v. 4.

Inst.

Inst. 2. Eodem cap. 3. v. 21. ait Ecclesiastes: *quis novit si spiritus filiorum Adam ascendat sursum, & si spiritus jumentorum descendat deorsum?* Ergo æqualis est conditio hominis cum jumento etiam quoad interitum. Resp. N. conf. Verba Ecclesiastis non sunt dubitantis, sed inerepantis amorem sensibilibus, & damnantis judicia, in quibus plus sensibus, & sensuum præjudiciis tribuimus, quam rationi & auctoritati divinæ. Si omnia velimus metiri sensibus: *quis novit, si spiritus filiorum Adam ascendat sursum.* Hinc ait Deum probare voluisse hominis fidem, quod nempe, quantum sensus suadent, habeat interitum cum bel-luis, certus tamen esse debeat ex puræ rationis lumine, & ex divina auctoritate se esse immortalem quoad mentem, seu spiritum qui ad Deum reversurus est.

Inst. 3. Ex 1. ad Tim. cap. 6. v. 16. *Deus solus habet immortalitatem*; Ergo &c. Resp. Dist. ant. a se ipso, & necessariam immortalitatem. Con. Ant. ab alio, Neg. Ant. & Con. Equidem solus Deus est immortalis immortalitate necessaria, & nullo indigente conservatore; mens autem humana indiget conservari a Deo, ut æternum existat. Pariter, quod dicitur in 6. Synodo œcumenica, animam, non naturam, sed gratia Dei esse immortalem, eo sensu intelligendum est, quod Anima immortalitatem habeat Deo volente & conservante, quæ conservatio est indebita naturæ, sed est ex sola gratia.

C A P U T II.

De mente humana in ordine ad corpus.

DE mente humana sic spectata tria considerari possunt : 1. quomodo corpori jungatur , & quænam sint hac de re Philosophorum hypotheser : 2. quænam sint præcipuæ sensationum leges , & in qua præsertim corporis parte anima residere videatur : 3. Tandem , quia imaginatio , & memoria ad corporis animæque conjunctionem maxime referuntur , de imaginatione , & memoria sermo habebitur .

A R T I C U L U S I.

Quomodo Anima corpori jungatur , & quænam sint conjunctionis leges .

I. **S**ubstantia spiritualis corpori conjuncta dicitur variis modis . Si anima de aliquo objecto cogitet , huic objecto veluti præsens fit , & hæc conjunctio dicitur *assistentiæ* . Spiritus potest corpori conjungi , ita ut pro arbitrio suæ voluntatis moveatur corpus , & illa conjunctio dicitur , vel *assumptionis* qualis est inter Angelum , & corpus aereum , quod sibi assumit , aut dicitur conjunctio *possessiois* , ut cum spiritus malus Energumeni corpus agitat contra voluntatem hominis . Corpus aliquod ita etiam potest cum spiritu conjungi , ut moto corpore spiritus sentiat , licet volente spiritu corpus non moveatur ; sic intelliguntur dæmones , & animæ damnatorum in inferis cum igne materiali conjungi . Tandem spiritus ita potest corpori conjungi , ut mutua sit connexio inter spiritus cogitationes , & certos motus corporis , ac vicissim ,

voluntarios . Porro ut anima hunc in corpore motum producat , necessum est vim quamdam animæ transire in corpus , eamque in vim *motricem* mutari ; contra autem dum corpus influit in animam , vis *motrix* corporis transit in animam , & in vim aliam transformatur ; cum vis motrix soli materiæ competere possit . Hinc vis aliqua motrix , quæ materiæ prius inhærebat , perit , dum corpus agit in animam ; dum vero anima agit in corpus , oritur vis motrix , quæ antea non erat , ac in illo systemate non conservatur in universo eadem virium *motricium* quantitas . Hoc est *influxus physici* systema , quod quidem non parum difficultatis habet ; intelligi enim nequaquam potest , quomodo anima physice agat in corpora & vicissim .

Causæ occasionales dicuntur , quæ vi agendi propria destituuntur , agendi tamen occasionem præbent ; Hæ igitur causæ opponuntur causis physicis , quæ vi agendi propria instructæ sunt . Ita in systemate influxus physici corpus , & anima sunt causæ physicæ ; contra vero in systemate causarum *occasionalium* Deus *modificat* animam in gratiam corporis , & corpus in gratiam animæ , producendo scilicet has ideas non alias , quia hi sunt in corpore motus , non alii ; & producendo hos corporis motus non alios , quia anima has non alias habet perceptiones . Unde apparet in hoc systemate animam destitui vi *activa* , qua motus in corpore producitur , & tantummodo per suas volitiones occasionem præbere Deo hos motus producendi ; similiter corpus per motus suos occasionem Deo præbet producendi has in anima ideas . Hinc juxta systema causarum occasionalium Deus hæc constituit leges . 1. Quoties organi sensorii motus ad cerebrum propagatur , toties in anima oriri debet idea *sensualis* , ob
mu-

mutationem in organo sensorio factam, atque huic mutationi idea quoque sensualis in anima coexistere debet. 2. Quoties animæ eadem est motus cujusdam volitio, toties quoque idem in corpore oriri debet motus per organorum constitutionem possibilis; & quoniam ista volitio in anima existit, eidem quoque motus coexistere debet, ac proinde Deus in hoc systemate ita modificat animam in gratiam corporis non secus, ac si corpus in animam influeret, seu vi sua motum corporis produceret. Hoc est percelebre systema causarum occasionalium, in quo quidem salva esse non posse videretur voluntatis libertas, si animæ adimeretur omnis vis activa, ita ut Deus in eadem producat omnes perceptiones, appetitiones, volitiones. Si vero Deus animæ vim tantummodo dirigit in percipiendo, vel si perceptione sensibilis objecti, quæ motus organici occasione producitur, ipsa anima deinde agit, & suas appetitiones elicit per systema causarum occasionalium, libertati nulla vis inferitur.

In systemate harmoniæ præstabilitæ ponitur in anima series perceptionum, & volitionum vi propria productarum, sine ulla a corpore *dependentia*. Similiter in corpore datur series quædam motuum vi *mechanismi* ex se invicem nascentium, qui pendent ab impressionibus externis in organa sensoria factis; neque corpus pendet ab anima, ita ut sine corpore anima eadem haberet perceptiones, & volitiones quas habet, & in corpore idem producerentur motus, qui producuntur etiam si anima non existeret. Porro singulæ perceptiones animæ consentiunt singulis corporis motibus, ita ut idem omnino contingat, ac si corpus in animam, & anima in corpus influeret. Nec tamen volunt hujus systematis patroni Deum effecisse corpus

Jacq. T. II,

E

jux-

juxta seriem perceptionum, & appetitionum animæ, atque animam juxta seriem motuum corporis, quod libertati manifeste repugnaret; sed unice asserunt appetitiones animæ nasci ex perceptionibus, Deum autem harmoniam tantum constituisse inter motus corporeos, & perceptiones animæ, non vero inter appetitiones ejus, itaut anima ex perceptionibus suis libere eliciat volitiones suas *independenter* à corpore, utpote tales futuras etiamsi nullum corpus ipsi coexistere. Hoc est celeberrimum systema, quod *harmonia præstabilita* dicitur, in quo quidem præter alias plurimas deinde exponendas difficultates, hæc remanet gravissima, quod motus corporis sint necessarii, cum alii esse non possint, quam qui sunt actu. Et quidem Leibnitius ipse cum absurda plurima probe intelligeret, quæ ex ipsius hypothese necessario manabant, ingenue testatus est se hypothese illam non serio, graviterque proponere. Ita enim scribit ad *Plafium*: *Neque philosophorum est rem serio semper agere, qui in fingendis hypothesebus ingenii sui vires experiuntur.*

IV. Cum his quæ hætenus explicavimus conjuncta est vulgatissima apud Scholasticos quaestio, qua scilicet ratione anima dici possit *forma substantialis* corporis. Facile solvi videtur quaestio, si dicatur cum Cartesio animam ex sola Dei destinatione, & libero decreto esse formam substantialem corporis, itaut ex se, & ex natura sua non exigit conjunctionem cum corpore. At alii non pauci volunt huic opinioni adversari auctoritatem sanctorum Patrum, qui proscribunt sententiam Origenis nullum asserentis esse discrimen naturale animas inter & Angelos, sed illas in corpora tamquam in ergastula detrudi, in pœnam scilicet criminum ante suam cum corpore conjunctionem admissorum. Verum
duo

duo in hac Origenis sententia distingui possunt; duo quippe dicit Origenes. 1. Animam humanam non esse ex natura sua formam corporis. 2. Eandem animam informare corpus jussu Dei eam punientis; illud secundum error est manifestus a Patribus merito damnatus. At non ita certum videtur primum fuisse a Patribus reprobaturum. Definitum videtur in Conciliis Lateranensi & Viennensi, animam per se, & *essentialiter* esse humani corporis formam. Cartesiani Conciliorum definitionem eo sensu intelligunt, quod anima spectata *formaliter* ut anima, hoc est, ut actu conjuncta corpori, sit forma corporis. Sed hæc explicatio displicet multis, qui volunt definitionem Conciliorum intelligendam esse de anima *simpliciter & absolute* considerata. Quapropter contendunt animam ex se, & ex natura sua exigere conjunctionem cum corpore. Exigentiam illam alii inde repetunt, quod anima separata non possit exercere quasdam facultates sibi essentielles, ut facultatem videndi, audiendi, &c. Alii autem inde exigentiam illam ducunt, quod anima talis sit naturæ, ut cogitandi vis sensationibus corporeis plurimum adjuvetur. Sed hæc omnia videntur gratis affirmari, nec satis rationi consona; unde vix quidquam certi de hac re non satis cognita, & terminis æquivocis implicata statui posse videtur; certum quidem est animam esse formam corporis, eo sensu quod corpus perficiat, quod ipsum reddat corpus hominis, quodque cum ipso corpore totum quoddam substantiale, unicumque suppositum, nempe hominem constituat. At quid sit, & an existat illa exigentia essentialis animæ, ut corpori jungatur, non satis intelligimus. His præmissis, intricatissimam de hujus conjunctionis legibus quæstionem sequenti conclusionem examinabimus.

CONCLUSIO.

AD EXPLICANDUM COMMERCIIUM MENTIS
CUM CORPORE NULLA VIDETUR ESSE RA-
TIO, CUR RELICTA COMMUNI SENTENTIA
DE INFLUXU PHYSICO, HYPOTHESIM CAU-
SARUM OCCASIONALIUM, VEL HARMO-
NIÆ PRÆSTABILITÆ AMPECTAMUR; IMO
PRIMA HYPOTHESIS DIFFICULTATIBUS GRA-
VISSIMIS EST OBNOXIA, GRAVIORIBUS AU-
TEM ALTERA, ET OMNINO REJICIENDA.

Prob. Omnes homines qui Cartesiana, vel
Leibnitiana Hypothesi præoccupatum non habent
animum, hoc est universum fere humanum ge-
nus sponte quadam naturæ judicant animam
in corpus, & corpus in animam vere agere;
imo ex ipsa corporum in animam actione,
quam continuis sensationibus percipiunt, certif-
sime judicant existere corpora, atque hæc est
veluti naturæ vox, quam qui non audiunt,
contra communem omnium fere hominum sen-
sum peccare videntur. Porro communi fere
omnium hominum sententiæ, & naturæ voci
adhærere potius debemus, quam novas finge-
re hypotheses non solum inutiles, sed etiam
periculosas. Et quidem prædictas hypotheses
minime necessarias esse facile patet; ecquis e-
nim nitide certoque ostendet, quod incorporei
quoque animi motus ad corpus ipsum diffun-
di, ipsum afficere ac movere non possint?
Certe Dei substantia quamvis incorporea, sim-
plex, atque a materia, vel corporis indole
omnino distincta, cum tamen ille infinita a-
gendi vi præditus sit, corpus creare, dispone-
re, & quo libuerit impellere profecto potest.
Quid

Quid ergo prohibet, quominus Deus creatis etiam spiritibus, animisque nostris quos regendo corpori destinavit, eam quoque vim concesserit, ut corpus ipsum movere possint, & voluntatis actus, qui in animo excitantur, in corpus ipsum, non corporeo quidem, sed physico tamen veroque influxu agant; ideoque corporeum motum, incorporeo voluntatis actui consonum producant. Ex his igitur patet ignotas quidem nobis esse hujus actionis leges; hanc tamen veram, physicamque corporis & animæ in se mutuo actionem impossibilem esse nulla ratione ostendi potest, ac proinde sine ulla necessitate finguntur hypotheser aliar, quæ quidem nec facilius intelliguntur, nec etiam sine aliquo periculo propugnantur. Et certe ut prætermittam gravissimas sane de animæ libertate difficultates, deinde fusius declarandas, Cartesiana causarum occasionalium hypothesis, & Leibnitiana Harmoniæ præstabilitæ opinio omnem de corporum existentia philosophicam certitudinem everterent; Deus enim in hypothesi causarum occasionalium, non corpus in anima nostra sensationes produceret; in hypothesi autem Harmoniæ præstabilitæ anima per naturam suam, nullo existente corpore, easdem sensationes haberet, quas nunc experitur. Ex his igitur Cartesii, atque Leibnitii hypothesibus lubrica est via ad *idealismum*, quo omnis materiæ tamquam inutilis existentia negatur. Et re quidem ipsa a Cartesii & Leibnitii temporibus plures in hunc absurdum errorem prolapsi sunt, atque etiam aliqui in aliud adhuc absurdior, quem *Egoismum* vocant, delirantes scilicet propriam dumtaxat sui ipsius existentiam certo cognitam esse.

Hæ sunt gravissimæ difficultates utrique hypothesi communes. Verum gravioribus incom-

modis laborat Leibnitiana hypothesis, eaque est omnino rejicienda. Et quidem in hac hypothesi nullum est corpus inter, & animam commercium, anima se habet veluti *automaton* spirituale, corpus autem velut *automaton* materiale, ac proinde motus corporei a voluntate nequaquam penderent, sed forent absolute necessarii; ideoque & necessariae forent volitiones nostrae, quae cum motibus corporeis, harmonia quadam, sine ulla tamen dependentia colligatae finguntur. Tandem mutuae hujus societatis inter corpus, & animam nobis intime conscii sumus, nec eam minus clare novimus, quam proprii corporis existentiam. Porro si constans ac perpetuum conscientiae nostrae testimonium illusionibus, atque fallaciis obnoxium esse possit, jam nihil certum est, & universalis Pyrrhonismus inducitur. Ergo probatae manent singulae conclusionis partes, quae quidem ex solvendis objectionibus magis, ac magis confirmabuntur.

Objic: Impossibile omnino est substantiam simplicem & inextensam, qualis est anima, agere in substantiam extensam, quale est corpus; talis actio mutua naturae ordini & motuum legibus omnino contraria est; ergo impossibilis est influxus physicus.... Resp. Neg. ant. Quamvis nesciamus quomodo mens simplex in corpus agat, non ideo tamen actio illa neganda est; hæc enim ignorantia nostra non magis probat nullam esse mutuam actionem corporis, & animae, quam cæci nati ignorantia probet ab aliis hominibus lumen, ac colores corporumque distantium motus non posse visione, cujus nullam ideam habet, percipi. Multa sunt in intima natura, atque essentia, tum corporis, tum animae, quae nobis sunt ignota, & quorum conscii non sumus, videturque a sapientissimo naturae Auctore id tantum nobis concessum esse, ut ea
dun-

duntaxat cognosceremus, quæ ad hujus vitæ usum, & ad aliam meliorem vitam consequendam sufficiunt. Cartesianorum & Leibnitianorum argumenta invictè quidem demonstrant, nec mentem in corpus, nec corpus in mentem agere, quemadmodum corpus in alterum corpus agit, sed non probant substantiam unam non posse agere in alteram aliquo modo, cujus nullam ideam habemus. Quamvis ergo physicas motuum leges in animæ, corporisque commercio non servari concedamus, inde tamen minime sequitur entia intelligentia, atque liberæ vim a Deo non accepisse motus aliquos in corporibus producendi, juxta leges alias ipsorum naturæ convenientes.

Inst. 1. Licitum est imo necessarium ad primam causam recurrere, si causæ secundæ non sufficiunt, nihil autem aliud fit in hypothesi causarum occasionalium; atque in hac hypothesi nullum admittitur miraculum proprie dictum, cum omnia fiant secundum leges naturales a Deo constitutas, ac proinde ordini naturæ convenientes. Neque incerta redditur corporum existentia; Deus enim summe verax velle non potest, ut perpetuis illusionibus decipiamur. Tandem vim activam voluntati non detrahit hypothesis Cartesianæ; ipsa etenim voluntas data motuum corporum occasione deinde agit, & suas operationes libere elicit. Unde sic argumentari licet: influxus physici hypothesis tanquam minus probabilis rejici debet, si causarum occasionalium systema, & facilius sit intellectu, & nullis incommodis obnoxium; atqui &c. Ergo &c. Resp. C maj. N. min. Et ad singulas argumenti partes respondeo. Et 1. quidem in effectuum naturalium, rerumque omnium explicatione ad primam tandem causam recurrendum est; verum id facere non debent Philosophi, si causæ

secundæ suppetant quæ quidem omnes ad primam referuntur . Porro in præsentī quæstione ad primam causam immediate confugere necessarium non est, nisi demonstretur impossibile esse influxum physicum, quod quidem nulla ratione ostendi posse jam probatum est. 2. In hypothesi causarum occasionalium ex infinita Dei veracitate, & ex revelatione ostendi quidem potest corporum existentia, sed adimeretur saltem aliud probationis genus quod ex nostris sensationibus oritur; & quidem non sine periculo quod vitari debet, præsertim si alia plurima incertæ vel etiam falsæ hypotheseos non desint argumenta, quæ in sequenti responsione exponuntur. 3. Tandem in eadem hypothesi vix ac ne vix quidem intelligi ac explicari poterit ius ac imperium illud, quod animæ in corpus concessum fuit; Si enim corpus ipsum ab anima non veluti efficiente sed occasionali solum causa moveretur, corporis motus non ab anima sed a Deo producerentur. Huic autem difficultati accedit etiam quod ubi voluntatis actus in anima excitatus fuerit, corporeus motus illi consonus aliquando facilius, difficilior aliquando in corpore excitari conspicitur; quod optime profecto explicari & intelligi poterit, si motus ille ab anima veluti efficienti causa repetatur, quæ modo languidius modo vividius in corpore operari, ejusque resistantiam modo lentius, modo celerius superare possit; Vix autem concipi vel explicari potest, si motus ille produci dicatur a Deo qui ea lege corpus animamque conjunxerit, ut ipse solum divina vi sua motum illum in corpore produceret, quem anima in corpore produci cuperet. Igitur Lex illa quæ a Cartesianis effingitur admitti non potest; atque efficiens actuum illorum causa non Deus sed humana anima esse deberet; aut certe Cartesia-

fiant ipfis explicandum est cur data volitionis
 alicujus occasione Deus aliquando similem, ali-
 quando vero diffimilem corporeum actum in cor-
 pore excitaret, quod explicari certe non pote-
 rit. Si vero dicunt Cartesiani motum corporeum
 ab anima vere produci, & animam dato aliquo
 corporeo motu vere & proprie agere, jam tota
 lis in solo nomine posita est, & causæ occasio-
 nalis nomen usurpent, per nos licet; at revera
 in hypothesim influxus physici relabuntur.

Inst. 2. Saltem harmoniæ præstabilitæ hypo-
 thesis ab enumeratis incommodis libera omnino
 est. Et quidem in hac hypothesi jam explica-
 ta, humanum corpus independenter ab anima
 motus suos suorumque actuum seriem producit,
 perinde ac si nulli corpori conjuncta esset. Ita-
 que duo illi corporeorum motuum & cogita-
 tionum ordines simul eodemque tempore pera-
 guntur, non quod anima in corpus, aut cor-
 pus in animam influere, agere, motusque suos
 imprimere ac transferre possit; Evanescit ergo
 prima difficultas, concipiendi scilicet qua ra-
 tione corpus in animam & anima in corpus
 agat. Deinde harmonia illa præstabilita est tan-
 tum inter motus corporeos & perceptiones animæ,
 non vero inter appetitiones ejus. Evanescit er-
 go difficultas altera de voluntatis humanæ liber-
 tate. Ex his omnibus sic inferre licet. Hæc hy-
 pothesis longe probabilior est in qua evanescent
 difficultates influxus physici & causarum occa-
 sionalium hypothesibus communes; Atqui &c.
 Ergo &c. Resp. N. Mi. Harmoniæ præ-
 stabilitæ hypothesi non solum communes habet
 cum causarum occasionalium systemate difficul-
 tates, sed etiam longe graviores. Et qui-
 dem temere prorsus ac immerito constans quæ-
 dam, perennis, ac invariabilis motuum series
 dependenter a sola partium textura externorum-

que corporum ordine & actione, in humano corpore futura supponitur; cum experimento ipso compertum sit corporis nostri motus ab extrinsecis etiam subitisque causis mirifice variari, ita ut motuum nostrorum series non ex intrinseco quodam constantique principio, sed ex innumeris prorsus arbitrariisque causis oriatur. Accedit etiam quod experimento ipso perspicue apparet animum aliquando motibus & affectionibus illis obsequi & assentiri quæ excitantur in corpore, sed aliquando tamen iis resistere ac dissentiri, ita ut nulla constans ac invariabilis similium motuum series vel harmonia effingi possit, qua dum motus quidam in corpore excitatur, similis alter & consonus in anima producat. Denique perfecta libertatis idea requirit ut humanus animus suorum actuum dominus, auctor & causa esse debeat, non alia de causa illos exerat nisi quod illos exerere velit, eoque imperio ac libertate corporis etiam motus sequi, aut iis resistere, eos efficere aut ab iis abstinere possit. Hæc igitur remanet semper, ut jam observatum est, gravissima difficultas, motus corporis esse necessarios utpote quia alii esse non possunt quam qui existunt. Neque est quod dicant Leibnitianæ hypotheseos assertores inter motus corporeos duntaxat & perceptiones animæ, non vero inter appetitiones ejus hanc harmoniam fuisse præstabilitam. Etenim harmoniæ præstabilitæ hypotheseos ideo excogitavit Leibnitius quod nullam inter animam & corpus dependentiam fingi posse crediderit, ac proinde non minus inter animæ volitiones quam perceptiones harmoniam præstabilitam admittere debuit. Neque tandem valet responsio motuum omnium seriem juxta liberam voluntatis determinationem a Deo fuisse prævisam atque ordinatam. Etenim cum nullam inter animam & corpus actio-

actionem admittant Leibnitiani, nulla ratione prævidere ac ordinare potuit Deus motuum omnium seriem cum libera voluntate consentientem. Si enim inter animam & corpus nulla dependentia intercedere possit, hanc Deus prævidere & ordinare non potuit. Si autem dependentia illa non repugnet, jam inutilis est harmoniæ præstabilitæ hypothesi. vel etiam ad causarum occasionalium systema facile posset revocari; quod tamen declinasse student Leibnitiani. Quæ cum ita sint, facile patet recentiores Metaphysicos in explicanda corporis animæque societate nihilo feliciores fuisse antiquis, sed audaciores. Superest ergo ut arcani hujus fœderis leges infinita Dei potentia & sapientia constitutas ab intellectu nostro comprehendere non posse fateamur.

ARTICULUS II.

*De præcipuis sensationum legibus, &
de animæ sede.*

I. *Sensationes* dicuntur perceptiones quarum ratio continetur in mutationibus, quæ corporis nostri organis accidunt *quatenus sunt organa*, quæ quidem ultima verba sunt omnino necessaria; nam organo sensorio a causis extrinsecis accidere possunt mutationes quæ a structura organica minime pendent. Ita si oculo vulnus infligitur, vulnus illud non est mutatio quæ oculo accidat vi structuræ ipsius organicæ. Inde ergo intelligitur quid sit *facultas sentiendi*; est nempe facultas percipiendi objecta externa juxta certas impressionum organicarum leges. Inde etiam evidens est varios esse sensationum gradus. Sensatio una dicitur altera *fortior* quæ majorem habet claritatis gradum, seu cujus magis nobis conscii sumus quam alterius. E. G.

major est claritas in perceptione luminis solaris quam lunaris, ac proinde in priori casu sensatio fortior est quam in altero.

Sensatione validiori debiliorem obscurari constat experientia quotidiana. Luna, instar tenuis cujusdam nubeculæ pallet quæ noctu satis vivide percipitur; Lumen stellæ noctu satis clare perceptum luce diurna oculos occupante adeo obscure percipitur, ut luminis hujus nobis prorsus conscii non simus, quamvis tamen stella radios lucis in oculum diu & noctu æque immittat.

II. Antequam sensationum naturam & leges explicemus, admirandam corporis humani machinam, rudi minerva quantum ad institutum nostrum satis est, describemus. Constat hæc machina ex partibus *solidis & fluidis*. Inter partes solidas 1. considerabimus *fibras* quæ sunt partes similes seu ex aliis partibus ad sensum similibus compositæ, tenues, instar fili diverso tractu protensæ, ex quibus diverso modo contextis & conjunctis, reliquæ partes solidæ componuntur. 2. *Nervi* sunt partes similes, albicantes, duriores, elasticæ & admodum sensibiles; oriuntur ex cerebro suntque vel *motorii* quibus partium corporis motus producit, vel *sensarii* quibus sensatio omnis absolvitur; resectis enim nervis aut vehementius compressis membra inferius posita & motum & sensum amittunt. . . . 3. *Membrane* sunt tenues partes quæ in longum & latum expansæ alias partes obtegunt & ob copiosissimos nervos iis intertextos sunt eximie sensibiles 4. *Tunicæ* sunt membranæ intortæ quæ vasorum & canalium cavitates continent . . . 5. *Ligamenta* sunt partes membranaceæ, solidiores, & firmiores, valde elasticæ, variæ figuræ & crassitie quibus potissimum ossa invicem connectuntur

6. *Ossa*

6. *Ossa* sunt partes corporis durissimæ, rigidæ, albæ, sensu destitutæ & plerumque cavæ quibus reliquæ partes molliores innituntur aut defenduntur. In majoribus ossibus reperitur intus cavitas qua *medulla* excipitur. Ossium externam superficiem atque internam cavitatem cingit membrana quædam nervosa *periostium* dicta quæ primordia ossium constituit iisque sensibilitatem confert 7. *Cartilagines* sunt partes ossibus analogæ, attamen flexibiles, lubricæ, solidæ & quadamtenus pellucidæ, ossibus communiter junctæ, nullam habent cavitatem, neque medullam in se continent, nec gaudent ulla sensibilitate. 8. *Musculi* sunt partes molles, carnosæ, rubicundæ & instrumenta motuum, nervorum ope. Constant ex meris fibris, nervis & vasculis intertextis, propria membrana vestitis. 9. *Tendines* sunt extremitates musculorum, ligamentosæ, validæ 10. *Glandulæ* gaudent peculiari quadam substantia, spongiosa, quam contorti nervuli, vascula & ductus excretorius componunt. Ductus ille communi quadam membrana cingitur, variisque secretionibus inservit 11. *Vasa, canales*, sunt meatus oblongi, conici, membranosi quibus liquores in corpore vehuntur. Hujus generis sunt *arteriæ*, seu vasa elastica, pulsantia, sanguinem ex corde ad omnes corporis partes revehentia, ex quatuor tunicis quarum una nervea est, composita. *Venæ* sunt etiam vasa, pulsu destituta, valvulis instructa & sanguinem ex partibus corporis ad cor revehentia; constant quoque ex quatuor tunicis. *Cor* duas continet cavitates, seu, ut Anatomici loquuntur, duos *ventriculos*, dextrum & sinistrum septo quodam diremptos. Ex dextro cordis ventriculo prodit vena *cava* quæ ramos suos per totum cor-

corpus diffundit, tum arteria *pulmonalis* quæ sanguinem ad pulmones deferit. Ex sinistro ventriculo oritur tum *aorta*, seu arteria *magna* quæ per ramos & furculos innumeros sanguinem ad omnes corporis partes vehit, tum vena *pulmonalis* sanguinem e pulmonibus ad cor revehens. *Vasa lymphatica* sunt canaliculi tenues, pellucidi, propter valvulas copiosas nodosi, liquorem aquosum ex partibus versus cor deferentes. Similes fere canaliculi sunt *vasa lactea* quæ *chylum* ex intestinis ad *receptaculum* adducunt. 12. *Pinguedo* est substantia molli, oleosa, ex albedine flavescens, in vesiculis membranosis contenta. Ejusdem fere indolis est medulla ossium.

Descriptis jam partibus solidis, partes fluidas corporis considerabimus. 1. *Sanguis* est liquor rubicundus, in arteriis & venis contentus, ex quo omnes partes solidæ nutriuntur, & humores in certis organis secernuntur. 2. *Chylus* est humor lacteus, ex alimentis in ventriculo seu stomacho & intestinis segregatus, quem *vasa lactea* & ductus thoracicus in sanguinem advehunt. 3. *Lympha* est humor limpidus, gelatinosus, nutritivus qui ex omnibus partibus ad cor revehitur. Perpetua fit sanguinis in corpore circulatio; Chylus namque ex cibis elaboratus & cum sanguine resfluente dextro cordis ventriculo illatus, ope constrictionis cordis per arteriam pulmonalem ad pulmones, & e pulmonibus per venam pulmonalem ad cordis ventriculum sinistrum deferitur, ex quo ventriculo tandem per aortam & ipsius *ramificationes* ad singulas corporis partes nutritionis causa propellitur. Sanguis vero a nutritione superfluius, refluit iterum per ramos ex trunco venæ cavæ ad dextrum cordis ventriculum, denuo hoc circuitu pellendus.

dus. Ea enim est cordis fabrica ut, durante
 constrictione cordis seu *systole*, sanguini diver-
 ticulum præbeant cordis *auriculæ*, donec, ite-
 rata ejus dilatatione, seu *diastole*, cordi influe-
 re possit. Præterea valvulæ tum in ventriculis
 cordis, tum in venarum internodiis. appositæ
 sunt ut sanguini e corde ad arterias liberum
 concederent transitum, ejus vero regressum
 refrænarent; & contra permetterent sanguini
 per venas. reditum ad cor, ejusdem vero per
 venas. refluxum impedirent. Hunc perpetuum
 motum sanguinis plurimum adjuvant *anastomo-
 ses*, sive mutux *inosculationes* extremitatum ar-
 teriarum & venarum, quales ubique occur-
 runt. 4. *Serum* est humor sanguinis sal-
 sus qui per renes & cutis poros excernitur.
Sudor est illa feri pars quæ sub cute secreta
 per poros eliminatur; huc etiam referenda est
transpiratio insensibilis. 5. *Fluidum ner-
 veum* est humor cerebri quo nervi irrigantur;
 habetur plerumque pro spiritibus animalibus.
 Certum quidem est omnes sensibilitates. & mo-
 tus in universo corpore a nervis. produci; an
 vero ad motum requirantur spiritus animales
 seu fluidum nerveum quod per nervos. defera-
 tur, iis. celerrime influat, illosque potenter
 expandat; an. potius nervi ob vim suam ela-
 sticam. motus omnes præstare valeant, non-
 dum satis. probatum est. Id. vero. negari ne-
 quit dari in nervis. fluidum quod nervos. ad
 necessarios. motus. peragendos. irrigat. Multi
 sunt alii liquores. in humano corpore. ut *saliva*,
liquor glandularum œsophagi, *bilis* &c.
 quorum ope alimenta. facilius digeruntur. To-
 tum. corpus. humanum. tegitur *epidermate* seu
 cuticula quæ est membrana. tenuissima, sensu
 destituta, ex squammulis composita, copiosis
 sulcis & poris distincta per quos sudor elabi-
 tur;

tur ; inservit venustati corporis & defension-
ni. *Cutis* est integumentum totius corporis ad-
modum crassum, ex meris fibris nervosis, ten-
dinosis & vasculis sanguiferis intertextum, in
quo copiosæ papillæ prominent & cujus sulci
ac pori, pro exhalante sudore, cum cuticu-
la sunt communes ; tegit cutis partes subja-
centes, vi sua constringente vapores expel-
lit, estque ob insignem sensibilitatem orga-
num tactus.

Dividitur corpus in caput, truncum & ar-
tus. *Caput* est suprema corporis pars globosa
quæ cervici seu collo incumbit. Ossa capitis
constituunt *cranium* & *maxillas*. *Cranium* est
veluti theca ossea durissima in cujus ampla ca-
vitate cerebrum continetur. *Cranium* dividitur
in *sinciput* seu partem anteriorem cum facie
glabra, & in *occiput* seu partem posteriorem
crinibus testam. Duæ sunt maxillæ, superior
immobilis & inferior mobilis. Cerebrum gau-
det figura globosa & substantia molli univer-
sum cranium replente quæ ex innumeris va-
sculis, tubulis & quibusdam glandulis constat.
Involvitur duabus membranis quæ *meninges*
sive *matres* vocantur. *Dura mater* est mem-
brana nervosa admodum valida, statim sub
cranio suturis affixa. *Pia mater* est membrana
tenuis, copiosis vasculis repleta & totum ce-
brum quaquaversum arte ambiens. Inter
duram & piam matrem deprehenditur adhuc
alia tenuissima membrana, tunica *arachnoidea*
dicta. Cerebrum dividitur in *cerebrum stricte*
ita appellatum quæ est pars antica totius ce-
rebri; in *cerebellum* quæ est totius cerebri pars
postica cujus superficies variis sulcis distingui-
tur; in *medullam oblongatam* ex qua oriuntur
novem, vel ut quidam volunt, decem paria
nervorum, inter quos sunt 1. Duo nervi
alfa-

olfactorii qui per foraminula ossis frontis ad nasum properant suntque organa olfactus.....

2. Duo nervi *optici* qui ad posticam oculorum partem producuntur & in fundo cavitatis oculi filamentorum suorum expansione formant tunicam *retinam*, tenerrimam, mucosam in qua cuncta objecta visibilia oculo opposita delineantur, estque organum visus. 3. Nervi *acustici* duo qui ad aures feruntur suntque organum auditus.... 4. Nervi *linguales* qui papillis linguæ distribuuntur & sunt organum gustus. Medulla *spinalis* ad cerebrum pertinet, estque productio medullæ oblongatæ intra cavitatem vertebrarum spinæ dorsæ. Ex ea oriuntur 30. paria nervorum quorum fibræ per omnes artus late vagantur atque in his terminantur. Hinc omnes nervi a cerebro ducunt originem & cinguntur membranulis a meningibus cerebri productis. *Truncus* corporis thorace seu pectore & abdomine seu ventre infimo constat. In trunco reperitur *spina dorsæ* quam componunt 24. vertebræ veræ & 9. spuria. In medio singularum vertebrarum est large foramen & foramina illa in omnibus vertebris sibi invicem impositis longum illum & amplum canalem formant quo medulla spinalis continetur, quæ nervos suos ubique, intra vertebrae utrinque per corporis partes dimittit. Hæc pauca dicta sint quæ ad explicandas sensationes sufficiunt; Cæterum hæc omnia visu melius quam auditu percipiuntur.

III. Quod spectat animæ sedem, certum est mentem humanam non esse in corpore eodem modo ac corpus est in loco; neque enim anima utpote spiritualis in modum corporis extendi potest. Nonnulli quidem ut explicent quomodo anima sit in corpore, admittunt extensionem animæ non *formalem* seu proprie dictam
quæ

quæ aperte spiritui repugnat, sed *virtualem* ita ut anima diversis spatii partibus respondeat per *idem sui simplex & indivisibile*. Verum extensio illa virtualis intelligi nequaquam potest & videtur absurda. Anima non aliter corpori præsens esse cognoscitur quam quia in illo operatur. Unde censenda est residere in omnibus & singulis corporis partibus, si agat immediate in omnes corporis partes. Si autem pars est unica in quam immediate operetur, in ea sola parte residere dici potest. His positis sit

C O N C L U S I O I.

LEX SENSATIONUM EST UT PRODUCTA AB
OBIECTO SENSIBILI IN ORGANO SENSORIO
MUTATIONE ALIQUA, HUIC IN MENTE
RESPONDEAT SENSATIO QUÆ IN ILLA MU-
TATIONE RATIONEM HABEAT CUR ACTU
SIT, ET CUR TALIS SIT.

Prob. Sensationes sunt animæ perceptiones quarum ratio cur nempe sint & cur tales sint, continetur in mutationibus quæ sensorii organi contingunt, *quatenus sunt organa*, per definitionem. Quare si ab objecto aliquo sensibili in organo sensorio rite constituto producat mutatio, ponitur id omne quod requisitum est ut in mente excitetur sensatio huic mutationi respondens, hoc est, ut excitetur talis sensatio & non alia. Ergo lex sensationum ea est quæ in conclusione enuntiatur. Hæc eadem lex experientia quotidiana confirmatur. Dum objectum sensibile in organum sensorium rite constitutum agit, nascitur in anima sensatio quædam quam impedire vel mutare anima non potest. Si fragor tormenti bellici aurem ferit, illum necessario percipimus, neque sensationem
illam

illam in sonum blandiorem mutare possumus. Si fœtor nares occupat, efficere nullo modo possumus ut ejus loco vel odorem suavem, vel fœtorem minus molestum percipiamus. Si oculis apertis objectum aliquod ex data distantia aspicimus, nostri non est arbitrii ut illud majus vel minus, hujus vel illius coloris videamus. Idem patet quoad tactum & gustum. Quapropter si molestam aut periculosam sensationem impedire velimus, oportet ut organum sensorium ab objecto avertamus, aut ejusdem objecti actionem in organum impediamus quocumque modo, V. G. averfis vel clausis oculis. Si vero neutrum sit in nostra potestate, tum sensationem illam excitata in nobis alia fortiori & minime periculosa perceptione debilitamus & frangimus, ita fœtoris perceptionem odorum suffitu fugamus. Sensatio enim fortior debiliorem ita nonnunquam obscurat, ut hujus vel nihil vel parum nobis conscii simus.

Ex hac generali sensationum lege colliguntur plurimæ regulæ 1. Si mutatio in eodem organo sensorio eadem est, sensatio quoque in anima eadem esse debet. . . . 2. Si contingat a diversis objectis sensibilibus eandem in eodem organo sensorio mutationem produci, objecta eadem apparere debent. . . . 3. si mutatio in organo sensorio diversa est, sensatio quoque in anima diversa esse debet. . . . 4. Hinc si contingat idem objectum diversam in eodem organo mutationem efficere, diversum quoque apparere debet objectum. Hæ regulæ continent rationes generales cur sensus quæ diversa sunt, sæpe repræsentent eadem & contra, ideoque fallant seu efficiant ut aliquid appareat quod non est. Ex his etiam fluunt generalia visionis explicandæ principia, & opticarum deceptionum fundamenta; Sed de his in Physica. Objic.

Objic. Plures producuntur in organo sensorio rite constituto mutationes sine ulla animæ sensatione, ergo &c.... Prob. ant. Dum interdiu cælum intuemur, singulæ stellæ luminis radios in oculum rite constitutum immittunt quibus stellarum imago in oculo delineatur, ac proinde mutationes in organo sensorio producunt, atqui tamen stellas anima non percipit, ergo &c. . . Resp. Dist. ant. Plures producuntur sine sensatione mutationes *insufficientes* C. *sufficientes* N. ant. & conf. ad probationem C. Maj. Dist. Min. Anima stellas non percipit interdiu, id est, anima stellarum perceptiones debiliores ab aliis fortioribus non distinguit C. Min. nullas habet stellarum perceptiones obscuras N. Min. & conf. Itaque non omnis mutatio in organo sensorio facta sufficit ut anima sentiat, sed requiritur ut mutatio illa ad cerebrum usque transmittatur, & idcirco necessariam esse diximus mutationem factam ab *objecto sensibili*, hoc est, ab objecto quod mutationem sufficientem in organo rite constituto producere possit. Quod spectat stellarum perceptionem, certum est earum imagines in oculi fundo etiam interdiu delineari, earumque impressionem ad cerebrum usque per nervum opticum propagari atque ab anima obscure tantum percipi; nam si luminis solaris actio in oculum vel solis ecclypsi, vel longioris tubi ope impediatur, tum stellas cæli clare videmus.

Inst. Eidem mutationi in eodem organo sensorio factæ non respondet eadem in anima sensitio, ergo &c.... Prob. ant. Sol & luna dum vertici nostro imminet, minores videntur quam prope horizontem positi, atqui in utroque loco eandem mutationem in eodem oculo producunt. Ergo.... Resp. N. ant. ad prob. C. Maj. & Dist. Min. Eandem mutationem in oculo pro-

producunt, sed conjunctam cum diversis mutationibus aliis in utroque loco C. secus N. Min. & conseq. phænomenum quod objicitur, explicatu difficile suo loco evolvemus, hic nobis observare satis sit lunam & solem in horizonte majores videri quam in meridiano; quia in horizonte simul cum eorum imaginibus in oculo pinguntur interjecta corpora terrestria cælique fornix oblongus. At illa objectorum series, dum sol & luna in vertice cæli conspiciuntur, oculum non afficiunt; atque inde est quod si solem & lunam in horizonte per tubum angustum conspiciamus, haud majores videantur quam in cæli vertice. Dum ergo dicimus eadem mutationi in eodem organo factæ eandem in anima sensationem respondere, propositio intelligenda est de mutationibus singulis seorsim consideratis.

CONCLUSIO. II.

DUM ANIMA SENTIT, MOTUS AB OBJECTIS SENSIBILIBUS NERVIS SENSORIIS IMPRESSUS, AD CEREBRUM USQUE PROPAGATUR, AC PROINDE ANIMA MERITO VIDEATUR HABERE SEDEM PROPRIAM IN SOLO CEREBRO.

Prob. 1. pars. Ex observationibus anatomicis certum est nervos omnes ortum ducere a cerebro & inde in singula organa sensoria & in omnes corporis partes propagari; nam a cerebro ad oculos pergunt nervi duo optici qui fibrillarum suarum expansione formant tunicam retinam in qua omnia visibilia oculo opposita delineantur. Ad aures protenduntur nervi duo acustici, ad nares duo olfactorii, ad linguam linguales; & ex medulla spinali quæ est cerebri

bri productio in omnes corporis partes diffunduntur 30. nervorum paria quorum fibræ organum tactus constituunt. Plurimis etiam experimentis compertum est resecto vel corrupto aut vehementius constricto organi sensorii nervo ita ut ipsius motus ad cerebrum transire non possit, nullam in anima sensationem excitari. Anima igitur sentire non potest nisi mutatio in organo sensorio facta per nervum ad cerebrum usque transmittatur. Porro omnis mutatio quæ in corpore ideoque & in organo sensorio contingit, fit per motum, ut manifestum est in sensationibus singulis, videlicet sensatio soni per motum vibratorium particularum aeris nervi acustici fibrillis communicatum; sensatio odoris per corpusculorum effluvia nervi olfactorii fibras agitantia; sensatio saporis per corpuscula linguæ papillas nerveasque fibrillas titillantia vel pungentia: sensatio visionis per luminis radios in retina collectos; sensatio tactus per immediatum contactum.

Præterea nemo est qui nesciat aut propria aut aliena experientia, ex sensationibus varios in corpore motus sæpe oriri etiam in partibus ab organo sensorio maxime remotis, non solum inconsulta anima, verum prorsus invitata. Ita dum ex fragore tonitrus vel tormenti bellici ex quo nihil nobis timendum esse certo novimus aut putamus, inviti in terrorem conjicimur & varii in corpore toto consequuntur motus. Ex fragore igitur in aures incidente nascitur motus organorum corporis, verum Anatomia docet ex organis sensorii nervos ad cerebrum usque protendi, & ex cerebro ad singulas corporis partes produci nervos motores sine quibus motus perfici nequeunt. Necesse est igitur ut motus qui nervis sensorii imprimatur, transeat in nervos motores quorum ope mo-

ven-

ventur musculi, proindeque oportet ut motus nervis sensoriis impressus ad cerebrum usque propagetur, & in hac communi nervorum origine ad motorios derivetur.

Prob. 2. pars: In ea sola corporis parte probabile est animam residere, quæ sola corporis pars est in qua anima immediate operatur; Atqui anima immediate agit in solum cerebrum; Etenim 1. solo cerebro vitato, ita ut cætera membra remaneant sana, sensuum omnium usus amittitur; Hinc Apoplexia correpti, veluti invisibili fulmine percussi omni sensu privantur, ita ut aciculis compuncti, aut corpore etiam dissecti nihil sentiant, obstrictis scilicet cerebri poris, vel compressis nervis nimia humoris pinguis aut tenacis vel lentioris copia, impedito scilicet per hunc humorem spirituum influxu. 2. Corporis affectiones quæ non transmittuntur ad cerebrum, mentem prorsus latent, ut in paralyti. . . . 3. Constat ex probatione primæ partis omnia sensuum organa, omnes scilicet nervos concurrere in cerebro, & ex eadem cerebri parte ducere originem, ex qua deinde in omnes corporis partes diffunduntur, anima nempe in eo loco posita ad quem appellant nervi omnes in quibus continentur spiritus vitales sensationum instrumenta, tamquam Regina in medio imperii sui admonetur de omnibus per nervorum motus, & inde facilius omnia perspicit & dirigit, immittendo in nervos Spiritus animales per quos pro arbitrio suo omnes corporis partes moveat. Hinc fit ut sæpe experiamur vapores, qui e stomacho in cerebrum ascendunt, ibique condensati, meatus per quos spiritus animales excurrunt, obstruentes sentiendi potentiam tollunt. Hinc Phreneticis in quibus læsa imaginatio est, remedia capiti solent adhiberi. Hinc qui sensis rebus

occu-

occupantur, aut longo studio fatigantur, capitis dolorem sentiunt, imo nosmetipsos in capite cogitare sentimus; quæ sane omnia non conringerent, nisi anima immediate ageret in solum cerebrum; & ex solius cerebri motu tamquam occasione immediate pateretur, variisque susciperet sensationes; Ergo animam in solo cerebro residere, sedemque propriam habere saltem probabile est.

Jam vero quænam sit pars cerebri ex qua nervi omnes originem ducunt, & in qua proinde omnia nervorum initia concurrunt, adhuc incertum est. Quidam arbitrantur nervos omnes convenire in centro ovato, quæ est pars quædam ovalis Cerebri; sed id certo non constat. Cartesius existimat nervos omnes originem ducere ex glandula pineali; Hæc autem opinio multis observationibus refelli potest: 1. Enim reperti sunt homines, qui in cerebro glandula pineali carebant: 2. Teste Willisio Medico Anglo, fuit homo æger ex hydrope cerebri, & e loco suo deciderat glandula pinealis, nihil tamen perturbato sensuum officio; In aliis oblitterata omnino fuit, in nonnullis lapidea, absque ulla sensationum perturbatione; Itaque id unum certum videtur, nervos omnes originem ducere e cerebro. Verum observandum est, compressa cerebri substantia medullari, voluntariam musculorum actionem suspendi, memoriam sensationesque extinguere, vigentibus tamen respiratione cordisque actione. At compressa cerebelli substantia, respirationis cordisque motus sistitur. Unde colligitur nervos motibus voluntariis destinatos ex cerebro proficisci, ex cerebello autem oriri nervos ex quibus pendent motus spontanei.

Quamvis autem certo statui non possit quænam sit præcise pars cerebri in qua coeant nervi

nervi omnes, ac proinde in qua precise cerebri parte resideat anima, nihilominus silentio præmitti non debet, quod hac de re observavit clarissimus Lapeyronius Accademicus Parisiensis. Perfracto cranio separatique duobus cerebri hemispheriis in aspectum venit corpus candens & firmiusculum quod callosum & cerebri medulla nuncupatur. Si corpus illud vel leviter afficiatur, ipsas animæ operationes affici; rationis scilicet & sensationum usum turbari constantissime observavit, quod quidem in aliis cerebri partibus non contingit, quibus læsis, vel etiam destructis, læsæ tamen non sunt animæ operationes; contra autem corpore calloso ad statum naturalem redeunte, ipsum quoque redit sensationum & rationis exercitium; Idque expertus est Lapeyronius in operatione chirurgica quam *terebrationem* vocant; compresso enim & remisso per vices corpore calloso, sensationum & rationis usu adimebat & restituebat. Cæterum ex his observationibus constat non ita angusto spatio definitum esse sensorium commune. Itaque si præsens questio eo redigatur ut nempe sedes animæ appelletur illa cerebri pars qua offensa, vel operationes animæ destruuntur, vel turbantur, jam sedes animæ hoc modo definita in corpore calloso constitui debet. Legenda sunt, quæ hac de re tradidit laudatus Accademicus in monumentis Parisiensibus an. 1741.

Objic. Adversus primam partem. Anima sentit eo ipso temporis puncto quo in organo sensorio, mutatio aliqua producitur; sed hoc esse non potest, si motus nervis sensoriis impressus ad cerebrum usque propagari debeat, ut anima percipiat. Ergo &c. Maj. constat. Nam si arbori oculos clausos obvertas, dum eosdem aperis illico lumen oculos ingreditur & illice

Jacq. T. II.

F

vides,

vides, nec minima quidem morula inter mutationem oculi & animæ perceptionem intercedit. Minor vero patet, quia cum motus in tempore fiat, aliquod temporis intervallum necessarium est ut motus retinæ fibrillis impressus ad cerebrum usque propagetur: Ergo &c. Resp. Dist. Maj. Anima sentit eo ipso temporis puncto quo mutatio fit in organo sensorio, hoc est, inter motum nervis sensoriis impressum & animæ perceptionem nulla intercedit mora *observabilis*. C. Nulla *absolute* N. Maj. & sic Dist. Min. N. Conf. Si motus per exiguum spatium magna celeritate propagetur, tempus quo per illud spatium propagatur a nobis non percipitur seu non distinguitur. Sic quamvis certum sit sonum *successive* propagari, non vero in *instanti*, nulla tamen possumus observare moram inter momentum quo quis nobis proximus loquitur & momentum quo vox ipsius ad aures nostras pervenit. Idem quoque patet in propagatione lucis; statim ac accenditur candela in tenebroso loco, illico objecta omnia etiam remota lumine videntur perfusa, quamvis lux in instanti propagari non possit. Igitur experimentum quod nobis obijcitur, id unum probat, motum a nervis sensoriis ad cerebrum usque magna celeritate transmitti.

Inst. 1. Motus ad cerebrum non propagatur per nervos qui ad cerebrum non pertingunt, sed sensorii nervi complures, nimirum 60. qui ex medulla spinali prodeunt, ad cerebrum non protenduntur, ergo &c. Resp. C. Maj. N. Min. Nam medulla spinalis est cerebri ipsius seu medullæ oblongatæ productio, & nervis consistat ad cerebrum usque protensis; unde fit ut in vertebrarum dorsi luxationibus membra corporis infra luxationem posita & motum & sensibilitatem quæ a nervis infra luxationem con-

sistit

stitutis pendent, amittant. Sunt itaque nervi veluti cerebrum in omnes corporis partes diffusum.

Inst. 2. Reperti sunt homines qui sine cerebro vivebant ac sentiebant, ergo ad animæ sensationem necesse non est ut motus nervis sensoriis impressus ad cerebrum usque propagetur... Resp. Dist. ant. Vivebant & sentiebant sine maxima cerebri parte C. sine ulla ipsius parte N. Ant. & Conf. In illis erat spinalis medulla & in ipsius principio potuit esse specialis quædam structura qua pars illa apta fiebat ut cerebri munere aliquatenus fungeretur. Cæterum verisimile est homines illos stupidos admodum atque hebetes fuisse. Si autem in aliquibus etiam abfuerit spinalis medulla, necessariæ hujus partis vices gerere debuit pars alia, quæcumque fuerit. Tandem partes illas abfuisse ex ipsa cadaverum sectione & observatione anatomica innotuit; fieri autem potuit ut partes illæ vi ipsius morbi corruptæ & oblitteratæ perierint.

Inst. 3. Si serpentes, lacertæ, aliaque animalia quæ circularibus incisuris distinguuntur, transversim secantur, singulæ illorum partes ad acus puncturam aut aliam quamcumque irritationem variis modis torquentur & agitantur, ac proinde adhuc sentiunt sine cerebro, ergo per analogiam quæ est inter corpora hominis & bruti idem dicendum est de homine..... Resp. N. Conf. & par. Alia enim est corporis humani structura, alia serpentum & lacertarum in quibus medullæ spinalis partes considerari possunt tanquam totidem minora cerebra; Hinc fit ut partes corporis humani resectæ post brevissimum tempus omni motu destituantur.

Inst. 4. Incertum omnino est an motus ex organo sensorio ad cerebrum propagetur fibrillarum nervearum oscillatione, an fluidi nervei

aut spirituum animalium ope, an alio quocumque modo. Ergo &c. Resp. permitto Ant. & N. Conf. Hic non investigamus modum quo illa motus propagatio absolvitur, satis est ratione atque experientia constare in organo sensorio motum quemdam excitari qui ad cerebrum usque nervorum auxilio propagatur, dum anima sentit. Eodem modo respondendum est si quis objiciat a nobis intelligi non posse quare ratione fieri queat, ut propter motum nervis impressum; anima quæ est substantia simplex & spiritualis, percipiat objectum sensibile: factum hic statuimus, rationem facti non quaerimus. Porro adversus facta indubitata obscuræ objectiones non valent.

Inst. 5. Qui organo sensorio destituuntur, sentiunt tamen, & contra sensatione carent aliqui in quorum nervis sensorii motus etiam validus producit. Ergo ut anima sentiat, necesse non est motum nervis sensorii imprimi... Prob. ant. II quibus abscissa sunt membra, dolorem aliquando in iisdem membris sentire sibi videntur; ut contigit puellæ de qua Cartesius meminit 4. parte princip. 2. furiosi & delirantes homines objecta sibi videre videntur quæ præsentia non sunt, quæque proinde nullam in eorum organis sensorii mutationem producant. 3. S. Augustinus lib. 14. de civitate Dei cap. 24. hoc factum narrat: *Presbyter quidam fuit nomine Restitutus qui quando ei placebat, ita se auferebat a sensibus & jacebat simillimus mortuo, ut non solum vellicantes atque pungentes minime sentiret, sed etiam aliquando igne ureretur admoto sine ullo doloris sensu...* Resp. his observationibus conclusionem nostram apprimè confirmari. Nam in omni sensatione tria sunt accurate distinguenda, duo quæ pertinent ad nostrum corpus, scilicet motus organo

no sensorio ab objecto sensibili impressus, & motus inde ad cerebrum propagatus, ac tertium quod animæ est, nempe his motibus respondens objecti sensibilis perceptio. Si motus organo sensorio impressus ad cerebrum usque non propagetur, anima non sentit, ut accidit in nobis dormientibus, & contingebat in presbytero Restituto qui mortuo simillimus jacebat. Si vero sine actione objecti sensibilis externi fibræ cerebri a causis internis eodem prorsus modo agitentur quo moventur, ubi objectum sensibile sua in organum extrinsecum actione eisdem motus producit, tum anima easdem habet perceptiones quas haberet objecto sensibili in organum extrinsecum agente, & perceptiones suas vi imaginationis productas a sensationibus non distingueret, uti accidit furiosis & delirantibus hominibus in quorum cerebro irregulares ac vehementiores motus excitantur; & hoc pacto quæ sibi imaginantur, confundunt cum iis quæ vident. Simili modo explicatur cur ii quibus membrum aliquod abscissum est, dolorem in eodem membro aliquandiu sentire sibi videantur; nimirum in nervis illis qui ad partem corporis amputatam pertinebant, iidem aliquando a causis extrinsecis motus oriuntur quos objecta externa excitarent, si nulla pars fuisset resecta.

Objic. adversus 2. partem. Anima præsens est singulis corporis partibus; quæcumque enim pars corporis lædatur, anima sentit dolorem; Ergo non soli cerebro præsens est.... Resp. N. ant.; ad probationem dico animam percipere impressionem factam in qualibet corporis parte, quia impressio illa ad cerebrum propagatur ope nervorum, qui a qualibet corporis parte ad cerebrum usque pertingunt; nimirum a qualibet parte corporis teni sunt nervi usque ad cerebrum; Unde cum nervi extremitas

quæ est in pede V. G. vel manu vellitur, pariter vellitur seu movetur altera extremitas quæ est in cerebro, & vi istius motus in cerebro excitati admonetur anima doloremque sentit, si impressio facta vehemens fuerit. Illud vero multis experimentis confirmatur. 1. Si arctissime stringatur pars aliqua corporis, cerebrum inter & partem aliam corporis refecandam aut pungendam, nullus aut fere nullus sentitur dolor; quia scilicet nullus aut fere nullus pervenit motus ad extremitatem nervi quæ est in cerebro. 2. Si quis, ut aliquando evenit, alte defixus sit in aliquam cogitationem, ut plurimum non percipit objecta externa, quæ tamen feriunt sensus illius externos, quia nimirum tunc nervi ita sunt tensi ut non admittant alium motum quo mens determinetur ad percipienda objecta externa.

Inst. Quæcumque pars corporis lædatur, anima percipit dolorem veluti existentem in illa ipsa parte corporis quæ læditur; Ergo mens proxime præsens est parti cuilibet corporis... Resp. N. Conf. Quamvis enim percipiatur ab anima dolor velut existens in quacumque vulnerata corporis parte, non tamen anima dolorem percipit in illa ipsa corporis parte quæ læditur; Et quidem cæcus baculo explorans objecta externa, proprietates eorundem, liquiditatem V. G. vel duritiem percipit extremo baculo, ac extremo in baculo velut existentem quodammodo; Nemo tamen dixerit animam hominis cæci residere in extremitate baculi; sic etiam quamvis anima percipiat sensationem aliquam V. G. caloris aut frigoris velut existentem in extremo digito, aut qualibet altera corporis parte, non idcirco anima dicenda est agere immediate in extremum digitum, & in eo proxime percipere sensationem qua afficitur;

tur; motus nimirum extremo digito primum communicatus, postmodum per nervos ad cerebrum diffusus pervenit ad animæ sedem, ubi fit sensatio, quam tamen anima naturaliter refert ad alteram extremitatem nervorum ubi facta fuit prima impulsio.

Ex iis quæ in præcedentibus conclusionibus dicta sunt, colligi possunt plurima quæ ad corrigendas sensationum fallacias utilissima sunt. Ut autem singulas sensationum partes accurate distinguamus, motum organo ab objecto sensibili impressum dicemus *speciem impressam*; motum inde propagatum ad cerebrum usque *ideam materiale* appellabimus, ac denique *ideam sensualem* vocabimus quæ a sensu in anima producit. Jam vero dum anima sentit, idea sensualem determinatur per ideam materiale, hæc vero per speciem impressam. Igitur si ex his tribus unum ponatur, duo alia quoque ponuntur. Etenim dum anima sentit, singulis speciebus impressis singulæ respondent idæ materiales tales & non aliæ, & idæ sensuales tales & non aliæ. Et contra singulis ideis sensualem singulæ respondent idæ materiales & singulæ species impressæ, singulisque ideis materialibus respondent tam singulæ idæ sensuales quam singulæ species impressæ. Hinc si in duobus casibus, ex his tribus nempe idea sensuali, idea materiali & specie impressa, unum fuerit idem, reliqua duo erunt quoque eadem; at si unum fuerit diversum, diversa quoque erunt reliqua duo. Itaque si organum sensorium eodem modo fuerit constitutum & idem objectum sensibile eodem modo ad organum se se habuerit, idea materialis & sensualem eadem esse debet. Si vero organum sensorium non fuerit eodem modo constitutum, vel objectum idem non eodem modo ad organum referatur, diversa es-

se potest idea materialis & sensualis . Etenim in primo casu nulla est ratio cur motus organo sensorio impressus non sit idem, cum motus nervis sensoriis imprimendus pendeat tantum ab interna atque extrinseca organi constitutione atque a modo quo objectum idem ad organum refertur ; igitur species impressa erit eadem, ac proinde idea materialis & sensualis erit quoque eadem . Ob rationes contrarias in altero casu fieri potest ut motus organo sensorio ab eodem objecto impressus non sit idem , ac proinde species impressa, ideoque & idea materialis & sensualis sit diversa . Rem exemplis illustrabimus . Ponamus oculo sano eoque nudo eundem videri hominem , lumine eodem illustratum , & in eodem aeris statu ; nemo non novit hominem illum eundem apparere, sive magnitudinem, sive formam , sive gradum distinctæ visionis spectes . Ponamus jam eundem hominem in planitie constitutum longius recedere , distinctam visionem hominisque magnitudinem sensim imminui videbis ita ut tandem obscura prorsus fiat visio & magnitudo evanescat . In primo casu idem objectum ad idem organum eodem modo constitutum refertur eodem modo , in secundo casu diverso modo . Si oculus vitro concavo muniatur, idem objectum in eadem distantia eodem modo illustratum & manente eodem aeris statu, valde imminutum apparet ita ut homo pueri formam mentiatur , diversitas in hoc casu in diversa organi constitutione extrinseca posita est . Itero laborantibus objecta præsertim alba, videntur flava ; in hoc casu ideæ sensualis diversitas pendet a constitutione interna oculi . At si ponamus hominem in fastigio turris non admodum altæ consistentem videri per vitrum concavum , perinde hic sese habebit ac si nudo oculo in turris præ-

præaltæ fastigio conspiceretur, atque in hoc casu diversitas visionis pendet tum a constitutione organi, tum a modo quo objectum ad organum refertur. In aliis sensibus res eadem experientia confirmatur; ita tactus in parte corporis contusa aliter sese habet quam ubi nulla facta fuit contusio.

Itaque ad detegendam cavendamque sensuum fallaciam plurimæ statui possunt regulæ. Et primo quidem organum sensorium rite constitutum censeretur debet, si idem objectum quod eodem modo sese habet ad organum quo alias sese habebat, tale quoque apparet quale alias apparuit; sic oculus rite constitutus est, si idem objectum, in eadem distantia eodemque situ, lumine ad claram distinctamque visionem sufficiente collustratum tale apparet quale antea in eadem distantia, eodemque situ & eodem lumine illustratum nobis apparuit.... 2. Si constet organum sensorium rite esse constitutum, objectum vero non idem appareat quale alias visum est, in ipso objecto vel in ipso modo aliquid immutatum fuisse recte colligitur.... 3. Si constet objectum idem eodem modo sese habere, sensualem vero ideam nobis diversam inesse, organum sensorium non eodem modo constitutum esse merito inferitur. Igitur ex his regulis constantes objectorum apparentias ab inconstantibus licet discernere.

Ex iisdem regulis diversa quoque organorum officia colliguntur. Si objectum idem sensibile in diversa organa sensoria agit, ideæ materiales & sensuales diversæ sunt. Nam experientia constat objectum sensibile non posse eodem modo agere in unum organum quo agit in alterum; ita colorata agunt in oculum mediante lumine, in organum tactus per contactum immediatum. Evidens igitur est motum fibrillis

nerveis ab eodem objecto sensibili impressum diversum omnino esse ab eo qui alterius organi fibrillis imprimitur, ac proinde species impressas esse diversas, ideoque & diversas ideas materiales ac sensuales. Diversas esse notiones diversis sensibus acquisitas confirmat exemplum quod in transactionibus philosophicis legitur. Cæcus a nativitate cum visus usum chirurgica operatione recuperasset, solo visu corporum distantias & solida corpora a pictis non bene primum distinguebat; omnia enim visibilia veluti oculum tangentia ipsi apparebant, ex figuris ac coloribus sensu perceptis canem a fele, quos adhuc cæcus sapissime tractaverat & tactu probe discernebat non poterat distinguere; nesciebat enim utrum sensatio canis visu percepti producta esset ab eodem objecto quod ante per tactum producebat sensationem canis diversam, an ab illo objecto quod per tactum producebat sensationem felis; Hoc propria experientia & attentione adhibita potuit addiscere.

Nec licet objicere quod cæci tactu colores distinguant, & surdi loquentium verba visu intelligant; nam si duæ qualitates in eodem objecto simul necessario insint, uno sensu dignosci potest ex una alteram adesse quæ ad alterum sensum pertinet; in hoc enim casu una est signum alterius. Porro cum colore quo objectum tinctum videtur, conjuncta est quædam superficiiei dispositio, vi cujus lumen reflectitur ita ut istius coloris sensatio excitetur, atque ea dispositio tactu discerni potest ab iis præsertim qui visu privati minimas in tactus organo differentias subtilius & facilius percipiunt. Ubi ergo ista deprehenditur superficiiei dispositio, concluditur ibidem quoque adesse talem colorem, V. G. hanc qualitatem quæ a visu pollentibus appellatur color ruber vel niger. Verum cæcus qui

qui colorem unum ab alio per tactum ita distinguit, non eandem habet coloris ideam quam nos habemus; tactu non percipit nisi speciem quamdam asperitatis vel lævitatatis in ipsa superficie quæ cum dato aliquo colore conjuncta est. Idem patet evidenter in surdis loquentibus, qui verba ore prolata ex labiorum motu & variata oris figura situque labiorum intelligunt, non autem ex sono. Etenim cum singulis verbis singulæ conjungantur oris configurationes labiorumque motus ita ut absque illis verba proferri nequeant; surdus autem cum illis conjungere usu didicit ideas vel notiones quas nos cum vocibus seu sonis diversis tamquam idearum vel notionum quarundam signis jungere consuevimus. Quando igitur cæcus tactu colores discernit, ideam quidem colorum, ut ita dicam, sociam habet; sed quæ cum tactui respondeat, diversa prorsus est ab ea quæ visionis organo convenit. Tactum visionis vices mirifice aliquando gerere demonstrat exemplum artificis cujusdam qui, narrantibus viris fide dignissimis, solo tactu faciei ideam valde distinctam acquirebat & ex cera effingebat imaginem simillimam, qualem qui visu pollet artis suæ peritissimus perficere posset. Cepit ejusdem rei experimentum Dux Braciani qui in cella profunda contra omnem luminis accessum optime munita imaginem suam fieri curavit, ut certissimus esset artificem ne minimum quidem visu juvari. Fecit idem artifex imagines statuis marmoreis Caroli primi Anglorum Regis & Urbani VIII. Pontificis Maximi simillimas. Similiter surdus qui visu verba loquentis distinguit, ideam sonorum sociam habet, sed quæ cum visui respondeat, diversa prorsus est ab ea quæ auditui propria est. Hinc quamvis cæci & surdi loquentes iisdem nobiscum utantur no-

minibus, ubi de coloribus vel de sonis sermo est; res tamen omnino diversas, nos illique intelligimus. E. G. cæcus natus nigri coloris nomine certam quamdam intelligit superficiem dispositionem tactu *perceptibilem*, nos vero *visibilem* qualitatem. Surdus natus, si de musica sermo fit, cogitat de figuris instrumentorum & motibus musicorum, nos vero sonorum combinationem consideramus. Cæterum ex his omnibus patet surdum natum diligenti educatione ita institui posse ut ex oris labiorumque motu & configuratione intelligat quæ alii homines proferunt, & suas etiam cogitationes aliis manifestet; Potest enim ita doceri ut & legere & scripturæ sensum percipere valeat, quæ quidem omnia pluribus experimentis confirmata fuere. Maximi autem momenti est hæc animadvertere, ut parvuli quibus auditum natura negavit, cogitationibus illis non priventur quæ ad salutem æternam pertinent.

ARTICULUS III.

De imaginatione & memoria.

I. **F**acultas *imaginandi* seu *imaginatio* vel *Phantasia* dicitur facultas producendi perceptiones rerum sensibilibum absentium. Ideam ab imaginatione productam deinceps dicemus *Phantasma*, ut illam ab idea sensuali quæ vi actualis sensationis in anima existit, distinguamus. Quod autem animæ competat imaginandi facultas, demonstrat quotidiana experientia; Nam patriæ nostræ, Parentum, Amicorum aliorumque objecto sensibilibum absentium ideas revocamus seu iterum producimus.

Quod imaginamur, minus clare imaginamur quam si idem sensu percipiamus; facilius vero
&

& clarius id imaginamur, quod sensu distincte quam quod confuse tantum percipimus. Id pariter quotidiana experientia certissimum est. Multo clarius solem præsentem, vel quodlibet aliud objectum visu percipimus, quam absentem imaginatione. Facilius, ac clarius producimus ideas distinctas figuræ, magnitudinis, situs partium & motus, quam ideas confusas-coloris, odoris, saporis; & ideo si quædam imaginari conemur, unusquisque in seipso experitur statim sibi occurrere objecta visibilia, & verba, seu sonos articulatos, quorum ideas distinctas habemus; colores autem, odores, saporis, quorum ideas confusas habemus, vix nobis imaginari licet. Igitur Phantasmata minus clara sunt, quam ideæ sensuales. Quia vero sensatio illa debilior est, quæ minorem claritatis gradum habet, actus imaginationis æquipollent sensationibus debilioribus, & quemadmodum sensatio fortior obscurat debiliorem, sic etiam sensationes ita obscurant actus imaginationis, ut horum actuum subinde nobis prorsus conscii non simus; & ideo si actus imaginationis soli sint in mente, clariores sunt quam si sensationes simul præsentibus habeant. Hinc in somno ubi cessant sensationes, & soli imaginationis actus in anima dantur, hi multo clariores sunt quam dum vigilamus; cum in somno phantasmata pro ideis sensualibus habeamus existimantes nos vigilare, & reipsa contingere quod tantummodo apparet. Ob eandem rationem actus imaginationis clariores sunt, dum in tenebris versamur, & dum oculos claudimus; alia enim objecta, quæ cætera organa feriunt, imaginationis actus non perturbant.

II. Vim imaginationis & memoriam, quæ ab illa pendet, læso per morbum cerebro, ita lædi certum est ex observationibus, ut perceptio-

ptiones, & ideæ antea sensu productæ, iterum produci non possint. Refert Thucydides quosdam a peste convalescentes memoria adeo orbatos fuisse, ut nec sese, nec suos familiares nossent, licet objecta præsentia discernèrent. Plinius hist. nat. Lib. 7. cap. 24. hæc habet: *Ictus lapide oblitus est litteras tantum, ex præalto tecto lapsus matris & affinium, propinquo- rumque cœpit oblivionem, alius ægrotus servo- rum tantum*. Crugerus Hevelii summi Astro- nomi Præceptor, febre ardente memoriam adeo debilitatam deprehendit, ut multiplicationis ac divisionis Arithmeticæ etiam in simplicissimis numeris non recordaretur. Necessè igitur est, ut quidpiam in corpore ac potissimum in cerebro insit, quod imaginationis operationi in anima respondeat. Quamobrem cum ideis sensualibus respondeant ideæ materiales in cerebro, hinc facile colligitur easdem ideas materiales in cerebro iterum produci debere, quoties ideæ sensuales iterum in anima producuntur; ita nimirum apparet vim imaginationis eodem modo deficere, quo deficit vis sensationis. Quænam vero mutationes in cerebro, & quo modo producantur, nos explicare non posse fatemur, tum quod structura cerebri non sit satis explorata; tum quod incertum omnino sit an motus in organo sensorio ab objecto impressus in fibrillarum nervearum oscillatione consistat, an in motu fluidi cujusdam subtilissimi, quod a nonnullis *fluidum nerveum*, ab aliis *spiritus animales* appellatur, an tandem in fibrillarum oscillatione, simulque spirituum animalium motu. Sed quamcumque hypotheseam amplectaris, rem perinde explicabis. Nos autem certis incerta miscere nolumus.

III. Si quædam simul percipimus, & unius perceptio denuo producat, sive sensuum, sive imaginationis ope, imaginatio producit & perceptio-

ceptionem alterius. Verum ut imaginatio cum perceptione præsentis rei alicujus, iterum producat perceptiones aliarum rerum, simul cum illa perceptarum, necesse est res istas, vel sæpius, vel diu simul perceptas fuisse: si enim res quam nunc percipimus, successive cum variis rebus aliis simul percepta fuit, ratio aliqua adesse debet, cur inter varias illas res una potius recurat in mentem cum re actu percepta quam alia; nulla autem alia ratio esse potest, quam quod illius rei, quæ in mentem revocatur, perceptio sæpius vel diutius conjuncta fuerit cum perceptione, quam actu habemus. Idem patet a posteriori. Si objectum aliquod vides, illud diu contemplaris, ut perceptionis illius iterum producendæ facilitatem tibi compares. Imo ab eodem objecto digressus phantasma vi imaginationis conservas, & aciem mentis in eodem contemplando adhuc defigis, ut ejusdem objecti absentis perceptionem imposterum producere valeas. Igitur facilitas producendi perceptiones rerum antea perceptarum cum iis, quæ nunc percipimus, acquiritur dum res sæpius, vel diu sive sensu, sive imaginatione simul percipiuntur. Quare si res plures sæpius, vel diu percipiuntur, illarum perceptiones inter se connectuntur, seu ex perceptione unius intelligitur ratio cur producat altera. Itaque si ex una perceptione vi imaginationis producat perceptio altera, necesse est ut idea materialis, quæ primæ perceptioni responderet, iterum etiam producat aliam ideam materialem alteri perceptioni denuo productæ respondentem; si nempe imaginationis vi ex una perceptione nascatur altera, idea materialis, quæ primæ perceptioni responderet, resuscitat, ut ita dicam, aliam ideam materialem cum altera perceptione conjunctam. Quia vero idea materialis consistit in motu, qui cerebro

rebro imprimitur, hinc patet imaginationem a statu cerebri pendere, & morbos cerebro infectos imaginationem quoque turbare ac corrumpere. Verum nemo a nobis requirat, ut distincte exponamus, unde oriatur facilitas producendi ideas rerum, quas antea habuimus, & qualis sit mutatio in cerebro producta, an, ut fert communis opinio, posita sit in certis cerebri vestigiis, quæ cum sensationum ope fuerint a spiritibus animalibus impressa cerebro, spirituum animalium reditu iterum teruntur, rursum trita revocant ideam rei antea perceptæ, & ex uno vestigio in aliud propter mutuam utriusque commercium transeant; an potius posita sit in facili fibrillarum cerebri *plicabilitate*, qua fiat ut facile eodem modo plicentur vel oscillentur, quo sæpius antea plicatæ vel oscillatæ sunt. Hæc nobis ignota esse candide fatemur.

IV. *Somnus* est status ille mentis, quo omnes sensationes claræ prorsus cessant, nilque eorum quæ præsentia nobis sunt, nobis conscii sumus; dum in illo statu versamur *dormire*, dum vero redeunt sensationes claræ *evigilare* dicimur. *Somnus profundior* appellatur, quando cum sensationibus claris cessant etiam phantasmata clara, ita ut nullius perceptionis prorsus nobis conscii simus; at dum in somno phantasmata clara menti insunt, *somniare* dicimur; & ideo *somnium* est status ille mentis, quo rerum absentium tantummodo, nullius vero rei præsentis nobis conscii sumus; hinc dum somniamus, res quas percipimus imaginamur. Porro inter imaginationis actus dum somniamus, & dum vigilamus hæc constituenda est differentia, quod in somnio perceptiones inordinatæ sint, seu repræsentent res nullo ordine se invicem consequentes, & in vigilia sint ordinatæ, seu res exhibeant constanti ordine sibi invicem succeden-

dentes. Hæc vero constant experientia. Si actum imaginandi clare percipiamus, sed phantasmata obscura fuerint, quid somniemus non agnoscimus. Quando enim phantasmata obscura sunt, rem quam repræsentant, non agnoscimus, nec a ceteris distinguimus, etiam si actum ipsum imaginandi clare percipimus. Quamobrem nobis conscii sumus nos somniare, non tamen quid somniamus agnoscimus. Somnia igitur, perinde ac perceptiones singulæ distinguenda veniunt in *clara* & *obscura*. Somnium clarum est, quando agnoscimus quid somniemus; obscurum vero est quando quid somniemus non satis agnoscimus, etsi actus percipiendi nobis conscii simus.

V. Ideam aliquam *recognoscere* dicimur, quando nobis conscii sumus nos eam jam antea habuisse. Sic dum hominem videmus, dumque jam antea a nobis visum fuisse nobis conscii sumus, illum recognoscimus. *Memoria* dicitur facultas recognoscendi ideas, ideoque & res ideis illis repræsentatas. Igitur memoria supponit quidem imaginationem, attamen ab illa distinguitur: fieri enim potest ut idea aliqua vi imaginationis iterum producat, & tamen non recognoscatur, ut contingit illis qui vi imaginationis in mentem revocant, quæ olim in libro aliquo legerunt, sibi tamen conscii non sunt se illa unquam legisse; sed contra existimant a se nunc inventa esse. Quia vero dum ideæ rerum sensu, vel imaginatione in mente iterum producuntur ac recognoscuntur, rursus etiam producuntur in cerebro ideæ materiales illis respondentes. *Memoria materialis*, seu in cerebro considerata nihil aliud est, quam facilitas iterum producendi ideas materiales. Hinc cum ista facilitas in actuali quadam cerebri mutatione consistat, a causa materiali pendet, ac proinde a causis quoque materialibus, vel
pror-

prorsus destrui, vel ex parte tolli potest. Memoria igitur a causis materialibus lædi potest, & ideo observamus memoriam sæpius debilitari vi morborum acutorum atque capitis, & ipsa senectute qua nervis, ac proinde cerebro creari solet mutatio aliqua.

VI. Plures sunt memoriæ in diversis subjectis differentiæ. 1. Alii diuturniore objecti contemplatione facilitatem ideas recognoscendi sibi comparant. Alii minus diuturna contemplatione ad id opus habent.... 2. Alii plures ideas recognoscere valent, alii pauciores..... 3. Alii frequentius iterata idearum productione, memoriæ semel infixæ retinent.... 4. Alii ideas memoriæ demandatas valent recognoscere, etsi a multo tempore eas in memoriam non revocaverint: alii ideas iterum producere, & recognoscere non valent, si eas ab aliquo tempore in memoriam non revocaverint. *Bonam* memoriam habere dicitur, qui cito & facile aliquid memoriæ mandat diuque retinet; *Magnam* vero memoriam habere dicitur, qui multarum rerum ideas iterum producere & recognoscere, longamque rerum seriem memoria retinere valet: videmus enim esse aliquos qui cito, & facile aliquid memoriæ mandare, & diu etiam retinere valent, non tamen multis eam onerare; eorum enim quæ antea tenuerunt, obliviscuntur, aut longam rerum seriem, eo ordine recensere non possunt, quo eas memoriæ mandarunt. Illa memoriarum diversitas peculiare fibrillarum nervearum dispositiones, seu constitutiones requirit; unde cum in diversis subjectis, imo in eodem subjecto diversis temporibus memoria diversa sit, fibrillæ nerveæ ex quibus nervi, atque cerebrum constant, nec in omnibus hominibus, nec in eodem homine diverso tempore sunt eadem.

VII.

VII. Imaginatio & memoria exercitio amplificari & extendi possunt. Imaginatio quidem quatenus per exercitium apta redditur ad plures ideas simul producendas, & easdem productas diutius conservandas; memoria vero quatenus istas ideas continuo recognoscit. Verum ad juvandam, confirmandamque memoriam maxime conducit rerum ordo, distinctaque singularum perceptio. Ponamus in objecto aliquo nos distinguere partes A, B, C, D, E, &c. easque eodem ordine se excipere, quo litteræ se invicem consequuntur; & 1. quidem ipsum A sigillatim nobis repræsentamus, non attentis ceteris partibus, atque deinde cogitationem successive ad B, C, D, E, &c. promovemus. Dum per aliquem temporis tractum, singula hæc sensui, vel imaginationi præsentia sistimus, & ad ordinem quo se invicem consequuntur respicientes A, & B simul; B, & C, simul &c. percipimus, facilitatem acquirimus una cum A, producendi perceptionem ipsius B, & cum ipso B perceptionem ipsius C, & ita porro, ita ut excitata idea ipsius A recurrat quoque idea ipsius B, & deinde idea ipsius C, atque ita deinceps. Hoc autem modo ipsum objectum memoriæ mandamus, eo quidem successu, ut perinde sit ac si unicum A, vel B, vel C, vel E memoriæ mandarem. Contra vero qui objectum nonnisi confuse percipit, partes objecti non distinguit, ac proinde ad numerum, ordinemque partium non attendit, ideoque subsidio destituitur, quo in distincta perceptione, idea ipsius B produciatur ope alterius A, idea ipsius C ope alterius B, & ita porro. Hæc juvandæ memoriæ ratio confirmatur etiam a posteriori. Ponamus enim te legere historiam quamdam prolixiorē, multisque perplexis circumstantiis involu-

volutam. Si lectionem ita instituas ut textum Auctoris distincte resolvas, singula facta circumstantiasque singulas a se invicem separans & eo ordine quo se invicem excipiunt perpendens, ea quæ legisti te accuratissime enarrare posse intelliges; Illa autem non adhibita diligentia, idem a te fieri non posse animadvertes, licet eodem consumpto tempore textum Auctoris sæpius relegeris. Idem experiri licet sive librum historicum, sive dogmaticum legamus; & his consentanea est praxis qua memoria juvatur, qualis est usus tabularum in quibus uno quasi conspectu exhibentur dogmata quæ de aliquo argumento tenenda sunt & in classes quasdam generales revocantur. In his vero tabulis conficiendis habenda est ratio ordinis quo dogmata ad idem argumentum pertinentia sese invicem excipiunt. Ex his ergo patet duplicem esse memoriæ speciem; alia *naturalis* appellatur qua sine ulla exercitatione ullove artificio præditi sumus; alia autem *artificialis* quæ exercitatione & artificiorum ope extenditur atque comparatur. Memoria distingui solet a *reminiscentia*, nempe perceptionum præteritarum mediata reproductio & recognitio dicitur *reminiscentia*, si nempe ad circumstantias loci, temporis, resque alias vel similes aut affines vel contrarias attendamus ut rem aliquam recognoscamus, tunc *reminisci* dicimur.

VIII. Ad hunc locum pertinere potest quæstio, utrum scilicet homines omnes in profundissimo etiam somno semper aliquid percipiant, suarumque perceptionum sibi conscii sint, licet cogitationum illarum memoria non remaneat. In hac quæstione ignorantiam nostram ingenue fateamur; & quidem animam perpetuo cogitare neque experientia neque ratione probari potest. Propria quidem conscientia quisque convincitur
se

se dum vigilat, aut somniat, cogitare, ac proinde concludendum esse semper nobis inesse cogitandi facultatem. At utrum id quod in nobis vigilantibus & somniantibus cogitat seu anima, in arctissimo etiam somno semper cogitet, quamvis a somno excitati nullam harum cogitationum memoriam habeamus, hoc ipsum est quod experientia nullo modo demonstrat. Affirmant Cartesiani intelligi non posse quid sit Anima nisi concipiatur tamquam substantia actu cogitans. Unde concludunt animæ essentiam in actuali cogitatione positam esse; verum nos animam dicimus substantiam quæ habet cogitandi facultatem; necesse autem non est ut inde inferamus substantiam illam semper cogitare. Præterea hæc inest menti proprietas ut ideæ quas antea habuit, ipsi quodammodo inhæreant, cum eas possit iterum producere & recognoscere. Quis autem affirmare poterit sublata omni cogitatione præsentis tales ideæ quæ revocari possunt, non superesse?

Neque observare abs re erit quibus, ut ita dicam, gradibus a vigilia in somnum paulatim delabamur: Mentem sentimus vividissimis distinctisque ideis ac sensationibus occupatam atque attentam; paulo post minuitur earum vividitas, attentio veluti subsidit; jam uni ideæ non magis quam alteri intenta mens res præsentis perfunctorie spectat; neque uni præ cæteris immoratur, tuncque vulgo dicitur *de nihilo cogitare*; Tunc confusa omnia apparent, mens ea spectare dedignatur, & ita leviter afficitur ut vix ea percipiat, donec tandem torpedine quadam velut oppressa nec sui ipsius nec aliarum rerum sibi conscia sit; tum demum producta somni cortina omne clararum idearum spectaculum menti intercipitur. Ex his paucis manifestum est de hac questione nihil certo affirmari posse.

C A.

C A P U T I I I.

De aliis quibusdam mentis humanæ facultatibus.

DUas primarias animæ facultates distinguendas esse statuimus in ipso Logices initio ; Prima nempe est facultas *cognoscendi*, altera autem facultas *appetendi*. Hæ autem duæ primariæ facultates juxta nostrum concipiendi modum rursus duas partes habere intelliguntur, *inferiorem* scilicet & *superiorem*. Facultatis cognoscitivæ pars inferior dicitur illa, qua rerum sensibilibum notiones obscuras & confusas, hoc est, per sensus tantum acquirimus. De hac prima parte in præcedentibus articulis sermonem habuimus, sensationum doctrinam explicantes. Facultatis cognoscitivæ pars superior vocatur qua notiones distinctas acquirimus & ab imaginibus corporeis separamus. Hæc intellectus proprie dicitur. Facultatis appetitivæ duæ etiam partes distinguuntur nimirum inferior, seu appetitus sensitivus, & superior seu appetitus rationalis. Prior est facultas objecta appetendi vel averfandi ex notione boni vel mali confusa, seu per sensus acquisita; atque hinc nascuntur animi affectus, ac proinde hæc prima pars ad *Ethicam* proprie pertinet. Posterior est facultas appetendi vel averfandi objecta prout ab intellectu proposita sunt tamquam bona vel mala, & voluntas proprie appellatur. Itaque intelligendi & volendi facultates dumtaxat hic considerabimus.

A R.

ARTICULUS I.

*De facultate intelligendi seu de intellectu
& ejus operationibus.*

I. **I**ntellectus dicitur facultas res distincte & universim repræsentandi. Quamvis intellectus nomen ambiguam vagamque significationem vulgo habeat, non invito tamen communi usu loquendi, sensus ad rerum præsentium in *singulari* repræsentationem refertur, imaginatio autem ad rerum absentium repræsentationem per imagines confusas itidem in *singulari*: at intellectus ad repræsentationem distinctam universim refertur. Atamen intellectus dici solet *purus* vel non *purus*; dicitur nempe purus si notioni rei quam percipit, nihil confusi admiscetur, nihilque obscuri. Non purus dicitur, si in notione rei aliqua sint quæ confuse aut prorsus obscure percipiantur. Quoniam vero perceptiones confusæ ad sensum & imaginationem spectant, intellectus purus est si a sensu atque imaginatione liber sit. Hic autem caveri debet verborum ambiguitas; dum intellectum purum dicimus, non ita res est intelligenda quasi existant in anima perceptiones quæ a sensibus neque *mediate*, neque *immediate* pendeant. Itaque ideas purè intellectuales dicimus rerum illarum ideas, quæ nullam cum rebus sensibilibus habent similitudinem, quæque proinde sine imagine corporea percipi possunt. Verum quamvis ideæ pure intellectuales nulla imagine corporea repræsentari possint, eæ tamen ex sensibus originem mediate trahere possunt. Ita licet animæ nostræ idea sit pure intellectualis, fieri tamen potest ut animæ nostræ existentiam ex aliqua sensatione primum noverimus.

Pari

Pari ratione licet pure intellectualis sit *idea* Dei, eam tamen ex rerum sensibilibus contemplatione haurire possumus. Itaque ideas pure intellectuales ex sensibus originem mediate habere non repugnat; quod quidem probe observandum est. Hæc enim quæstio: *utrum ideæ omnes a sensibus saltem mediate originem habeant*, Intellectus nostri limites longe excedit; pendet enim ex animæ corporisque commercio cuius quidem commercii leges tamquam divinum arcanum venerari potius debent Metaphisici, quam curiosius scrutari. Tandem observandum superest hæc omnia nequaquam repugnare iis quæ de ideis innatis Logices initio tractavimus; Hæc enim quæstio perinde se habet siue ideæ pure intellectuales mediatam originem a sensibus habeant, siue a sensibus nullatenus pendeant. Hanc autem quæstionem fusius explicare non licet, tum quod eam mortalibus imperviam crediderim, tum quod eam minoris, quam putari solet, utilitatis habuerim.

II. Hinc quo plura objecta distincte intellectus sibi repræsentare potest, eo major censetur illius vis. Hic autem intellectus gradus cum ab objecto desumatur, *objectivus* appellari potest. Similiter quo plura quis in eodem subjecto distinguit, eo major etiam dicitur vis intellectus, atque hic est alter gradus qui cum a *forma* seu modo repræsentandi desumatur, gradus *formalis* dici potest.

Quoniam autem in intellectu non distinguimus nisi objectum quod repræsentatur, & modum quo repræsentatur; primus vero gradus illius ab objecto, alter a forma petitur, intellectus major concipi nequit quam qui omnia possible distincte sibi repræsentare valet, ac proinde intellectus omnia possible distincte repræsentans est omnium maximus seu absolute summus,

mus, qualis est solus intellectus divinus; nostrum vero intellectum ad aliqua tantum possibilia extendi posse & in uno subiecto omnia non distinguere, ideoque limitatum esse tum *materialiter* seu ratione obiecti, tum *formaliter* seu ratione modi, ac proinde ab intellectu maximo infinite distare, unusquisque continuo experitur. Quare patet veritas vulgatissimæ sententiæ: *maxima pars eorum quæ scimus, est minima eorum quæ nescimus.*

III. In Logica ostendimus tres esse intellectus operationes, de quibus quidem operationibus satis fuse dictum est. Quare non est quod hoc argumentum iterum revocemus. Varias dumtaxat mentis facultates atque *dispositiones* considerabimus, ea tantum explicaturi de quibus verba hactenus non fecimus: Inter varias mentis facultates primo loco considerabimus *attentionem*. Anima sibi conscia est eorum quæ simul percepta distinguit; ea autem a se invicem distinguit quorum sibi conscia est; utrumque in nobis facile experimur. Si igitur anima in perceptione totali partiales perceptiones distinguit, rerum perceptarum sibi conscia est, & viceversa si rerum perceptarum sibi conscia est, in perceptione totali partiales distinguit, & ideo si perceptiones singulæ partiales obscuræ sunt, anima quæ eas distinguere nequit, rerum perceptarum sibi conscia esse non potest. Nascitur itaque *conscientia* quam etiam *apperceptionem* dicunt Metaphysici ex claritate perceptionum partialium quæ totalem componunt, & ea claritate sublata anima rerum quas simul percipit, sibi conscia non est. Porro facultas efficiendi ut in perceptione composita pars una præ ceteris maiorem claritatem habeat, dicitur *attentio*. Hanc autem facultatem animæ convenire experientia patet; Nam dum percipimus arbo-

rem V. G. efficere possumus pro arbitrio nostro ut nobis magis conscii simus trunci quam ramorum, surculorum, & foliorum.

IV. Si plura simul percipimus, attentionem ad id dirigimus quod clarius percipitur, si nulla adsit ratio cur eam ad aliud dirigamus. Cum enim attentionem ad perceptionem aliquam partialem potius quam ad aliam non dirigamus sine aliqua ratione, & attentio non alio tendat quam ut unum cæteris clarius percipiamus, id quod clarius percipitur, attentionem ad se trahit, si nulla adsit ratio extra perceptionem totalem cur eam ad aliud dirigamus. Si ex aliqua re voluptatem percipimus in ea attentionem nostram defigimus & defixam in eadem retinemus. Contra vero si ex re aliqua tædium percipimus, attentionem ab ea avertimus. Quare adolescentum animis frequenter instillanda est scientiæ jucunditas.

V. Plures sunt hominum circa gradus attentionis differentiæ; nonnullorum attentio tanta est ut vix ac ne vix quidem conscii sibi sint objectorum quæ organa sensoria feriunt. Petrus de Montmort Mathematicus Gallus ad objectum meditationis suæ tantam attentionem adhibebat ut inter plurimos strepitus, resonantibus instrumentis musicis, curritante & patrem interpellante parvulo filio, difficiliora problemata solveret, uti refertur in ejus elogio an. 1719. hist. acad. Regiæ Scien. Parisien. Sunt qui attentionem ad idem objectum diu conservare possunt, V. G. ad longam atque perplexam demonstrationum seriem; alii contra attentionem suam statim expirare patiuntur, quando longior evadit ratiocinationum nexus. Plerique hominum non nisi ad unum objectum attenti esse possunt; si autem attentionem suam inter plura dividere voluerint, eam minorem esse

esse ad singula experiuntur, indeque natum est hoc vulgatum: *pluribus intentus, minor est ad singula sensus*. Non desunt tamen exempla eorum qui ad plura simul probe attendere potuerint; Nam Julius Cæsar eodem te pore quo ipse epistolam scribebat, quatuor alias epistolas dictare potuit & septem ipse scribebat. Quidam ad objectum quodlibet eandem attentionem afferre possunt: alii contra ad quædam objecta nullam prorsus, ad alia vix levem quamdam afferunt attentionem; prout enim sua quemque trahit voluptas, attentione utitur sua; ita Poetæ attentionem præbent versibus; ad alia eam transferre ipsis difficile est. Contra Mathematicus stupendam calculis ac figuris attentionem præbet; At si versus legere debeat, vel alia quæ sunt ab ipsius foro aliena, licet ea intelligere possit, vix tamen ad illa attentionem aliquam adhibere potest. Aliqui ad rem præsentem, quæcumque fuerit, omnem afferre possunt atque solent attentionem; alii animum habent semper absentem, nisi præsens fuerit objectum illud ad quod attentionem adhibere sunt assueti. Exempla nobis præbent in primis eruditi illi qui animum semper habent, ut ita dicam, in musæo suo, unice attendentes ad ea quæ memoria de rebus litterariis suppeditat. Sunt etiam artifices quos præter artem nihil delectat. Plurimum utilitatis habet animus ad omnia præsens, plurimum obest si quis animo constanter absens fuerit; Quemadmodum enim alii gradus attentionis maximum usum habent in rerum cognitione, ita animus semper præsens in prudente actionum nostrarum determinatione plurimum commendari debet.

VI. Gradus attentionis exercitio comparantur; Nam infantes recens nati ad nihil prorsus attentum sunt, sed successive excitanda est illo-

rum ad objecta nonnulla attentio , atque ita demum ad aliquid attendere assuescunt. Eorum tamen attentio profectione ætate ad eximium gradum numquam promovetur , nisi actus ad gradum illum spectantes sæpius iterentur. Sane Wallisius , Momnortius , Julius Cæsar aliique non pervenire ad summum attentionis gradum quem commemoravimus , nisi attentione sæpius exercitata in debitis circumstantiis . Studium Matheseos præstantissimum est attentionis comparandæ adjumentum , ut experientia constat ; quilibet enim in se ipso experiri potest quod initio studii Mathematici exiguus attentionis gradus , successu temporis per continuum exercitium augeatur. Non omne tamen attentionis genus studio Matheseos acquiritur ; Cum autem diversæ sint attentionis veluti species , diversis quoque exercitiis ad illas acquirendas opus est. Regulas autem trademus uniuscujusque speciei attentionis acquirendæ quæ quidem utilitatis maximæ esse possunt . 1. Si attentionis inter multos strepitus conservandæ facilitatem quis sibi comparare voluerit , is sæpius omnem conatum adhibere debet eandem conservandi inter strepitus sensim sensimque majores ; hæc enim facilitas attentionem ad idem objectum conservandi diversos gradus habet qui proinde non nisi exercitio seu iteratis attentionis hujus actibus comparantur . Hanc regulam confirmat experientia 2. Si quis attentionem ad idem objectum conservandi facilitatem sibi comparare voluerit , is omnem conatum adhibere debet ut eam sensim sensimque per longius temporis spatium conservet . Hæc regula eodem fere modo probatur quo præcedens . Cæterum si quis in disciplinis diu conservandæ attentionis facilitatem sibi acquireret voluerit , ei nihil quidquam magis ad donum

num hoc eximium consequendum proderit quam demonstrationum continuo longiorum evolutio, & calculorum continuo prolixiorum tractatio. Hoc exercitio attentionis diu conservandæ tantum gradum acquisiverat subtilissimus Geometra Varignonius, ut lucubrationes suas sæpissime protraheret ad horam usque secundam post mediam noctem, & miraretur sonum Campanæ horam hanc indicantis..... 3. Si quis attentionis ad plura simul adhibendæ facilitatem sibi comparare velit, is sibi primum acquirere debet facilitatem attentionis ad idem objectum tandiu conservandæ, quandin voluerit. Deinde attentionem dividere debet inter objecta duo, felicitque progressu inter plura. Antequam enim attentionem ad plura extendere possit, necesse est ut eam in eodem objecto pro arbitrio retinere queat, & animum ab iis objectis, quæ sensus feriunt revocare.... 4. Si quis acquirere velit facilitatem eandem attentionem ad objectum quodlibet afferendi, is omnem adhibere debet conatum, ut ad objecta non modo quævis obvia, sed studio etiam quæsitæ, atque ad ea in primis, a quibus retrahitur animus, attendat; hoc enim exercitio acquireret facilitatem sine molestia attendendi ad rem quamlibet, quamdiu ipsi visum fuerit..... 5. Gradus cujuslibet attentionis continuo usu conservatur & perficitur, diu intermisso usu amittitur; quoniam enim omnis attentionis gradus exercitio comparatur, impossibile est ut amittatur quamdiu exercitium istud durat, imo continuo exercitio crescit. Experientia autem probat interrupto usu decrescere, & tandem amitti..... 6. Ex iis, quæ hætenus diximus, facile intelliguntur attentionis impedimenta. Attentio facilius conservatur, si pauca in sensus externos agunt, difficilior vero si multa simul, præsertim

tim valide organa sensoria feriunt, & inde est quod *aurora* dicatur *musicis amica* seu studiis; quoniam matutino tempore pauca sunt objecta, quæ in organa sensoria agunt; cum nondum fervéat solis æstus, aer strepitu hominum non resonet, nec corpus sibimetipsi molestum sit, quemadmodum a prandio præsertim fieri solet. Accedunt ab imaginatione rationes aliæ plurimæ. Si multa phantasmata in imaginatione continuo sibi invicem succedunt, attentio difficulter conservatur, in hoc enim casu nova continuo nobis obijciuntur phantasmata. Quare ubi ad ea attendimus, cessat attentio in objectum ad quod eandem conservare volumus. Idem a posteriori liquet. Si quis enim in frequentia multorum hominum fuit, & ad singula quæ ibi gerebantur multum attendit, eidem paulo post meditatur in mentem veniunt phantasmata hominum illorum, rerumque ab illis gestarum, & experitur quam difficile sit mentem conservare attentam ad ea, quæ meditatur. Idem experimur cum per aliquot dies rure in urbem ad consuetam studia revertimur. Verum nihil attentioni magis obstat, quam inordinatus affectuum tumultus, quem proinde summa cura declinare debent non solum scientiæ, sed rectitudinis & virtutis amatores.

VII. Ex præcedenti mentis facultate nascitur alia, quæ *ingenii acumen*, atque *profunditas intellectus* appellari potest; eaque est facultas in uno multa distinguendi, & notiones distinctas in alias simpliciores resolvendi. Hinc intellectus eo profundior est, quo longius in notionum Analyti progredi potest. Unde patet intellectus profunditatem acquiri studio scientiarum, in quibus partes omnes ita inter se connexæ sunt, ut ab anterioribus sequentia semper pendeant, & notio quælibet in anteriores con-

continuo resolvi possit, ut fit in Mathesi. Quamobrem maxime suadendum imo urgendum est, ut & plurima in rebus distinguere, atque universalia abstrahere, & quæ distinguimus, atque abstrahimus singula suo proprio nomine efferre discamus; ita demum præclarum acuminis, ac profunditatis, intellectus gradum a nobis acquiri experiemur. Eam ob causam summo studio curavimus, ut in nostris institutionibus philosophicis omnia, quantum fieri potest, perpetuo nexu jungerentur. Nihil magis vagum est, & ambiguum in quotidiano sermone, quam ingenii vocabulum. Ingenii nomine vulgus intelligere solet acutis, argutisque dictis ludendi & jocandi facilitatem; alii quamdam animi alacritatem intelligunt, alii alias significationes tribuunt, sed ut plurimum præclaro ingenii nomine abutuntur. Nos autem ingenii vocabulo eam tribuimus significationem, quæ maximo in pretio haberi debet, & de hac ingenii specie acquirenda laborare maxime debent Philosophiæ studiosi.

Ex his intelligitur quid sit ingenii imbecillitas; est nempe impotentia judicandi orta ex notionum defectu, atque inopia, qualis reperitur in infantibus & idiotis. Quia vero sine memoria nulla potest esse notionum copia; si memoria læditur, ingenii acumen hebetari quoque necessum est. Læditur autem memoria, ut antea observavimus, dum a causis quibusdam materialibus veluti morborum acutorum vi, atque etiam sæpe ipso senectutis morbo læditur cerebrum. Hinc capitis contusionibus sæpius obtunditur judicii acies, ideoque barbara castigatione in pueros sæviunt Parentes, & Præceptores, qui eorundem caput verberibus pessime tundunt. Quamvis autem dixerim ad ingenii aciem conferre memoriam, de illa tamen me-

memoria dumtaxat loquor, quæ notionum seriem ordine digestam habet. Aliquando enim nimia rerum farragine ingenium obrui, atque obtundi observamus. Hinc fit, ut qui inordinata lectione memoriam opprimunt, diversissimos sermones sine ordine, & iudicio miscere soleant, atque hinc oritur, ut eruditio multa cum multo ingenio non semper conjuncta sit. Hæc pauca dicta sint de intelligendi facultate, & intellectus operationibus; amplissimum quidem foret argumentum, sed de hoc jam in aliis Metaphysicæ locis, atque in Logica plura dispersa leguntur.

A R T I C U L U S II.

De voluntate illiusque operationibus.

I. **V**oluntas est facultas appetendi, vel aver-
sandi objecta, prout ab intellectu propo-
sita sunt, tamquam bona vel mala. Ad hunc lo-
cum pertinet gravissima de voluntatis humanæ
libertate controversia, quam quidem ut digne,
& pro rei magnitudine pertractemus, nonnullis
cursum & generaliter præmissis, speciales dein-
de conclusiones adjungemus. *Actus humanus*
appellatur ille, qui fit ab homine, humano
modo seu consulto operante; unde secernitur ab
eo qui dicitur *Actus hominis*: seu qui ab ho-
mine fit citra ullam mentis attentionem. Om-
nis ergo actus, ut sit humanus, debet esse vo-
luntarius, seu fieri cum cognitione intellectus,
& propensione voluntatis; quapropter duo ma-
xime sunt opposita voluntario, nempe vis seu
coactio, & *ignorantia*. Vis seu coactio definitur
impetus qui repelli non potest, quique est vo-
luntatis propensioni contrarius. Ignorantia est
absentia cognitionis. Per vim tollitur volunta-
rium. V. G. Cum quis truditur in carcerem,
is non sponte, sed invitus carceris ostium su-
bit.

bit . Per ignorantiam *invincibilem* tollitur etiam voluntarium ; ignorantia invincibilis ea dicitur , quæ adhibita humana indutria superari nequit .

II. *Actus liber* generatim dicitur , vel qui fit nullo cogente , vel etiam qui sic exercetur , ut possit ad libitum exerceri . Hinc duplex in actibus voluntatis distinguitur libertas , nimirum *libertas a necessitate externa* , sive a *coactione* , & *libertas a necessitate intrinseca* sive *naturali* . Prima quæ etiam *spontaneitas* dicitur omnem vim externam , id est , ab externo principio contra voluntatis propensionem illatam removet . Hac libertate bonum generatim amamus & malum generatim odimus ; hac libertate Beati Deum amare dicuntur , quia , nullo cogente , sed libentissime Deo per amorem adhærescunt , ex quo patet liberum a coactione idem esse ac voluntarium , seu libens aut spontaneum ; quod nempe fit a voluntate citra coactionem , ideoque omnis actus voluntarius est liber a coactione 2. libertas dicitur a *necessitate* , seu libertas *electionis & indifferentiæ* , quæ & liberum arbitrium , & libertas simpliciter dicitur , omnem necessitatem tam internam seu naturæ , quam externam seu coactionis excludit

III. *Necessitas naturæ seu inclinationis naturalis* , definitur determinatio seu propensio quædam voluntaria a natura indita ad aliquid necessario prosequendum , vel fugiendum . V. G. ad bonum generatim necessario non ex electione amandum , & malum odio habendum

IV. *Necessitas coactionis* , seu uno verbo *coactio* dicitur vis aliqua alicui contra propriam inclinationem illata , ut cum quis truditur in carcerem percutitur &c. . Quamobrem in hoc coactio differt a necessitate naturali , quod illa sit a principio extrinseco contra voluntatis in-

clinationem, proindeque tollat tum liberum, tum voluntarium; ista autem sit a voluntate ipsa, ac proinde voluntarium non tollat, sed dumtaxat liberum strictè sumptum, quod sit electione; si tamen illa necessitas sit tantum *hypothetica*, libertatem non lædit. V. G. Ex hypothesi, quod me ad scribendum determinaverim, necessario scribo, sed hæc necessitas minime obstat, quominus possim scribere, vel a scribendo abstinere. Quare liberum arbitrium in me remanet, dum remanet potestas eligendi, quæ in eo maxime consistit, ut quis actum exercere possit, vel omittere.

V. *Libertas electionis*, seu *liberum arbitrium recte* dicitur vis electiva, idest facultas eligendi unum præ alio; cum autem electio alia sit ad agendum, vel non agendum, alia vero ad agendum hoc vel illud, hoc vel illo modo; duplex distinguitur libertas arbitrii seu electionis & indifferentiæ; altera ad agendum vel non agendum, quæ vocatur *libertas contradictionis*, quia agere & non agere sunt contradictoria; altera ad agendum hoc vel illud, hoc vel illo modo, V. G. ad amandum vel odium habendum, ad loquendum vel scribendum, quæ libertas *contrarietatis*, vel *diversitatis*, vel *specificationis* appellatur; nam mox enumerata actuum species sunt, vel contrariæ, vel diversæ. Observandum tamen est in posterioris libertatis exercitio nihil occurrere præter duos actus prioris; quando enim malo scribere quam legere. 1. Nolo nunc legere. 2. Malo scribere quam non scribere.

VI. Liberum arbitrium definiri etiam potest vis sui ipsius *determinatrix*, sive, cum Theologis, *facultas quæ positis omnibus ad agendum prærequisitis potest agere, vel non agere, imo contrarium aliquando eligere.*

VII. Hinc patet libertatem arbitrii non versari circa finem ultimum, seu beatitudinem

nem generationi sumptam; Hanc enim non possumus non expetere, sed versatur tantum circa ea quæ media sunt ad finem, nec tamen cum eo sunt necessario connexa, seu quæ possunt modo videri bona, modo non bona. Experimur etiam nos non posse propositioni per se evidenti assensum negare; Contra vero sentimus de propositione obscura.

VIII. Homo est liber a coactione; nam bonum generatim, seu felicitatem suam necessario quidem, sed tamen sponte ac nemine cogente diligit, ut Beati libentissime Deum amant; Imo non potest cogi humana voluntas in actibus suis interioribus & propriis; Quippe non potest simul velle & non velle. At si vis phisica & cogens posset inferri voluntati, tum ea vellet & nollet simul; vellet quidem (ex hyp.) nollet vero, quia sibi ipsi volenti repugnaret, seu vellet invita, aut quod idem est vellet nolens, cuperet refugiens, quæ manifestam involvunt contradictionem.

IX. Homo est etiam liber a necessitate naturali seu donatur libertate electionis & indifferentiæ; Etenim in homine est vis electiva, seu facultas eligendi unum præ alio; Siquidem homo præditus est intellectu quo res cognoscitur, & voluntate qua ex multis rebus quæ non sunt summum bonum, unum potest assumere aut relinquere ad libitum; quemadmodum multis propositionibus obscuris assensum præbere vel non præbere potest, aut etiam iudicium cohibere, ut omnes experiuntur. Et certe si non est vis electiva in homine, vita humana omnino subvertitur; frustra enim dantur leges, frustra adhibentur objurgationes, laudes, vituperationes & exhortationes, atque sine ulla iustitia bonis præmia & malis supplicia constituta sunt.

X. Jam vero cum satis constet liberum arbitrium seu vim electivam esse in homine, eamque citra indifferentiam non posse intelligi, quia ibi nulla est electio ubi incumbit necessitas, tota difficultas est quænam indifferentia requiratur. Alia est indifferentia *passiva*, seu ad patiendum, ut cera est indifferens ad multas figuras recipiendas, statera ut in hanc vel illam partem attollatur aut deprimatur. Per hanc autem non posse constitui liberum arbitrium satis patet. Alia est *activa* quæ rursus duplex est; nempe *contradictionis* & *contrarietatis* de quibus supra. Alia dicitur *negativa*, & est negatio seu privatio omnis plane determinationis, sive animi suspensio qua quis omnino incertus est & ignarus ejus quod agere debeat, quam indifferentiam ad libertatem electionis minime requiri fatentur omnes. Alia dicitur *positiva*, & est vis seu capacitas voluntatis ad unum ex multis eligendum, quæ indifferentia stare potest cum determinatione seu electione, hæcque indifferentiæ species ad rationem liberi arbitrii pertinet.

XI. Quamvis indifferentia contrarietatis reperiatur in homine lapso; Si quidem nullus est qui hanc ad bonum aut ad malum morale sese convertendi potestatem maximo suo dispendio non experiatur, illa tamen ad essentiam libertatis minime pertinet. Etenim sine hac indifferentia esse & concipi potest liberum arbitrium seu vis electiva, cum ad electionem sufficiat potestas agendi vel non agendi. V. G. Cui unicum in mensa apponitur ferculum, liber est libertate electionis, quatenus potest ex eo edere vel non edere, tamen non possit unum ferculum præ alio assumere, ac proinde circa hoc non sit liber libertate contrarietatis. Præterea si nulla esset libertas sine tali indifferentia ad bonum vel

vel malum morale, sequeretur potentiam peccandi esse de essentia libertatis, quod falsum est; Ea siquidem potentia defectus est non perfectio libertatis. Deus etiam nunquam deficere aut peccare potest, & tamen est liberrimus; idem dic de Angelis Beatis. Ergo ut probe intelligatur libertas, comparari debet potentia agendi cum iis actibus de quibus quæstio est. Si adsit agendi vel non agendi potentia, adest libertas, si desit illa potentia, deest quoque libertas relate ad talem actum. Nam ad libertatem ut sufficiens, sic necessaria est indifferentia contradictionis quæ etiam dicitur exercitii; Tum enim liberum arbitrium concipitur in aliquo, cum vim habet electivam seu potestatem in proprios actus, ita ut eos ponere possit vel non ponere ad libitum, quod citra indifferentiam saltem contradictionis intelligi nequit, E. G. Ut possim scribere, vel non scribere; Sed minime necesse est ut possim scribere vel legere; Si enim non adessent libri, legere non possem, & tamen possem scribere si necessaria mihi essent instrumenta, vel non scribere. In hoc ergo casu non essem liber ad legendum, hoc est, non haberem sub hoc respectu libertatem contrarietatis, sed liber essem ad scribendum vel non, libertate contradictionis, atque etiam contrarietatis sub alio respectu. V. G. Si possem scribere, vel deambulare aut loqui.

XII. Ex his omnibus colligitur liberum arbitrium seu libertatem electionis quæ nobis ad merendum necessaria est, facultatem esse, *activam & indifferentem*; activam quidem quia possumus agere vel non agere; indifferentem vero, quia sic nos efficit actuum nostrorum dominos ut eos ad libitum ponere vel suspendere, imo aliquando varias actionum species elicere possimus. Evidens autem est liberi arbitrii originem

ginem repetendam esse a natura animæ rationalis quæ nullo nisi summo bono ad agendum, nullo nisi clara perceptione ad judicandum necessario determinatur; unde bona finita perlustrare potest, & bono aliquo neglecto ad aliud se convertere, in qua potestate liberi arbitrii vis consistit.

XIII. His ita constitutis aliquid addendum de questione celebri; *Quare fiat ut mens libera ad quidpiam volendum adducatur*. Respondent vulgo mentem seu voluntatem adduci ultimo iudicio intellectus practici. Intellectum practicum dicunt qui bonum & malum & quæ ad praxim pertinent considerat: quemadmodum & intellectum theoreticum vocant qui circa res mere speculativas, seu veritatem & falsitatem in se simpliciter spectatas versatur. Itaque dicunt voluntatem adduci ultimo iudicio intellectus practici, nempe iudicio quo lato non potest voluntas id non exequi; hoc est, cum mens iudicavit aliquid esse volendum, id vult; quod quidem verissimum est; nam iudicare esse volendum & velle idem sunt. Verum responsio hæc non satisfacit quæstioni, quæ ut solvatur ostendi debet quid efficiat ut mens iudicium ferat.

Leibnitius existimavit humanum animum in singulis actibus eliciendis semper aliqua sufficienti ratione percelli, moveri ac determinari. Quamvis autem rationis sufficientis principium jam antea breviter explicaverim, tota res tamen accuratius & fusiùs exponenda. Itaque, secundum Leibnitianam hypothèsim, Deus ab æterno decrevit humanos quosdam animos creare, quibus incorporeas rerum ideas, intelligendi vim, voluntatem eamque facultatem concederet qua sese determinare possent pro varia rationis sufficientis indole. Deus ipse ab æterno circumstantias omnes, ideas & objecta quæ singulis animis proponi poterant, nitide cognovit,

vit, ideoque singulas rationes sufficientes in animo futuras prævidit quæ nimirum in circumstantiis illis liberam ac indifferentem animi vim ad actum aliquem inflectere ac determinare debebant; ideoque nitida certaue cognione prævidit actuum illorum seriem quam quilibet humanus animus erat faturus..

Altera ex parte observavit Leibnitius quod in humano corpore plurimi ac infiniti fere motus ex admirabili ipsius textura, partium ordine, situ, simulque externorum corporum motu & compage oriuntur, ita ut pro vario partium ordine, figura, situ ac varietate in certo quodam humano corpore, varii quoque distinctique motus in illo produci debeant. Igitur in quolibet corpore humano cui certa quædam cum aliis corporibus connexio & certa quædam partium textura concessa fuerit, certa quædam ac distincta motuum series erat futura; quemadmodum autem certa ac peculiaris illa connexio vel dispositio infinitis modis a Deo variari poterat, ita quoque infiniti prorsus distinctique corporum motuum ordines admitti debent. Jam vero Deus infinitos omnes cogitationum ordines cognovit qui ab infinitis humanis animis dependenter ab infinitis rationum sufficientium ordinibus erant futuri, simulque prævidit infinitos motuum ordines in infinitis humanis corporibus futuros dependenter ab infinitis texturæ, figuræ &c. ordinibus. Ubi vero certum quemdam animam in quo nimirum certa quædam ac distincta cogitationum series esset futura cum humano corpore conjungere voluit; ex infinitis humanis corporibus illud unum elegit quod ex indole texturaque sua eam motuum seriem foret habiturum quæ primæ seriei consona & accurate conveniens foret; ac utramque simul animi corporisque substantiam.

nam conjunxit ut ex iis resultaret admirabile quoddam compositi genus quod hominem appellamus. Ex hac Leibnitiani systematis expositione patet, totum rationis sufficientis principium quale a Leibnitio intelligitur, pendere ex harmoniæ præstabilitæ hypothese quam libertati omnino repugnare ostendimus. Et quidem in hac hypothese ante constitutum a Deo præsentem animarum & corporum ordinem, animæ ponantur ad quemlibet statum indifferentes atque omnino inertes; at in præsentium rerum serie ratione sufficienti flectuntur atque determinantur. Hæc igitur ratio sufficiens pendet ex ipsorum ordine & nexu, non autem ex ipsa voluntate, ac proinde ratio hæc *necessaria* convenientius quam *sufficiens* appellanda est. Et certe in mundo *intellectuali* non secus ac in mundo *materiali* hanc rationem sufficientem admittit Leibnitius. Porro in effectibus causisque materialibus nulla libertas fingi potest. Præterea mundum sive materiale sive intellectualem comparant Leibnitiani horologio automato. Rem ita explicant. In horologio rotarum indicisque horarii situs quilibet per structuram horologii rotarumque motum determinatur, non mutata horologii structura. At non repugnare inquit ut structuræ horologii, rotarum indicisque motibus aliqua accidat mutatio a causa quadam extrinseca. Pari ratione fieri posse ajunt ut mutationes aliquæ in mundo accidant; hinc nullam esse dicunt necessitatem absolutam sed hypotheticam duntaxat. Verum, ut horologii automati exemplo utar, manente partium ordine, nexu & indole, motus horologii est absolute necessarius. Porro in hypothese Leibnitiana, Deus universum mundi ordinem certo nexu conjunxit ita ut partes singula ab eo quem Deus præscripsit, ordine & fine

nun-

nunquam aberrare possint. Itaque mundus universus sive materialis sive intellectualis considerari poterit tanquam horologium affabre elaboratum cujus præscriptus motus est omnino necessarius. Hæc autem comparatio non hypotheticam duntaxat, sed absolutam fatalemque necessitatem importat. Hæc argumenta vim majorem habent, si conjungantur cum iis quæ de harmonia præstabilita diximus. His de humana libertate generatim explicatis jam sit

CONCLUSIO I.

ANIMA NIHIL AVERSATUR NISI SUB RATIONE MALI, NIHIL APPETIT NISI SUB RATIONE BONI, IDEOQUE NON POTEST APPETERE MALUM QUA MALUM, NEC AVERSARI BONUM QUA BONUM.

Prob. Malum nihil aliud est in præsentî quæstione nisi quod nobis displicet & molestiam aliquam asserre judicatur. At quandiu aliquid nobis displicet, hoc est, quandiu voluntas aliquid aversatur, non potest idem placere, contradictorium enim est aliquid placere simul & displicere. Similiter boni nomine hic intelligimus quod nobis placet & jucunditatem aliquam creare judicatur; ac proinde eadem ratiocinatione evidens est idem quandiu nobis placet, seu quandiu voluntas in illud fertur, non posse simul displicere. Ergo ut voluntas bonum velit & appetat, necesse est ut & ipsi placeat.

Et quidem unusquisque proprio conscientiæ testimonio experitur se bonum appetere, malum autem aversari. Hic autem probe attendi debet præsentis quæstionis status ne boni mali que notionem perperam misceamus atque confundamus. Non enim debemus judicare aliquid
esse

esse bonum, quia nobis placet, nec aliquid esse malum quia nobis displicet. Bonum, vel malum hic consideramus duntaxat quatenus nobis apparet; ut plurimum autem erroneæ sunt boni & mali notiones: his notionibus erroneis, tribuendum est quod homines in vitia proclives ruant, & dum felicitatem anxie quæzunt, infelicitatem inveniant. Rectam atque erroneam boni notionem his verbis explicat S. Augustinus lib. 14. de civ. Dei cap. 7. *Recta voluntas est bonus amor, & voluntas perversa malus amor. Amor ergo inhians habere quod amatur, cupiditas est, id autem habens eoque fruens, lætitia; fugiens quod ei adversatur, timor est, idque, si acciderit, sentiens, tristitia est, proinde mala sunt istæ, si malus est amor, bona, si bonus.*

Objic. Si mens humana nihil appetit nisi sub ratione boni, nihilque averfatur nisi sub ratione mali, libera non est, falsum Conf. Ergo & ant. Prob. seq. Maj. Libera non est mens, si necessario determinata sit ad unum, sed si mens nihil appetit nisi sub ratione boni, nihilque averfatur nisi sub ratione mali, jam necessario determinata est ad unum. Et quidem objectum quodlibet menti exhibitum, vel ipsi tanquam bonum apparet, vel tanquam malum, vel neque bonum, neque malum videtur; sed si bonum appareat, mens necessario determinatur ad illud appetendum, si malum videatur illud necessario averfatur, si neutrum, est necessario indifferens. Ergo. . . Resp. N. seq. Maj. Ad cuius probationem Dist. Maj: objectum menti exhibitum vel ipsi apparet tanquam bonum vel tanquam malum, vel nec bonum nec malum, ita ut mens possit aliud iudicium ferre C. Maj. ita ut non possit aliter iudicare N. Maj. & Dist. similiter Min. Si objectum menti bonum undique appareat ita ut aliter iudicare nequeat, necess.

necessario determinatur ad illud appetendum C. si mens aliter judicare possit, necessario determinatur ad illud appetendum N. M. & Conf. Itaque si objectum aliquod menti exhibeatur tanquam undequaque bonum, nec in potestate animæ sit vel judicium suum de bonitate objecti suspendere, vel malum huic admixtum percipere, vel idem cum majori bono conferre, tum mens objectum illud necessario appetit. Sic Beati in cælo cum in Deo clarissime ac certissime videant summam perfectionem, summum bonum, nullum vero malum, nec majus bonum sibi repræsentare possint, Deum amore necessario prosequuntur. At objectum particulare quod nobis bonum apparet, non necessario tale judicatur, quia vel judicium nostrum de illius bonitate suspendere, vel etiam malum aliquod in eo detegere, vel majus bonum verum aut apparens nobis repræsentare possumus, ac proinde illud non necessario appetimus. Idem, proportionem servatâ, dicendum est de objecto quod malum nobis apparet vel indifferens, ita ut possimus transire a statu indifferentiæ ad statum appetitionis, & ab hoc ad statum aversionis & viceversa. Anima igitur per naturam suam determinata est ad bonum in genere appetendum & malum in genere averſandum; sed non est necessario determinata ad objecta particularia vel prosequenda vel averſanda. E. G. Nobis offertur cibus quem sapore gratissimum esse experti sumus, si id tantum in cibo illo consideremus & judicio sensuum acquiescamus, illum appetimus; at si nobis in mentem veniat cibus illum sanitati noxium esse & ratione nostra velimus uti, illum averſamur. Contra medicamentum nobis exhibitum averſamur, dum unice attendimus ad illius ingratum saporē, & sensuum judicio stare volumus; sed si illius vim ad sanitatem resti.

restituendam attendamus & ratione nostra uti velimus, idem appetimus seu volumus.

Inst. 1. Voluntas est libera circa bonum & malum, ergo potest appetere malum & averfari bonum. Unde Ecclesiastici cap. 15. *legitur: Ante hominem vita & mors: bonum & malum quod placuerit dabitur illi....* Resp. Dist. ant. Voluntas est libera circa bonum & malum quatenus potest appetere vel non appetere bonum, & malum averfari vel non averfari, quæ dicitur libertas contradictionis C. quatenus potest averfari vel non averfari bonum sub ratione boni, appetere malum vel non appetere sub ratione mali N. A. & conf. Ita cibus sanus ob saporem nobis ingratus averfantes, bonum averfamur sub ratione mali; & contra cibus sanitati noxius appetentes ob saporem nobis gratus, malum appetimus sub ratione boni. Potest itaque idem objectum sub diverso respectu bonum & malum videri. Ecclesiasticus autem cum dicit, *bonum & malum quod placuerit dabitur illi*, loquitur de præmiis & suppliciis homini, pro libertate sua bene vel male agendi, propositis a Deo. Porro dum homo male agit moraliter, malum quod sibi placet operatur; quod vero placet voluptatem creat & quod voluptatem creat nobis bonum apparet, quando in iudicio sensuum acquiescimus: ideoque qui malum operatur, illud apprehendit sub ratione boni.

Inst. 2. Qui proximum suum odio habet, vult illi malum sub ratione mali, ergo voluntas appetere potest malum sub ratione mali.... Resp. Dist. ant. vult illi malum sub ratione mali *proximi* C. sub ratione mali sui seu *quoad se* N. ant. & conf. Qui proximo quem odit, malum verum, ut morbum, vel mortem aut aliud simile contingere exoptat, malum istud non vult proximo, nisi sub aliqua specie boni respectu
tui

sui ipsius ; illud scilicet appetit tanquam sibi jucundum vel utile , atque ideo malum appetit sub ratione boni , ac proinde malum ut malum simpliciter non est ratio appetitionis .

Inst. 3. Voluntas eodem modo se habet ad bonum & malum quo intellectus ad verum & falsum , sed intellectus potest cognoscere falsum ut falsum , ergo voluntas appetere potest malum ut malum . Resp. N. Maj. Intellectus quidem cognoscere potest falsum tanquam falsum , ut pote *intelligibile* per ipsius oppositionem cum vero ; sed non ideo voluntas potest appetere malum ut malum , quia malum sub ratione mali non est *appetibile* . Et certe voluntas potest aliquo modo conferri cum intellectu ; quemadmodum enim assentiri non possumus falso sub specie falsi , sed tantum sub ratione veri apparentis ; ita nec possumus appetere malum sub ratione mali , sed tantum sub ratione boni apparentis .

Inst. 4. Sanæ mentis homines certissime norunt virtutem & scientiam esse verum bonum ex quo nulla molestia sequi potest , atqui tamen plerique homines virtutem non sectantur , plurimi scientiam parum curant . Ergo saltem averfantur bonum sub ratione boni . Ergo &c... Resp. Dist. Maj. virtus moralis & scientia sunt verum bonum ex quo nulla molestia sequi potest *per se* , & secundum veram bonitatis notionem C. Maj. *per accidens* & secundum bonitatis notionem erroneam M. Maj. similiter Dist. Min. plerique homines virtutem non sectantur , & in virtutis exercitio molestiam inveniunt *per accidens* & ex perversa boni notionem , C. M. *per se* & ex sincera notionem boni , N. M. Quare N. Conf. Itaque ex uno aliud sequitur *per se* , si in priori continetur ratio cur alterum inde sequatur . Ita ex gravi vulnere cordi inflicto *per se* sequitur mors ; nempe vul-

vulnus cordi inflictum est per se lethale. At ex uno aliud sequi dicitur *per accidens*, si in priori non continetur ratio, cur inde sequatur alterum, sed ratio continetur dumtaxat in alio aliquo externo, non tamen necessario. Sic ex levi vulnere manus inflicto per se non sequitur mors, sequi tamen potest per accidens si propter chirurgi absentiam nimia sanguinis copia ex dissecta vena profluxerit, & in hoc casu vulnus dicitur lethale per accidens.

Inde autem derivatur vera boni moralis notio inconcussumque fundamentum. Verum bonum per se nunquam displicere potest, sed per accidens dumtaxat, & ex errore. At contra bonum apparens ex se molelliam trahit, per accidens autem dumtaxat, & ex errore placere potest. Inconstantem rerum terrenarum felicitatem, atque satietatem pie & eleganter describit S. Augustinus lib. 9. confess. cap. 1. *Quam suave mihi subito factum est carere suavitatibus nugarum, & quas amittere metus fuerat, jam dimittere gaudium erat; ejiciebas enim eas a me, vera & tu summa suavisitas rejiciebas & intrabas pro eis omni voluptate dulcior.* Qui virtutem exercent, medios inter hujus vitæ labores, beate vivunt, sinceramque voluptatem percipiunt, eos consolante bona conscientia. Qui scientia ornatum habent animum, & vere scientiam amant, non aliorum invidia & malitia perturbantur, sed studii laborem malignosque invidorum hominum sermones longe superat scientiæ jucunditas. Verum quia rerum mundanarum cupiditas menti nostræ tenebras offundit, & mentita boni imagine corda nostra seducit, enixe Deo supplicandum est, ut *det amare quod precipit, & ibi nostra fixa sint corda ubi vera sunt gaudia.*

CON.

C O N C L U S I O I I .

ANIMA SESE AD VOLENDUM VEL NOLENDUM DETERMINAT SINE RATIONE SUFFICIENTE LEIBNITIANA , NON TAMEN SINE MOTIVO ALIQUO .

Prob. Rationis sufficientis principium libertati contrarium esse jam ostendimus, ac proinde nihil est quod de hac parte adjungamus. Quod spectat secundam partem, ea facile colligitur ex præcedenti conclusione in qua demonstratur animam nihil appetere nisi sub ratione boni, & nihil averfari nisi sub ratione mali. Igitur repræsentatio boni est motivum volitionis, repræsentatio autem mali est motivum nolitionis. Ergo anima sese ad nolendum vel nolendum non determinat sine motivo aliquo. Idem confirmatur a posteriori. Dum librum aliquem apud Bibliopolam percurris multaque in eo invenis ad scientiam tuam augendam utilia, eum distincte tibi repræsentas tamquam bonum tibi-que utilem, & ideo illum cupis habere. At contra si tibi occurrat liber aliquis erroribus absurdisque opinionibus plenus, ratiocinando colligis ideoque distincte cognoscis eum esse malum tibi-que inutilem, & propterea illum averfaris longeque a te remotum cupis. In aliquolibet exemplo unusquisque nosse potest proprio conscientię testimonio voluntatem sine motivo aliquo sese non determinare. Quamvis autem anima sine motivis sese non determinet, libera tamen manet; contraria enim motiva sibi potest repræsentare & actum aliquem elicere, vel ab eo abstinere. Sed ex solvendis objectionibus & ex sequenti conclusione hæc magis fient manifesta. Evidens autem est hæc
mo-

motiva longe differre a ratione sufficiente Leibnitiana quæ fatalem necessitatem induceret, a qua tamen eam liberare conantur plurimi.

Hæc conclusio cum Scholarum Theologicarum doctrina probe consentit. De gratiæ efficacia diversæ sunt Scholarum sententiæ quæ quidem omnes cum explicata hætenus doctrina apprimè conveniunt. Universa Augustinianorum schola docet efficaciam gratiæ reponendam esse in suaviori motione & præveniente delectatione quæ ipsam voluntatem moraliter determinat. Tota Thomistarum schola motionem moralem admittit, sed ei necessario adjungendam esse contendit præmotionem physicam. Hæc utraque scholarum sententia non sine motivis determinationem admittit. Alia tandem superest opinio eorum scilicet Theologorum qui efficaciam gratiæ in consensu voluntatis, aut etiam in circumstantiis magis congruis reponunt. Deus scilicet indiscriminatim eandem omnibus dat gratiam quæ ob voluntatis consensum fit efficax, vel etiam Deus prævidit circumstantias in quibus voluntas constituta ipsam gratiam reddit efficacem; Deus autem misericorditer constituit voluntatem in iis circumstantiis quas prævidit ita congruas ut gratia suum effectum infallibiliter sit habitura. In hac ultima opinione, circumstantiarum congruitas ipsa motiva præsupponit. Hanc Scholarum doctrinam fufius explicare nostri non est instituti: hæc pauca breviter observasse satis sit ex quibus evidens est conclusionem nostram non solum rationibus Philosophicis, sed etiam Theologorum placitis esse omnino consentaneam. Cæterum hæc motiva si quis appellare voluerit *rationem sufficientem*, per nos licet, de nomine enim non disputamus; dummodo tamen rationem hanc sufficientem non confundat cum

cum ratione sufficiente Leibnitiana quæ ratio *necessaria* merito dici posset.

Objic. 1. Motivum est ratio ob quam volumus aut nolumus, sed sæpe volumus & nolumus sine ratione ulla, ergo etiam sine motivo. Prob. Min. Sæpe ex pluribus bonis cognitis quorum unum alteri præferendum est, id præferimus ac proinde volumus quod altero minus est, sed tum volumus sine ratione ulla, siquidem minus bonum cum meliore comparatum habet rationem mali, ideoque cum minus bonum meliori comparatur, illud nobis non repræsentamus sub ratione boni. Ergo Resp. N. Min. cujus probationem distinguo. Minus bonum meliori anteponimus quatenus habet rationem boni C. ut minus est altero & tale apparet N. si plura sint objecta quæ bona judicemus quoad nos, singula appetimus; ubi vero ex illis unum alteri præferendum est, illud anteponimus quod nobis melius apparet, illudque magis appetimus quam alia. Nam bonum majus appetimus magis quam bonum minus. E. G. Si duo nobis offerantur nummi aurei & ex iis unus eligendus sit, nobis vero constet unum esse legitimi ponderis, alterum ponderis justo minoris; si nihil aliud in his nummis consideremus, eum anteponimus qui legitimi est ponderis; fieri tamen potest ut quis alia quadam ratione permotus eum præferat qui minoris est ponderis.

Inst. I. Cum duo nobis offeruntur objecta quæ æque bona judicamus, unum anteponimus alteri, ita si ex duobus nummis aureis inter quos nullum discrimen observamus, unum eligamus præ altero; atqui tunc nulla est ratio volitionis. Ergo Resp. In hoc casu semper inesse aliquam electionis rationem. Et quidem 1. licet nulla adsit ratio intrinseca cur unum nummum alteri præteramus, potest adesse

Jacq. T. II.

H

ex-

extrinseca, ut si V. G. scias unum ex his nummis fuisse viri cujusdam præclari cujus memoria tibi jucunda est, vel si nulla alia occurrat ratio extrinseca cur unum nummum alteri præferas, eum arripis ad quem commodius brachium extendis, vel qui ad illam partem positus est ad quam consuevisti brachium extendere dum aliquid manu capis, quia a consuetudine agendi sine ratione non recedimus. 2. Si omnia æquipollentia videantur ita ut electionis unius objecti nulla nobis adsit ratio neque intrinseca neque extrinseca, inde colligimus perinde prorsus esse sive unum sive alterum eligamus, ideoque decernimus illud eligendum quod primum nobis obvium est, & manente hoc proposito illud eligimus quod primum attentionem nostram in se rapit quacumque de causa.

Inst. 2. Ibi nulla est volitionis ratio, ubi non volumus quæ meliora videntur, sed quæ judicamus esse deteriora; atqui sæpe videmus meliora probamusque, & deteriora sequimur, ut ait Medea apud Ovidium: *Video meliora proboque, deteriora sequor*. Ergo Resp. Dist. Maj. nulla est volitionis ratio ubi ea volumus quæ deteriora seu mala aut minus bona judicamus judicio ultimo quod vulgo dicitur *practicum* C. judicio non ultimo & speculativo N. Maj. D. M. N. C. Ultimum judicium dicitur illud quod de voluntatis objecto fertur immediate antequam voluntas sese determinet, & propter quod proinde voluntas sese actu determinat; in eo judicio objectum consideratur sub circumstantiis specialibus, tum in se tum relate ad statum nostrum præsentem, & si bonum judicetur, illud actu appetimus, si malum actu averfamur. Hoc ultimum judicium præcedere possunt alia judicia ab ipso diversa vel eidem opposita, dum videlicet objectum spectamus

mus generaliter vel sub quibusdam circumstantiis aut sine relatione ad appetitum sensitivum, tumque malum judicare possumus quod sub omnibus circumstantiis particularibus, ac præsertim per relationem ad appetitum sensitivum bonum nobis apparet & contra. Ita si quis ratione sua utatur, virtutis praxim bonam esse judicat etiam quoad se, & eam sic generaliter spectatam vult atque appetit; at si in datis circumstantiis virtutis exercitio danda sit opera, fieri potest ut mens virtutis praxim in talibus circumstantiis sibi repræsentet tamquam aliquod malum, eo quod appetitu sensitivo & falsa voluptate in transversum agatur.

Inst. 3. Hinc sequeretur eos qui de rebus recte judicant, recte etiam agere debere, falsum consequens, ergo &c. ... Resp. Dist. Maj. Sequeretur recte agere debere qui de rebus recte judicant *actu* & judicio ultimo practico C. qui de rebus recte judicant *habitu* tantum aut judicio speculativo ultimum præcedente N. Maj. & sic Dist. Min. N. C. Itaque, ut Scriptura Sacra loquitur, *errant omnes qui operantur malum*, actu scilicet & judicio ultimo quo actionem committendam vel omittendam decernunt, quamvis habitu aut judicio speculativo ultimum antecedente sæpe non errent; sed vis appetitus sensitivi eorum cognitionem ita obscurat ut quod jucundum in vitio sibi fingunt, quasi in luce constituent ac vivide seu clarissime sibi repræsentent, quod vero boni est in virtute sub obscure tantum, non serio, non attente considerent.

Objic. 2. Si anima sese ad volendum nunquam determinat sine motivis ab intellectu propositis, voluntas non sese determinat, sed omnino determinatur ab intellectu, falsum conf. Ergo & ant. Resp. dist. Seq. Maj. voluntas non sese determinat independentem ab intelle-

Et C. dependenter ab intellectu. N. Nam cum voluntas sit facultas bonum ab intellectu cognitum appetendi, & malum ab intellectu cognitum averfandi, non potest hæc facultas in suis operationibus seu determinationibus ab intellectu non pendere; unde Scholastici voluntatem appellant facultatem *per se cæcam*, ut pote quia ad intellectum, non autem ad voluntatem pertinet videre bonum in quod voluntas fertur & malum quod fugit; quamvis revera idem sit animus simplex qui intelligit & vult. Itaque voluntas seipsam determinat sed dependenter ab intellectu. Hinc vulgo dicitur in scholis libertatem esse *radicaliter* in intellectu & *formaliter* in voluntate, hoc est, *radicem* seu initium liberi arbitrii esse in intellectu, *complementum* vero & *formam* in voluntate, quatenus voluntas ex multis ab intellectu propositis potestatem habet eligendi unum præ ceteris.

Inst. 1. Motiva illa ab intellectu proposita necessitatem antecedentem afferunt voluntati, ergo voluntas non erit libera Resp. N. ant. Nam iudicium intellectus quo objectum particulare sibi repræsentat tamquam bonum vel malum, liberum est, illudque voluntas mutare potest aut suspendere, & ideo nulla erit necessitas absoluta quæ libertatem tollit.

Inst. 2. Libertas animæ consistit in facultate sese determinandi sine motivis, atque etiam contra motiva, ergo motiva libertatem tollunt. Resp. N. ant. Quoad primam partem, & *Dist.* quoad secundam. Libertas animæ consistit in facultate sese determinandi contra motiva antecedentia per alia motiva consequentia C. sine aliis motivis, N. Itaque motiva, ut jam diximus, voluntati necessitatem minime imponunt, sed anima omissis prioribus motivis alia sibi repræsentare potest pro arbitrio suo & per
illa

ista ultima sese determinare ad agendum vel non agendum, quatenus nimirum aliquid sibi tamquam bonum vel tamquam malum repræsentat, ideoque ad committendas actiones honestas & ad turpes omittendas sese potest determinare, prout cognoverit illas esse & per se & quoad se bonas, has vero malas. Itaque id appetimus quod nobis repræsentamus tamquam bonum quoad nos, & id averſamur quod nobis repræsentamus tamquam malum quoad nos, dummodo in hac repræsentatione acquiescimus; si repræsentatio illa sit confusa, habemus legem facultatis *appetitivæ sensitivæ*; si distincta sit, habemus legem facultatis *appetitivæ rationalis*.

CONCLUSIO III.

HUMANA MENS IN SUIS VOLITIONIBUS AC NOLITIONIBUS LIBERA EST.

Prob. I. Anima humana ad volendum & nolendum semetipsam determinat vi propria seu per principium activum. Et quidem dum anima aliquid appetit volendo, id sibi repræsentat tamquam bonum; dum aliquid averſatur nolendo, id sibi exhibet tamquam malum, estque repræsentatio boni motivum volitionis, & repræsentatio mali motivum nolitionis: motiva autem animam non necessitant ad volendum vel nolendum. Et certe experientia manifestum est & ex conclusione præcedenti, ad motiva animum attendere posse vel non attendere, motivo acquiescere vel aliud quærere & sibi repræsentare, ideoque volitionem aut nolitionem omittere vel mutare prout sibi visum fuerit. Habet ergo anima facultatem sese determinandi in suis volitionibus ac nolitionibus, ideoque libera est.

H 3

Prob.

Prob. 2. Experimento intimoque sensu in nobis existere novimus perfectam illam libertatem qua nempe voluntas objectum aliquod sibi propositum eligere potius quam respuere possit. Etenim nostrum quilibet si voluntatis indolem ejusque vires consideret, perspicuo sane ac vivo sensu percipiet se plane liberum esse, suæque determinationis dominum. Sensus hujus intimi testem appellemus puerulum aliquem a parentibus reprehensum quod mendacium protulerit, is sane in aliqua necessitate excusationem non quæret, neque in proferendo mendacio se liberum non fuisse reponet. Contra autem si morbo oppressus puniatur quod studio operam non dederit, id se facere non potuisse vehementer dolebit, atque castigationem injustam & crudelem esse conqueretur. Unde autem responsionis diversitas in puerulo qui de libertatis questione nihil unquam audiit? in primo casu sese liberum omnino, in altero autem vi morbi coactum sentiebat.

Ex hac ipsa libertatis idea intimaque persuasione hominum mentibus infixæ veluti ex fonte dimanant tum divinarum, tum humanarum legum æquitas & vis obligandi. Et quidem nisi in hominibus ea libertatis species & arbitrii vis existeret quæ necessitatem omnem excludat, prorsus iniquum fuisset determinatos quosdam actus ipsis præscribere, & longe iniquius pœnas ab iis exigere qui actus illos elicere neglexissent. Ille nimirum qui legem violasset, facile aut homini aut Deo vindici reponere profecto posset se actum illum non libere sed necessario perpetrasse. Illud autem immane tyrannidis ac injustitiæ genus in legislatoribus, præsertim vero in optimo, æquissimo, amantissimo, sapientissimoque Deo sine summo scelere fingi non potest. Ex hac intima libertatis persuasione
ori-

oritur in nobis conscientia qua nempe admonemur de bono vel malo opere. Si quis ex lapide casu fortuito decidente ictum exceperit; hunc sibi ictum non imputat; at si alium quemlibet actum ipse elegerit, suæ electionis conscius vel sibi gratulatur, vel pœnitentia ac dolore cruciatur, prout actus ille bonus est aut malus. Præterea nulla foret virtuti laus, nullum vitio dedecus dempta libertate; Si enim voluntas ad virtutem aut vitium cogatur, jam in virtutis aut vitii exercitio nulla voluntati pars tribuenda est, ac proinde laus nulla, vituperatio nulla, non secus ac dementibus & furibundis hominibus libertate carentibus nihil potest mali vel boni imputari.

Objic. 1. Animæ libertas nec experientia, nec ratione probari potest. Ergo. Prob. 1. Pars anteced. Libertas animæ per experientiam deducitur ex sensu intimo quo unusquisque suæ libertatis sibi conscius est, dum agit; sed nulla inde libertatis probatio colligi potest. Et quidem si intimo sensu unusquisque conscius sibi esset suæ libertatis, nemo eorum qui ad hoc conscientia testimonium attendunt, dubitare posset de libertate sua; sed plurimi, postquam illud conscientia testimonium consuluerunt, non solum de libertate sua dubitarunt, verum etiam docuerunt hominem non esse liberum. Ergo &c. Et certe quando agimus, conscii quidem nobis sumus nos sponte ac libenter agere, minime vero sentimus in nobis potentiam non agendi sine qua libertas esse non potest.... Resp. N. Ant. cujus probationem Dist. nemo eorum qui ad conscientia suæ testimonium attendunt dubitare posset de libertate sua, si præjudiciis & erroribus non abriperetur C. secus N. Multi docuerunt hominem non esse liberum examinato conscientia suæ testimonio eo-

que non audito, ob præjudicia & errores quibus infecti erant. Inter eos qui animæ libertatem negarunt, alii existimant libertatem illam ab humani cordis affectibus & originali peccato, alii ab invariabili Dei præscientia divinisque decretis violari. Sed si omnes præjudiciis abrepti non satis attenderunt ad intimum libertatis suæ sensum, & dum actiones suas liberas expendebant, errorum tenebris veluti obcæcabantur, nec lumen internum perceperunt. Ea enim est præjudiciorum vis ut in rebus etiam maxime evidentibus intellectum excæcare possint, ut contigit in Philosophis illis qui omnia vel fere omnia in dubium vocarunt. Ad id vero quod in objectione adjungitur respondeo, nos conscios esse non tantum spontaneitatis, sed etiam libertatis qua agere possumus vel non agere. Et quidem intimo conscientię sensu clarissime percipimus differentiam inter volitionem beatitudinis seu felicitatis nostrę in genere, & volitionem alicujus objecti particularis. In utroque casu experimur in nobis spontaneitatem, sed in primo sentimus necessitatem, in secundo autem potentiam volendi vel nolendi.

Inst. 1. Intimus conscientię sensus ostenderet nobis libertatem vel in perceptionibus nostris, vel in judiciis, vel in voluntatis actibus, atqui nullum horum dici potest. Ergo.... **Prob. min. 1.** Liberi non sumus circa perceptiones nostras quę primam originem habent in sensibus, respondent enim necessario motibus organo sensorio impressis. **2.** Judicia nostra circa propositionum veritatem aut falsitatem versantur; in omni autem propositione vel evidenter percipimus nexum aut repugnantiam prædicati cum subiecto, tuncque necessario judicamus propositionem esse veram vel falsam; aut nexum il-
lum

lum vel repugnantiam illam prædicati cum sub-
 jecto non percipimus evidenter, tumque propo-
 sitio nobis necessario apparet vel probabilis vel
 improbabilis vel dubia . . . 3. Cum voluntas ne-
 cessario sequatur ultimum mentis judicium, hoc
 autem liberum non sit, voluntas libera esse non
 potest. Et quidem voluntas vel libera esset ante-
 quam agat, vel dum agit, vel postquam egit;
 nullum autem horum esse potest. Nam ante-
 quam agat, determinatur ad agendum per mo-
 tivum aliquod; dum agit jam determinata est:
 postquam egit, efficere non potest ut factum
 infectum sit. Ergo . . . Resp. C. Maj. N. M.
 & ad singula seorsim respondeo. 1. Dico perce-
 ptiones nostras in multis casibus a libertate pen-
 dere. Et quidem cum sensationes pendeant a
 situ corporis & partium ipsius relate ad objecta
 externa, situm vero illum libere mutare possi-
 mus, ut accedere vel non accedere ad objectum,
 oculos claudere vel aperire, in hanc vel illam
 partem convertere &c. manifestum est plurimas
 sensationes a nobis libere agentibus pendere . . .
 2. Dico mentem nostram liberam quoque esse
 circa judicia. Re quidem vera dum evidenter
 percipimus nexum prædicati cum subjecto pro-
 positionis, non sumus liberi nec judicare possu-
 mus falsam esse propositionem; nam percipere
 evidenter nexum prædicati cum subjecto idem
 est ac judicare propositionem esse veram; non
 possumus autem judicare propositionem veram
 esse & simul judicare eandem esse falsam. Ve-
 rum quoniam in omnibus judiciis considerari
 debent subjectum & prædicatum seorsim, dein-
 de utrumque simul ut nexus vel repugnantia
 utriusque percipiatur, hæc autem operationes
 quæ judicium præcedunt a mentis libertate pen-
 dent, liquet mentem liberam esse circa judicia
 præsertim discursiva ad quæ non pervenimus nisi

H. 5

post.

post examen præmissarum, quod a libertate pendet ... 3. Denique dico ultimum mentis iudicium liberum esse, ut ex præcedenti responsione manifestum est, ideoque subsequens voluntatis actus etiam liber est; nempe iudicium ultimum poni potest vel non poni pro arbitrio voluntatis, ideoque etiam voluntas libera manet quoad actum qui iudicium illud subsequitur. 4. Voluntas libera est antequam agat nec a motivis determinatur, sed ipsa sese libere determinat per motiva quæ non sunt causæ necessariæ & efficientes determinationum voluntatis; voluntas enim ipsa est causa efficiens suæ determinationis. Dum vero actu agit voluntas, determinata quidem est ad hanc actionem, sed libera manet ad eam prosequendam, vel relinquendam; postquam egit, libera non est circa actionem factam, quia *factum infectum esse nequit*, sed libera est ad alias actiones committendas, vel omittendas.

Inst. 2. Voluntas necessario amplectitur id quod intellectus melius esse iudicat, ergo libera non est Resp. Dist. ant. voluntas amplectitur necessario necessitate *hypothetica* & *consequenti* id quod intellectus ultimo iudicio melius esse iudicat, C. Ant. voluntas amplectitur necessario necessitate *absoluta* & *antecedenti* id quod intellectus ultimo iudicio melius esse iudicat, N. ant. & conseq. Itaque probe recordandum est necessitatem aliam esse absolutam, aliam hypotheticam. Absolute necessarium est id cuius oppositum absolute est impossibile; Hypothetice vero necessarium est cuius oppositum impossibile non est, nisi facta hypothese vel sub data conditione. Necessitas antecedens voluntatis determinationem antecedit, necessitas autem consequens sequitur ex hypothese determinationis voluntatis. H's. in memoriam revocatis, jam patet responsio. Cum enim ultimum intel-

lectus

Lectus iudicium liberum sit, quamvis in suo conceptu importet voluntatis determinationem non tollit libertatem voluntatis, neque ei necessitatem absolutam & antecedentem imponit, sed hypotheticam tantum & consequentem; ex hypothese scilicet quod ponatur ultimum intellectus iudicium, poni etiam debet voluntatis determinatio, sed absolute suspendi vel mutari potest illud iudicium, ideoque & voluntatis-determinatio.

Inst. 3. Necessaria omnino est voluntatis determinatio si homo per lapsum Adami libertatem perdiderit, atqui ex sancto Augustino in enchiridio cap. 3. *Homo male utens libero arbitrio & seipsum perdidit, & ipsum peccantem secuta est gravis & dura peccandi necessitas*, ergo &c.... Resp. Dist. Maj. Si homo per lapsum Adami libertatem perdiderit simpliciter & absolute quoad *essentiam* C. Maj. Si libertatem perdiderit secundum *quid*, seu quoad *appendicem*, hoc est, quoad summam bene agendi facilitatem quam habebat Adamus in statu innocentiae N. Maj. & similiter explicata Min. N. Conf. Essentia liberi arbitrii est indifferentia activa ad agendum vel non agendum quæ post Adami lapsum remansit, appendix vero libertatis est facultas summa recte agendi quam per peccatum homo perdidit substitutus iugo concupiscentiæ, quamvis concupiscentiæ motibus consentire vel dissentire possit. Dicit autem S. Augustinus hominem lapsum ex gravi necessitate peccare, quia concupiscentiæ illecebris ægre resistit & in multis offendit ita ut tamen possit resistere; unde illa necessitas non est absoluta & proprie dicta, sed improprie accepta pro magna difficultate, seu pro necessitate morali non autem physica. Eadem est responsio ad alia plurima S. Scripturæ testimonia quæ peccandi ne-

cessitatem imponere videntur, sed objectiones illæ ad sacram Theologiam pertinent, easque breviter attigisse satis sit.

Obijc. 2. Hominis libertas cum divina præscientia divinisque decretis conciliari non potest. Ergo &c. Prob. Ant. Quæ a Deo qui errare non potest præscita aut decreta sunt, necessario fiunt; quæ vero libera sunt, possunt non esse ideoque non fiunt necessario. Ergo.... Resp. Et ratione demonstrari & fide certissimum esse quod homo sit liber & quod Deus omnia futura ab æterno præsciat. Quapropter etiamsi non possemus clare conciliare utrumque dogma, utrumque tamen firmiter tenendum est, *neque enim ideo negari debet quod apertum est, quia comprehendere non potest quod occultum est*, ut loquitur S. Augustinus lib. de dono perseverantiæ cap. 2. itaque divina præscientia divinumque decretum non tollunt indifferentiam activam voluntatis, sed homini relinquunt potentiam ad oppositum, licet homo nihil unquam facturus sit quod divinæ præscientiæ aut decreto divino sit contrarium. Necesse quidem est ut homo faciat quod Deus præscivit, sed necessitas illa est tantum consequens & hypothetica atque in *sensu composito*, quatenus fieri non potest ut conjungatur futurorum præscientia cum illorum non existentia; non est autem necessitas absoluta & antecedens atque in *sensu diviso*; nam sub præscientia divina stat in homine potentia non eliciendi actum præscitum quanquam certo eliciendum; *non enim ideo quod Deus scit futurum, id futurum est, sed quia futurum est Deus novit*, ut loquitur S. Gregorius in caput 26. Jeremiæ. Ita cum videor sedens, possum non sedere in *sensu diviso*, quia liber sedeo; non autem in *sensu composito*, dum enim sedens videor, necesse est ut sedeam; hæc autem ne-

cess-

cessitas est tantum hypothetica & consequens, non absoluta & antecedens. Hanc quæstionem de concordia præscientiæ Dei divinorumque decretorum cum humana libertate proprio loco tractant Theologi, hanc igitur objectionem non secus ac præcedentem paucis explicasse sufficiat.

S E C T I O II.

De Deo seu Theologia naturali.

Theologia secundum vim græci nominis est λόγος του θεού, sive sermo de Deo, & defini potest scientia de Deo rebusque divinis, aut scientia eorum quæ Deo insunt, & eorum quæ per Deum fiunt vel fieri possunt. Dividitur in *naturalem* & *supernaturalem* seu *revelatam*, aut *sacram*. Prima solo lumine naturæ, altera divinæ revelationis luce acquiritur, atque hæc ultima simpliciter Theologia per *excellenziam* dicitur. Gentiles quibus divinæ revelationis lumen non affulgebat, Theologiam distinguebant in *fabulosam*, *naturalem* & *civilem*; fabulosa complectebatur Poetarum de Diis commenta quæ *mythologia* nomine hodie insigniuntur; naturalis Theologia Deum exhibebat tanquam primam causam rerum contingentium quæ in hoc mundo aspectabili observatur; civilis autem Theologia ex naturali & fabulosa componebatur, a civibus & Sacerdotibus colebatur eamque a Politicis ad multitudinem facilius coercentiam inventam fuisse tradit Aristoteles. *Metaphysicæ* lib. 12. cap. 8. ubi Theologiam fabulosam & civilem tanquam spuriam rejicit, solamque naturalem probat. Theologiam naturalem cum civili impiissime confundunt Athei dum theologiam omnem pro figmento Politicorum

habent. Itaque ostendemus existere naturalem theologiam eamque esse veri nominis scientiam. Amplissimus est hujus scientiæ usus, tum quia animos præparat ad Theologiam sacram facilius. & clarius intelligendam; tum quia juris naturalis principia continet; tum quia per eam confutantur perversissimi homines qui excusso auctoritatis Ecclesiæ jugo, Philosophia abutuntur ut errores suos tueantur. Porro ut rem gravissimam ordine tractemus, considerari potest Deus vel *absolute* ut in se est, vel *relative* secundum ordinem quem dicit ad creaturas. In Deo absolute spectato & prout est in se, duo rursus considerata veniunt. 1. Quidem ipsius existentia. 2. Ejusdem attributa. Deus secundum ordinem quem dicit ad creaturas considerari potest. 1. Ut illarum creator & conservator. 2. Ut primus motor. 3. Ut rerum, & creaturarum gubernator. 4. Ut supremus Dominus & ab hominibus colendus. Ultimo tandem de erroribus Theologiæ naturali adversis appendicem adjungemus.

G A P U T I.

De Deo in se & absolute considerato.

A R T I C U L U S I.

De existentia Dei.

I. **E**Ns *necessarium* in Ontologia diximus esse illud cujus existentia est absolute necessaria, seu quod perinde est, quod rationem existentiae suae sufficientem in essentia sua habet. Ens vero *contingens* diximus quod necessarium non est, seu quod existentiae suae rationem sufficientem non habet in sua essentia, sed in alio ente a se diverso. Quare ens omne est necessarium vel

con-

contingens ; & quidem ens necessarium , cum habeat in seipso rationem sufficientem suæ existentiae , vi propria existit , seu sibi metipso sufficit ad existendum ; at ens contingens indiget vi alterius entis ut existat .

II. *Ens a se* est ens , quod rationem existentiae suæ sufficientem in essentia sua habet , seu est ens ex cujus essentia necessario fluit existentia , ita ut scilicet concipi non possit nisi existens ; unde patet ens a se idem esse , ac ens necessarium , ac proinde illud vi propria existere , & vi alterius ad existendum non indigere . Igitur *aseitas* est independentia existentiae ab alio , seu est id , quo ens est a se . *Ens ab alio* est illud , quod rationem sufficientem existentiae suæ in essentia sua non habet , sed in ente alio a se diverso , ideoque indiget vi alterius ad existendum , & idem est ac ens contingens . Est igitur omne ens , vel a se , vel ab alio .

Ex hac definitione patet ens a se nullum habere existendi initium nullumque finem . Etenim ens a se existentiae suæ rationem sufficientem habet in sua essentia , ac proinde posita ipsius essentia ponitur etiam ejusdem existentia , ideoque salva essentia poni non potest non existentia . Igitur non existentia repugnat essentiae entis a se .

III. *Ens a se* non est compositum , sed simplex . Etenim ens a se per essentiam suam nullum habet existendi initium nullumque finem ; sed ens omne compositum oriri , ac interire potest , existendi initium ac finem potest habere , ut demonstratum est in Ontologia . Igitur ens a se compositum esse nequit , ideoque nullas habet partes , ac proinde simplex est . Hinc cum omne extensum partes habeat , quarum unaquaque extra alteram existit , ens a se ex-

ten-

tensum esse nequit, & quod extensum est, a se esse non potest.

IV. Mundus aspectabilis non est ens a se, sed ab alio, ideoque non est necessarium, sed contingens. Est enim ens compositum, sed ens compositum nequit esse ens a se; mundus igitur aspectabilis non est ens a se. Ens vero quod non est a se, est ab alio, ideoque contingens, ergo mundus est ens ab alio, ac proinde contingens. Quamobrem mundus hic existere non potest, nisi existat ens aliud necessarium, seu ens a se a mundo diversum, mundus ergo indiget vi alterius ad existendum.

V. Si ratio existentiae mundi huius aspectabilis reperiri potest in ente uno quod est a se, plura entia a se admitti non possunt. Etenim quærimus rationem sufficientem existentiae mundi in ente aliquo quod est a se; quamobrem si per ens unum a se intelligatur, cur hic mundus existat, ens hoc unum sufficit cur mundus existat, ac proinde præter ipsum aliud admitti repugnat. Hæc propositio communis est notio ab omnibus recepta; nam quotiescumque effectus alicujus causam efficientem quærimus, in una acquiescimus statim ac eam effectui producendo sufficientem invenimus, nec aliam aliquam admittimus.

VI. Existit ens necessarium, seu ens a se. Existit enim aliquod ens, nam anima nostra existit, seu nos existimus. Quare cum omne ens existens sit a se, vel ab alio; ens illud quod existit, vel est a se, vel ab alio; si dicatur esse a se, jam existit ens a se; si sit ab alio, cum ens ab alio rationem existentiae suæ sufficientem habere debeat in ente a se, existet etiam ens a se, seu ens necessarium, ergo existit ens necessarium, seu ens a se. His præ-

mis-

METAPHYS. PARS II. SECT. II. CAP. I. 185
missis , & in memoriam revocatis Ontologiae
principiis sit.

CONCLUSIO.

EXISTENTIA DEI DEMONSTRATUR.

Existentiæ Dei demonstrationes duplicis potissimum generis afferri possunt. Aliæ deducuntur ex contemplatione mundi hujus aspectabilis: *Invisibilia enim ipsius a creatura mundi per ea, quæ facta sunt, intellecta conspiciuntur, sempiterna quoque ejus virtus, & divinitas,* (ad Rom. I.) Aliæ hauriuntur ex notione entis perfectissimi, & contemplatione animæ nostræ; *Habet enim Deus testimonia, totum hoc quod sumus, & in quo sumus:* Ex Tertull. lib. I. contra Marcionem cap. 10.

Prima demonstratio ex contemplatione mundi aspectabilis.

Dei nomine hic intelligimus ens a se, in quo continetur ratio sufficiens existentiae mundi hujus aspectabilis; sed existit ens a se, in quo continetur ratio sufficiens existentiae mundi hujus aspectabilis, ergo Deus existit. Major est definitio nominis, quæ in controversiam vocari non potest. Minor demonstratur: mundus aspectabilis est ens ab alio, sed ens ab alio non habet rationem sufficientem existentiae suæ, nisi in ente a se; ergo existit ens a se in quo continetur ratio sufficiens existentiae mundi hujus aspectabilis. Ergo existit Deus. Tota demonstratio hæc pendet ex principiis hujus capituli initio præmissis.

Quoniam autem Deus est ens a se, ipsi conveniunt omnia, quæ enti a se convenire demon-

mon-

monstravimus. Deus igitur vi propria, & per essentiam suam existit, nullumque proinde habere potest existentiae initium, nullum finem. Quare cum aeternitas sit existentia, nec initium nec finem habens, Deus est aeternus. Est quoque ens simplex ideoque incorporeum & non extensum; unde impossibile est, ut spatium infinitum sit Deus, vel attributum Dei; & quia simplex est, nec sensibus, nec imaginatione percipi, ac representari potest; est igitur invisibilis, atque etiam omnimode incorruptibilis.

Hæc quidem omnia Scripturis sacris consona sunt; nam Exodi 3. v. 14. Deus hoc sibi nomen tribuit: *Ego sum qui sum*: ait Moysi: *Sic dices filiis Israel: qui est misit me ad vos*; Hoc nomine *qui est* significatur aliquid Deo essentiali, alteri cuilibet enti *incommunicabile*, ideoque existentia ad essentiam Dei pertinet, & Deus per essentiam suam existit, ex Scriptura sacra. Hinc etiam sæpe appellatur *Deus aeternus, principium & finis, qui est, qui erat & qui venturus est*. Dicitur etiam incorruptibilis, invisibilis, nulla imagine corporea representabilis: *mutaverunt, scilicet gentes, gloriam incorruptibilis Dei in similitudinem imaginis corruptibilis hominis & volucrum, & quadrupedum, & serpentium* (ad Rom. i. v. 23.) Itaque ex notione entis a se ea derivantur attributa, quæ Deo in sacris Scripturis tribuuntur, ac proinde ex hac sola notione patet existentia Dei.

Præterea in Deo continetur ratio sufficiens existentiae Mundi hujus aspectabilis; ratio vero est id unde intelligitur, cur aliquid potius sit quam non sit; necesse est ergo ut Deo ea tribuantur prædicata, per quæ intelligi possit, cur hic Mundus potius existat, quam non existat, & cur talis potius existat, quam alius. Porro

ra-

ratio sufficiens existentiae Mundi in atomis aut
 elementis, seu primis, inernisque corporum
 principiis contineri non potest, ut dicunt Athei.
 Nam 1. si hoc verum esset, Mundus absoluta
 necessitate existeret essetque proinde ens neces-
 sarium, seu ens a se, quod absurdum esse de-
 monstravimus.... Secundo nullus major existen-
 tiae gradus, nulla major perfectio concipi potest
 quam existentia necessaria; igitur existentiae ne-
 cessariae gradus est infinite summus, perfectio in-
 finita. Porro atomi sunt entia finita atque li-
 mitata; cum ergo existentia absolute necessaria
 sit perfectio infinita, entibus finitis ea conveni-
 re nequit, sed tantum enti infinito. Simili ra-
 tione patet animas nostras non esse entia a se;
 quia vero animae corporibus conjunctae sunt,
 patet illarum existentiae rationem contineri in
 illo ente, in quo est ratio existentiae totius Mun-
 di hujus aspectabilis. Deus ergo est ens infini-
 tum, in quo continetur ratio existentiae totius
 Mundi, partium ipsius, elementorum & ani-
 marum. Igitur totus Mundus aspectabilis, par-
 tes ipsius, elementa & animae sunt entia con-
 tingentia, quorum existentiae ratio in Deo con-
 tinetur, quae proinde existentiam suam a Deo
 recipiunt. Deus igitur fecit Mundum aspecta-
 bilem cum ipsius partibus & elementis, atque
 animabus. Quia vero prima corporum principia,
 animaeque simplices ex aliis praesistentibus ori-
 ri non possunt, Deus haec omnia ex nihilo pro-
 duxit, seu creavit. Est ergo Deus creator totius
 Mundi aspectabilis & animarum. Hinc sequitur
 Deum, & intellectu, & propria voluntate gaude-
 re, has enim duas facultates in nobis observa-
 mus: *nemo autem dat, quod non habet*: ut vul-
 gare fert axioma. Ergo Deus, qui animas nostras
 creavit, est ens intellectu, ac libera voluntate
 praeditum ideoque spiritus; & quia est ens a se,
 ac

ac proinde infinitum atque independens ab omni alio ente, est quoque spiritus infinitus & independens. Tandem constat corpus quod movetur posse quiescere vel alio modo moveri; ac proinde motum ipsiusque directionem esse quid contingens respectu corporis; ideoque rationem cur corpus quodlibet data celeritate & directione moveatur, in ipsa corporis essentia non contineri, sed recurrendum esse ad causam extrinsecam corpori ut hæc ratio inveniatur; invenitur autem in Deo qui mundum creavit partesque ipsius disposuit ac movit nunquam satis mirando ordine. Hinc mundus aspectabilis est veluti speculum in quo tum existentia Dei, tum ejus attributa resplendent, & Physica est perpetua Dei divinorumque attributorum demonstratio, sive corpora mundi totalia eorumque ordinem ac motus, sive partialia contemplerur. Ergo *celi enarrant gloriam Dei, & opera manuum ejus annuntiat firmamentum.* Psal. 18. *Interroga jumenta & docebunt te, & volatilia celi & indicabunt tibi: loquere terræ & respondebit tibi, & narrabunt pisces maris. Quis ignorat quod omnia hæc manus Domini fecerit?* Job cap 12.

ALTERA DEMONSTRATIO EX NOTIONE ENTIS PERFECTISSIMI.

Nomine Dei hic intelligimus ens perfectissimum; sed existit ens perfectissimum. Ergo existit Deus. Prob Min. 1. Ens perfectissimum possibile est seu nullam contradictionem involvit; cum enim ens perfectissimum sit quod omnes perfectiones possibiles continet in gradu absolute summo; si ens perfectissimum contradictionem involveret, vel involveret contradictionem quoad ipsas perfectiones, vel quoad ipsarum gradum;
atqui

atqui neutro modo contradictionem involvit. Non quoad ipsas perfectiones; Etenim perfectiones possibiles dicimus quæ eidem subjecto una inesse possunt; seu quæ sibi mutuo non repugnant: igitur notio entis perfectissimi nullam contradictionem involvit quoad perfectiones; quia vero perfectiones illæ in gradu absolute summo tribuuntur Deo; omnem prorsus excludunt imperfectionem, ac proinde nihil quod ad easdem perfectiones quomodocumque pertineat, de iisdem negari potest; ideoque nullam involvunt contradictionem quæ in *simultanea ejusdem de eodem affirmatione & negatione consistit*. . . . 2. Ens perfectissimum necessario existit estque proinde ens a se. Etenim ens perfectissimum continet omnes perfectiones possibiles in gradu absolute summo, existentia autem necessaria & a seitas sunt perfectiones in gradu absolute summo; Enti igitur perfectissimo competit existentia necessaria, ideoque necessario existit estque ens a se. Ergo existit Deus.

Duabus præcedentibus demonstrationibus tertia addi potest quæ ex Philosophorum & gentium omnium consensu desumitur. Præclare sapienterque observavit Cicero: *quod nulla gens sit tam immanis, neque tam fera quæ non, etiamsi ignoret qualem Deum habere deceat, tamen habendum sciat*. Quia vero, ut ait idem Cicero, *omni in re consensio omnium gentium lex naturæ putanda est*, supremi numinis, primæ causæ cognitio ita est a natura impressa, ut a nemine in dubium vocari possit. Neque prætermittenda est præclarissima alia Ciceronis ratiocinatio in quæst. Tusculan: *Ipsa enim cogitatio de vi & natura Deorum studium incendit illius eternitatis imitandæ neque se in brevitate vitæ collocatum putat, cum rerum causas alias ex aliis aptas & necessitate nexas videt. Quibus ab æterno tempore stantibus in æternum ratio*

ratio tamen mensque moderatur Hinc illa cognitio virtutis existit, efflorescunt genera partesque virtutum; invenitur quid sit, quod natura spectet bonum in extremis, quod in malis ultimum, quo referenda sint officia, quæ degenerate ætatis ratio deligenda.

Tertium illud demonstrationis genus quod ex Philosophorum & gentium omnium consensu desumitur, fusius explicabimus ut pote facillimum & tamen certissimum, existere Deum seu ens a se mundi hujus aspectabilis creatorem, certissimum est ex antiquissima Moïsis historia quæ germanos veritatis characteres simul omnes sibi vendicat, quæque ipsam mundi creationem describit recentemque ejus ætatem assignat. Et quidem I. ex perpetua Israelitarum traditione & Paganorum atque Christianorum consensu multo magis certum est Pentateuchum Moysi Auctori tribuendum esse quam ex latinæ ac græcæ auctoritatis testimonio constet Ciceronis orationes & Aristotelis opera ipsorum esse sætus; hoc indubitatum est, ergo & illud magis. Porro Judæi tanto studio tantaque religione Pentateuchum incorruptum servarunt, ut non modo neque adjicere quidquam aliquis, nec auferre nec immutare præsumpserit: ex Josepho lib. 1. contra Appionem: sed etiam singulos uniuscujusque libri versus, imo etiam apices ad calcem singulorum librorum adnotarent, illius compendium canerent, atque ad privatum & quotidianum suum usum describerent singuli, in synagogis per omne sabbatum legerent, ac singulis septenniis Deuteronomium publice recitarent, & facta ac prodigia in eo exarata festis institutis recolerent ne earum oblitteraretur memoria II. Mosaicæ historiæ præcipua capita illustrent suoque consensu firmant Philosophi, Historici, atque etiam Poetæ in fabulis, ut
osten-

ostendit Grotius lib. I. de Religionis Christianæ
 veritate, & præsertim Huetius prop. 4. De-
 monstr. Evangelicæ. Ex historia etiam vulgo
 notum est quo tempore plurimæ terrarum re-
 giones, deductis coloniis habitari cæperint, ar-
 tes complures ad vitæ usum maxime utiles fue-
 rint inventæ. Hæc igitur omnia recentiorum
 mundi ætatem ostendunt, nec ipsius æternitati
 conveniunt, ac proinde creatoris, entis a se,
 entis perfectissimi existentiam certissimo facili-
 moque argumento demonstrant. Et quidem in-
 sania profecto ac furori simile censi debet si
 quis pulcherrimum naturæ ordinem, admiran-
 dam mundi compagem sine consilio, ratione,
 cognitione, sed fortuito solum ac temerario cor-
 porum motu, a fortuitis materiæ æternæ af-
 fectionibus produci ac disponi potuisse putaverit.
 Qui aliquanto diligentius perpenderit infinitam
 rerum varietatem, admirabilem connexionem
 ac dispositionem, videbit sane quanta sapientia
 & potentia opus sit ad ea omnia eligenda &
 disponenda. Cogitemus quid una lux præstare
 debeat ut se propaget sine occurso, ut diver-
 sam pro diversis coloribus *refrangibilitatem* ha-
 beat. Aptanda fuit corporum textura, particu-
 larum crassitudo ad ea potissimum emittenda
 radiorum genera quæ determinatos colores exhi-
 berent; disponendæ, mira prorsus structura, o-
 culorum partes ut imago pingeretur in fundo
 & propagaretur ad cerebrum. Quid unus aer
 qui simul pro sono, pro respiratione & anima-
 lium vita, pro ventis ad navigationem, pro
 vaporibus continendis ad pluvias, pro innume-
 ris aliis commodis est conditus? Quid gravitas
 qua perennes fiunt planetarum & cometarum
 motus, qua omnia compacta retinentur, qua
 maria continentur litioribus & current flumina,
 imber in terram decedit, eam irrigat ac fecun-
 dat,

dat, sua mole ædificia consistunt? Quanta sapientia opus fuit ad eas combinationes invenientes quæ tot organica corpora nobis exhiberent, tot arbores & flores educerent, tot brutis animantibus & hominibus tam multa vitæ instrumenta subministrarent? pro fronde unica efformanda quanta cognitione opus fuit ut motus omnes per tot sæcula perdurantes, cum aliis omnibus motibus arte connexi, minimas materiæ particulas certo ac determinato tempore ad datam frondem producendam adducerent? Quid tandem cogitandum nobis est de iis ad quæ nulli nostri sensus pertingunt, quæ telescopiorum & microscopiorum potestatem fugiunt? Hujus autem argumenti vis maxima magis ac magis demonstrabitur in Physica ubi pulcherriam sibi que mire consentientem universi singularumque partium dispositionem explicabimus.

Ad demonstrandam Dei existentiam plurimis argumentis utuntur Philosophi eaque desumunt ex motu, ex causa efficiente, ex contingenti & necessario, ex ordine & pulchritudine universi, ex entium spiritualium idea, ex idea Dei. Patet autem hæc omnia argumentorum genera in præcedentibus demonstrationibus contineri. Demonstrationes quæ ex entis necessarij & perfectissimi notione desumuntur, *metaphysicæ* solent appellari; dicuntur autem *physicæ*, si ex mundi pulchritudine & ordine desumantur; tandem *morales* appellantur, si ex Philosophorum gentiumque omnium consensu deducantur.

Obj. I. Existentia Dei demonstrari non potest nisi cognita sit ipsius essentia quæ ab existentia non distinguitur; sed incognita aut saltem minus certo cognita est essentia Dei, cum Theologi inter se disputent an, illa sit *vis infinita intelligendi*, an *infinitas omnimoda*, an *summa*

per.

perfectio, an aseititas; Ergo.... Resp. dif. triaj.
 Existentia Dei demonstrari non potest nisi prius
 cognita sit ipsius essentia, hoc est, nisi prius
 tradatur definitio nominis Dei per quam ab
 aliis entibus sufficienter distinguatur, C.maj. N-
 si prius solvatur quæstio in quo consistat essen-
 tia Dei, N.Maj., & permissa minori N. Conf.
 Itaque existentiam Dei demonstraturi explicare
 primum debemus quid nomine Dei intelligi ve-
 limus. In prima demonstratione Deum defini-
 vimus *ens a se* in quo continetur ratio sufficiens
 mundi hujus aspectabilis, in altera *ens perfectis-
 simum*, atque invicte ostendimus hujusmodi ens
 existere. Deinde demonstravimus Deo sic defi-
 nito convenire attributa quæ ex communibus
 hominum notionibus atque ex S. Scriptura Deo
 vero attribuuntur, & ea ipsa in quibus Theolo-
 gi essentiam divinam *formaliter* consistere do-
 cent, nempe *vim infinitam, aseitatem, infini-
 tatem omnimodam, summamque perfectionem*.
 Quamobrem minime necesse fuit ut ad demon-
 strandam accurate Dei existentiam, quæstionem
 aliam omnino diversam agitaremus, nempe
 quisnam sit *gradus constitutivus* essentia Dei,
 seu quodnam sit primum illud quod de Deo
 concipitur & ex quo fluere intelliguntur omnia
 Dei attributa. Hæc quæstio ad Theologos per-
 tinet. Obiter observare satis erit quamlibet Dei
 perfectionem esse omnimode infinitam, ac pro-
 inde ex una qualibet perfectione infinita deri-
 vari posse alias omnes perfectiones. Itaque ex
 iis quæ diximus in Logica evidens est tanquam
 primum Dei attributum considerari posse
 vel *aseitatem*, ut volunt aliqui Theologi,
 vel *perfectionem omnimodam*, vel *infinitatem*,
 aut *vim intelligendi perfectissimam*, ut volunt
 alii. Res perinde se habet, cum ex singulis
 illis perfectionibus, si considerentur tanquam

primæ, colligi possint aliæ omnes divinæ perfectiones.

Ob. 2. Entia contingenter existentia non possunt esse medium demonstrationis existentia entis necessarii; sed Mundus &c. Ergo &c. Prob. Maj. Medium demonstrationis debet esse necessarium; Ergo &c.... Resp. dist. Ant. probationis: Medium demonstrationis debet esse necessarium necessitate *connexionis* C. Necessitate rei seu *existentia* N. Ant. & Conf. Inter existentiam entis contingentis & existentiam entis necessarii necessaria est connexio; quod sufficit ut ex entis contingentis existentia concludamus existere ens necessarium seu ens a se, quod existentia entis contingentis rationem sufficientem contineat.

Inst. 1. Omne ens contingens finitum est, & ens necessarium est infinitum; sed ex entis finiti existentia demonstrari non potest existere ens infinitum; Nam nulla est proportio inter finitum & infinitum; Ergo ex entis contingentis existentia &c.... Resp. Dist. probationem Min. Inter ens finitum & infinitum nulla est proportio *Entitatis* C. *habitudinis & dependentia* N. Ant. & Conf. Cum perfectiones quæ enti finito insunt numero & gradu limitatæ sint, nulla potest esse proportio entis finiti ad ens infinitum quoad entitatem seu numerum & gradum perfectionum quæ in ente infinito illimitatæ sunt. Verum hoc non obstat quominus ens finitum atque contingens pendeat ab ente infinito & necessario a quo existentiam accepit; imò eo ipso quod ens finitum aliquod ac proinde contingens existit, necesse est ut existat etiam ens a se atque infinitum, ut demonstravimus.

Inst. 2. Opus finitum non probat auctorem infinitum; sed omne ens contingens & mundus ipse aspectabilis est opus finitum; Ergo &c.

Ref.

Resp. Dist. Maj. Opus finitum tam *in se* quam *in producendi modo* non probat auctorem infinitum. C. In seipso tantum sed quod esse non potest nisi existat ens a se ideoque infinitum, Neg. similiter Dist. Min. Neg. Conf.

Inst. 3. Non repugnat mundum ab æterno existisse. Ipse S. Thomas 2. par. quæst. 46. art. 2. hæc habet: *Mundum non semper existisse sola fide tenetur & demonstrative probari non potest*; Sed in hac hypothese necesse non est admittere Deum Mundi auctorem; Ergo &c.... Resp. dist. maj. Non repugnat dependenter ab ente necessario seu a se tamquam principio extrinseco.

Esto: Independentem ab ente a se, Neg. Maj. & Mi. Hæc quæstio utrum Mundus per Deum ab æterno esse potuerit, magnas habet difficultates, & illius solutione minime opus est ad existentiam Dei invicte demonstrandam. Qui affirmant Deum aliquid ab æterno creare potuisse, ita suam tuentur sententiam: nullum scilicet fuit in tota æternitate instans in quo hanc creandi potentiam Deus non habuerit; effectus autem simul cum causa potest existere, licet sit semper causa prior effectu *prioritate nature*, non vero *prioritate temporis*. Alii contendunt hanc ab æterno creationem repugnare quod Creatio sit transitus a non ente ad ens, ac proinde necessum est ut id quod creatur ante non existat; si autem non existit antequam creetur, ergo non est ab æterno creatum. Deus itaque, inquit, potuit creare ab æterno sed in tempore, potuit scilicet creare in omni æternitatis momento *distributive* sumpto, non vero in omnibus æternitatis momentis *collective* sumptis. Patet igitur quæstionem hanc in utramque partem a Scholasticis agitatam nihil omnino conjunctam esse cum existentia Dei quam invictissimis demonstravimus argumentis.

Obij. 3. Ex notione entis perfectissimi non magis concludi potest illud existere quam ex notione trianguli colligi possit existere figuram quæ tres angulos habet; Atqui hoc secundum colligi non potest; Ergo nec primum.... Resp. Neg. Maj. & paritatem. Nam existentia necessaria eo modo se habet respectu entis perfectissimi quomodo se habet numerus ternarius angulorum respectu trianguli, non autem ipsa existentia trianguli. Quemadmodum autem numerus ternarius angulorum est attributum trianguli seu figuræ tribus lineis concurrentibus terminatæ, ita existentia necessaria se habet per modum attributi respectu entis perfectissimi.

Inst. 1. Ex ista responsione sequitur tantum ens perfectissimum ex hypothese quod existat, necessario existere, uti triangulum necessario habet tres angulos, ex hypothese quod existat; non vero sequitur ens perfectissimum absolute existere; Ergo &c....

Resp. Neg. Ant. Ex hypothese enim quod ens perfectissimum sit possibile, sequitur illud necessario existere, ita ut existentia necessaria fluat ex ipsa essentia seu intrinseca possibilitate entis perfectissimi, ut numerus ternarius angulorum ex essentia trianguli. Igitur quam primum constat ens perfectissimum esse possibile, statim intelligitur ipsum existere.

Inst. 2. *A possibilitate ad actum non valet consequentia*, seu ex eo quod ens possibile sit, concludi non potest ipsum existere; Ergo &c. Resp. dist. ant. In entibus *contingentibus* seu *ab alio* C. in ente *necessario* seu *a se* N. ant. & conf. Itaque cum existentia non pertineat ad essentiam seu intrinsecam possibilitatem entis contingentis; ex eo quod ens contingens sit possibile, concludi non potest ipsum actu existere; At quia existentia pertinet ad essentiam entis neces-

necessarii seu a se & perfectissimi, legitima est consequentia ab ejus possibilitate ad actum. Hæc demonstratio est ad mentem sancti Thomæ qui variis in locis & præsertim 1. part. quæst. 41. pro maximo quo pollebat ingenii acumine observavit, existentiam entis perfectissimi ex ejus notione recte inferri, ubi probatum fuit ens perfectissimum esse possibile.

Inst. 3. Existentia Dei *a priori* seu argumentando a causa ad effectum demonstrari non potest, sed tantum *a posteriori*, sive ab effectu ad causam; atqui dum existentia Dei probatur ex notione entis perfectissimi, probatio est *a priori*; Nam ex possibilitate entis perfectissimi tamquam a causa concluditur ejusdem existentia tamquam effectus; Ergo. Resp. 1. Dummodo accurate demonstrata sit existentia Dei, parvi interesse quo nomine demonstratio illa appelletur, ideo argumentum nihil concludit. . . . Resp. 2. C. Maj. & N. Min. Nam quamvis entis perfectissimi possibilitatem primum demonstremus & inde ejus existentiam necessariam deducamus, revera tamen possibilitas illa quæ nihil aliud est quam existentia divina, non distinguitur ab existentia ipsa in Deo ipso, neque concipi potest tamquam ens aliquod ab existentia Dei distinctum; Unde argumentatio non procedit a causa ad effectum, sed tantum ab eo quod primum nobis innotescit, ad id quod nondum erat ita cognitum. Præterea cum constare nequeat quale sit ens perfectissimum nisi quatenus ex perfectionibus quæ insunt animæ, colligimus attributa divina, Deo nimirum illimitatas tribuendo perfectiones quæ in ipsa limitatæ deprehenduntur & per modum *actus* quæ nobis insunt per modum *potentiæ*, existentia Dei hoc pacto demonstratur ex contemplatione animæ nostræ quæ a Deo est. Neque enim dici potest demon-

strata existentia Dei qualem fide credimus, nisi evincatur ipsi competere attributa quæ fides docet. Certe Spinoza atheus fuit quamvis profiteatur se admittere ens perfectissimum & necessarium, quia illi detraxit attributa quæ enti vere perfectissimo conveniunt, ut simplicitatem, immaterialitatem, Deumque confundit cum mundo ipso & animabus, dixitque unicam esse substantiam rerum omnium. Igitur ex notione entis perfectissimi existentiam veri numinis demonstrare idem est ac eandem ex contemplatione animæ nostræ derivare, sicque demonstratio non minus a posteriori dici potest, quam si ex mundi aspectabilis contemplatione deducatur.

Inst. 4. Maxima Philosophorum pars admit-
tit vacuum sive spatium *immensum, infinitum, æternum, increatum, immutabile*, ac proinde spatium est *ens a se*; ergo ex *aseitatis* notione non colligitur existentia Dei sive entis perfectissimi, ideoque nulla est prima demonstratio....
Resp. varias explicando de natura spatii Philosophorum opiniones. De hac quæstione acriter in scholis disputatur, eamque in Physica nos iterum revocabimus, Leibnitiani spatium nihil *reale* esse affirmant, sed merum duntaxat *rerum coexistentium ordinem*, ita ut spatium sit ens *ideale, imaginarium*, per solam abstractionem formatum. Rem ita explicant. Si res duas consideremus tanquam diversas unamque ab altera distinguamus, unam extra alteram nobis mente representamus. Ita si imaginationis vi nobis representemus ædificium quod nusquam vidimus, ædificium illud concipimus tanquam extra nos existens, quamvis hujus ædificii ideam in nobis existere consciî simus & nihil fortasse hujus ædificii extra ideam nostram existat. Ita si duos homines nobis per imaginationem exhibeamus, unum extra alterum consideramus;
fie.

fieri enim non potest ut res duas tanquam unam
 & simul tanquam duas imaginemur. Itaque res
 plures diversas tanquam simul conjuncta, nobis
 repræsentare non possumus, nisi ex illa rerum
 diversitate simulque conjunctione resultet no-
 tio quædam quam *extensionis* notionem dicunt
 Leibnitiani. Ex illa extensionis notione fit ut
 lineæ extensionem aliquam tribuamus; plures
 enim in ea partes consideramus quas seorsim
 existentes videmus, simulque conjunctas &
 unum totum constituentes. Hinc nascitur vul-
 garis idea spatii quod nobis repræsentamus tan-
 quam ens aliquod; Si enim res diversas coexi-
 stentes imaginemur, nulla coexistentiæ ratione
 habita, nihilominus perseverare nobis videtur
 ens illud quod spatium dicimus. Verum pro cer-
 to habent Leibnitiani spatium nihil aliud esse
 quam rerum coexistentium ordinem, idque il-
 lustrant exemplo numerorum. Si res diversæ
 considerantur tanquam multitudinem aliquam
 constituentes, omissis, *per abstractionem*, rerum
 illarum *qualitatibus* vel *determinationibus*, jam
 formatur idea numeri. At nisi foret realis en-
 tium multitudo, nullus existeret realis nume-
 rus, sed numeri forent duntaxat possibiles.
 Igitur cum tot existant duntaxat unitates quot
 sunt res actu existentes, ita etiam non plures
 existunt spatii partes actuales quam quæ re-
 rum actu existentium ordine designantur, ita
 ut sublato ordine illo nullæ in spatio partes
 actuales admitti possint. Quia vero res utcum-
 que multas imaginari possumus & ab illarum
 determinationibus *abstrahere*, hinc nascitur idea
 spatii infiniti, immutabilis, immobilis, quod
 quidem spatium omnino est *imaginarium*. Hac
 extensionis notione abutuntur qui mentis no-
 stræ facultates tanquam entia diversa extra se
 invicem existentia sibi repræsentant, & inde

concludunt mentem humanam esse extensam ; quod quam fit a veritate alienum, demonstravimus tractantes de animæ spiritualitate ; facultates enim mentis nostræ non sunt ipsius partes extra se invicem existentes, quamvis per abstractionem distinguuntur inter se. Cæterum paret in exposita Leibnitianorum sententia nullius roboris esse propositam objectionem.

Aliis videtur spatium non esse substantiam aliquam, sed ens *negativum* sive *privativum*, spatiumque existere dicunt eo fere modo quo existissent tenebræ, si Deus nullam lucem produxisset. Rursus in hac opinione vim nullam habere potest objectio.

Alii tandem affirmant spatium per se subsistere, atque inter eos qui id asserunt, aliqui putant spatium fuisse creatum & esse *capacitatem* recipiendorum corporum ; nonnulli autem spatium quoquo versus infinitum atque increatum dicunt. Quod primam spectat opinionis partem, evidens est nullum omnino superesse objectioni propositæ locum. Quod ultimam partem spectat, eam negare ac refellere possem. Verum cum ea a Philosophis illibatæ minimæque suspectæ fidei propugnetur, alia mihi in eunda est via, & in qualibet philosophica hypothesei totum manere demonstrationis robor facile ostendam. Itaque dum in prima demonstratione *aseitatis* notionem adhibuimus, per ens *a se* intelligimus ens omnino independens quod continet rationem non solum suæ existentiae, sed etiam totius mundi hujus aspectabilis. Porro ratio illa tribui non potest spatio quantumvis infinito & æterno. Hujus opinionis sectatores spatio intelligentiam nullam, vim nullam tribuunt nec tribuere possunt. Spatium considerant velut substantiam mere *passivam*. Præterea substantia illa ex partibus componitur ac pro-

proinde non potest considerari tanquam absolute infinita, cum in ea intelligi possint partes finitæ, qui quidem concipiendi modus ab infinitate divina abhorret omnino. Ob eandem rationem non foret absolute independens; quidquid enim compositum est, ex ipsis partibus pendet, ac proinde spatium non foret independens nisi sub *conditione parvium*.

Ex his ergo patet crassissimum atque impiissimum esse recentiorum quorundam errorem qui spatium fingunt tanquam essentia divinx attributum. Hanc impietatem Newtono imponunt aliqui, verum hanc calumniam depellere non videtur difficile. Newtonus quidem spatium infinitum appellat *veluti sensorium Dei*. At cum in scholio generali principiorum enumeratis Dei attributis Deum *spatium non esse* concludat, hoc figurato loquendi modo nihil aliud intelligere videtur. Newtonus nisi Deo omnia esse præsentia ita ut per suam immensitatem sit ubique præsens. Hæc pauca dicta sint ut ineptissimi erroris socium in rebus Mathematicis non satis laudandum, audacissimis scriptoribus eripiam. Cæterum, ut jam observavi, deceptricem & fallacem esse extensionis notionem huic objectioni cum Leibnitianis reponere potuissem, vel etiam ex propositis opinionibus aliam quamlibet tenere & difficultatis nodum statim solve-re expeditum fuisset. Verum in demonstrationibus philosophicis quæ ad sanctæ religionis dogmata pertinent, id semper religiose curabo ut nempe a Philosophorum placitis minime pendeant. Et certe probare non possum quosdam scriptores qui optimo quidem fine sed ardentiori animo velut fidei contrarias traducunt philosophicas opiniones a viris catholicis & incorruptæ fidei propugnatas; hi quidem dum religioni prodesse volunt, nocent plurimum. Obvulen-

dum quidem est toto pectore perniciosis temerariisque opinionibus, sed benigne tractanda sunt illa Philosophorum placita, quæ in scholis catholicis innoxie & sine temeritatis nota defenduntur; atque id maxime cavendum est ne aliquod Theologiæ naturalis dogma innitatur hypothefi aut alicui argumento quod a Philosopho catholico negari possit. Illud quidem saluberrimum consilium iis vel maxime inculcari debet quibus contra incredulos tuenda atque vindicanda sunt Theologiæ naturalis dogmata.

ARTICULUS II.

De divinis attributis.

I. **D**Eus semetipsum & omnia quæ ipsi insunt, distinctissime & unico actu seu simul cognoscit. Nam anima humana semetipsam cognoscit, & hæc sui ipsius cognitio est perfectio quæ animæ humanæ vere inest; sed Deo tribuendæ sunt perfectiones quæ insunt animæ nostræ, & quidem in gradu absolute summo; Ergo cognitio sui ipsius Deo tribuenda est in gradu absolute summo adeoque sine ulla imperfectione. Porro experimur in nobis animæ nostræ cognitionem in eo imperfectam esse quod omnia quæ animæ insunt quæque in eadem contingunt, nec clare distinguere nec simul cognoscere valeamus; necesse est igitur ut Deus in quo nulla dari potest imperfectio, semetipsum & omnia quæ ipsi insunt distinctissime atque simul cognoscat.

II. Deus non solum mundum hunc aspectabilem sed etiam omnes mundos possibiles distinctissime & simul cognoscit. Etenim anima humana mundum hunc adspectabilem cognoscit multaque in eo distinguit. Præterea vim habet
sibi

sibi repræsentandi multa quæ ad hanc rerum seriem non pertinent quæque sunt mere possibilia; & hæc animæ vis perfectio est licet admodum limitata. Deo igitur tribuenda est in gradu absolute summo, ac proinde Deus hunc mundum aspectabilem omnesque mundos posibles distinctissime ac simul cognoscit; & quia nobis conscii sumus eorum quæ distincte nobis repræsentamus, Deus omnium mundorum possibleum & eorum quæ ipsi insunt atque sui ipsius sibi conscius est & quidem clarissime ac plenissime.

III. Deus omnia a se diversa cognoscit in seipso, seu quatenus seipsum cognoscit. Cum enim Deus sit ens omnium primum, cætera vero entia ab ipso sint, perfectiones divinæ sunt omnium primæ, sunt prima possibilia, & in illis continetur ratio possibilitatis omnium aliarum perfectionum, ita ut sublato Deo nihil amplius possibile concipiatur. Hinc cum Deus perfectiones illimitatas quæ sunt in ejus essentia, perpetuo intueatur, omnes quoque limitationes perfectionum posibles & finitorum quorumlibet entium combinationes omnes posibles videt, seu omnia possibilia cognoscit in seipso, seu quatenus seipsum cognoscit.

Hinc colligitur ideas rerum Deo essentielles esse ac proinde necessarias & immutabiles. Nam intellectus divinus Deo essentialis est; est autem intellectus divinus omnium possibleum tum singularium tum universalium distincta ac *simultanea* repræsentatio; ergo cum idea sit repræsentatio rei in mente, ideæ rerum sunt Deo essentielles, ac proinde necessariae & immutabiles. Hinc ideæ rerum non sunt arbitrariæ, seu non sunt tales quod Deus eas voluerit esse tales; pone enim eas esse arbitrarias, sunt ergo tales quia Deus voluit eas esse tales, & insunt intellectui divino quia Deus eas inesse vult;

id.oque cum voluntas Dei in hac re ponatur libera, non repugnat alias inesse intellectui divino ideas quam quæ insunt, quod absurdum est. Igitur essentia rerum sunt æternæ earumque æternitas a Deo est. Etenim rerum essentia in earumdem possibilitate intrinseca consistit; quamobrem cum possibilia etiam in se spectata represententur in intellectu divino & quidem perpetuo, essentia rerum perpetuo fuere in intellectu divino earumque æternitas a Deo est. Hinc clarius patet quod in Ontologia ostendimus, nimirum essentias rerum esse necessarias, immutabiles & æternas, intellectumque divinum esse fontem omnis possibilitatis intrinsecæ.

IV. Intellectus divinus est illimitatus, infinitus, immensus, omni intellectui finito incomprehensibilis; Intellectus enim limitari nequit nisi quoad objectum & modo representandi objectum. Quamobrem cum intellectus divini objectum sit quicquid est possibile, illimitatus est quoad objectum, si ad omne possibile extendatur; illimitatus etiam est quoad modum representandi, si omnia possibilia simul & distinctissime representet. Quoniam itaque intellectus divinus in distinctissima & simultanea omnium possibilium representatione consistit, prorsus illimitatus est. Est quoque infinitus quatenus nihil est *cognoscibile* quod non actu in intellectu divino representetur ac proinde omnia ei insunt *actu* quæ inesse possunt. Est etiam immensus, quia fieri non potest ut intellectus limitatus, etiamsi pluries utcumque sumatur, fiat illimitatus, seu pro mensura illimitati intellectus adhiberi possit; itaque intellectus divinus respuit omnem mensuram, ideoque immensus est. Denique omni intellectui finito incomprehensibilis est; nam *comprehensibile* aliquid dicitur, si modum quo est vel fieri potest, clare & distincte nobis

nobis repræsentare valeamus; contra autem aliquid dicitur *incomprehensibile*, si modum quo est vel fieri potest nobis minime repræsentare valeamus. Porro intellectus finitus non simul, sed successive cognoscit ea, quæ potest cognoscere, non potest omnia inter se conferre, nec proinde omnia inter se distinguere. Quia ergo ens intellectu finito præditum, qualis est anima nostra, intellectus sui ideam habet quatenus sui ipsius sibi conscius est, non habet ideam claram, nisi successivæ repræsentationis possibilitatem, & quidem *inadequate*, seu non habet ideam claram, nisi intellectus finiti; repræsentare igitur sibi non potest modum, quo intellectus infinitus omnia possibilia simul, ac distinctissime sibi repræsentat, ac proinde intellectus divinus intellectui finito incomprehensibilis est.

V. Deo inest ratio absolute summa seu infinita. Nam ratio est facultas veritatum universalium seriem, nexumque intuendi seu percipiendi, ac proinde qui veritatum universalium seriem, nexumque intuetur, ratione præditus est; & quidem eo major est ratio, quo plurius veritatum universalium nexum percipit, & quo longius nexum illum continuare valet. Quapropter ratio absolute summa, seu maxima est qua omnium veritatum nexus simul, seu actu unico perspicitur; sed hæc Deo competit, ergo Deo inest ratio absolute summa. Patet vero hanc in Deo non nudam esse *potentiam*, sed *actum*, nec minus liquet eam esse infinitam & omni intellectui finito incomprehensibilem.

Prima & secunda mentis operatio competant Deo in gradu absolute summo; tertia vero eisdem tribui nequit nisi *eminenter*. Prima mentis operatio in nobis absolvitur, dum attentionem nostram successive dirigimus ad ea, quæ

in ideis duorum, vel plurium individuorum eadem sunt, atque efficimus, ut ea majorem claritatem habeant. Unde quoad primam intellectus operationem major gradus concipi nequit, quam intuitus omnium universalium in omnibus singularibus, omni modo possibili inter se combinatis, simultaneus & quam maxime distinctus; hic ergo intellectus Deo competit. Quia vero vi intellectus divini omnia singularia & universalia distincte, ac simul repræsentantur cum omnibus relationibus, & combinationibus possibilibus, earumque Deus sibi conscius est, unico actu intuetur, & distinguit in omnibus universalibus & singularibus ea omnia, quæ ipsis insunt, eorumque mutuas omnes relationes; in hoc vero consistit secunda mentis operatio, ea igitur Deo inest in gradu absolute summo. Patet vero quod Deus per duas illas operationes omnia intuitive cognoscat, nec proinde opus habeat ex judiciis prævijs alia formare judicia ratiocinando; Deo igitur tertia mentis operatio, seu ratiocinatio tribui non potest *proprie*. Quia tamen Deus veritatum omnium seriem nexumque intuetur, quod quidem ratiocinationi æquivalet, tertia mentis operatio eminenter Deo tribui potest.

VI. Deo competit scientia in gradu absolute summo per *eminentiam*. Et quidem animæ nostræ inest scientia, qua per demonstrationem, ideoque per tertiam mentis operationem cognoscimus veritatem aliquam, seu prædicatum propositionis convenire, vel non convenire subiecto; unde scientia est perfectio quæ animæ nostræ inest. Porro omnis perfectio Deo tribuenda est in gradu absolute summo; Deo igitur competit scientia in gradu absolute summo; quia vero tertia mentis operatio Deo inest tantum per *eminentiam*, scientia quoque Deo inest per

per eminentiam. Hinc scientia Dei est omnium singularium & universalium, atque ad omnes veritates, earumque nexum omnem extenditur, ideoque Deus est omniscius.

Similiter ostenditur Deum nosse quid sub data conditione futurum esset, vel non futurum. Experimur enim nos multa cognoscere, quæ sub posita conditione futura, vel non futura essent; conditionatam hanc cognitionem esse perfectionem aliquam in anima nostra existentem nemo non admittit; quamobrem Deo tribuenda est in summo gradu, ideoque omnis, sub conditione data, futuri vel non futuri cognitio tribuenda est Deo. eaque per modum actus; & quia divina cognitio omnem incertitudinem excludit, conditionata illa Dei cognitio certa est.

Quamvis una sit in Deo simplicissimaque scientia, ut ex dictis patet, attamen humanus intellectus duplicem cum *fundamento* scientiam in Deo distinguit ob variam scilicet considerationem objectorum, ad quæ sese extendit divina scientia. Scientia Dei dividitur in scientiam *simplicis intelligentiæ*, & scientiam *visionis*. Prima vocatur qua Deus res tantummodo cognoscit ut possibiles, tum *intrinsece*, tum *extrinsece*. Scientia visionis est, qua Deus ab æterno cognoscit, quæ in tempore futura sunt; eademque scientia cognoscit, quæ præsentia sunt, & quæ præterita. *Præscientia* in specie dicitur cognitio futurorum, seu scientia visionis. qua Deus ab æterno novit, quæ futura sunt. Ut autem quæ de scientia Dei nobis dicenda supersunt, melius intelligantur, principia quædam necessaria prius exponemus. Itaque.

VII. Quoniam Deus est ens perfectissimum ac liberrimum, Mundum adspectabilem animasque libere creavit, ipsique competit potentia libera ad actum perducendi ea, quæ intrinsece pos-

possibilia sunt; & quia potentia illa perfectio est, tribui debet Deo in summo gradu, ita ut Deus sit omnipotens, seu facere possit omnia possibilia; quæ enim impossibilia sunt, contradictionem involvunt, & potentia faciendi quæ contradictionem involvunt, enti perfectissimo inesse non potest. Igitur Deus est ens omnium primum, prima rerum omnium causa, & sublato divino intellectu nihil est intrinsece possibile; sublata vero divina potentia nihil est extrinsece possibile. Patet itaque intrinsecam rerum possibilitatem a divino intellectu, & extrinsecam a divina potentia pendere. Denique quia *a posse ad actum non valet consequentia*, & quia Deus est liberrimus in rerum productione, requiritur decretum divinæ voluntatis ad rerum existentiam, seu *actualitatem* in tempore, ideoque res pendent a libero decreto divinæ voluntatis, ut existant in tempore.

Itaque Deus per scientiam simplicis intelligentiæ cognoscit omnia intrinsece possibilia, quatenus sibi conscius est idearum in intellectu suo existentium, & cognoscit omnia extrinsece possibilia, quatenus sibi conscius est suæ omnipotentiae. Etenim Deus sui ipsius, & eorum quæ in ipso sunt, ideoque & idearum rerum omnium possibilem, quæ in intellectu ejus necessario existunt, & omnipotentiae suæ sibi conscius est; sed ideo aliquid est intrinsece possibile, quia ejus idea datur in intellectu divino, & extrinsece possibile est, quia Deus illud producere potest; ergo Deus cognoscit res omnes, ut intrinsece possibiles, quatenus sibi conscius est idearum, quæ in intellectu ejus sunt; eaque ut extrinsece possibiles, quia sibi conscius est suæ omnipotentiae. E. G. Idea Mundi hujus adspicibilis in Deo fuit ab eterno; quatenus igitur Deus intellectum suum cognoscit, ideoque sibi
con-

conscius est hujus ideæ, ab omni æternitate novit Mundum hunc esse intrinsece possibilem. Præterea Deus ab æterno non minus sibi conscius est potentia suæ, ac proinde Mundum hunc esse extrinsece possibilem cognovit, quatenus sibi conscius est suæ potentia. Manifeste autem patet positis ideis in intellectu Dei positæque Dei potentia nondum intelligi, cur hic Mundus adspectabilis actu extiturus sit aliquando, & cur nunc actu existat, sed ut extiturus sit, requiri decretum divinæ voluntatis. Hinc per scientiam simplicis intelligentiæ nondum intelligitur, quod aliquid sit futurum, multo minus, quod aliquid actu sit vel extiterit, sed tantummodo quod fieri possit, ut aliquando existat. Unde ex sancto Thoma 1. par. qu. 25. ar. 5. ad primum in Scholis theologicis tritum est istud; *scientia Dei dirigit, voluntas decernit, omnipotentia exequitur*, seu omnia possiblea cognoscit Deus per scientiam simplicis intelligentiæ, ex eorum numero quædam efficacissima sua voluntate creare decernit, idque per omnipotentiam suam exequitur.

Deus non solum novit ea omnia, quæ contingunt in Mundo materiali, verum etiam quæ in animabus accidunt, ipsa earundem libera decreta, præscitque omnia. Et quidem nos ipsi rationem sufficientem eorum, quæ in Mundo materiali, atque etiam in animabus contingunt, & libera earundem decreta nonnunquam satis certo, sæpe probabiliter præcognoscimus; sic Astronomus certo præscit eclipsem, & rationem præcognoscit cur dato tempore futura sit. Si bene nota sint principia, quibus alter homo imbutus est, quid in dato casu judicaturus sit prævidemus saltem probabiliter; & quia voluntas non sese determinat sine motivis, sæpe etiam actum volitionis prædicimus. Quoniam itaque

que hæc cognitio certa vel probabilis eorum , quæ in Mundo materiali , & in animabus liberis contingunt , est perfectio , quæ animæ nostræ inest , ea quoque Deo tribuenda est in gradu absolute summo , ac proinde Deus certo præscit omnia quæ contingunt in Mundo materiali , quæ in animabus contingunt , ipsaque earumdem decreta libera .

VIII. Decretum Dei est ab æterno , immutabile , & tamen liberrimum . Nam Deo ab æterno insunt omnia , quæ inesse possunt , & in eo nulla datur statuum successio , nulla mutatio , & simul vult quidquid vult ; & quia est ens a se , perfectissimum , independens , sibi metipsum sufficientissimum est , nulloque ente alio extra se indiget ullo modo , & ejus voluntas liberrima est , quoad ea quæ Deo sunt extrinseca . Quamobrem cum decretum sit actus , seu determinatio voluntatis ad aliquid agendum , vel non agendum , decretum Dei est ab æterno , immutabile & tamen liberrimum .

Frustra objiceretur decretum æternum , atque immutabile esse quoque necessarium , ac proinde minime liberum ; nam necessitas decreti divini est tantum *hypothetica* , & *consequens* , non *absoluta* & *antecedens* ; quia neque in Deo ipso , neque in entibus extra Deum possibilibus aliquid inesse potest , quod Deum necessario determinaverit ad decretum formandum ; sed facta tantum hypothese , quod Deus aliquid decreverit , tum sequitur decretum esse æternum & immutabile , ac proinde necessarium necessitate tantum hypothetica & consequenti , quæ libertatem non tollit . Itaque Deus , qui per essentiam suam sibi conscius est , & intellectus sui , & omnipotentiae , & voluntatis liberrimæ , prius (*prioritate* scilicet *rationis* non *temporis*) videt in intellectu suo possibilitatem rei
in-

intrinsecam, in sua omnipotentia possibilitatem ejus extrinsecam, & in sua voluntate libera non repugnantiam ut decretum rei producendæ ponatur vel non. Tum sese liberrime determinat ad illam rem producendam in tempore, seu ponitur decretum quod proinde ex natura Dei immutabile est & ab æterno.

IX. Deus eorum quæ in mundo sunt nihil in particulari vult, seu decrevit *absolute* spectatum, sed in *relatione ad totum*. Mundus enim ens unum est & singula in eodem vel simul vel successive existentia sunt ejusdem partes. Quoniam itaque Deus qui omnia ab æterno & simul seu unico intellectus actu cognoscit, mundum tamquam ens unum, & singula coexistentia & successiva tamquam unius totius partes sibi repræsentavit ab æterno, actualitatem quoque totius mundi & eorum omnium quæ in ipso sunt, simul unico voluntatis actu decrevit, ac proinde nihil decrevit in particulari sine relatione ad totum. Hæc propositio probe notanda est ne circa originem & permissionem mali oriantur difficultates gravissimæ; quæcumque enim moveri solent, non aliunde proveniunt quam quod res quædam particulares referantur ad voluntatem divinam sine relatione ad totum systema a Deo decretum. Quoniam autem homo perspicere nequit omnes rerum in mundo contingentium relationes ad totum systema mundanum, decreta Dei sunt imperscrutabilia. Unde Apostolus ad Rom. cap. 11. v. 33. ait: *O altitudo divitiarum Sapientiæ, & Scientiæ Dei! quam incomprehensibilia sunt judicia ejus & investigabiles viæ ejus!*

Hic autem obiter observabimus accurate distinguenda esse ea quæ sunt supra rationem ab iis quæ sunt contra rationem. *Supra rationem* esse, vel uno nomine *mysterium* dicitur, quod

ex

ex principiis rationis demonstrari non potest. At *contra rationem* esse dicitur quod principiis rationis repugnat. Hæc duo pessime confunduntur, nempe esse *supra rationem* & esse *contra eandem*. Patet autem in divina revelatione locum esse mysteriis, cum enim Deus infinite plura intelligere, velle ac facere possit quam nos ex principiis rationis nostræ admodum limitatæ percipere possimus, inter divinæ revelationis characteres mysteria continentur, ideoque absurde & contra rationem ipsam agunt religionis revelatæ hostes dum mysteria revelata in dubium vocant vel impugnant.

X. Res decretæ possibiles fuere ante decretum, sed actu præscitæ post decretum. Etenim Deus per scientiam simplicis intelligentiæ cognoscit omnia tum intrinsece tum extrinsece possibilia. Quoniam vero per decretum res demum evadunt futuræ, liquet res decretas post decretum actu præscitas fuisse. Illud autem decretum Dei licet immutabile & præscientia ejus licet infallibilis nec contingentiam nec libertatem tollunt. Nam cum Deus rem quamdam decernit, eam ex statu possibilitatis ad actualitatem vult perducere; Sed cum possibilitas rerum non pendeat a voluntate Dei, res ante decretum jam intelligitur possibilis & quidem intrinsece quatenus idea ejus in intellectu divino continetur, extrinsece vero quatenus Deus eam facere potest. Talem igitur eam decernit, qualem possibilem esse intrinsece ac extrinsece novit, hoc est, qualem a se fieri posse intelligit, antequam eam ad actum perducere velit. Quoniam itaque decretum rei intrinsece atque extrinsece possibilis nihil addit nisi certitudinem existendi, ideoque eandem relinquit qualis spectatur ante ipsum; evidens est id quod ante decretum divinum spectatur ut contingens, idem etiam

etiam non aliter quam contingens spectari posse post decretum ; & quod ante decretum intelligitur esse liberum , id etiam liberum intelligi post decretum . Igitur decretum Dei licet immutabile nec contingentiam nec libertatem tollit . Similiter præscientia Dei qui errare non potest , in re decreta nihil mutat , sed per eam Deus tantummodo actu novit res decretas . Quare cum decretum nec contingentiam nec libertatem tollat , præscientia quoque nec contingentiam nec libertatem tollit .

Neque obijci potest posito decreto immutabili positaque infallibili præscientia necesse esse ut quod decretum ac præscitum est , eveniat . Nam id tantum necesse est necessitate hypothetica , non vero necessitate absoluta . Et ratio est quia dum ponitur decretum aut præscientia rei futuræ , ponitur etiam eandem futuram esse . Unde ex hypothese decreti aut præscientiæ necessario consequitur rem decretam aut præscitam esse futuram . At illa necessitas non est absoluta , quia decretum atque præscientia rem natura sua contingentem aut liberam relinquunt in sua contingentia & libertate , atque immutabilitas decreti ac infallibilitas præscientiæ non ex rei futuræ necessitate ac immutabilitate , sed ex natura voluntatis ac intellectus Dei nascuntur . Si quis vero dicat supponi posse rem contingentem aut libere futuram non esse futuram , quod repugnat immutabilitati decreti & præscientiæ divinæ infallibilitati , respondendum est id posse supponi extra hypothese decreti ac præscientiæ divinæ seu in *sensu diviso* , non autem in hypothese facta decreti ac præscientiæ seu in *sensu composito* . Dum enim res supponitur a Deo decreta atque præscita , supponitur etiam eam esse futuram ; & ideo dum in hypothese decreti ac præscientiæ

ex principiis rationis demonstrari non potest. At *contra rationem* esse dicitur quod principiis rationis repugnat. Hæc duo pessime confunduntur, nempe esse *supra rationem* & esse *contra eandem*. Patet autem in divina revelatione locum esse mysteriis, cum enim Deus infinite plura intelligere, velle ac facere possit quam nos ex principiis rationis nostræ admodum limitatæ percipere possimus, inter divinæ revelationis characteres mysteria continentur, ideoque absurde & contra rationem ipsam agunt religionis revelatæ hostes dum mysteria revelata in dubium vocant vel impugnant.

X. Res decretæ possibiles fuere ante decretum, sed actu præscitæ post decretum. Etenim Deus per scientiam simplicis intelligentiæ cognoscit omnia tum intrinsece tum extrinsece possibilia. Quoniam vero per decretum res demum evadunt futuræ, liquet res decretas post decretum actu præscitas fuisse. Illud autem decretum Dei licet immutabile & præscientia ejus licet infallibilis nec contingentiam nec libertatem tollunt. Nam cum Deus rem quamdam decernit, eam ex statu possibilitatis ad actualitatem vult perducere; Sed cum possibilitas rerum non pendeat a voluntate Dei, res ante decretum jam intelligitur possibilis & quidem intrinsece quatenus idea ejus in intellectu divino continetur, extrinsece vero quatenus Deus eam facere potest. Talem igitur eam decernit, qualem possibilem esse intrinsece ac extrinsece novit, hoc est, qualem a se fieri posse intelligit, antequam eam ad actum perducere velit. Quoniam itaque decretum rei intrinsece atque extrinsece possibilis nihil addit nisi certitudinem existendi, ideoque eandem relinquit qualis spectatur ante ipsum; evidens est id quod ante decretum divinum spectatur ut contingens, idem etiam

etiam non aliter quam contingens spectari posse post decretum; & quod ante decretum intelligitur esse liberum, id etiam liberum intelligi post decretum. Igitur decretum Dei licet immutabile nec contingentiam nec libertatem tollit. Similiter præscientia Dei qui errare non potest, in re decreta nihil mutat, sed per eam Deus tantummodo actu novit res decretas. Quare cum decretum nec contingentiam nec libertatem tollat, præscientia quoque nec contingentiam nec libertatem tollit.

Neque objici potest posito decreto immutabili positaque infallibili præscientia necesse esse ut quod decretum ac præscitum est, eveniat. Nam id tantum necesse est necessitate hypothetica, non vero necessitate absoluta. Et ratio est quia dum ponitur decretum aut præscientia rei futuræ, ponitur etiam eamdem futuram esse. Unde ex hypothese decreti aut præscientiæ necessario consequitur rem decretam aut præscitam esse futuram. At illa necessitas non est absoluta, quia decretum atque præscientia rem natura sua contingentem aut liberam relinquunt in sua contingentia & libertate, atque immutabilitas decreti ac infallibilitas præscientiæ non ex rei futuræ necessitate ac immutabilitate, sed ex natura voluntatis ac intellectus Dei nascuntur. Si quis vero dicat supponi posse rem contingentem aut libere futuram non esse futuram, quod repugnat immutabilitati decreti & præscientiæ divinæ infallibilitati, respondendum est id posse supponi extra hypothesim decreti ac præscientiæ divinæ seu in *sensu diviso*, non autem in hypothese facta decreti ac præscientiæ seu in *sensu composito*. Dum enim res supponitur a Deo decreta atque præscita, supponitur etiam eam esse futuram, & ideo dum in hypothese decreti ac præscientiæ

tiæ

tia Dei supponitur rem decretam ac præscitam non esse futuram, duo simul contradictoria ponuntur, videlicet rem esse futuram & tamen non esse futuram. Hactenus in decretis divinis multipliciter diversumque ordinem consideravimus; at cavendum est ne de Deo ex nobis ipsis judicemus, ipsique tribuamus quod in nostro dumtaxat intellectu existit. Et quidem Deus omnia ab æterno & simul, atque unico intellectus actu cognoscit, omnia simul unico voluntatis actu decrevit. At quemadmodum ex infinito intellectu divino colligitur unicum esse Dei decretum & sine ulla temporum successione, ita etiam ex nostro finito intellectu humano colligitur in decretis divinis multipliciter diversumque ordinem spectari posse, ratione scilicet objecti & ad faciliorem decreti divini representationem.

XI. In suis decretis Deus est infinite sapiens. Sapientia nomine intelligimus scientiam actionibus liberis finis naturæ suæ convenientes præscribendi, & media ad eos conducentia eligendi, atque fines particulares sibi invicem & ad totum subordinandi. In sapientia igitur tria spectanda sunt, nimirum I. finis determinatio, II. mediorum electio. III. finium particularium subordinationem. Ex hoc triplici fonte æstimandi sunt sapientiæ gradus ita ut quis eo sapientior sit quo rarius ab his regulis aberrat. At Deo competit sapientia in gradu absolute summo seu perfectissimo; Etenim mens humana capax est sapientiæ licet admodum limitatum quoad finis determinationem, tum quoad mediorum electionem, tum quoad finium particularium subordinationem. Quare cum perfectiones quæ animæ humanæ insunt, Deo tribuendæ sint in gradu absolute summo, & quidem quæ nobis insunt per modum potentia, Deo

Deo convenient per modum actus, sapientia in gradu absolute summo Deo inest. Quia igitur sapientia triplicem scientiam involvit, nempe finis determinationem, mediorum electionem & finium particularium subordinationem, Deus triplicem hanc scientiam habet in gradu absolute summo & perfectissimam. Quare sapientia Dei est illimitata, infinita, & cum ea comparari non potest sapientia entis finiti.

Itaque Deus nihil vult nihilque facit absque fine; finis quem Deus intendit, Deum ipsum maxime decet nihilque facit frustra. Etenim Deus sapientissimus est, sed *sapientis est agere propter finem, nec velle quidquam absque fine*, ex definitione sapientiæ, ergo Deus nihil vult nihilque facit absque fine. Ex eadem definitione patet finem quem Deus sibi constituit; talem esse debere ut Deum maxime deceat. Tandem liquet Deum nihil facere frustra; cum frustra quid facere dicatur qui vel nullo fine id facit, vel facit quod fini consequendo non sufficit aut non conducit.

Igitur Deus malum non vult, nec illud tamquam finem intendere potest. Deo enim competit voluntas optima seu in gradu absolute summo & absque ulla imperfectione; sed voluntatis imperfectio est, si in malum ferri possit; Deus igitur malum non vult, ac proinde illud tamquam finem intendere nequit. Absurde igitur & superbe ea quæ in mundo contingunt, existimant prophani atque impii homines cum sapientia cæterisque divinis attributis conciliari non posse, eo quod ipsi non videant qua ratione concilientur. Etenim cum scientia ac sapientia humana sint limitatæ, evidens est fieri non posse ut homo sciat in singulari fines omnes quos sibi Deus constituit, omnia media quæ ad fines illos conducunt & totam finium par-

particularium subordinationem. Homini imper-
scrutabilis est sapientia divina, atque hic rur-
sus & sæpe sæpius exclamandum est cum Apo-
stolo: *altitudo sapientiæ*.

XII. Bonum *in se* aliquid dicitur quatenus
suam in se habet perfectionem absque relatio-
ne ad aliud. Quare bonum *relate* ad aliud vo-
catur quod ad perfectionem alterius aliquid
confert. Malum *in se* aliquid appellatur qua-
tenus imperfectio quædam ipsi inhæret, & ma-
lum *relate* ad aliud dicitur quod ad imperfe-
ctionem alterius aliquid confert. Malum *meta-*
physicum dicitur quod ex natura sua rem im-
perfectiorem reddere censetur. Ita intellectus
nostri limitatio habetur pro malo metaphysico,
quia intellectus noster longe foret perfectior, si
ea limitatione careret. Malum *physicum* voca-
tur quod statum mundi quoad effectus natura-
les imperfectiorem reddere censetur; E. G. tem-
pestas qua damnum infertur frugibus & ædi-
bus, dicitur malum physicum, propterea quod
status mundi quoad effectus naturales censetur
imperfectior quam si nullum unquam frugibus
aut ædibus damnum a tempestate esset metuen-
dum. Malum denique *morale* nuncupatur quod
inhæret actionibus liberis hominum ob quod
eodem dicuntur *vitiose*.

XIII. Deus est summe bonus seu optimus in
se, ipsiusque bonitas *essentialis* est immensa.
Ens enim bonum in se est quatenus ipsi inest
perfectio, ideoque ens in se optimum seu sum-
me bonum erit cui inest omnis perfectio in gra-
du absolute summo, seu quod absolute perfe-
ctissimum est; sed Deus est ens absolute perfe-
ctissimum, ergo Deus in se summe bonus est,
atque hæc est bonitas Dei *essentialis & absoluta*
non confundenda cum bonitate *relativa*.

Deus mundum in tempore creare decrevit
ab

ab æterno eumque propter seipsum produxit,
 seu manifestationem sui ipsius & perfectionis
 suæ infinitæ constituit finem ultimum totius u-
 niversi. Cum enim Deus sit sapientissimus ac
 proinde finem optimum in suis actionibus libe-
 ris sibi præscribat, ipse vero sit in se optimus
 & sibi metipso sufficientissimus, non potuit de-
 cernere mundi creationem ipsumque creare nisi
 propter semetipsum tamquam finem ultimum
 rerum omnium. Quia autem nihil est extra
 Deum quod ad ipsius perfectionem conferre ali-
 quid valeat; entia enim a Deo creata possunt
 esse dumtaxat signum perfectionis sui creatoris,
 nullus concipi potest modus quo Deus propter
 seipsum quidquam facere possit quam manife-
 stando suam perfectionem per hoc quod facit:
 Ergo manifestationem perfectionis suæ infinitæ
 constituit finem ultimum totius universi. Hinc
 proverb. 16. v. 4. legitur: *universa propter se-
 metipsum operatus est Dominus; impium quoque
 ad diem malum*: scilicet, homines fecit quos
 noverat mala moralia perverso libertatis suæ usu
 perpetraturos, idque permittere decrevit, &
 mala physica idcirco eidem decrevit immittere
 ut hoc ipso manifestaret perfectionem suam.
 Hinc etiam juxta Apostol. ad Rom. 1. v. 20.
*Deus se manifestavit hominibus per creationem
 hujus universi, quatenus per ea quæ facta sunt
 invisibilia Dei veluti sempiterna ejus virtus &
 divinitas intelliguntur.* Unde intelligitur Deum
 voluisse ab æterno ut homines per ea quæ fe-
 cit, attributa ipsius cognoscant; complexio au-
 tem attributorum divinorum quatenus a crea-
 tura rationali agnoscitur, dicitur *gloria Dei*: un-
 de gloriam suam manifestare dicitur Deus qua-
 tenus perfectionem suam absolute summam aut
 attributa sua hominibus revelat.

XIV. Cum perfectio sit *consensus in varie*
Jacq. T. II. K ate,

tate, ex demonstratis in Ontologia, seu plurimum a se invicem differentium *tendentia* ad unum aliquod obtinendum, omnia quæ sunt & fiunt in universo, diriguntur ad finem ultimum, nempe ad manifestationem gloriæ Dei, ac proinde patet mundum eam habere perfectionem quæ in gloriæ Dei manifestatione consistit, juxta illud Genes. 1. *vidit Deus cuncta quæ fecit, & erant valde bona.* Quia vero perfectio partis æstimari nequit nisi in relatione ad totum, perfectio eorum quæ sunt & fiunt in mundo, æstimanda non est nisi in relatione ad totum universum & ad finem ultimum ipsius seu manifestationem gloriæ Dei, ideoque in relatione ad omnia attributa divina. Hinc S. Thomas 1. part. Quæst. 47. art. 20. ad primum; *optimi agentis est, inquit, producere totum effectum suum optimum, non tamen quod quamlibet partem totius faciat optimam simpliciter, sed optimam secundum proportionem ad totum; tolleretur enim bonitas animalis, si qualibet pars ejus haberet oculi dignitatem. Sic igitur & Deus, totum universum constituit optimum, secundum modum creaturæ, non autem singulas creaturas, sed unam alia meliorem, & ideo de singulis creaturis dicitur Genes. 1. vidit Deus lucem quod est bona, & similiter de singulis; sed de omnibus simul dicitur; vidit Deus cuncta quæ fecerat, & erant valde bona: Hæc sanctus Doctor. Et quæst. 48. art. 6. ad septimum: facit quod melius est in toto, sed non quod melius est in unaquaque parte, nisi per ordinem ad totum; ipsum autem totum quod est universitas creaturarum, melius & perfectius est, si in eo sint quedam quæ a bono deficere possunt, quæ interdum deficiunt, Deo hoc non impediente; tum quia providentiæ non est naturam destruere, sed salvare: ipsa autem natura rerum hoc habet ut quæ deficere possunt, quan-*

quandoque deficiant; tum quia ut dicit *Augustinus* in *Enchiridio*. Deus est adeo potens: quod etiam bona potest facere de malis. Unde multa bona tollerentur, si Deus nullum malum permitteret.

Ex his autem quæ hæcenus explicavimus, nemo colligat mundum hunc ita a Deo optimum creatum fuisse, ut Deus nullum alium meliorem creare potuerit, ita ut *optimismus* quem vocant, fuerit ratio creationis mundi hujus & non alterius; hanc opinionem omnino rejicimus. Laudata sancti Thomæ testimonia ita intelligi debent ut Deus mundum optimum creaverit secundum *modum*, non secundum *substantiam*. Etenim cum Deus sit sapientissimus, quæcumque facit optime facit. At opinio de mundi optimismo quam acriter tuentur Leibnitiani, divinam tolleret libertatem rerumque omnium contingentiam. Qui enim potuisset id non existere quod habebat existentiae suæ rationem, quam quidem rationem naturæ Auctor non potuit non videre nec potuit non sequi? contraria ratione existere non potuit quod eandem non habuit existendi rationem. Præterea repugnat omnino *optimismus* Leibnitianus, cum nulla possit esse perfectio maxima, nulla minima, sed quavis finita perfectione utcumque magna vel parva possit esse alia perfectio major vel minor. Quidquid enim existit, in se finitum est ac determinatum, unico infinito & perfectissimo conditore excepto, ita ut alia finita perfectiora existere possint *in infinitum*. Igitur non officit omnipotentiae aut bonitati infinitæ quod optimum non seligat, ubi nullum est optimum, nullum perfectissimum præter Deum ipsum. Porro solum divinæ libertatis exercitium infinites perfectius est quavis perfectione creata, quæ proinde nullam potest divinæ libertati imponere creandi necessitatem.

XV. Malum metaphysicum est absentia perfectionis alienæ non propriæ, & ideo malum potius apparet quam est; per se autem ante decretum rebus decretis inhæret nec ab illis per decretum separari potest, estque absolute necessarium, & mundus sine eo esse non potest. Nam malum metaphysicum consistit in *limitationibus determinationum essentialium*. Quamobrem cum ens limitatum habere nequeat nisi determinationes essentielles limitatas & per easdem in *esse* hujus entis constituatur, capax non est nec fieri potest majoris perfectionis quam illius quæ vi illarum limitationum locum habet; in essentia enim continetur ratio sufficiens cur cætera vel actu insint vel inesse possint; major igitur perfectio est alterius entis ideoque aliena. Jam cum aliquid in se malum sit quatenus imperfectio quædam ipsi inhæret, ideoque perfectio quædam de eo negatur, limitationes essentielles tantummodo remouent perfectionem alienam, non propriam entis cujus sunt limitationes essentielles; consequenter malum metaphysicum non est absentia perfectionis propriæ, & idcirco tantummodo minus quoddam bonum est, si relative ad majora spectetur. Quia vero essentia rerum sunt absolute necessariae & immutabiles, limites vero determinationum essentialium ad essentiam entis pertinent, in ideis divinis essentialium insunt ante decretum, & per decretum a rebus decretis separari nequeunt; malum igitur metaphysicum per se ante decretum rebus decretis inest nec ab illis per decretum separari potest; & quia absoluta est necessitas quæ ex essentia entis oritur, malum metaphysicum est absolute necessarium. Denique cum mundus sit series entium finitorum, essentielles determinationes singulorum entium ex quibus mundus constar, suas necessario habent limitationes sine quibus re-

pu-

pugnat entia illa esse; quare absolute impossibile est ut mundus sine malo metaphysico existat.

Hæc omnia exemplo manifesta fiunt. Limitationes facultatis *cognoscitivæ* in anima humana sunt malum metaphysicum; Sunt autem adeo necessariae ut iis ablatis non amplius maneat anima humana. Igitur facultas cognoscendi in homine non ideo est limitata, quia decrevit Deus has animæ humanæ limitationes, sed quia producere decrevit hominem qui absque limitationibus produci non poterat. Philosophi qui ideas rerum arbitrarias fingunt in intellectu divino & limitationes determinationum essentialium ideis rerum per decretum inferunt, in doctrina mali inextricabilibus sese implicant difficultatibus quas superant qui essentias rerum æternas, necessarias & immutabiles, Philosophis ac Theologis ad Cartesii usque tempora unanimi consensu probatas agnoscunt, & idcirco præsentem propositionem & sequentes tamquam probe notandas inculcamus.

XVI. Mala physica ex determinationum intrinsecarum limitationibus oriuntur perinde ac cætera quæ mala non sunt, & Deus per scientiam simplicis intelligentiæ ea intuetur in idea mundi possibilis ante decretum. Et quidem Deus per scientiam simplicis intelligentiæ antecedenter ad decretum omnes essentias naturalesque possibiles intuetur, ac proinde in idea mundi possibilis intuetur quoque omnes corporum essentias atque naturas, eorum mutuam connexionem, ideoque omnes mutationes naturales omniaque mala physica inde oriunda, exemplo res manifesta est. Si ventus vehemens arbores prostermit & tecta ædium disjicit, aut grando damnum infert segeti, ii effectus naturales per essentiam & naturam causarum naturalium atque per regulas motus quibus naturæ

impositus est ordo, explicantur eodem modo quo effectus alius quilibet naturalis, & Deus ante decretum hos effectus in idea mundi possibili intuetur.

XVII. Malum morale possibile est ob intellectus humani limitationem, & libertatis abusu liberas hominum actiones corrumpit, illudque antecedenter ad decretum intuetur Deus in idea hominum, seu in idea mundi huius possibilis quatenus homines complectitur. Etenim in idea totius universi possibilis quæ est in intellectu divino antecedenter ad decretum, continentur etiam ideæ singulorum hominum & animarum quot quot existere possunt, quoad essentiam, attributa & omnes modificationes, ideoque & quoad omnes appetitiones, & aversiones, volitiones ac nolitiones. Quoniam itaque malum morale liberas hominum actiones libertatis abusu vitiat, omne malum morale quod in mundo datur, Deus intuetur ante decretum in idea mundi huius possibilis. Observandum autem est mala physica & moralia in hac rerum serie locum habere sed diverso plane modo quo malum metaphysicum. Etenim cum qualibet creatura finita esse debeat atque limitata, evidens est malum metaphysicum absolute necessarium esse. At malum physicum cum sit effectus naturalis qui in hac rerum serie ex causis suis oritur, non absoluta sed hypothetica tantum necessitate in hoc mundo locum habet. Idem dicendum de malo morali quod liberis & contingentibus hominum actionibus inhæret per verso libertatis usu.

XVIII. Neque mala physica & moralia obstant quominus mundus bonus sit & fini ultimo quem sapientia Dei rebus omnibus præscripsit, omnino conveniat. Ea enim quæ mala

la nobis videntur, a sapientissima causa permit-
ti poterant, cum exinde plurima bonorum ge-
nera oriantur. Nam ut observat Sanctus Au-
gustinus in Enchirid. c. 11. *Neque enim Deus*
omnipotens ullo modo sineret mali esse aliquid
in operibus suis, nisi usque adeo esset omni-
potens & bonus, ut bene faceret etiam de ma-
lo. Et quidem cum Deus per mundi creatio-
nem manifestare voluerit gloriam suam ideo-
que & suam summam bonitatem, dubitandum
non est quin unicuique creaturæ tantumdem
boni conferat quantum ad consequendos fines
liberrimo arbitrio sibi præfixos permittit divi-
na illius sapientia bonitasque infinita. Hinc
quocumque te vertas in hoc universo, totum
plenum est bonitatis divinæ quæ est fons &
causa omnis bonitatis tum essentialis, tum ac-
cidentalis ceterorum entium.

Observandum tandem est in eo peccare ho-
mines quot quot bonitatem divinam suspectam
habent, quod de ea judicent non in relatio-
ne ad totum universum & ad omnia Dei at-
tributa, sed ad partem aliquam mundi dum-
taxat. Sæpiissime fallimur cum singula ad nos
iplos referimus, ideoque res & effectus illos
aut utiles, aut bonos vocamus qui nobis ip-
sis placere, prodesse, probarique solent; eos
vero vicissim noxios atque inutiles esse cen-
semus ex quibus nulla nobis utilitas aut ju-
cunditas oriatur. Totam hanc de malo phy-
sico & morali doctrinam illustrat parabola de
zizaniis Matth. 13. vers. 24. In ista parabola
ager mundum denotat, *bonum semen* filios Re-
gni, hoc est, homines a Deo electos: *Zizania*
significant homines improbos, atque inde
apparet Christum in ista parabola docere
unde sit malum & cur eidem locus relinqua-
tur in hoc mundo. Et quidem Christus ra-

tionem redditurus cur malum morale ex hac rerum serie a Deo non tollatur, in hac parabola narrat Patrem familias noluisse a servis colligi zizania ne simul triticum cum eis eradicetur, nempe Deus malum morale ex hac rerum serie non tollit ne cum malo simul tollatur bonum. Pater familias semen bonum commisit terræ non vero semen zizaniorum quod commisisse legitur *inimicus*. Quamobrem dici nequit Deum voluisse absolute ut zizania crescerent, prohibuit tamen ne servi eadem eradicarent; quare nec dici potest Deum absolute voluisse zizania non crescere; cumque servis præceperit ut zizania juxta triticum crescere sinerent, impedire noluit quominus zizania crescerent. Ergo Pater familias zizania crescere permisit, & quidem sapienter, ne scilicet triticum eradicaretur cum zizaniis & spes messis excideret. Quia ergo Pater familias *Deum*, triticum *homines probos*, zizania *improbos* repræsentant, Deus, Christo Domino docente, malum in hac rerum serie existere sapienter permittit; permittere autem ideo decrevit, quia ex permissione mali bonum oritur. Hæc parabola doctrinam de origine & permissione mali mirifice confirmat; mos enim fuit Christo Domino ardua dogmata ad imagines revocare quarum ope adumbrari possunt. Quomodo autem Deus per bonitatem suam summam mala dirigat ad bona, luculentissime patet ex historia Josephi a fratribus suis venditi (Genes. 37.) & maxime ex morte Christi Domini cuius Joseph erat figura.

CAPUT II.

De Deo in ordine ad creaturas.

ARTICULUS I.

De Deo creatore & conservatore.

I. **U**T vera creationis notio habeatur, advertendum est quod *producere* generatim sit facere aliquid de novo, sive aliquid quod non erat; aliquid autem sit de novo, vel ex aliqua præexistente materia, ut cum sculptor facit statuam ex marmore; vel aliquid sit de novo ex nulla præexistente materia, ut cum dicimus Deum fecisse ex nihilo omnia. Quod producitur de novo ex præexistente materia, illud proprie dicitur *educi*, & ejus productio vocatur *eductio*; quod producitur de novo ex nulla præexistente materia, proprie dicitur *creari*, & ejus productio *creatio* appellatur. Igitur creatio definiri potest productio ex nihilo tum *sui*, tum *subiecti*; eductio vero dicitur productio ex nihilo *sui*, sed ex aliquo *subiecti*.

II. Ex his notionibus liquet substantias creari, modos substantiarum educi; nempe cum substantia quælibet sit ens in se ipso existens, non potest produci ex ullo ente; cum vero modus omnis in se non existat, sed in subiecto cujus est modus, cuilibet modo convenit produci ex subiecto quod *modificat*, ita rotunditas respectu massæ cereæ. Creatio exigit causam intelligentem & volentem; nam necessum est ut causa quæ aliquid producit per creationem, habeat ideam *exemplarem* rei creandæ & velit illius ideæ objectum existe-

re ; causa igitur *creatrix* intelligitur ea cujus voluntatis actus necessario infert volitam existentiam rei creandæ, ita ut inter illum actum voluntatis causæ creatricis & existentiam rei creandæ sit connexio essentialis ; si enim voluntas posset frustrari absolute effectu voluto , jam non conciperetur influere *physice* in suum effectum dando illi existentiam , nec proinde intelligeretur vera causa illius effectus .

III. Creatum esse a Deo mundum , creatas ab ipso varias substantiarum species , calum & terram , spiritus & corpora , non fides modo sed ipsa ratio docet ; esse enim debet fons atque ultima ratio seu prima & immutabilis rerum omnium contingentium ac mutabilium causa in qua series mutationum non nisi eminenter existat . Mundum hunc universum a Deo creatum fuisse ostendunt eadem argumenta quibus existentiam Dei demonstravimus .

Patet soli Deo competere potentiam creandi ; nam ad creandum requiritur potentia seu vis infinita quæ sola potest superare distantiam infinitam quæ est inter substantiam & non substantiam ; soli autem Deo competit vis infinita . Præterea nulla voluntas creata intelligitur hanc virtutem habere ut necessaria sit & essentialis connexio inter aliquam ejus volitionem & existentiam entis ipsi extrinseci , quod antea neque est ratione sui , neque ratione subjecti . Unde SS. PP. contra Arianos probant verbum non esse creaturam , ex eo quod cuncta per ipsum fuerint creata .

Constat etiam mundum fuisse a Deo libere creatum ; illius enim summa perfectio a mundo creato non penderet , alioquin non esset summa perfectio ; ergo illum non necessitate naturæ , sed libere omnino condidit , seu creavit quia voluit . Iisdem rationibus probatur Deum
non

non fuisse necessario determinatum ad hunc potius quam alium mundum creandum; quamvis enim summa sapientia semper facere teneatur quod sibi melius est, si quid melius esse posset sapientiæ infinitæ, non tenetur tamen facere quod creaturis melius est; igitur, ut observat Hugo a S. Victore: *Magnum est discrimen inter id quod est respectu Dei melius, & id quod est tantum melius respectu creaturarum; melius est creaturis esse quam non esse, esse perfectiores quam minus perfectas, sed velate ad Deum hæc duo sunt unum & idem, ipsi melius non est si creaturæ existant quam si non existant; nec ipsi melius est si plures vel pauciores perfectiones habeant, quia perfectio divina nullo modo a creaturis pendet. Sed de his jam fuse disputavimus in capite præcedenti.*

IV. Dogma de mundi creatione nihil omnino conjunctum est cum quæstione Scholastica de æternitatis notione. Disputant scholastici *utrum æternitas sit successiva*, seu ex partibus perpetuo fluentibus & sibi invicem succedentibus composita; an vero sit *duratio simplex* quæ præteritum & futurum necessario excludat. Primam opinionem acriter tuentur Scotistæ, alteram vero Thomistæ. Suam opinionem colligare nituntur Scotistæ cum dogmate de mundi creatione. Etenim, inquiunt, si æternitas sit *instans indivisibile* & præterita futuraque complectatur, jam nullum assignari poterit in tota æternitate temporis punctum in quo creaturæ non extiterint. Præterea decretum de mundo creando nulli determinato temporis puncto respondere potest; cum igitur actus divinæ voluntatis mundi creationem decernentis nullum principium habere potuerit, ita etiam nec creatio mundi initium potuit habere.

Thomistæ hoc alio modo ratiocinantur . Si æternitas foret successiva , infinita contineret tempora ; sed infinita temporum successio exhauriri numquam potest ; ac proinde ad præsens usque tempus pervenire fuisset impossibile ; exhausta enim foret infinita temporis successio , quod repugnat . Præterea æternitas , inquit , est perfectio Deo essentialis ; at perfectio essentialis Deo successiva esse non potest ; Deus eam totam , & semper habere debet . Tandem perfectio illa , vel consisteret in partibus singulis , vel in successionibus omnibus simul sumptis . Primum dici non potest ; cum enim partes singulæ perpetuo fluant , atque præsentis sint , præteritæ & futuræ , perfectio essentialis perpetuis mutationibus foret obnoxia . Neque perfectio illa in omnibus partibus successivis simul sumptis consistere potest ; Deus enim per totam æternitatem essentiali perfectione destitutus foret , quandoquidem partes illas singulas simul continere non potest . Ita argumentantur subtilissimi hinc & inde Philosophi ; at certissimum est creationis dogma cum subtilitatibus illis Metaphysicis nequaquam conjunctum esse . Nos autem ab illis disputationibus alieni æternitatem definimus existentiam , quæ nec initium , nec finem habere potest ; æternitatis naturam mentibus creatis assequi , & comprehendere datum non est .

Hic tamen , data occasione , non abs re erit explicare , quid de temporis natura conjectentur recentiores quidam celebres Metaphysici . Rem ita explicant . Si ad continuam entium sibi invicem succedentium A , B , C , D , &c. successionem attendamus , & existentiam ipsius A , distinguamus ab existentia ipsius B , existentiam ipsius B , ab existentia ipsius C &c. quatenus tali ordine se invicem consequuntur , ut

A sit

A sit primum, B, secundum, C, tertium &c. notionem temporis formamus. Itaque tempus definiunt *ordinem successivorum in serie continua*, ac proinde tempus non dari ajunt, nisi *existentibus successivis in continua serie*, ideoque partes temporis *actuales* nullas admittunt, nisi quæ per rerum existentias actu designantur. In hac hypothese tempus se habet ad res successivas sicuti numerus ad res numeratas; numerus enim est earumdem unitatum multitudo; per unitates autem designantur entia, quorum unum quodque unum est. Numerus igitur differt a rebus numeratis, non tamen datur nisi rebus existentibus. Ita etiam tempus diversum est a rebus successivis, illis tamen sublati tollitur. Itaque antequam existerent res successivæ, intelligimus quidem tempus possibile, quatenus possibilem rerum successivarum existentiam nobis repræsentamus; nullum vero extitisset tempus actuale. Quare tempus illud actuale, quod ante Mundi creationem fingimus, imaginationis foetum esse dicunt.

Igitur affirmant ex idearum nostrarum successione nos tempus cognoscere. Perpetuo fluxu in nobis percipimus multiplicem idearum successione. Dum ideas illas mentis acie intuemur, cognoscimus nos existere, ac per eas novimus existere multas res alias extra nos positas. Intimo sensu experimur intervallum temporis inter ideas disjunctas, non secus ac oculis intuemur intervallum locale inter bina extrema hexapedæ. Illud temporis intervallum æstimamus potissimum ex idearum intermediarum multitudine. Ubi abrumpitur hæc idearum successio, vel potius ubi deest idearum intermediarum *intuitio*, tunc intermedium illud tempus instar puncti habetur. Id autem plurimis de causis contingere potest; vel cessare possunt ideæ

in.

intermediæ , ut in profundiori somno fieri putant nonnulli, vel ipsæ ideæ nimis debiles sunt & languidæ , ut in somno graviore, vel e contrario nimis sunt vividæ , & totam occupant mentem, ut in profundissima meditatione ; atque his tempus brevius apparet . Contra vero iis, qui calamitatibus conflictantur, vel qui rei molestæ inviti dant operam, mens ab ideæ objecto avertitur, & ad alia objecta convertitur, iisque dies apparent longiores . Præter hanc temporis mensuram, quæ ex idearum successionem oritur, aliam quoque considerant mensuram *sensibilem*, quam ex corporum motu desumunt . Verum hæc mensura ad idearum successionem referri etiam potest . Etenim motus ideam nobis comparamus per reflexionem in ideas successivas, quas corpus motum in mente excitat, dum in variis locis successive existit . Et quidem dum horologii indicem conspiciamus, illius non percipimus motum . Index in eodem loco remanere nobis videtur, & dum longa idearum series in mente fluit, partes spatii, quod corpora describunt, distinguere non possumus . At si mobile tanta celeritate rapiatur, ut nullam habeamus idearum successionem, interea dum ex uno loco in alium transfertur, dicimus in *instanti* spatium percursum fuisse .

In illa hypothesi quæ ad Thomistarum opinionem facile revocari potest, statim solvitur vulgaris Scotistarum objectio ; æternitas enim tempori prorsus *heterogenea* est, nec cum ullo tempore comparabilis . Sed quidquid sit de variis Metaphysicorum hypothesibus, difficultas omnis evanescit, si æternitatem accurate definiamus *existentiam quæ initio & fine caret* . Scholastici vulgo definiunt æternitatem, *Durationem interminabilem, indivisibilem, & independentem*, quæ quidem definitio nostræ consona est.

est. Verum ut tollatur omnis ambiguitas, nullusque relinquatur hypothefibus locus, pro *duratione* vocabulum *existentiæ* substituiamus. Cum hac nostra definitione apprime consentiunt, quæ scribit S. Augustinus lib. 11. Confess. cap. 13. quæstionem jam tempore suo vulgatam: *quid faceret Deus antequam orbem conderet*: ridet S. Doctor his verbis: *Si autem ante calum & terram nullum erat tempus, cur quæritur quid tunc faciebatur? Non enim erat tunc, ubi non erat tempus, nec tu tempore tempora præcedis, alioquin non omnia tempora præcederes. videant itaque nullum tempus esse posse sine creatura tua, & desinant istam vanitatem loqui*. Ex his sancti Augustini verbis colligitur etiam responsio ad quæstionem aliam: *utrum Mundus citius creari potuerit*: hac quæstio nullum omnino habet sensum, si realem temporis notionem consideremus; at nullam patitur difficultatem, si temporis possibilis notionem attendamus.

V. Quæ Deus omnipotenti voluntate sua creavit eadem conservat. Quemadmodum autem *productio* est id, per quod causa dat effectui *existere*, ita *conservatio* est id, per quod causa dat effectui *perseverare*. Duplex autem distinguí potest conservationis species, *directa* scilicet & *indirecta*. Directa est continua productio rei per actionem positivam; indirecta nihil aliud intelligitur, quam *remotio* eorum, quæ rem destruere possunt; ita dum quis accensæ lucernæ flammulam contra ventorum vim, quæ extingueretur, manu protegit. Alia itidem distinguí potest species conservationis, quæ *negativa* dicitur, & est mera non destructio rei, quæ tamen destrui posset.

His positis quæritur, quo genere conservationis indigeant creaturæ, & reipsa conserventur a Deo. De hac re duplex est Philosophorum

rum

rum sententia, licet ceteroquin omnes creaturas a Deo conservari consentiant. Alii volunt semel creatis rerum naturis datam esse stabilitatem, ut suæ naturæ vi esse pergant, nisi a Deo destruantur. Substantiæ omnes secundum hos Philosophos vi a Deo solo accepta necessario sunt, nisi ab ipso Deo in nihilum redigantur; quæcumque mutationes ex naturæ legibus iis convenient, eæ dumtaxat sunt *accidentales*. Alii conservationem esse veluti perpetuam quamdam creationem contendunt adeo ut quemadmodum, Deo volente, vi hujus voluntatis res extiterunt, ita ejusdem voluntatis perseverantis efficacia esse pergant. Sunt etiam alii, qui non voluntatem solam Dei existentiae & durationis rerum causam agnoscunt; sed præterea *influxum* quemdam Dei in creaturas esse affirmant, cujus vi conservantur. In re tam abstrusa hæ omnes sententiæ suas habent difficultates, quibus non ita facile & accurate satisficit. Qui Deum volunt stabilitatem substantiis indidisse, non possunt affirmare substantiarum naturam sibi perspectam esse, atque in ea stabilitatem, quam dicunt se deprehendisse, ideoque meram conjecturam in medium proferunt. Si ad influxum confugas, rem neque comperitam ratione, neque ab ullo intelligendam profers, ideoque nihil quod accurate philosophantibus satisficiat dixisti. Superest ergo tertia sententia, qua generatim tantum affirmatur creaturas vi & efficacia voluntatis perseverantis Dei conservari, aut quodam modo continuo creari. Hæc sententia nunc communis, quamvis non videatur sola ratione demonstrata, pluribus tamen probari potest argumentis. Quare sit

CON.

CONCLUSIO.

CREATURÆ INDIGENT DIRECTA, ET POSITIVA DEI CONSERVATIONE; UNDE CONSERVATIO NIHIL VIDETUR ESSE ALIUD, QUAM CONTINUATA CREATIO.

Prob. 1. pars. Tam creatura indiget actione Dei positiva, ut perseveret existere, quam ut incipiat existere: atqui creatura indiget actione Dei positiva, ut incipiat existere; ergo. Minor per se patet. Prob. Maj. Creatura in primo instanti existens non magis est determinata, ut in secundo instanti existat, quam dum erat in nihilo, determinata fuit, ut inciperet existere; siquidem primum instans existentiz in creaturis non magis connexionem necessariam habet cum secundo instanti existentiz, quam nihilum cum ente. Si enim esset necessaria connexio inter primum, & secundum instans existentiz, illa connexio ex natura substantiz semel creatæ, aut ex necessaria voluntate Dei deduceretur, ac proinde repugnaret, ut substantia semel creata in nihilum Deo volente redigeretur, cum Deus non possit contradictoria facere. Absurdum vero est dicere eum qui omnibus existentiam libere dedit, eandem adimere pro arbitrio non posse. Ergo &c.

Prob. 2. pars quæ prioris non est, nisi *corollarium*. 1. Non minor vis requiritur, ut creatura perseveret, quam ut primum incipiat existere. Et quidem, ut ratiocinatur Cartesius, ex eo *præcise*, quod nunc existam, non sequitur me debere post horam existere, nisi existentia mihi continuo tribuatur ab eo, qui est ens per essentiam. Neque tamen putes singulis instantibus renovari actum divinæ voluntatis, quasi
Deus

Deus continuo diceret: *volo creaturam existere*: Sed est unicus idemque actus simplicissimus ab æterno productus quo Deus voluit rem existere, qui actus *positive* influit in singula momenta quibus existit creatura. 2. Si singulis instantibus Deus non produceret seu crearet omnes creaturas, eas non posset annihilare; Non annihilatio non videtur fieri posse nisi per actionem positivam aut per subtractionem actionis positivæ, id est, aut tribuendo nihilum, aut desinendo tribuere existentiam; atqui nihilum dari non potest, cum nulla sit positiva actio quæ ad nihilum terminetur. Ergo non nisi cessando ab actione qua existentiam tribuit, Deus annihilare potest res creatas, ergo singulis momentis omnibus existentiam tribuit, cum singulis momentis eas possit annihilare suam actionem subtrahendo 3. Entia non producuntur, nisi quia Deus vult ea producere, non pergunt esse nisi quandiu vult, Deus vult ea esse quandiu sunt; ergo Deus ea producere pergit quandiu sunt; nam cum velle ut quod non est incipiat esse, in Deo sit rem creare; ita etiam velle ut quod est pergat tandiu esse, est toto tempore in rei productione seu creatione perseverare.

Objic. Deus negative tantum creaturas conservat; ergo Prob. creatura semel existens debet perseverare, modo Deus nolit eam annihilare. Ergo Resp. N. ant. ut enim creatura semel existens perseveret existere, requiritur ut Deus velit positive eam in sua existentia perseverare, quia creatura non habet existentiam nisi dependentem & precariam quatenus ipsi datur a Deo. Unde si Deus cessat ipsi dare existentiam, eam ipsi necessario aufert. Et quidem creatura, ut diximus, non potest annihilari per actionem positivam; superest ergo

go ut Deus creaturam annihilaret *negative*, destruendo scilicet ipsi dare existentiam.

Inst. 1. Opus artefactum remanet sine altera actione positiva artificis. Ergo a pari... Resp. N. Conf. Disparitas est quod opus artefactum non habeat ab artifice suum esse *simpliciter*, sed tantum suum esse *modaliter*, seu tale esse, hoc est, partium dispositionem & situm; nam partes totius artefacti secundum entitatem prius existerant quam ab artifice disponentur, nec ab artificis voluntate pendeant ut existerent. Unde singulæ ejus partes quæ habent existentiam suam a Deo & jugiter conservatam, remanent in eodem situ in quo ab artifice posita sunt, donec causa aliqua alia hunc ordinem destruat. Contra vero substantiæ ipsæ creatæ cum a solo Deo acceperint suum esse simpliciter, indigent eadem Dei actione qua ipsis conservet existentiam semel datam.

Inst. 2. Quod semel habuit esse, non potest desinere esse. Et quidem corpus semel positum in motu perseverat in motu, quamvis cessaverit actio causæ motricis. Ergo a pari res posita in existentia debet in ea permanere, licet cessare intelligatur actio causæ a qua producta est.... Resp. Dist. Ant. Non potest desinere esse *per se*. C. Ant. per *cessationem influxus* ejus causæ a qua habuit esse. N. Ant. Equidem quod existit, existentiam semel acceptam adimere sibi non potest, sed existentiam potest amittere & statim reipsa amittit, si causa productrix, Deus scilicet, desinat in illud influere. Ad probationem nego paritatem. Etenim per actionem productivam motus, Deus est determinatus ad conservandum corpus in illo statu donec a contrariis causis secundis determinetur ad idem corpus conservandum in alio statu. At sicut ab aliis causis Deus non est determinatus ad dandam

dam primam rebus existentiam, ita ad eam conservandam non potest determinari nisi a se ipso. Quare ut conserventur, tam necesse est Deum velle existentiam illarum rerum pro secundo & tertio instanti, quam necesse fuit ipsum velle earum existentiam ut primo inciperent existere.

Inst. 3. Statuere potuit Deus ut mundus creatus permaneret sine ulla actione positiva. Ergo. Resp. N. Ant. Deus enim non potuit velle ut creatura non esset necessario dependens; atqui nisi creaturam, mundum V.G. conservaret positive, creatura non esset necessario dependens; posset enim concipi permanere independentem a Dei existentia, & supposito per impossibile, Deum non existere, conciperetur tamen creatura permanere; ergo non esset necessario dependens nisi positive conservaretur.

Objic. Contra secundam partem. Creatio & conservatio habent definitiones diversas, ergo non sunt eadem actio. Resp. Dist. Ant. creatio & conservatio habent definitiones diversas *relative* ad diversa tempora quæ connotant; C. Ant. *præcise* ut sunt actiones ad existentiam creaturarum terminatæ, N. ant. & conseq. Creatio & conservatio directa ut terminantur ad existentiam creaturarum, definiuntur voluntatis divinæ actus dans existentiam creaturis. At si spectentur diversa tempora quibus creaturarum existentia respondet, creatio pertinet ad primum instans quo creatura existit, conservatio autem ad sequentia.

Inst. 1. Creatio unico instanti perficitur, conservatio autem pertinet ad sequentia instantia duratque per successionem temporis; Ergo creatio & conservatio directa non sunt eadem actio... Resp. Dist. ant. Creatio spectata ut dans primam existentiam creaturæ unico instanti perficitur,

tur, C. Ant. spectata ut actio quæ conservat creaturis existentiam jam datam, N. Ant. & conseq. Creatio generatim est actio dans existentiam creaturæ sive in primo sive in altero instanti; creatio quatenus dans existentiam creaturæ in primo instanti perficitur unico instante, quatenus vero dans existentiam in secundo & sequentibus non perficitur temporis puncto; itaque conservatio quamvis diu multumque dureret, dici potest creatio.

Inst. 2. Absurde diceretur Deum nunc creare mundum; ergo creatio differt a conservatione.... Resp. Dist. Ant. absurde diceretur *juxta usum loquendi* C. Ant. *proprie & philosophice* loquendo N. Ant. & cons. usus loquendi obtinuit ut actio qua Deus dat existentiam creaturis, vocaretur creatio quando refertur ad primam existentiam, & conservatio appellaretur, quando spectatur in ordine ad perseverantem existentiam, licet utraque actio sit ejusdem generis seu potius eadem operatio.

A R T I C U L U S II.

De Deo primo motore.

I. **C**reaturæ pendent a Deo non tantum ut sint & esse perseverent, sed etiam ut operentur, atque in hoc consistit perfectum Dei in creaturas dominium, ut ipsa demonstrat idea entis infinite perfecti. Quapropter certum est & extra controversiam positum, actus creaturarum etiam liberos pendere a Deo. Quomodo autem explicanda sit illa dependentia actuum liberorum a Deo, disputant Philosophi. Ut quæstionis status clare exponatur, præmittendæ sunt definitiones aliquæ. *Præmotio* seu *prædeterminatio* generatim est prævius quidam actus unius rei
vel

vel causæ in aliam quo hæc ad actum determinatur. Præmotio seu prædeterminato relate ad voluntatem est motio prævia & antecedens voluntatis actum, qua motione voluntas ad aliquid agendum impellitur. Præmotio duplex distinguitur, alia *moralis*, *physica* alia. Præmotio moralis est invitatio quædam, adhortatio, suasio vel quælibet altera impulsio ad aliquid agendum, sed quæ consistere potest cum negatione actus. Physica præmotio est prævia & antecedens impulsio ad aliquid faciendum, talis ex natura sua ut non possit consistere cum negatione actus ad quem impellit. *Concursus* in genere est *cooperatio* unius causæ cum altera secundum hujus exigentiam & indigentiam. Itaque concursus Dei cum creatura definitur cooperatio Dei cum creatura agente pro exigentia & indigentia creaturæ quæ ope & auxilio Dei destituta non valeret per se sola agere. Rursus concursus Dei duplex distinguitur, *mediatus* & *immediatus*. Mediatu est actio Dei conservantis potentiam agentem; dicitur mediatu, quia Deus producus & conservans immediate potentiam agentem, mediante eadem potentia eundem effectum producit, ac proinde non afficit actum nisi mediate. Concursus immediatus est actio Dei ipsum actum creaturæ cum creatura producentis; immediatus dicitur quia cadit immediate in actum ipsum ita ut effectus sit a Deo & a creatura simul agentibus; unde etiam dicitur *simultaneus*.

II. Aliqui volunt omnes & singulos actus creaturæ liberos etiam ordinis naturalis sive bonos sive malos pendere a Deo tum per singularem præmotionem, tum per concursum simultaneum. Volunt alii actus liberos in ordine naturali pendere tantum a Deo per concursum simultaneum. Nonnulli cum Durando solum Dei

con-

concursum mediatum ad actus liberos quoslibet creaturarum admittunt, voluntque Deum non aliter ad eos concurrere quam creando & conservando vim activam creaturis libere concessam, ita ut ista vi activa semel donatæ creaturæ non indigeant ulteriori actione Dei quæ eorum effectus immediate attingat. Hæc opinio si ad actus naturales restringatur, quamvis rationi humanæ satis consona videatur & a multis difficultatibus facile libera, paucos tamen habuit sectatores. Alii enim numero frequentiores & Philosophi & Theologi volunt specialem esse Dei actionem quæ immediate attingat effectus creaturarum, & concursum immediatum qualem superius explicavimus admittunt. Hic autem sermonem habemus duntaxat de actibus liberis in ordine naturali ad quos edendos sufficit naturalis facultas nobis in creatione data, ut ad scribendum, deambulandum &c. Quod autem spectat actus supernaturales ad quos producendos auxilium supernaturale necessarium est, quales sunt actus charitatis, fidei &c. de his actibus quæstio ad Theologiam pertinet.

III. Conscientiæ testimonio cuique comper-
tum est, se naturali & necessario pondere incli-
nari ad amandum bonum in genere seu felici-
tatem, & *indeliberatis motibus* seu *primo pri-
mis* ferri ad quæcumque objecta singularia quæ
præferunt aliquam bonitatem & velut imagi-
nem quandam beatitudinis. Talis inclinatio &
impulsio necessaria est vera præmotio physica
qua Deus impellit voluntatem; cum enim vo-
luntas creata huiusmodi inclinationem natura-
lem in se ipsa sentiat nec eam pro arbitrio pro-
ducat, necesse est ut hanc ipsi Deus impresserit
continuoque conservet. In hac præmotione phy-
sica naturali quæ non differt a voluntate ipsa,
nihil est quod minimam officiat humanæ liber-

tati ; quemadmodum enim voluntas necessario & motibus indeliberatis fertur ad quæcumque objecta singularia quæ ipsi exhibentur ut bona, ita potest iis motibus indeliberatis dare vel denegare consensum, & ex duobus bonis singularibus propositis hoc vel illud eligere, qui quidem posterior actus liber est. His præmissis, præsens quæstio tota in eo versatur an Deus physice specialiter prædeterminet voluntatem creatam ad actus liberos naturales per quos voluntas eligit hoc vel illud bonum, per quos consentit vel dissentit impulsioneibus ad bonum aliquod singulare. Sed cum hæc materia abstrusissima sola ratione discuti non possit, utriusque sententiæ præcipua argumenta referemus, & deinde concursum immediatum adjuncta conclusione ostendemus.

**AFFERUNTUR RATIONES QUIBUS PROBATUR
PRÆMOTIO PHYSICA AD ACTUS LIBEROS
NATURALES.**

Primum argumentum. In actibus liberis qui vires naturæ non superant, voluntas creata est indifferens ad agendum vel non agendum. Ergo seipsam determinare non potest nisi a Deo physice præmoveatur ; Nam mens non potest sese determinare nisi agat ; sese determinare agere est ; ergo si seipsam sola sine præmotione physica determinet, requiritur adhuc alia prædeterminatio qua se determinet seu qua agat tali modo. Circa hanc secundam determinationem quæ vera est actio libera, eadem est difficultas, & sic deinceps in infinitum. Ergo necesse est ut prima voluntatis determinatio a Deo sit.

Respondent non dari in mente humana determinationes determinationum in infinitum, mentem gaudere potentia sese determinandi vere activa, quæ semetipsam determinat sine alia determinatione prævia quæ eam efficeret mere passivam.

passivam . Itaque 1. ad bonum generatim tendimus necessario . 2. Intellectui obijciuntur bona singularia , quæ cum non sint summum bonum necessario non determinat . 3. Consideratis illis bonis mens ad ea prosequenda , vel committenda semetipsam active determinat , cujus determinationis vera causa est ipsa mentis actio . Si valeret argumentum propositum , in systemate præmotionis physicæ urgeri eodem modo posset ; nam cum sese *determinare* sit revera agere , necesse foret , ut mens ageret ad sese determinandum , atque ita requireretur secunda determinatio , & secunda præmotio physica , & sic deinceps in infinitum .

Secundum argumentum . 1. Voluntatis determinatio est aliquid positivum , aliquid reale , aliqua perfectio , cum sit actio ; illa perfectio non erat in mente antequam produceretur ; atqui mens humana novam perfectionem in se producere non potest , nisi eam Deus producat . Ergo &c. Maj. evidens est . Prob. Min. Nemo potest dare , quod non habet , nec proinde plus quam habet , ergo ens creatum non potest sibi dare perfectionem quam non habet , nec suas ullo modo perfectiones augere , ergo mens humana novam perfectionem in se producere non potest , ac proinde nec primam determinationem , nisi eam Deus producat ; alioqui necessum foret ut perfectionem illam e nihilo mens educeret .

Respondent maximum esse discrimen inter substantiæ creationem e nihilo , & modi alicujus in subjecto jam præexistente generationem , facultatem activam sese varia ratione modificandi menti humanæ a Deo esse concessam , ita ut possit mens novam modificationem , quam antea non habebat , in se producere ; illæ enim mentis modificationes in potentia activa quo-

Jacq. T. II.

L

darn-

dammodo continentur, cum nulla esse possit activa potentia, nisi sit vera potentia agendi, ac proinde actiones ante non existentes formaliter producendi. Unde, inquiunt, si argumentum probaret, jam foret concedendum mentem nulla ratione proprie agere posse, cum omnis actio in mente a Deo necessario fieret, mens ergo esset mere passiva non libera, quod absurdum est; imo sentimus & ipsi mentem nostram a nobis modificari, ipsi volumus, voluntatis imperum cohibemus prout videtur, ipsi etiam conscii sumus, eaque conscientia cogitatio est, seu mentis modificatio & perfectio, quæ plane nostra est. Neque hoc quidquam divinæ gloriæ detrahit; quod enim modificationes nostras procreemus per beneficium creationis a Deo non a nobis habemus, cum præsertim Deus modorum productionem, quæ a creaturis fit, & noverit, & impedire, ut ei videtur, possit.

Tertium argumentum. Oportet creaturas, quam maxime a Deo pendere, non modo pro creationis & conservacionis ratione, sed etiam in ipsis operationibus liberis, quod solent Metaphysici ita efferre: causas secundas pendere a prima *in fieri, in esse, atque in operari*: Deus enim summum dominium habet in creaturarum voluntates, potestque eas flectere & inclinare quocumque voluerit, estque earum primus motor, atqui hoc summa creaturarum in suis actionibus liberis dependentia, sine prædeterminatione physica intelligi & esse nequit. Ergo &c. Maj. constat. Prob. Min. Summa non est dependentia, qua major esse potest. At vero creatura ad actus singulares physice non prædeterminata minus a Deo pendet, quam ea, quæ prædeterminata foret, ergo &c. Præterea quomodo Deus voluntates creatas, quocumque vult fle-

flecteret, atque earum etiam liberrimas actiones certissime prævideret, nisi eas ipse ad agendum physice præmoveret? nam sine præmotione physica actiones liberæ minime fixæ erunt, sed contingentes omnino respectu Dei, nihilque erit quo certo præcognosci queant.

Respondent 1. Sine prædeterminatione physica perfectissime intelligi causam secundam libere pendere a Deo, tum in fieri, & in esse per creationem & conservationem: tum in operari per concursus. 2. Seclusa præmotione physica Deum intelligi primum humanæ voluntatis motorem, quatenus illam præmoveret, ac prædeterminat, tum ad bonum in genere per innatum felicitatis amorem, tum ad objecta singularia, quæcumque ab intellectu bona repræsentantur per motus *primo primos*... 3. Actionem liberam etiam ut libera est pendere a Deo, quatenus creatura libere agens non habet vim bene agendi nisi a Deo, nec potest illam exercere, nisi dependenter ab ipso... 4. Admitti quidem debere maximam creaturæ a Deo dependentiam, sed ita ut illæsa remaneat libertas; dependentia autem, quæ oritur ex præmotione physica tolli ajunt vim omnem agendi; omnemque essentiam actus liberi... 5. Deum sine præmotione physica posse flectere voluntatem humanam quocumque voluerit, & omnes actus liberos certissime prævidere; ad id enim satis est, si Deus noverit quid creatura actura sit in tali, vel tali circumstantia, tali aut tali modo excitata; quo cognito potest Deus adhibere media, quorum auxilio voluntas factura est re ipsa & libere quod ipse vult. Addunt præterea præmotionis physicæ patronos vocibus obscuris sibi & aliis persæpe fucum facere, quærendumque ab ipsis, quid sit pendere a Deo? Si hac voce significetur creaturis nullam inesse per se ope-

randi facultatem, sed Deum proprie loquendo esse facultatem activam creaturarum, hoc ipsum est, quod quaeritur, meraque est petitio principii. Sin autem pendere in operando significet Deum posse vim operandi creaturae detrahere, impedire, & dirigere prout vult, quod quidem nemo negaverit qui Deum agnosceret, jam allatum in argumento axioma non probat Deum per physicam praemotionem actionum creaturarum proprie auctorem esse. Et certe, inquit, ut summam Dei in omnia sua opera potestatem agnoscamus, non videtur necesse ipsi ea tribui, quae a creaturis fiunt; sed tantum, quemadmodum quidquid habent creaturae id a Deo acceperunt, id etiam Deo volente posse amittere, nec suis facultatibus inscio, aut invito Deo posse ullo modo uti. Hoc posito satis a prima causa pendere intelliguntur, neque ulla ratione divinae potentiae subtrahuntur. Igitur speciosus ille creaturarum a Deo dependentiae praetextus, quo probare nituntur Thomistae, omnia a Deo solo active & proprie fieri, plane, inquit, inanis est. Praeterea tantum abest, subjiciunt Thomistarum adversarii, ut haec praemotionis physicae opinio divinam gloriam extollat, quemadmodum ejus fautores jactare solent, quin potius divinis perfectionibus aliquid detrahat. Dum enim ita deprimuntur opera divina, ut machinam perpetuo movendam imitari videantur, divinae gloriae non satis consultum esse ajunt. Ecquis enim horologium, quod fune circumducto velateris sui, aut ponderis horas sine alio subsidio demonstrat, ei non anteponat, quod idem non praestaret, nisi quis perpetuo indicem digito moveret?

Quartum argumentum. Deus conservat omnes creaturas creatione continuata, ut diximus, ergo Deus omnes creaturas in omnibus suis

fuis actibus physice prædeterminat , ac præmōvet . . . Prob. Conf. 1. Deus per conservationem continuo creat animam , ac proinde singulis momentis eam totam cum omnibus suis actibus , ac determinationibus creat , ergo Deus mentes humanas , omnesque substantias physice præmōvet . . . 2. Deus omnes actus , ac determinationes mentis nostræ conservat , sed conservatio non est nisi continuata creatio , ergo Deus creat omnes nostras actiones , atque determinationes non solum eo tempore quo sunt , sed eo primo instanti quo incipiunt esse . Ergo Deus præmōvet physice ; nam physice præmovere est nostras determinationes physice operari & creare .

Respondent 1. hoc argumentum esse *ad hominem* , & nihil probare adversus eos , qui conservationem dicunt non esse cum creatione proprie dicta confundendam . . . 2. Nihil etiam probare adversus eos , qui fatentur quidem conservationem esse continuatam creationem , sed substantiæ tantum , & facultatum ipsius naturalium , eam vero non immediate ad actus ipsos a substantia productos extendi debere . . . 3. Posito quod Deus conserveat , non solum potentiam agendi , verum & actus ipsos , ac proinde quod immediate concurrat cum creaturis , ipsosque actus creatione producat , inde tamen non probatur præmotio physica , quia creatio illa actuum seu concursus non est prævius , sed simultaneus & concomitans ; at prædeterminatio seu præmotio , ut nomen ipsum præfert , debet esse prævia . Ergo . . . Verum hæc ultima responsio , nullo modo videtur argumento proposito satisfacere ; nam ut valide instant Thomistæ , posito quod Deus immediate creet actus quoscunque creaturarum , seu quod idem est , immediate cum iis concurrat , certe nihil est in iis actibus , quod non sit a Deo productum ,

ac creatum . Si autem in iis nihil est a Deo non creatum , omnis creaturæ in operando determinatio , atque actio est effectus Dei agentis ac creantis ; ergo actio divina est prævia , saltem ea ratione , quæ sufficit ad omnem vim præmotionis physicæ stabiliendam ; nihil enim aliud potest præmotio physica facere , quam omnem creaturæ determinationem & actionem creare . Præterea , inquiunt Thomistæ 1. ut concurrat Deus ad hanc actionem , necesse est ut sese determinet , vel ut determinetur ad concurrendum potius , quam non concurrendum . 2. Id quod Deum ad concurrendum determinat , debet sumi ex parte creaturæ ; alioquin Deus per seipsum solum non determinatus a creaturis , eas determinaret ac præmoveret . 3. Quod in creaturis est indeterminatum , non potest Deum ad concurrendum potius , quam ad non concurrendum determinare ; nihilum enim nihil potest producere . 4. Voluntas sine concursu absolute est sine actione , & sine determinatione , quod fateri debent concursus immediati patroni , cum juxta eos sine concursu nulla possit esse actio , aut determinatio ; ergo concursus non est concomitans , ac simultaneus tantum , sed prævius ; & quidem non a creaturis indeterminatis , sed a semetipso ad concurrendum seu ad creandam actionem determinatur Deus ; nihil est in creaturis , quod Deum determinare possit ; non facultas , quæ est indeterminata ante concursum , cum non possit determinari sine concursu ; non actio ipsa , quæ ante concursum nulla esse potest .

PROPONUNTUR RATIONES , QUIBUS IMPUGNATUR PRÆMOTIO PHYSICA AD ACTUS LIBEROS NATURALES .

Pri-

Primum argumentum. Præmotio physica hos
 habet characteres inseparabiles. 1. Antecedit om-
 nem actum voluntatis. 2. Datur ex solo Dei
 beneplacito. 3. Est omnino necessaria ad omnes
 prorsus actus tam bonos quam malos. 4. Talem
 habet connexionem cum actu ad quem datur ut
 prædeterminatio ad actum & non actus sint duo
 impossibilia. 5. Connexionis illius infallibilitas
 non repetitur ab aliquo extrinseco, sed ab ipsa
 prædeterminationis natura, quatenus per se a-
 ctum infert & de se est essentialiter conjuncta
 cum actu. De his characteribus consentiunt phy-
 sicæ prædeterminationis assertores, atqui Deus
 non sic prædeterminat voluntates creatas ad a-
 ctus liberos ordinis naturalis; nam talis præde-
 terminatio repugnat libertati; quod ita pro-
 bant. Illud repugnat libertati quod, si adest,
 assert necessitatem agendi antecedentem; si non
 adest, assert impossibilitatem agendi anteceden-
 tem, atqui talis est prædeterminatio physica de
 qua agitur. Ergo &c.... 1. Si adest, assert ne-
 cessitatem agendi antecedentem; quod enim an-
 tecedit omnem voluntatis actum & quo posito
 voluntas non potest non agere, assert necessita-
 tem agendi antecedentem, atqui prædetermina-
 tio physica talis est; si quidem habet intrinse-
 cam & essentialem connexionem cum actu ad
 quem datur, ut patet ex ipsis characteribus mox
 allatis. Ergo cum adest, præmotio physica as-
 fert necessitatem agendi antecedentem.... 2.
 Cum abest, assert impossibilitatem agendi an-
 tecedentem; nam illud, cum abest, assert agen-
 di impossibilitatem antecedentem quod a volun-
 tate est prorsus independens & sine quo volun-
 tas absolute non potest agere, atqui prædeter-
 minatio physica talis est ut patet ex 2. & 3.
 illius caractere. Ergo cum abest, assert impos-
 sibilitatem agendi antecedentem, idque eo ma-

gis repugnat quod in actibus liberis & naturalibus Deus nobis facultatem vere activam concesserit actuum suorum dominam, ita ut revera eos possit ponere vel non ponere ad libitum.

Respondent Thomistæ ad rationem libertatis non requiri facultatem agendi vel non agendi in sensu composito, sed tantum in sensu diviso, quam facultatem non tollit præmotio physica. Itaque, inquiunt, ut homo sub præmotione physica liber sit, minime necesse est eum posse in sensu composito non agere eodem tempore quo agit, quemadmodum ut libere sedeat, non requiritur eum posse simul stare & sedere, sed sufficit ut sub præmotione physica semper conservet potentiam non agendi in sensu diviso, quemadmodum dum sedet habet potentiam standi in sensu diviso. Revera impossibile est ut homo per physicam præmotionem ad agendum determinatus, non sit determinatus in sensu composito; præmotio enim physica actum ipsum & ipsam determinationem ponit, unde repugnat ut determinatio ponatur simul & non sit; sed tamen remanet semper potentia non agendi in sensu diviso.

Verum hæc responsio futilis & merum effugium videtur Thomistarum adversariis. Nam, inquiunt, quid aliud hæc responsio clare significare potest nisi hominem sub præmotione physica non posse revera agere, vel tantum ei remanere potentiam ad non agendum si tollatur præmotio, quemadmodum homo vinculis constrictus habet potentiam currendi posito quod ei eximantur vincula. An vero dices hominem constrictum vinculis quibus se expedire nequit in sensu composito, quamvis id possit in sensu diviso, liberum esse ad currendum, quia vincula illum non privant pedibus & vi naturali currendi? In eodem sensu nec ipsa gratia necessi-

tans a Calvino admissa tolleretur libertatem; tum enim vere diceretur voluntatem posse abstinere ab actu in sensu diviso gratiæ necessitantis; ergo cum in sensu composito præmotioni physiciæ repugnet hominem non agere, nulla remanet libertas. Quoad paritatem hominis sedentis necessario in sensu composito eam negant, quod in homine sedente necessitas sedendi sit tantum consequens, quia subsequitur liberam voluntatis determinationem, & oritur ab ipso voluntatis & libertatis exercitio; contra vero necessitas agendi respectu voluntatis quæ physice prædeterminatur, foret necessitas antecedens utpote quæ oriretur ex principio antecedente. Præterea homo qui sedet potest surgere, nec est necessario determinatus ad sedendum per aliquod principium necessario præmovens ad sedendum; unde potest priorem determinationem liberam mutare pro lubitu; at homo physice prædeterminatus ad agendum, hanc prædeterminationem non potest amovere, cum ab ipso non pendeat; quia sicut illius præsentia ita & absentia est independens a voluntate. Ergo ea præmotio libertatem prorsus destruit.

Reponunt Thomistæ indifferentiam positivam remanere posse cum determinatione actuali etiam antecedenti, quemadmodum homo sapiens est actu & antecederet determinatus ad vitam suam conservandam, & tamen in se sentit potentiam sese præcipitem agendi, quam certe repugnat ad actum reduci in sensu composito, seu quamdiu mente sanus erit. Quemadmodum ergo homo sapiens est antecederet determinatus ad vitam conservandam, ita ut certissimum sit fore ut semetipsum volens atque lubens non occidat, & tamen liber est ad semetipsum occidendum; sic etiam licet homo sub prædeterminatione physica sit ad agendum an-

recedenter determinatus, fruitur semper libertate ad non agendum.

Sed Thomistarum adversarii contendunt in homine sano & sapiente nullam esse libertatem ad seipsum occidendum, licet homo ille possit deinceps insanire & semetipsum occidere; nam homo non est liber ad prosequendum malum qua malum, sed mors sine ullo emolumento, sine ulla ratione respectu hominis sapientis est malum qua malum; ergo homo sapiens non est liber ad semetipsum occidendum.

Secundum argumentum. Prædeterminatio physica facit Deum auctorem peccati & proinde hominem meriti atque demeriti incapacem; nam ille est auctor peccati qui creaturam indifferenter decreto antecedenti, efficaci & ineluctabili physice applicat ad peccatum, atqui per physicam præmotionem Deus hoc faceret, ut patet ex characteribus illius; antecedit enim actum voluntatis, habet infallibilem cum actu ad quem datur connexionem, & ad omnes actus sive bonos, sive malos necessaria est. Igitur præmotio physica facit Deum auctorem peccati ac proinde rejici debet tamquam injuriosa sanctitati divinæ. Et quidem prædeterminatio physica tam facit Deum auctorem peccati, quam auctorem boni operis; nam juxta Thomistas, ideo Deus est auctor boni operis, quia ad ipsum prædeterminat motione antecedente & ex natura sua efficaci, atqui pariter prædeterminat ad malum opus per similem motionem antecedentem & ex natura sua efficacem. Ergo &c.

Neque dicant Deum prædeterminare tantum ad physicum & materiale peccati, non vero ad moralitatem seu ad formale peccati; cum enim detur a Deo præmotio physica ex propria determinatione & independenter a creatura, positaque præmotione non possit non poni tum physicum,
tum

tum morale peccati, sequitur Deum prædeterminando physice creaturam esse proprie auctorem peccati tum quoad physicum, tum quoad morale, quod in actu singulari necessario conjunctum est cum physico. Tandem homo qui peccat privatus fuit præmotione ad non peccandum necessaria, imo habuit præmotionem necessario conjunctam cum actu peccati, ergo non poterat non peccare. Quomodo igitur homo peccati reus esse potest qui fecit id ad quod erat a Deo prædeterminatus, & non fecit bonum quod non poterat facere sine præmotione quam non habuit, & quæ ab ipso non pendeat?

Respondent Thomistæ 1. has difficultates obijci non posse ab iis qui concursum immediatum Dei in omnibus creaturarum actibus exigunt; quemadmodum enim Deus concurrit ad materiale peccati, licet non concurrit ad formale, ita etiam potest præmovere ad actum peccati quatenus præcise est entitas physica seu actio physica & realis, & tamen non prædeterminare ad formale seu malitiam illius actionis; non enim, inquiunt, magis dividitur vel distinguitur formale peccati a materiali in concursu immediato, qui vera est actus productio quam in præmotione physica quæ etiam nihil aliud est quam actus physici productio; nam producere actum concursu aut prædeterminatione sunt unum & idem diversis nominibus expressum.

Respondent 2. in quolibet systemate duo esse necessario distinguenda *physicum* scilicet & *morale* actus. Physicum est ipsamet entitas actionis præcise sumpta, seu actus spectatus præcise secundum suam substantiam; morale est conformitas vel diffinitas actionis cum lege. Actio mala quoad morale, seu sumpta secundum

dum difformitatem quam habet cum lege, peccatum est. Eadem actio quoad physicum seu sumpta secundum suam entitatem *præcise*, non est peccatum. Difformitas illa cum lege non est realitas aliqua positiva, sed privatio realitatis seu perfectionis; Deus autem non potest esse causa efficiens privationis seu non entis, nec etiam causa est efficiens mali; hoc in Deum cadere non potest, sed in voluntatem creaturæ quæ deficit a recto. Ergo cum Deus per physicam præmotionem non possit nisi aliquid physicum & reale producere, non nihil, quia actio physica Dei effectum realem habere debet, non privationem, necessario sequitur creaturam non vero Deum deficere in actu peccati, seu morale peccati ad creaturam prorsus pertinere; quemadmodum enim si quis calamo male aptato ad scribendum utatur, calamum non determinat ad vitium scripturæ, sed vitium istud a solo calamo proficiscitur, ita Deus præmovendo creaturam ad materiale peccati minime influit in defectum seu malitiam actus, sed ille defectus in solam creaturam est refundendus.

Verum contra hanc Thomistarum responsionem gravissimæ opponuntur difficultates quarum præcipua est morale peccati esse necessario cum physico conjunctum; licet enim abstractione distinguantur, non sequitur ea esse divisa, aut actionem singularem ita posse divisim patrari ut Deus partem ejus, alteram creatura faciat; nulla est actio in genere, omnes sunt singulares & eo ipso momento quo fiunt, versus certum objectum feruntur. Cum ergo hæc duo physicum & morale sint necessario connexa cum actione singulari, qui unius est causa dici debet causa alterius.

Respondent 3. ad hoc quod additum est homi-

minem sub præmotione physica peccati reum
 esse non posse, hanc difficultatem gravissimam
 quidem sed omni systemati communem esse,
 tum in hypothese concursus immediati, tum in
 hypothese præmotionis physicae. Præterea, in-
 quiunt, quemadmodum fide constat hominem
 revera mereri præmium supernaturale, etiamsi
 jure nequeat in se & de se gloriari, sed totus
 a Deo pendeat in bono; ita etiam meretur pœ-
 nam etiamsi ad physicum peccati præmoveatur,
 quia ipse præsertim vera est causa defectus actio-
 nis suæ, non Deus. Nam homo meretur propter
 malitiam peccati, malitia peccati in privatione
 & defectu posita est, privationis & defectus pri-
 ma causa est ipsamet humana voluntas, non
 Deus, ergo solus homo meretur pœnam &
 peccati reus est, non Deus. Tandem ad rei ip-
 sius incomprehensibilitatem recurrunt, nec e-
 nim possumus iusfirma ratione nostra iustitiam
 Dei clare ac perfecte intelligere, etiamsi evi-
 dentissime demonstrata sit. *Hæc cogita & noli
 judicem Deum iudicibus hominibus comparare,
 quem non dubitandum est esse iustum, etiam
 quando facit quod videtur hominibus iniustum
 & quod homo, si faceret, esset iniustus*: Ex
 August. lib. 3. contra Julian.

Thomistarum adversarii fatentur quidem hu-
 iusmodi responsionem optimam esse in materia
 revelata aut accurate demonstrata, qualis est
 iustitia Dei; sed ubi materia nec est myste-
 rium revelatum, nec veritas probe demonstra-
 ta, responsionem illam prorsus invalidam esse
 ajunt. Utrum autem physica præmotio reve-
 lata sit, aut saltem ex fide necessario deducta,
 Philosophorum non est judicare.

C O N C L U S I O.

DEUS CONCURRIT IMMEDIATE AD OMNES ET SINGULOS ACTUS LIBEROS CREATURARUM.

Prob. 1. Vulgari argumento. Omnes & singuli actus liberi creaturarum sunt a Deo immediate producente. Ergo &c. Prob. ant. omnes & singuli actus creaturarum pendent essentialiter a Deo quantum pendere possunt, salva libertate; atqui non penderent a Deo quantum pendere possunt salva libertate nisi essent a Deo immediate producente; effectus enim magis pendet a causa illum immediate producente quam a causa eum producente remote tantum & mediate.

Prob. 2. Creaturæ omnes indefinenter egent directâ Dei conservatione, ut jam probatum est; ideoque cum directâ Dei conservatio sit continuata creatio, seu actio qua Deus continuo dare pergit existentiam creaturæ, in quocumque statu illa reperiatur, creaturæ omnes illa Dei actione egent non solum quatenus possunt agere, sed etiam quatenus agunt; ac proinde actio Dei actionem creaturæ cum creatura per conservationem producit, atqui concursus Dei immediatum dicimus actionem Dei actum creaturæ cum creatura producentis: Deus igitur immediate concurrat ad singulas creaturarum actiones.

Objic. 1. Ex actionibus hominum quædam bonæ sunt, quædam malæ; atqui Deus concurrere non potest ad actiones malas, ergo non concurrat ad singulas hominum actiones

Prob. Min. Si Deus concurreret ad actiones malas, esset Auctor mali moralis & peccati, sed Deus non potest esse &c. Resp. C. M. D. M. Deus non potest concurrere ad actiones malas

tas in *specie* consideratas quatenus malæ sunt C. ad actiones malas in *genere* spectatas quatenus sunt actiones N. M. & conseq. sub eadem distinctione. E. G. Ponamus hominem injurias sibi illatas vindicaturum, velle necem inimici; quod velit a Deo est, nisi enim Deus actualitatem homini impertiretur & vim activam largiretur, fieri non posset ut vellet, propterea quod cessante actione divina qua homo actualitatem & vim activam adipiscitur, in nihilum recideret; verum quod hæc volitio dirigatur in necem inimici, id homini tribuendum, non Deo. Volitio itaque in genere spectata quatenus scilicet est quidam actus volendi pendet a divino concursu, sed quatenus ea dirigatur in necem inimici, ideoque specificè considerata quatenus mala est, a concursu divino non est. Sed hæc paulo fufius explicanda sunt.

Itaque actiones humanæ sive *internæ*, nimirum volitiones ac nolitiones animæ, sive *externæ* nempe motus corporis. volitionibus ac nolitionibus animæ respondentes, vel spectantur *physice* vel *moraliter*. *Actiones internæ physice spectatæ* sunt nolitiones ac volitiones quatenus sunt mutationes in anima contingentes, seu animæ modificationes. *Actiones internæ moraliter spectatæ* sunt eædem volitiones ac nolitiones animæ quatenus vel bonæ vel malæ sunt. Similiter *actiones externæ physice spectatæ* sunt motus volitionibus ac nolitionibus animæ respondentes quatenus sunt mutationes in corpore accidentales, seu corporis modificationes a nutu animæ pendentes. *Actiones externæ moraliter spectatæ* sunt iidem motus corporis, quatenus vel boni vel mali sunt. Ponamus V. G. Titium committere furtum auferendo clam merces Mævii. Actus externus consistit in extensione brachii ad merces alienas & in ceteris motibus or-

ganorum corporis ad eas auferendas requisitis. Enim vero Titius non extendit brachium, nisi volens, nec alii sequuntur motus in corpore, nisi ipso volente. Volitiones igitur quibus motus isti respondent & sine quibus non darentur in corpore, sunt actiones internæ; volitiones vero & motus simul constituunt integram actionem humanam quæ *furtum* dicitur. Porro extensio brachii & ceteri motus qui ad furtum adhibentur nonnisi physice spectantur, quatenus non considerantur nisi ut motus in corpore humano existentes. At si perpendis extensionem brachii fieri ad rem alienam, cæterisque organorum corporis motibus rem alienam auferri, actio externa furti moraliter spectatur. Similiter volitio a qua pendet extensio brachii, singulæque volitiones quibus determinantur motus organorum corporis in furto spectantur physice, si non considerentur nisi ut actus voluntatis animæ quibus aliquid appetitur. Eædem vero volitiones moraliter spectantur quatenus consideramus eas dirigi in ablationem rei alienæ & violationem juris quod alter in ipsam rem habet; neque enim volitio dicitur mala nisi quatenus brachium extendere volumus ad rem alienam eamque alteri auferre; extensio autem brachii in se spectata non est mala, nec quicquam vitii in se habent cæteri motus quibus alteri res sua aufertur.

His positis facile ostenditur Deum concurrere quidem ad id quod physicum est in actionibus malis, non vero ad id quod morale seu malum est; seu quod perinde est, Deum concurrere ad actum malum *materialiter* sive *physice* sumptum, minime vero ad actum peccati *formaliter* seu *moraliter* sumptum quatenus malum est, ideoque non esse mali moralis aut peccati Auctorem. Re quidem vera quod fur brachium
ad

ad rem alienam extendere velit, concurrui divi-
no tribuendum est; item quod brachium ad
nutum animæ extendere valeat divino concur-
sui acceptum quoque ferendum est. At quod
velit extendere brachium ad rem alienam au-
ferendam & ea intentione manum actu exten-
dat, id nonnisi hominis est libertate sua abu-
tentis. Extensio brachii & volitio hujus exten-
sionis sunt quid physicum & homini naturale;
quod vero hæc actio tendat ad auferendum al-
teri quod suum est, moralitatem habet, &
quidem malum est, ac proinde patet Deum con-
currere ad id quod physicum est in actione fu-
ris, non vero ad id quod morale est; nimi-
rum physicum actionis tantummodo indiget con-
cursu divino, non vero malum morale ejusdem.
Etenim Deo concurrente, fur quatenus animo
& corpore constans, & velle & brachium ad
nutum animæ movere potest; sed quatenus vult
rem alienam atque ad eam auferendam bra-
chium movet, id homini tribuendum libertate
sua abutenti.

Inst. 1. Deus non potest concurrere ad id quod
physicum est in actionibus malis, nisi concurrat
etiam ad id quod morale seu malum est. Ergo
&c. Prob. Ant. Physicum seu materiale a-
ctionis malæ conjunctum est cum morali seu for-
mali aut malitia ipsa actionis. Ergo &c.
Resp. N. Ant. Ad cujus probationem Dist. Ant.
malitia ipsa seu morale conjunctum est cum phy-
sico *a causa secunda deficiente* C. *a causa prima*
indefectibili N. Itaque defectus actionis moralis
a Deo creaturam tum in *esse simpliciter*, tum in
esse operantis conservante non est, sed a creatu-
ra quæ cum limitata sit, deficere potest & re-
vera aliquando deficit libertatis abusu.

Inst. 2. Qui concurrat ad physicum actionis
malæ ex quo videt sequi morale peccati, ille
est

est reus peccati, sed Deus concurrente ad physicum actionis malæ videt ex eo sequi morale peccati. Ergo &c. . . . Resp. Dist. Maj. Est reus peccati, si sit causa *particularis*, agens contra legem actionum suarum C. si sit causa *universalis*, agens juxta legem actionum suarum N. & concessa Min. Dist. similiter Conseq. Igitur causa particularis ut homo qui tenetur non cooperari alteri peccanti, reus esset peccati, si concurreret ad physicum actionis malæ ex quo videret sequi malum ipsum, quia tunc ageret contra legem actionum suarum; non peccat tamen si ex officio concurrat ad physicum peccati alterius; ita Sacerdos qui ex officio ministrat Sacram Eucharistiam homini publice petenti quem per confessionem novit indignum ad eam accedere; quia tunc tenetur ex officio ministrare, ideoque non agit contra legem actionum suarum, sed juxta eam. Deus vero est causa universalis rerum omnium quæ sine ipsius conservatione seu continuata creatione nec existere nec agere possunt, & hanc sibi legem sapientissime præscripsit ut creaturas suas conservando & cum illis concurrente, iisdem libertatis usum non adimeret. Quoniam igitur actiones malæ, si physice spectentur, secundum easdem leges nascuntur quibus fiunt non malæ, Deus autem concurrat tantum ad physicum actionis malæ, liquet eum non concurrere ad actiones malas nisi quatenus concurrat ad ordinis naturæ conservationem; sive eum ordinem quoad animam spectes, sive eundem quoad corpora & mundum aspectabilem consideres.

Inst. 3. Actio Dei concurrentis & actio creaturæ sunt una & eadem actio, ergo si Deus concurrat cum creatura, erit auctor peccati Resp. Dist. ant. Actio Dei & creaturæ est una & eadem actio ratione *termini* seu effectus producti

ducti physice sumpti C. ratione *principii* N. ant. & cons. Cum enim Deus & creatura sint causæ duæ agentes ac diversæ quarum altera priori subordinata est, actio Dei non est eadem cum actione creaturæ ratione principii, quamvis utraque actione idem effectus physice sumptus producat.

Inst. 4. Idem effectus non potest a duabus causis produci. Ergo nulla solutio . . . Resp. Dist. ant. Non potest totus produci a duabus causis ejusdem ordinis *transcat*. A duabus causis diversi ordinis & quarum una alteri subordinata est N. ant. & cons. Sic a pictore & penicillo simul producitur tota tabella.

Objic. 2. Agentia naturalia vim habent completam agendi, ergo non indigent concursu Dei saltem immediato, . . . Resp. dist. ant. vim habent completam agendi dependentem ab actione Dei C. independentem N. ant. & cons. Quia igitur creatura omnis indefinenter eget directâ Dei conservatione seu continuata creatione, tum quatenus vim habet agendi, tum quatenus agit, non mediato tantum sed immediato concursu Dei indiget. Voluntas autem ut pote libera vim habet agendi completam *intrinsece*; concursus enim ipsam vim agendi non afficit *intrinsece*, neque est quid *intrinsecum* ex parte creaturæ; at sine concursu vis illa agendi non est completa *extrinsece* quatenus concursus est auxilium extrinsecum necessario requisitum ut creaturæ facultas exerceatur.

Inst. 1. Deus est perfectissimus artifex, ergo potuit creaturas condere quæ non indigerent illo extrinseco auxilio ad operandum. Prob. cons. Perfectior ille artifex censetur qui potest formare artefacta, ut horologia & alia similia quorum motus sine assidua artificis manu perseverat. Ergo &c. Resp. N. cons. & dico disparitatem

tem

tem esse omnimodam; quippe horologium non pendet essentialiter ab artifice humano qui materiam operis sui jam existentem disponit tantummodo, nihilque aliud in illam inducit præter figuram & motum localem, recte & apposite adhibendo vires rerum naturalium. Unde si horologium assidua opificis actione indigeret ut moveretur, hoc quidem artificis incitiam argueret quod videlicet male opus suum conflasset, nec vires rerum naturalium applicare novisset, in quo sita est tota humani artificis perfectio & excellentia. Contra creatura summe & essentialiter pendet a Deo non solum quoad potentiam agendi, sed etiam quoad actus omnes. Quare exigentia perpetui influxus seu immediati concursus ad agendum summam in Deo perfectionem arguit, ut pote connotans summum & absolutum ipsius in creaturas dominium. Præterea proprium est machinæ V. G. horologio posse moveri sine perpetuo opificis influxu; aliter enim esset inutilis; nam opifex non potest semper & ubique concurrere cum suo opere, sed Deus id potest & quidem sine ullo labore & opera.

Inst. 2. Explicari non potest quid sit immediatus Dei concursus & quomodo Deus immediate producat actus liberos creaturæ, ergo talis concursus non debet admitti . . . Resp. N. ant. Deum enim concurrere immediate seu producere immediate actus liberos creaturæ est Deum velle immediate singulos actus liberos creaturæ; Siquidem Deus non agit ad extra nisi per actus suæ voluntatis ita ut Deum agere idem sit ac Deum velle ut aliquid fiat. Ergo bene explicatur quid sit concursus & quo pacto Deus immediate producat omnes & singulos actus liberos creaturarum. Enimvero Deus non potest creare & conservare potentiam liberam, nisi

nisi velit in genere omnes actus liberos ejusdem potentia; hoc enim exigit natura potentia; libera. Sic ergo statuit Deus per decretum generale; *Volo actum quemlibet ad quem sese determinatura est creatura*: actus ille voluntatis sic consideratus in genere & ut indeterminatus habendus est pro concursu generali & remoto atque in *actu primo*; cum autem creatura ex libera sua determinatione agit hoc vel illud, tunc actus divinae voluntatis de se generalis quasi applicatur ad hoc vel illud, fitque particularis ita ut Deus velit in particulari quidquid ex libera sua determinatione creatura vult in particulari, & est concursus in *actu secundo* immediatus & simultaneus; Simultaneus quidem, quia neque antecedit neque subsequitur actionem creaturae, sed ipsam indivisibiliter comitatur; Eo enim ipso instanti quo creatura vult aliquid, illud ipsum vult etiam Deus.

Inst. 3. Concursus iste non videtur differre a concursu mediato.... Ergo &c.... Resp. N. ant. Discrimen est inter utrumque; concursus enim mediatus habet pro termino immediato solam potentiam qua mediante tantum effectum producit Deus cum creatura; concursus vero qualis a nobis explicatur, habet pro termino immediato ipsam actionem seu operationem creaturae.

Inst. 4. Saltem concursus ille non est, nec dici potest simultaneus. Ergo &c.... Prob. Ant. determinatur a creatura, ergo non est simultaneus.... Resp. N. Conf. Non enim concursus Dei determinatur a creatura per actionem prae-
viam; nam determinatio illa creaturae est ipsius creaturae actio particularis quae indiget concursu; atqui actio illa creaturae particularis non antecedit actionem Dei concurrentis; Siquidem est volita simul & a creatura & a Deo ipso;
ergo

ergo determinatio creaturæ non antecedit, sed comitatur actionem Dei seu concursum. Ergo licet concursus determinetur a creatura, non idcirco subsequitur creaturæ determinationem. Cum igitur potentia agendi creaturæ concessa transit ad actum aliquem particularem, eodem instanti generalis Dei voluntas quæ terminatur ad potentiam liberam prout est libera, seu concursus in actu primo transit ad volitionem particularem talis numero actus, ac tunc ita determinatur & fit particularis, seu fit concursus in actu secundo per actionem creaturæ, ita ut illam non subsequatur sed comitetur.

Inst. 5. Actio determinans est prior actione determinata ad eundem effectum, sed determinatio creaturæ est actio determinans, & concursus in actu secundo est actio determinata. Ergo &c. . . . Resp. Dist. Maj. Actio determinans & independens est prior actione determinata C. Maj. actio determinans & dependens N. M. D. M. N. C. Actio igitur creaturæ determinans concursum, ipso tamen prior non est, quia pendet a concursu nec potest sine illo concipi, quamvis determinet concursum; neque enim creatura potest concipi agens, nisi Deus ipse concipiatur agens & operans cum creatura. Ergo actio creaturæ determinans non est prior actione Dei determinata. Id autem sequenti exemplo illustrari solet. Rex præficiat alicui provincię Proregem, & edicto suo decernat se omnia velle quæ Prorex iussurus & voliturus est pro rerum exigentia. Deinde Prorex dicat: *Statuo ut provinciæ hujus incolæ urbi novæ construendæ laborent.* En duæ voluntates quæ volunt novæ urbis constructionem; utra prior hunc numero effectum voluit? An Regis an Proregis? Sane neutra. 1. Non Regis quia Rex volebat per voluntatem generalem quidquid

quid a Prorege statuendum erat, nondum tamen hanc novæ urbis constructionem ante Proregis statutum. 2. Non Proregis; nam eo ipso instanti quo vult Prorex civitatem construi, eo ipso Rex id velle intelligitur. Idem, proportionem servata, dicendum est de voluntate generali Dei applicata & determinata per creaturam liberam ad actum aliquem singularem.

Inst. 6 Si actio creaturæ determinaret actionem Dei, actio Dei penderet ab actione creaturæ, falsum consequens, ergo & ant. Resp. Dist. Maj. penderet ab actione creaturæ agentis per virtutem acceptam a Deo & ipsi subordinatam C. Maj. agentis per virtutem independentem nec subordinatam N. Maj. Dist. Min. N. C. Etiam cum creatura per actionem suam determinat Dei concursum, Deus servat rationem causæ principalis & primæ, quatenus creatura non agit aut se determinat nisi per virtutem a Deo concessam.

Inst. 7. Si effectus idem produceretur simul a Deo & a creatura, actio Dei & creaturæ esset eadem, ac proinde alterutra causa foret inutilis. Ergo &c. Resp. Dist. ant. actio Dei & creaturæ esset eadem *terminative* sumpta C. Ant. *principiative* sumpta N. ant. & conf. Actio cujuslibet agentis spectari potest, vel ratione principii & dicitur actio principiative sumpta, vel ratione termini seu effectus & dicitur actio *terminative* sumpta. Re quidem vera actio Dei concurrentis & creaturæ agentis est eadem actio *terminative* sumpta, quia est unus & idem terminus seu effectus productus tum per causam primam & universalem, tum per causam secundam & particularem. At non est eadem actio Dei & creaturæ principiative sumpta, quia sunt duæ causæ agentes & producentes eundem effectum, voluntas scilicet divina & crea-

creata. Neque inutilis est causa alterutra; non quidem actio creaturæ, quia sine illa Deus ipse effectum non produceret; neque etiam actio Dei, quia sine Deo cooperante & producente effectum creatura non posset producere.

ARTICULUS III.

*De Deo rerum omnium & creaturarum
gubernatore.*

DEus res omnes gubernare sive rebus omnibus providere dicitur, quatenus eas conservat atque ad earumdem actiones concurrat, omnesque ad suos fines dirigit. Igitur providentia divina est decretum Dei de conservatione rerum omnium, de concursu ad earumdem actiones & de omnium directione ad suos fines.

CONCLUSIO.

**DEUS PROVIDET REBUS OMNIBUS QUÆ SUNT
AC FIUNT IN UNIVERSO.**

Prob. Nulla creatura seipsam conservare potest, sed omnis a Deo conservetur necesse est. Similiter nulla datur creaturæ cujuscunque actio ad quam Deus non concurrat & quam ad suos fines non dirigat, ut antea demonstravimus; cum ergo Deus dicatur rebus providere quatenus eas conservat, ad earumdem actiones concurrat illasque ad finem dirigit, manifestum est Deum providere omnibus quæ sunt ac fiunt in universo. Quia vero Deus omnia ab æterno præscivit & in tempore facit quod ab æterno decrevit, certissimum est Deum ab æterno decrevisse rerum omnium in hoc universo conservatio-

vatio.

vationem, divinumque concursum ad quascumque actiones atque singularum rerum & actionum finem. Cum igitur decretum Dei de conservatione rerum omnium in hoc universo, divinoque concursu ad quascumque earundem actiones & de omnium rerum atque actionum directione ad finem, sit ipsa providentia divina, patet dari providentiam divinam.

Et certe argumenta omnia quæ probant Deum existere, demonstrant quoque mundum universum divinæ providentiæ regi & gubernari. Hinc præclare observavit Cicero lib. 1. de natura Deorum: *Quis hunc hominem dixerit qui cum sano certis celi motus, tam ratos astrorum ordines, tamque omnia inter se connexa & apta videret, neget in illis ullam esse rationem? . . . quæ quanto consilio geruntur, nullo consilio assequi possumus.*

Objic. Si Deus omnibus providet, nihil casu fortuito contingit, falsum conf. Ergo & ant. . . . Resp. Dist. conseq. Maj. nihil casu fortuito contingit ex parte Dei C. ex parte creaturarum N. Maj. quare Nego conf. & explico quid sit casus, quid fortuna & quomodo nullus sit casus nullaque fortuna respectu Dei. *Casus purus* dicitur *actualitas* sive existentia destituta ratione sufficiente; ut cum Athei fingunt homines olim ex terra instar fungorum prodisse. Cum enim neque in terra neque in homine detur aliquid per quod talis ortus intelligi possit, istiusmodi ortus foret casus purus.

Casus simpliciter dictus est concursus causarum ad effectum quemdam producendum, quæ causæ singulæ alterius effectus gratia agunt. E. G. Ponamus ædificium dirui & intra murum reperiri gemmas pretiosas, gemmæ dicuntur casu repertæ. Etenim eas intra murum condidit Dominus non eo fine ut ædificium diruens eas

Jacq. T. II.

M

repe-

reperiret; nec qui ædificium diruit id eo fine facit ut gemmas reperiat. Itaque ad hunc effectum concurrunt, tum qui gemmas intra murum conclusit ut eas certius asservaret, tum qui murum diruit ut ædificium novum extrueret, sed uterque agit propter effectum alium quam qui ex illo concursu prodiit. Similiter si ventus ex tecto deiecit tegulam quæ hominis prætereuntis caput vulnerat, ad vulnus capiti inflictum concurrunt & ventus & causæ tegulam disponentes ut impellenti vento facile cedat, & tegulæ gravitas & homo ædes præteriens. Hæ vero causæ non agunt capiti vulneris infligendi causa, & ideo vulnus hoc casui tribuitur.

Fortuna est concursus causarum minime prævisus ad effectum homini vel bonum vel malum producendum. Dicitur *fortuna secunda* quando effectus inde pendens iudicatur nobis bonus; contra autem *adversa fortuna* vocatur, quando effectus inde pendens nobis malus censetur. Ita inventio gemmarum in muro diruto tribuitur fortunæ secundæ; at vulnus capiti inflictum tegula e tecto cadente refertur ad fortunam adversam. His positis definitionibus facile ostenditur nullum esse casum, nullamque fortunam ex parte Dei, sed tantum ex parte causarum secundarum & hominum. Nam cum Deus ab æterno præciverit omnes omnium causarum effectus, seu quidquid in hac rerum serie contingit, & hoc universum gubernans omnia dirigat ad certum finem, dubium non est quin omnes effectus a nobis minime prævisos ab æterno præsciat & ad certum finem dirigat. Quamvis igitur causæ, si eas in se spectes, aliquando casu fortuito agere videantur, agunt tamen propter finem a Deo intentum. Nullus igitur casus, nulla fortuna est respectu Dei,

Dei, sed tantum respectu causarum secundarum, & omnia quæ casu & fortuna contingere dicuntur, providentiæ Dei decernentis vel permittentis & ad finem bonum dirigentis subijciuntur. Non defuerunt tamen veteres Scriptores qui universum naturæ ordinem a Deo constitutum *fati* nomine appellarunt. Verum hanc appellationem excusat S. August. lib. 5. de Civ. Dei cap. 8. *Qui omnium connexionem feriemque causarum quæ fit omne quod fit, fati nomine appellant, non multum cum eis de verbi controversia laborandum atque certandum est, quandoquidem ipsum causarum ordinem & quandam connexionem Dei summi tribuunt voluntati & potestati, qui optime & veracissime creditur & cuncta scire antequam fiant & nihil inordinatum relinquere.* Quæ quidem Sancti Doctoris verba probe perpendenda sunt; apprime enim congruunt cum iis quæ de causarum connexionem illarumque ad finem ultimum relatione demonstravimus.

Inst. 1. Si Deus omnibus provideret, cum sit optimus & omnipotens, non sineret tot mala physica & moralia in mundo contingere, aut saltem impiorum prosperitatem & iustorum afflictionem atque oppressionem non permetteret. Ergo &c. . . . Resp. hanc difficultatem fuisse explicatam fuisse atque dissipatam ubi de sapientia & bonitate Dei sermonem habuimus; ostendimus enim malorum tum physicorum, tum moralium originem, & quare Deus optimus & omnipotens simulque sapientissimus ea permittat. Quod autem spectat impiorum felicitatem & iustorum afflictionem in hac vita, inde tantummodo probatur alteram esse vitam in qua impii punientur, iusti remunerabuntur, & illi divinæ justitiæ, hi divinæ misericordiæ manifestandæ inserviunt. Præterea per malos

boni exercentur, purgantur, erudiuntur: *omnis enim malus aut ideo vivit ut corrigatur, aut ut bonus per eum exerceatur*: inquit S. Augustinus in Psalm. 54. Eandem responsionem fusius explicat S. Doct. lib. 1. de Civ. Dei cap. 6. *patientia Dei, inquit, ad pœnitentiam invitat malos; sicut flagellum Dei ad pœnitentiam erudit bonos. Item misericordia Dei fovendos amplectitur bonos; sicut severitas Dei puniendos corripit malos; placuit quippe divine providentiæ præparare in posterum bona justis quibus non fruuntur iniusti, & mala impiis quibus non excruciantur boni. Ista vero temporalia bona & mala utrisque voluit esse communia; ut nec bona cupidius appetantur quæ malo quoque habere cernuntur, nec mala surpiter evitentur quibus & boni plerumque afficiuntur; nam si nunc omne peccatum manifesta plecteretur pœna; nihil ultimo iudicio servari putaretur. Rursus si nullum peccatum minime punisset aperte Divinitas, nulla esse providentia divina videretur. Tandem neminem tam justus est qui non aliquando delinquat; inde temporalis punitio; nemo tam malus est qui aliquod bonum morale interdum non operetur; inde fluxa & temporalis felicitas; boni hic pœnis exercentur ut munden- tur & cælo maturescant; mali hic falsa sæpe felicitate gaudent, quia post mortem acerbius torquendi. Cæterum Divinæ providentiæ leges expendere humanæ non est sapientiæ. Hinc præclare ait S. Augustinus lib. de vera Relig. cap. 22. *Non multum iis qui nausea & vertigine laborant, dissimiles sumus, qui omnia sursum deorsumque verti putant, cum ipsi ver- rantur. Idem enim his de quibus loquimur ac- cidit; Neque enim Deum se sapientiores esse putant.**

Inst. 2. Providentia rebus omnibus re-essita-
tem

tem imponit ; quæ enim Deus præordinavit , non possunt non fieri ; alioqui providentia divina effectui suo frustrari posset . Præterea res omnes ita disposuit divina providentia ut effectus omnes ex causis antecedentibus pendeant . Ita apud Ciceronem lib. de fato argumentatur Chrysippus : *Si omnia antecedentibus causis fiant , omnia naturali colligatione contexte conserteque fiunt ; quod si ita est , omnia necessitas efficit ; id si verum est , nihil est in nostra potestate .*

Ergo &c. Resp. N. ant. & singulas probationis partes explicamus . Cum providentia nihil aliud sit quam rerum omnium conservatio & divinus ad creaturarum omnium actiones concursus singularumque actionum directio ad ultimum finem ; manifestum est ex singulis huius definitionis partibus quas antea specialibus quæstionibus seorsim tractavimus , nihil omnino lædi humanam libertatem . Et quidem probe distingui debent causæ liberæ & causæ necessariæ ; quamvis autem res omnes causasque singulas divina providentia disposuerit , causas tamen singulas secundum propriam earum naturam ordinavit ; quæ sunt necessariæ ad unum , sunt necessario determinatæ ; quæ vero sunt liberæ , eas salva libertate divina providentiæ gubernat . Hoc idem argumentum solvit S. Augustinus lib. 15. de civ. Dei cap. 9. *Ordinem causarum non negamus ; Non est autem consequens ut si certus est ordo causarum , ideo nihil sit in nostræ voluntatis arbitrio ; ipse quippe voluntates in causarum ordine sunt .* Et quidem causas liberas , salva libertate , colligari inter se posse exemplo illustrari potest : Pater filium bonæ docilisque indolis paterno affectu minatur , hortatur ; Patris comminationes , hortationes , voluntatis determinationem in filio liberaliter instituto producent infallibiliter .

non tamen necessario, ideoque causæ liberæ in aliam causam liberam influxus erit quidem infallibilis, minime tamen necessarius. Neque etiam causæ physicæ in causam liberam influxus libertatem tollit; Etenim in mundo materiali contingunt effectus physici ex quibus nascuntur in causis liberis sensationes, ex sensationibus actiones; sed actiones illæ licet infallibiliter contingant, minime tamen necessario fiunt. Itaque patet hanc objectionem divinæ præscientiæ & providentiæ esse communem, ac proinde & communem responsionem; accurate distinguenda est *futuritionis* infallibilitas ab ipsa necessitate.

Inst. 2. Absurdum est *ad hoc Dei deducere maiestatem ut scias per singula momenta quot nascuntur culices, quotve moriantur*; ut loquitur S. Hieron & *numquid de bobus cura est Deo?* ait Apostolus. Ergo saltem providentia divina ad ea quæ abjecta & vilia sunt, sese non extendit.... Resp. Dist. ant. rerum aut minutarum, aut quas abjectas censemus, cognitio & cura Deo tribuenda non est cum *successione & anxietate* C. cum *immutabilitate & tranquillitate* N ant. & conseq. Nulla est igitur in divina cognitione successio, & nulla in Dei providentia anxietas, sed ab æterno Deus omnia immutabiliter cognovit, & vi æterni decreti rebus omnibus providet etiam quæ vilissimæ censentur. Hinc Christus Dominus discipulos suos persuasos facturum quod Deus eorum curam summam gerat; a minori ad majus ita argumentatur: *Nonne duo passeres asse videntur; & unus ex illis non cadet super terram sine patre vestro? vestri autem capilli capitis omnes numerati sunt. Nolite ergo timere, multis passeribus meliores estis vos.* Christo igitur docente rerum quantumvis vilium, quales sunt passeres & capilli, tantam curam gerit Deus ut nihil indem acci-

accidere possit nisi ipso volente. Et certe quæ nostro iudicio abjecta, vilia & contemnenda censentur, talia non sunt iudicio Dei; Nam pretium decernimus rebus ex usu quem eas habere iudicamus, & ideo vilia & abjecta nobis videntur quæ nullum aut exiguum usum præbere præsertim nobis existimamus. At Deus videt omnem usum sive proximum sive remotum quem unumquodque ens in hac universa rerum serie habet, & idcirco de usu rerum iudicat in relatione ad totum universum; nos autem in usu rerum immediato acquiescimus, imo sæpissime ne hunc quidem attingimus, ac proinde exigui usus ea æstimamus quorum usus immediatus non est magni momenti, & nullius usus ea reputamus quorum nullum percipere valemus, atque hinc abjecta & vilia illa iudicamus, aliter prorsus iudicaturi si nobis daretur integrum rerum nexum intuitivè pervestigare; sic in machinis sunt partes quædam exiguæ quarum usum non percipit mechanicæ imperitus, quasque proinde abjectis iudicat & salva machina abesse posse sibi fingit; Sed longe aliter sentit machinæ auctor cui operis sui adest idea distincta, qua partium illarum usus omnes mutuamque relationem percipit.

Præterea licet creaturæ omnes divinæ subiaceant providentiæ, erga homines tantien quos Deus tot & tantis cumulavit beneficiis, longe illustrius elucet divina providentia. Allatum S. Hieronymi textum, ita explicat ipse S. Doctor in cap. 1. Habacuch: *Non sumus tam fatui adulatores Dei ut dum potentiam ejus etiam ad ima detrahimus, in nos ipsos injuriosi simus, eandem rationabilium quam irrationabilium providentiam esse dicentes.*

Inst. 3. Si eventus omnes in universa rerum

serie per divinam providentiam constituti sint, vana omnino esset humana providentia privataque sollicitudo. Inutiliter omnino vota precesque supremo numini funderentur, mutua hominum consilia atque hortamenta prorsus forent superflua, frustra omnino conderentur leges, inutilisque foret omnis cura vitæ & valetudinis, atque induceretur *fatum Mahumetanum* ita appellatum quod Turcæ præsertimque milites huic *fatalitatis* principio suam vivendi rationem conformare soleant. Tandem providentia divina quæ in causarum omnium atque effectuum perpetuo nexu consistit, miracula de medio tolleret; hunc enim nexum miracula abrumpunt; Atqui hæc consecraria repugnant omnino; Ergo repugnat divina providentia saltem qualis a nobis definita est.

Resp. N. Maj. Et ad singulas probationis partes facilis est responsio. Etenim preces, vota, consilia, hortamenta non frustra sunt, nec inutiliter constituuntur leges; Hæc enim omnia in universa rerum serie divinæque providentiæ ordine continentur. Et quidem licet determinata sit universa rerum series, hanc tamen determinationem ignoramus, eamque cum actionum nostrarum serie conjunctam esse cognoscimus. Quare evidens est nos revera agere debere non secus ac si nihil esset determinatum. Itaque dum in sacris paginis præcipitur abjiciendam esse rerum temporalium curam, ita intelligendum est præceptum illud ut non simus de rebus vanis & caducis solliciti, sed de rebus non perituris quæ ad Deum spectant animæque salutis profunt; nam istas nimis curare non possumus, illas non possumus fere nisi nimis curare; quare scriptum est: *querite primum regnum Dei & justitiam ejus, & hæc omnia adjicientur vobis.* Absurdum omnino est

est *factum Mahometanum*, & nemo sana mente præditus non ridet Turcas illos, qui loca contagiosa despiciunt, & quasi laceſſunt perſuaſi ſe morituros in loco minime contagioſo, ſi Deus ipſos mori hoc tempore decreverit. Eodem divinæ providentiæ abuſu ſtulte peccant illi, qui referente Tournefortio in itinere Orientali, arbores in hortis incultas ſibi permittunt, atque negligunt. Itaque in divinæ providentiæ ordine continetur, ut eam adhibeamus diligentiam, quam prudentia, rectaque ratio dictant; & deinde in providentia divina conquieſcere debemus, atque animo tranquillo ferenda, ſi quæ nobis eveniant mala.

Quod ultimam ſpectat objectionis partem miracula ſcilicet, res paulo fuſius explicanda eſt. Miraculum definitur *effectus aliquis ſingularis, cujus ratio in univerſali cauſarum naturalium ſerie non continetur*. Ita dum ſanctus Petrus Act. 3. Homini claudis ſolis verbis, ſoloque imperio gremium reſtituit, ita ut exiliens ſtatim ambulaverit, factum illud in univerſa motuum naturalium ſerie non continetur; neque enim verba, quæ protulit S. Petrus, ullam in pedum articulatione inutationem producere potuerunt. Probe obſervanda eſt hæc miraculi notio, ex qua patet impiſſimam eſſe miraculi definitionem, quæ proferitur a Spinoſa in execrando opere, cui titulus eſt: *Tractatus Theologico-Politicus*: Miraculum definit Spinoſa effectum aliquem, cujus cauſam naturalem explicare non poſſumus, ita ut miracula in opinione dumtaxat, meraque ignorantia poſita ſint. Spinoſæ definitionem amplexus eſt Lokius in diſſertatione de miraculis, ubi miraculum definit ſenſibilem quandam operationem, quæ cum captum ſpectatoris tranſcendat, ab eo pro divina habetur. Naturæ leges neceſſarias omnino eſſe, &

inmutabiles affirmant Auctores illi, ac proinde omnia negant miracula. At ex nostra definitione patet dari veri nominis miracula. Et certe quis unquam somnare poterit aquam vasi infusam iussu alterius per aliquam naturalem motuum legem in vinum transmutari posse, & nostræ ignorantiz tribuendum, quidquid portenti invenimus in miraculo Christi de aqua in vinum conversa? Qui maximo miraculo Mundum creavit, perpetuoque miraculo conservat atque gubernat, is leges naturæ quarum ipse Auctor est, pro sua liberrima, & omnipotentissima voluntate immutare potest atque suspendere. Neque hæc legum generalium perturbatio divinæ providentiæ repugnat, quin imo, specialem erga homines providentiam, summamque clementiam demonstrat, atque manifestat. Sunt enim miracula luculentissimum religionis testimonium. Et quidem cum miracula in causarum naturalium serie non contineantur, omnem naturæ vim excedunt, ac proinde solus Deus, miracula patrare potest, ipse miraculorum omnium causa est primaria, creaturæ autem sunt dumtaxat causæ *instrumentales*, atque *occasionales*. Porro repugnat a Deo summe veraci, & bono patrari miracula ad erroris confirmationem hominumque perniciem. Sunt ergo miracula evidentissimum credibilitatis motivum, divinamque providentiam magis, ac magis confirmant. Si autem Deus a gentilibus, improbisque viris prodigia patrari aliquando permiserit, ad maiorem erroris confirmationem veritatisque confirmationem id factum est. Ita Magi Ægyptii aliqua Moysis miracula imitati sunt; at cum ad quartum perventum esset prodigium, hic imbecilla, atque desperata stetit Magorum ars & exclamare coacti sunt: *dignus Deus est hic*. Hanc doctrinam

fu.

fulius explicare nostri non est instituti ; ob-
servare satis erit ex miraculis , legumque gene-
ralium perturbatione nullam in Deo argui pos-
se mutabilitatem ; Deus enim opera , nec con-
silia mutat , cum omnia decreverit ab æterno .
Dum autem diximus miracula in causarum na-
turalium serie non contineri , id in eo sensu
intelligendum non est , quasi miracula ipsam
rerum essentiam violarent , ut ait Spinoza . Ef-
fectus corporum naturales dicimus , qui per i-
psam partium nexum earumque qualitates , &
regulas motus explicari possunt . Contraria ra-
tione effectus supernaturalis appellatur , qui per
mutuum partium nexum , earumque qualitates
& leges motus explicari non potest . Itaque
patet miracula corporum essentiae non repugna-
re , atque essentiarum immutabilitate perpe-
ram abusum fuisse Spinosam , ut miraculorum
possibilitatem labefactaret . Et quidem si per
immutabilem rerum ordinem intelligantur ve-
ritates æternæ nulli mutationi obnoxie , si in-
telligantur ipsæ rerum essentiae omnino invaria-
biles , jam ordinis miraculorumque notio per-
vertitur . Et certe Deus facere non potest ut
spiritus , quamdiu spiritus manet , non sit in-
telligentia præditus , ut corpus , quamdiu cor-
pus manet , non sit a spiritu distinctum . At
quod sol in certa a tellure distantia constitua-
tur , quod certa periodo terram illustret , quod
præscriptus corporum cælestium ordo , jubente
Deo , suspendatur atque turbetur , quod corpus
aliquod moveatur vel quiescat , quod homo in-
firmus sit vel sanus , mortuus an vivus , tales
effectus ad rerum essentiam non pertinent .

Neque rerum essentiae contraria sunt miracu-
la , quæ ex S. Scriptura assert Spinoza . Quod
ignis vim comburendi amisit , & juvenes hæ-
breos in fornace intactos reliquerit , quod cor-

pus nullum gravitatis signum demonstret, ita cum Christus Dominus super aquas ambulavit; hæc & alia similia immutabiles rerum essentias minime perturbant. Etenim Deus temperare, vel sistere omnino potuit ignearum particularum motum, quicumque sit, in quo consistit ignis actio. Sub pedibus hominis aquam, vel aerem indurare potuit Deus omnipotens. Quamvis autem divina hæc prodigia essentiarum immutabilitati non sint contraria, universali tamen rerum ordini contraria sunt, & vera sunt miracula. Patet ergo Spinosam miraculorum, essentiarumque notionem omnem pervertisse, & falso divinæ immutabilitatis prætextu in divinam Omnipotentiam injurium fuisse. Quæ autem de miraculorum notione tradidimus, apprimè conveniunt cum doctrinæ sancti Augustini lib. 6. de Genesi ad litt. cap. 13. *Nec enim ista cum sunt contra naturam, fiunt nisi nobis, quibus aliter nature cursus innotuit, non autem Deo, cui hoc est natura quod fecerit.*

ARTICULUS IV.

De Deo Domino, & ab hominibus colendo.

L DEO competit dominium in omnes creaturas, estque proinde earum Dominus. Etenim Deus hunc Mundum aspectabilem, omnesque creaturas ex nihilo liberrime produxit, & ita conservat, ut cessante actione divina in nihilum reciderent omnia. Igitur Deus pleno in omnes creaturas dominio fruitur, ac proinde de toto universo, & de omnibus creaturis, potest pro suo arbitrio disponere, cum nihil insit creaturis, quod non habeant a Deo; disponere igitur potest de liberis hominum actionibus. Itaque voluntas Dei debet esse homini loco propriæ

voluntatis; atque hinc patet, quid sit *abnegatio* propriæ voluntatis; scilicet propositum firmum, nil quicquam volendi aut agendi, nisi quod sit Divinæ voluntati conforme.

II. Deus vult ut homo actiones suas liberas ad sui, aliorumque hominum perfectionem dirigat. Cum enim Deus sit summe bonus erga homines, ita ut nulla major bonitas concipi possit, bonus vero erga alios ad aliorum perfectionem promovendam pronus sit, fieri non potest ut Deus non velit hominem actiones suas liberas ad sui, aliorumque hominum perfectionem dirigere; id ergo Deus vult. Hinc ut homo voluntati Divinæ conformiter agat, non non sufficit ut suam promoveat perfectionem, sed requiritur quoque ut pro virili aliorum hominum perfectioni inserviat, nec quicquam faciat, quod ad aliorum imperfectionem quomodocumque tendat, & ideo non vult Deus ut homo bonum suum promoveat cum malo alterius. Itaque ex jure Dei in creaturas fluit hæc hominis obligatio, nempe ut suas actiones liberas ad gloriæ divinæ, divinorumque attributorum manifestationem, hoc est, ad sui aliorumque hominum perfectionem dirigat; atque ex eodem jure fluit amor Dei, amor sui ipsius, hoc est, propriæ perfectionis, & amor proximi. Præterea cum amor sui ipsius, & amor proximi fluant ex Dei dominio, ex infinita Dei perfectione, illiusque bonitate infinite summa, patet Deum super omnia amandum esse, nosque ipsos & alios propter Deum esse diligendos.

III. Jure domini Deo competit *justitia vindicativa*; nam justitia vindicativa dicitur, qua poenæ decernuntur & irrogantur, male facientibus, seu divinam voluntatem violantibus. Poena autem est malum physicum ab eo, qui alterum obligandi jus habet, immissum ob ali-
quod

quod malum morale . Igitur ex supremo Dei dominio fluit iustitia vindicativa . Itaque timerendus est Deus, sed timore *filiali* ; nempe iustitia Dei vindicativa non debet influere in determinationem voluntatis , nisi quatenus ex ea colligitur hanc esse Dei voluntatem ut hoc faciamus , illud omittamus . Et quidem cum Deus super omnia amandus sit , timor quem Deo debemus , est timor filialis ; nempe sollicite cavendum est , ne aliquid faciamus quod Deus fieri non vult , nec omittamus quod vult fieri . Timori filiali opponitur timor *servilis* , si nempe pœnz metu quis adactus aliquid fecerit ; timor servilis non est officium erga Deum , sed medium cohibendi voluntatem malam , ac proinde utilis est & bonus . Hæc sunt fecundissima Theologiæ naturalis principia ex quibus derivari possunt prima legis naturalis præcepta . At particulares casus , & horum principiorum usum , fufius explicare ad Ethicam pertinet .

IV. Cultum tum internum , tum externum domini jure Deo deberi manifeste patet . Cum enim Deus in liberas hominum actiones , tum internas , tum externas plenum habeat dominium , non solum actiones internas , sed etiam externas ad manifestationem gloriæ divinæ dirigere debemus , sed hoc est Deum *colere* , cultu nempe interno si in actionibus internis consistat ; & cultu externo si consistat in actionibus externis ; ergo actibus interiois , atque externis Deum colere debemus . Deum ergo debemus invocare , Deo grates agere ; & cum tota hominis vita moralis non sit , nisi actionum liberarum complexio , quæ quidem actiones ad gloriæ divinæ manifestationem , rectumque finem dirigi debent , hinc tota hominis vita perpetuus cultus divinus esse debet , ita ut homo Deo vivere & mori debeat . Ex his
omnis

omnibus evidens est dari religionem, nempe modum colendi Deum. Si religio ex principiis rationis seu ex iis quæ in Theologia naturali demonstrata sunt, definiatur, tunc religio dicitur *naturalis*; Si autem ex revelationis auctoritate definiatur, *revelata* appellatur. Religionem naturalem dari jam demonstravimus, sive Deum actibus internis atque externis colendum esse; quod quidem a nemine negari potest, nisi Deum ipsum negaverit. Quia vero religionis revelatæ necessitas ex Theologiæ naturalis principiis demonstrari potest, ideo sit

CONCLUSIO.

REVELATIONIS. NECESSITAS DEMONSTRATUR.

L. Quamvis universalissima religionis naturalis præcepta homini sua ratione utenti ita comperta sint, ut deleri nequaquam possint, eorundem tamen præceptorum usus conclusionesque particulares ex iisdem præceptis eruendæ, concupiscentia, cupiditate inordinatisque affectibus sæpe corrumpuntur. Conclusiones omnes ab universalissimis Theologiæ naturalis principiis eodem non distant intervallo; aliæ sunt propiores, remotiores aliæ quæ non sine multiplici ratiocinationum nexu colliguntur. Hanc vero longiorem ratiocinationum seriem persequi non possunt rudes atque illiterati homines. Hanc ratiocinationem fuscè exponit S. Thom. 1. 2. quæst. 94. art. 6. *Ad legem naturalem pertinent primo quidem præcepta universalissima quæ sunt omnibus nota. Secundaria autem quedam præcepta magis propria quæ sunt conclusiones quasi propinque principiis. Quantum ergo ad illa præcepta communia, lex naturalis nullo modo potest*

esse

est a cordibus hominum deleri in universali, deletur autem in particulari operabili secundum quod ratio impeditur applicare commune principium ad particulare operabile propter concupiscentiam, vel aliquam aliam passionem. Quantum vero ad alia præcepta secundaria, potest lex naturalis deleri de cordibus hominum vel propter malas persuasiones eo modo etiam quo in speculativis errores contingunt circa conclusiones necessarias, vel etiam propter pravas consuetudines & habitus corruptos.

Tristissima experientia hæc ratiocinatio confirmatur. Ex prædictis enim causis tamquam ex mala radice pullularunt innumera errorum monstra. Qui ad hoc præceptum attenderit: *alteri feceris quod tibi fieri velis*: facile concludet proximum suum diligendum esse: qui autem attenderit ad præceptum aliud: *alteri ne feceris quod tibi fieri non vis*: facile intelliget nemini vel per furtum, vel per adulterium vel alia qualibet injuria nocendum esse. Ita autem apud quasdam gentes depravata fuere hæc principia ut furtum uxorumque communitatem licita esse putaverint. Apud alias nationes barbaro pieratis abusu parentes senio confecti enecabantur. Si autem tanta sit hominum cœcitas ut ipsas e corde deleant conclusiones quæ ex lege naturali proxime deducuntur, quanto magis obscurare & delere facile est conclusiones quæ non sine multiplici ratiocinationum anfractu colliguntur?

Neque barbaræ tantum gentes rudesque homines in Theologiæ naturalis crassa supinaque ignorantia versati sunt, sed eadem fere mentis caligine laborarunt ingeniosissimi doctissimique homines divinæ revelationis auxilio destituti. Plato inter antiquos sapientissimus habitus qui tot ac tanta de animorum immortalitate egre-

gie scripsit, de hoc tamen dogmate firmitatem habuisse non videtur, in *Timeo* enim cum de hoc sermonem habiturus esset dixit, satis sibi esse, si in re tam difficili verisimilia diceret, Omni religionis notione sese caruisse propriis verbis testatur Cicero lib. 2. de divinatione: *Retinetur autem & ad opinionem vulgi & ad magnas utilitates rei publice mos, religio, disciplina.* In ipsa Dei notione immaniter errasse cultiores quoque veteres Philosophos certissimum est, Zenonis reliquorumque Stoicorum errores ita exponit Cicero lib. 4. quæst. Acad. *Zenoni & reliquis fere Stoicis æther videtur summus Deus mente præditus, quia omnia regantur. Cleanthes qui quasi majorum est Gentium Stoicus solem dominari & rerum potiri putat.* Itaque cogimur dissensione sapientium Dominum nostrum ignorare, quippe qui nesciamus *Soli an Ætheri serviamus.* Sed nihil opus est in re notissima diutius immorari. Nemo enim ignorat monstrosa de ipso supremo numine & lege naturali veterum Philosophorum commenta. Quod ergo Philosophi revelationis face illustrati de Theologia naturali tam sancte & præclare scripserint, non excellentiori ingenio, sed maxime divino lumini tribuendum est. Hinc cum Lactantio exclamandum est: *o quam difficilis est ignorantibus veritas, & quam facilis scientibus.* Deo soli opere sua nota sunt: homo autem non cogitando aut disputando assequi eum potest, sed dicendo & audiendo ab eo qui scire solus potest & docere. Lib. 2. de falsa sap. cap. 14. Ex his omnibus concludit Lactantius lib. 3. cap. 25. *Philosophia non est sapientia sed ab hominum certu abhorret.* Quod si natura hominis sapientie capax est, oportuit opifices & rusticos & mulieres & omnes denique qui humanam formam gerunt, doceri ut sapiant. Itaque tandem ex hactenus explicata pro-

que hanc secundam probationem non secus ac primam simili argumento concludere licet. Necessaria omnino est etiam quoad cultum externum revelationis auctoritas, si tanta sit cultuum varietas quæ nullo hominum iudicio, nulla privata auctoritate tolli ac dirimi possit; atqui &c. Ergo.

III. Revelationis necessitatem demonstrat ipsa religionis divina notio. Religionis objectum, principium & finis est Deus ipse, nempe ens infinitum, menti limitatæ incomprehensibile. Religio igitur multa continere debet *supra rationem*, seu mysteria rationi omnino impervia quæ ad Theologiam naturalem non pertinent. Divina attributa illorumque summa consensus altissimum sunt mysterium pullo rationis naturalis lumine cognoscendum. Non solum Deus est rerum omnium creator atque conservator; sed præter hæc duo supremi auctoris beneficia, innotescere etiam debuit an Deus pro sua infinita bonitate aliis nos cumulaverit gratis quæ ad salutem æternam referuntur; ignorare non debuit homo quid post hanc mortalem vitam sperandum bonis, quid timendum improbis. Dogma religionis primarium quo veluti fundamento nititur, est ipsa animæ immortalitas, quod quidem dogma licet in Theologia naturali demonstratum in dubium vocarunt aliqui, negarunt alii; præmiorum poenarumque æternitas aliud est spei tremorisque plenum religionis decretum, cuius quidem veritatem divina auctoritate hominibus certo cognitam esse oportebat. Ex hac demonstratione duabusque præcedentibus patet revelationis necessitatem duplici modo considerari posse, vel in ordine ad ipsas etiam veritates quæ ex principiis rationis colliguntur, vel in ordine ad dogmata su-
bli.

blimiora quæ intellectus finiti vim omnem longe superant & sine revelatione cognosci non poterant. Pro utroque veritarum genere revelationis necessitatem demonstravimus.

Objic. Revelationis necessitas demonstrari solet ex summa inter homines etiam cultissimos discordia circa legis naturalis præcepta; at multo obscurior est revelatio quæ eam certe non habet evidentiam quam præferunt ipsa legis naturalis principia; revelatio enim fallaci sensuum factorumque testimonio innixa est; lex autem naturalis purissimo innititur rationis lumine. Et quidem affulgente etiam revelationis luce non tamen dissipatæ sunt opinionum tenebræ, atque hinc tanta sectarum varietas. Unde sic argumentari licet: minime necessaria est auctoritas illa quæ rationis legisque naturalis luci nihil addere potest, atqui &c. Ergo . . . Resp. N. Min. Singulas objectionis partes explicabimus. Universalissima legis naturalis principia fulgentissimo quidem splendent lumine & ex hominum cordibus deleri non possunt. At conclusiones ex iisdem principiis etiam proximius eruendas, non solum concupiscentia & cupiditate sed ignorantia quoque corrumpi demonstravimus. Itaque falsum omnino est revelationis auctoritatem legis naturalis lumini nihil addere. Etenim cum evidentissima sint credibilitatis notiva, ipsa motivorum ratione evidenter credibilia fiunt remotiora legis naturalis principia quorum notio cupiditatis vel ignorantie tenebris obscuratur. Præterea religionem non sola lege naturali contineri demonstravimus, sed sublimioribus quoque mysteriis quæ intellectus limitati vires longe superant. Porro ad mysteriorum illorum fidem omnino necessariam esse revelationis auctoritatem nemo negabit.

Ita.

non tamen necessario, ideoque causæ liberæ in aliam causam liberam influxus erit quidem infallibilis, minime tamen necessarius. Neque etiam causæ physicæ in causam liberam influxus libertatem tollit; Etenim in mundo materiali contingunt effectus physici ex quibus nascuntur in causis liberis sensationes, ex sensationibus actiones; sed actiones illæ licet infallibiliter contingant, minime tamen necessario fiunt. Itaque patet hanc objectionem divinæ præscientiæ & providentiæ esse communem, ac proinde & communem responsionem; accurate distinguenda est futuritionis infallibilitas ab ipsa necessitate.

Inst. 2. Absurdum est *ad hoc Dei deducere maiestatem ut sciat per singula momenta quot nascuntur culices, quotve moriantur*; ut loquitur S. Hieron & *numquid de bobus cura est Deo?* ait Apostolus. Ergo saltem providentia divina ad ea quæ abjecta & vilia sunt, sese non extendit.... Resp. Dist. ant. rerum aut minutarum, aut quas abjectas censemus, cognitio & cura Deo tribuenda non est cum *successione & anxietate* C. cum *immutabilitate & tranquillitate* N. ant. & conseq. Nulla est igitur in divina cognitione successio, & nulla in Dei providentia anxietas, sed ab æterno Deus omnia immutabiliter cognovit, & vi æterni decreti rebus omnibus providet etiam quæ vilissimæ censeantur. Hinc Christus Dominus discipulos suos persuasos facturum quod Deus eorum curam summam gerat; a minori ad majus ita argumentatur: *Nonne duo passeres asse videntur; & unus ex illis non cadet super terram sine patre vestro? vestri autem capilli capitis omnes numerati sunt. Nolite ergo timere, multis passeribus meliores estis vos.* Christo igitur docente rerum quantumvis vilium, quales sunt passeres & capilli, tantam curam gerit Deus ut nihil iisdem acci-

accidere possit nisi ipso volente. Et certe quæ nostro iudicio abjecta, vilia & contemnenda censentur, talia non sunt iudicio Dei; Nam pretium decernimus rebus ex usu quem eas habere iudicamus, & ideo vilia & abjecta nobis videntur quæ nullum aut exiguum usum præbere præferimus nobis existimamus. At Deus videt omnem usum sive proximum sive remotum quem unumquodque ens in hac universa rerum serie habet, & idcirco de usu rerum iudicat in relatione ad totum universum; nos autem in usu rerum immediato acquiescimus, imo sæpissime ne hunc quidem attingimus, ac proinde exigui usus ea æstimamus quorum usus immediatus non est magni momenti, & nullius usus ea reputamus quorum nullum percipere valemus, atque hinc abjecta & vilia illa iudicamus, aliter prorsus iudicaturi si nobis daretur integrum rerum nexum intuitivè pervestigare; sic in machinis sunt partes quædam exiguæ quarum usum non percipit mechanicæ imperitus, quasque proinde abjectis iudicat & salva machina abesse posse sibi fingit; Sed longe aliter sentit machinæ auctor cui operis sui adest idea distincta, qua partium illarum usus omnes mutuamque relationem perspicit.

Præterea licet creaturæ omnes divinæ subiaceant providentiæ, erga homines tanten quos Deus tot & tantis cumulavit beneficiis, longe illustrius elucet divina providentia. Allatum S. Hieronymi textum ita explicat ipse S. Doctor in cap. 1. Habacuch: *Non sumus tam fatui adulatorem Dei ut dum potentiam ejus etiam ad ima detrahimus, in nos ipsos injuriosi sumus, eandem rationabilium quam irrationabilium providentiam esse dicentes.*

Inst. 3. Si eventus omnes in universa rerum

serie per divinam providentiam constituti sint, vana omnino esset humana providentia privataque sollicitudo. Inutiliter omnino vota precesque supremo numini funderentur, mutua hominum consilia atque hortamenta prorsus forent superflua, frustra omnino conderentur leges, inutilisque foret omnis cura vitæ & valetudinis, atque induceretur *fatum Mahumetanum* ita appellatum quod Turcæ præsertimque milites huic *fatalitatis* principio suam vivendi rationem conformare soleant. Tandem providentia divina quæ in causarum omnium atque effectuum perpetuo nexu consistit, miracula de medio tollet; hunc enim nexum miracula abrumpunt; Atqui hæc consecraria repugnant omnino; Ergo repugnat divina providentia saltem qualis a nobis definita est.

Resp. N. Maj. Et ad singulas probationis partes facilis est responsio. Etenim preces, vota, consilia, hortamenta non frustra sunt, nec inutiliter constituuntur leges; Hæc enim omnia in universa rerum serie divinæque providentiæ ordine continentur. Et quidem licet determinata sit universa rerum series, hanc tamen determinationem ignoramus, eamque cum actionum nostrarum serie conjunctam esse cognoscimus. Quare evidens est nos revera agere debere non secus ac si nihil esset determinatum. Itaque dum in sacris paginis præcipitur abjiciendam esse rerum temporalium curam, ita intelligendum est præceptum illud ut non simus de rebus vanis & caducis solliciti, sed de rebus non perituris quæ ad Deum spectant animæque saluti profunt; nam istas nimis curare non possumus, illas non possumus fere nisi nimis curare; quare scriptum est: *quærite primum regnum Dei & justitiam ejus, & hæc omnia adjicientur vobis.* Absurdum omnino est

est *fatum Mahometanum*, & nemo sana mente præditus non ridet Turcas illos, qui loca contagiosa despiciunt, & quasi laceſſunt perſuaſi ſe morituros in loco minime contagioſo, ſi Deus ipſos mori hoc tempore decreverit. Eodem divinæ providentiæ abuſu ſtulte peccant illi, qui referente Tournesortio in itinere Orientali, arbores in hortis incultas ſibi permittunt, atque negligunt. Itaque in divinæ providentiæ ordine continetur, ut eam adhibeamus diligentiam, quam prudentia, rectæque ratio dictant; & deinde in providentiâ divina conquieſcere debemus, atque animo tranquillo ferenda, ſi quæ nobis eveniant mala.

Quod ultimam ſpectat objectionis partem miracula ſcilicet, res paulo fuſius explicanda eſt. Miraculum definitur *effectus aliquis ſingularis, cujus ratio in univerſali cauſarum naturalium ſerie non continetur*. Ita dum ſanctus Petrus Act. 3. Homini claudſo ſolis verbis, ſoloque imperio greſſum reſtituit, ita ut exiliens ſtatim ambulaverit, factum illud in univerſa motuum naturalium ſerie non continetur; neque enim verba, quæ protulit S. Petrus, ullam in pedum articulatione mutationem producere potuerunt. Probe obſervanda eſt hæc miraculi notio, ex qua patet impiſſimam eſſe miraculi definitionem, quæ proferitur a Spinoſa in execrando opere, cui titulus eſt: *Tractatus Theologico-Politicus*: Miraculum definit Spinoſa effectum aliquem, cujus cauſam naturalem explicare non poſſumus, ita ut miracula in opinione dumtaxat, meraque ignorantia poſita ſint. Spinoſæ definitionem amplexus eſt Locius in diſſertatione de miraculis, ubi miraculum definit ſenſibilem quandam operationem, quæ cum captum ſpectatoris tranſcendat, ab eo pro divina habetur. Naturæ leges neceſſarias omnino eſſe, &

immutabiles affirmant Auctores illi, ac proinde omnia negant miracula. At ex nostra definitione patet dari veri nominis miracula. Et certe quis unquam somniare poterit aquam vasi infusam jussu alterius per aliquam naturalem motuum legem in vinum transmutari posse, & nostræ ignorantie tribuendum, quidquid potenti invenimus in miraculo Christi de aqua in vinum conversa? Qui maximo miraculo Mundum creavit, perpetuoque miraculo conservas atque gubernat, is leges naturæ quarum ipse Auctor est, pro sua liberrima, & omnipotentissima voluntate immutare potest atque suspendere. Neque hæc legum generalium perturbatio divinæ providentiæ repugnat, quin imo, specialem erga homines providentiam, summamque clementiam demonstrat, atque manifestat. Sunt enim miracula luculentissimum religionis testimonium. Et quidem cum miracula in causarum naturalium serie non contineantur, omnem naturæ vim excedunt, ac proinde solus Deus, miracula patrare potest, ipse miraculorum omnium causa est primaria, creaturæ autem sunt dumtaxat causæ *instrumentales*, atque *occasionales*. Porro repugnat a Deo summe veraci, & bono patrari miracula ad erroris confirmationem hominumque perniciem. Sunt ergo miracula evidentissimum credibilitatis motivum, divinamque providentiam magis, ac magis confirmant. Si autem Deus a gentilibus, improbisque viris prodigia patrari aliquando permiserit, ad majorem erroris confirmationem veritatisque confirmationem id factum est. Ita Magi Ægyptii aliqua Moysis miracula imitati sunt; at cum ad quartum perventum esset prodigium, hic imbecilla, atque desperata stetit Magorum ars & exclamare coacti sunt: *dignus Deus est hic*. Hanc doctrinam

fu.

fufius explicare noſtri non eſt inſtituti ; obſervare ſatis erit ex miraculis , legumque generalium perturbatione nullam in Deo argui poſſe mutabilitatem ; Deus enim opera , nec conſilia mutat , cum omnia decreverit ab æterno . Dum autem diximus miracula in cauſarum naturalium ſerie non contineri , id in eo ſenſu intelligendum non eſt , quaſi miracula ipſam rerum eſſentiam violarent , ut ait Spinoſa . Eſſectus corporum naturales dicimus , qui per ipſum partium nexum earumque qualitates , & regulas motus explicari poſſunt . Contraria ratione effectus ſupernaturalis appellatur , qui per mutuum partium nexum , earumque qualitates & leges motus explicari non poteſt . Itaque patet miracula corporum eſſentia non repugnare , atque eſſentiarum immutabilitate perperam abuſum fuiſſe Spinoſam , ut miraculorum poſſibilitatem labefactaret . Et quidem ſi per immutabilem rerum ordinem intelligantur veritates æternæ nulli mutationi obnoxia , ſi intelligantur ipſæ rerum eſſentia omnino invariables , jam ordinis miraculorumque notio pervertitur . Et certe Deus facere non poteſt ut ſpiritus , quamdiu ſpiritus manet , non ſit intelligentia præditus , ut corpus , quamdiu corpus manet , non ſit a ſpiritu diſtinctum . At quod ſol in certa a tellure diſtantia conſtituatur , quod certa periodo terram illuſtret , quod præſcriptus corporum cæleſtium ordo , jubente Deo , ſuspendatur atque turbetur , quod corpus aliquod moveatur vel quieſcat , quod homo infirmus ſit vel ſanus , mortuus an vivus , tales effectus ad rerum eſſentiam non pertinent .

Neque rerum eſſentia contraria ſunt miracula , quæ ex S. Scriptura aſſert Spinoſa . Quod ignis vim comburendi amiſerit , & juvenes hæbreos in fornace intactos reliquerit , quod cor-

pus nullum gravitatis signum demonstret, ita cum Christus Dominus super aquas ambulavit; hæc & alia similia immutabiles rerum essentias minime perturbant. Etenim Deus temperare, vel sistere omnino potuit ignearum particulærum motum, quicumque sit, in quo consistit ignis actio. Sub pedibus hominis aquam, vel aerem indurare potuit Deus omnipotens. Quamvis autem divina hæc prodigia essentiarum immutabilitati non sint contraria, univèrsali tamen rerum ordini contraria sunt, & vera sunt miracula. Patet ergo Spinosam miraculorum, essentiarumque notionem omnem pervertisse, & falso divinæ immutabilitatis prætextu in divinam Omnipotentiam injurium fuisse. Quæ autem de miraculorum notionem tradidimus, apprimè conveniunt cum doctrina sancti Augustini lib. 6. de Genesi ad litt. cap. 13. *Nec enim ista cum sunt contra naturam, fiunt nisi nobis, quibus aliter nature cursus innotuit, non autem Deo, cui hoc est natura quod fecerit.*

ARTICULUS IV.

De Deo Domino, & ab hominibus colendo.

L DEO competit dominium in omnes creaturas, estque proinde earum Dominus. Etenim Deus hunc Mundum aspectabilem, omnesque creaturas ex nihilo liberrime produxit, & ita conservat, ut cessante actione divina in nihilum reciderent omnia. Igitur Deus pleno in omnes creaturas dominio fruitur, ac proinde de toto universo, & de omnibus creaturis, potest pro suo arbitrio disponere, cum nihil insit creaturis, quod non habeant a Deo; disponere igitur potest de liberis hominum actionibus. Itaque voluntas Dei debet esse homini loco propriæ.

METAPHYS. PARS II. SECT. II. CAP. II. 277
voluntatis; atque hinc patet, quid sit *abnegatio* propriæ voluntatis; scilicet propositum firmum, nil quicquam volendi aut agendi, nisi quod sit Divinæ voluntati conforme.

II. Deus vult ut homo actiones suas liberas ad sui, aliorumque hominum perfectionem dirigat. Cum enim Deus sit summe bonus erga homines, ita ut nulla major bonitas concipi possit, bonus vero erga alios ad aliorum perfectionem promovendam pronus sit, fieri non potest ut Deus non velit hominem actiones suas liberas ad sui, aliorumque hominum perfectionem dirigere; id ergo Deus vult. Hinc ut homo voluntati Divinæ conformiter agat, non non sufficit ut suam promoveat perfectionem, sed requiritur quoque ut pro virili aliorum hominum perfectioni interserviat, nec quicquam faciat, quod ad aliorum imperfectionem quomodocumque tendat, & ideo non vult Deus ut homo bonum suum promoveat cum malo alterius. Itaque ex jure Dei in creaturas fluit hæc hominis obligatio, nempe ut suas actiones liberas ad gloriæ divinæ, divinorumque attributorum manifestationem, hoc est, ad sui aliorumque hominum perfectionem dirigat; atque ex eodem jure fluit amor Dei, amor sui ipsius, hoc est, propriæ perfectionis, & amor proximi. Præterea cum amor sui ipsius, & amor proximi fluant ex Dei dominio, ex infinita Dei perfectione, illiusque bonitate infinite summa, patet Deum super omnia amandum esse, nosque ipsos & alios propter Deum esse diligendos.

III. Jure domini Deo competit *justitia vindicativa*; nam justitia vindicativa dicitur, qua poenæ decernuntur & irrogantur, male facientibus, seu divinam voluntatem violentibus. Poena autem est malum physicum ab eo, qui alterum obligandi jus habet, immissum ob ali-
quod

quod malum morale. Igitur ex supremo Dei dominio fuit iustitia vindicativa. Itaque timendus est Deus, sed timore *filiali*, nempe iustitia Dei vindicativa non debet influere in determinationem voluntatis, nisi quatenus ex ea colligitur hanc esse Dei voluntatem ut hoc faciamus, illud omittamus. Et quidem cum Deus super omnia amandus sit, timor quem Deo debemus, est timor filialis; nempe sollicitè cavendum est, ne aliquid faciamus quod Deus fieri non vult, nec omittamus quod vult fieri. Timori filiali opponitur timor *servilis*, si nempe pœnæ metu quis adactus aliquid fecerit; timor servilis non est officium erga Deum, sed medium cohibendi voluntatem malam, ac proinde utilis est & bonus. Hæc sunt fecundissima Theologiæ naturalis principia ex quibus derivari possunt prima legis naturalis præcepta. At particulares casus, & horumce principiorum usum, fufius explicare ad Ethicam pertinet.

IV. Cultum tum internum, tum externum domini jure Deo deberi manifeste patet. Cum enim Deus in liberas hominum actiones, tum internas, tum externas plenum habeat dominium; non solum actiones internas, sed etiam externas ad manifestationem gloriæ divinæ dirigere debemus, sed hoc est Deum *colere*, cultu nempe interno si in actionibus internis consistat; & cultu externo si consistat in actionibus externis; ergo actibus internis, atque externis Deum colere debemus. Deum ergo debemus invocare, Deo grates agere; & cum tota hominis vita moralis non sit, nisi actionum liberarum complexio, quæ quidem actiones ad gloriæ divinæ manifestationem, rectumque finem dirigi debent, hinc tota hominis vita perpetuus cultus divinus esse debet, ita ut homo Deo vivere & mori debeat. Ex his
omni.

omnibus evidens est dari religionem, nempe modum colendi Deum. Si religio ex principiis rationis seu ex iis quæ in Theologia naturali demonstrata sunt, definiatur, tunc religio dicitur *naturalis*; Si autem ex revelationis auctoritate definiatur, *revelata* appellatur. Religionem naturalem dari jam demonstravimus, sive Deum actibus internis atque externis colendum esse; quod quidem a nemine negari potest, nisi Deum ipsum negaverit. Quia vero religionis revelatæ necessitas ex Theologia naturalis principiis demonstrari potest, ideo sit

CONCLUSIO.

REVELATIONIS NECESSITAS DEMONSTRATUR.

I. Quamvis universalissima religionis naturalis præcepta homini sua ratione utenti ita comperta sint, ut deleri nequaquam possint, eorundem tamen præceptorum usus conclusionesque particulares ex iisdem præceptis eruendæ, concupiscentia, cupiditate inordinatisque affectibus sæpe corrumpuntur. Conclusiones omnes ab universalissimis Theologiæ naturalis principiis eodem non distant intervallo; aliæ sunt propiores, remotiores aliæ quæ non sine multiplici ratiocinationum nexu colliguntur. Hanc vero longiorem ratiocinationum seriem persequi non possunt rudes atque illiterati homines. Hanc ratiocinationem fuscè exponit S. Thom. 1. 2. quæst. 94. art. 6. *Ad legem naturalem pertinent primo quidem præcepta universalissima quæ sunt omnibus nota. Secundaria autem quedam præcepta magis propria, quæ sunt conclusiones quasi propinquæ principiis. Quantum ergo ad illa principia communia, lex naturalis nullo modo potest*

est

est a cordibus hominum deleri in universali, deletur autem in particulari operabili secundum quod ratio impeditur applicare commune principium ad particulare operabile propter concupiscentiam, vel aliquam aliam passionem. Quantum vero ad alia praecepta secundaria, potest lex naturalis deleri de cordibus hominum vel propter malas persuasiones eo modo etiam quo in speculativis errores contingunt circa conclusiones necessarias, vel etiam propter pravas consuetudines & habitus corruptos.

Tristissima experientia hæc ratiocinatio confirmatur. Ex prædictis enim causis tamquam ex mala radice pullularunt innumera errorum monstra. Qui ad hoc præceptum attenderit: *alteri feceris quod tibi fieri velis*: facile concludet proximum suum diligendum esse: qui autem attenderit ad præceptum aliud: *alteri ne feceris quod tibi fieri non vis*: facile intelliget nemini vel per furtum, vel per adulterium vel alia qualibet injuria nocendum esse. Ita autem apud quasdam gentes depravata fuere hæc principia ut furtum uxorumque communitatem licita esse putaverint. Apud alias nationes barbaro pietatis abusu parentes senio confecti enecabantur. Si autem tanta sit hominum cœcitas ut ipsas e corde deleant conclusiones quæ ex lege naturali proxime deducuntur, quanto magis obscurare & delere facile est conclusiones quæ non sine multiplici ratiocinationum anfractu colliguntur?

Neque barbaræ tantum gentes rudæque homines in Theologiæ naturalis crassa supinaque ignorantia versati sunt, sed eadem fere mentis caligine laborarunt ingeniosissimi doctissimique homines divinæ revelationis auxilio destituti. Plato inter antiquos sapientissimus habitus qui tot ac tanta de animorum immortalitate egre-

gle

gie scripsit, de hoc tamen dogmate firmitatem
 habuisse non videtur, in *Timeo* enim cum de
 hoc sermonem habiturus esset dixit, satis sibi es-
 se, si in re tam difficili, verisimilia diceret. O-
 mni religionis notione sese caruisse propriis ver-
 bis testatur Cicero lib. 2. de divinatione: Re-
 tinetur autem & ad opinionem vulgi & ad ma-
 gnas utilitates rei publicæ mos, religio, discipli-
 na. In ipsa Dei notione immaniter errasse cul-
 tiores quoque veteres Philosophos certissimum
 est, Zenonis reliquorumque Stoicorum errores
 ita exponit Cicero lib. 4. quæst. Acad. Zenoni
 & reliquis fere Stoicis æther videtur summus
 Deus mente præditus, quæ omnia regantur. Clean-
 thes qui quæsi majorum est Gentium Stoicus solem
 dominari & rerum potiri putat. Itaque cogimur
 dissensione sapientium Dominum nostrum ignorare,
 quippe qui nesciamus Sols an Ætheri serviamus.
 Sed nihil opus est in re notissima diutius ima-
 morari. Nemo enim ignorat monstrosa de ipso
 supremo numine & lege naturali veterum Phi-
 losophorum commenta. Quod ergo Philosophi
 revelationis face illustrati de Theologia naturali
 tam sancte & præclare scripserint, non excellen-
 tiori ingenio, sed maxime divino lumini tri-
 buendum est. Hinc cum Lactantio exclamandum
 est: o quam difficilis est ignorantibus veritas, &
 quam facilis scientibus. . . . Deo soli operis sua
 nota sunt; homo autem non cogitando aut dispu-
 tando assequi eum potest, sed dicendo & audien-
 do ab eo qui scire solus potest & docere. Lib.
 2. de falsa sap. cap. 14. Ex his omnibus con-
 cludit Lactantius lib. 3. cap. 25. Philosophia
 non est sapientiæ sed ab hominum cœtu abhorret. . .
 Quod si natura hominis sapientiæ capax est, &
 portuit opifices & rusticos & mulieres & omnes
 denique qui humanam formam gerunt, doceri ut
 sapiant. Itaque tandem ex hætenus explicata
 pro-

probationum serie ita argumentamur. Necessaria est revelatio si satis non sint Theologiæ naturalis principia, atqui ex demonstratis non sufficiunt Theologiæ naturalis principia quæ ab hominibus non solum misere corrupta fuisse, sed etiam ad omnium captum accommodata non esse ostendimus. Ergo &c.

II. Ex corrupta supremi numinis legisque naturalis notionis sponte fluebat ipsa divini cultus depravatio. Hinc tot nati sunt *fanatici & supersticiosi* cultus pro varia quam unusquisque sibi fingeat, divini numinis idea; quod quidem variis exemplis declarabimus. Deus est rerum omnium conservator ipsique tribuendum tamquam causæ primæ quod globus terraqueus qui ab hominibus & animalibus habitatur, in tali conservetur statu ut sit habitabilis. Quamobrem cum viderent Persarum Philosophi remoto sole globum nostrum in *Chaos* quoddam converti nec vegetationi amplius esse locum, hominibus ac animalibus esse perennandum, ideo solem rerum omnium conservatorem omniumque naturæ effectuum primam causam esse putarunt. Hinc delati divini honores Soli, erecta Tempia, Sacrificia perpetrata. Alii astra coluerunt Deos, & in iis effectuum naturalium causas quæsierunt; hinc nata est Astrologia, hinc variis syderibus cultus exhibitus. Eiusdem criminis rei accusari non debent qui futuros eventus in certo quodam planetarum aspectu etiamnum hodie investigare non dubitant, sed a *superstitione* vel saltem a *fortuitate* excusari non possunt.

Non solum supersticiosi & fanatici cultus Diis decernebantur, sed etiam nefandi atque inhumani; hinc merito de his execrandis impietatibus cecinit Lucretius: *tantum religio potuit suadere malorum.* Qui Bacchum Deum cole-

lebant ebrietate, qui Venerem impudicitia sua
 festa peragebant; atque hinc horrenda Baccha-
 nalium solemnia quæ quidem religioso silentio
 premere jubet pudor. In barbariem ipsa verte-
 batur religio. Apud barbaras quasdam gentes,
 filios suos idolo Moloch flammisque Parentes
 devovebant. Alii idolo Baal, alii Saturno filios
 suos immolabant. Furor ille ad Carthaginenses
 manavit apud quos in calamitatibus publicis
 frequentissima erant horrenda hæc Sacrificia.
 Hanc cultus barbariem non exhorruerunt ipsi
 Romani; Curtius & ambo Decii sese morti de-
 voverunt humanum sanguinem a Diis ultoribus
 exposci putantes; eo usque pervenit crudelitas
 ut vivi sepelirentur homines ad avertenda Rei-
 publicæ pericula. Longius esset referre diversis-
 simos atque immanissimos cultus quibus detur-
 pata fuit antiquitus religio naturalis ipsaque
 humanitas. Inter Christianos quoque summa est
 cultus dissensio; superstitionis imo & idolola-
 triæ Catholicos accusarunt recentiores Hæretici.
 Hæc quis erit in tantis controversiis iudex nisi
 qui falli & fallere non potest? ipsa nempe di-
 vine revelationis auctoritas. Et quidem ut præ-
 clare ratiocinatur Lactant. lib. 3. cap. 27. *Nihilne
 illi, Philosophi scilicet, verisimile præcipiunt?
 imo permulta & ad verum frequenter accedunt;
 sed nihil ponderis habent illa præcepta, quia
 sunt humana, & auctoritate majori, id est divi-
 na illa carent. Nemo igitur credit; quia tam se
 hominem putat esse qui audit, quam esse ille qui
 præcipit.* Neque dicatur Principis auctoritate
 cultum præscribi posse; talis enim cultus Prin-
 cipis imperio constitutus mere civilis foret nec
 religionis nomen mereretur. Divine auctori-
 tatis necessitatem agnoverunt *Politici* legistato-
 res qui sectarum suarum commenta numinis ali-
 cujus auctoritate semper protexisse leguntur. Ita-
 que

que hanc secundam probationem non secus ac primam simili argumento concludere licet. Necessaria omnino est etiam quoad cultum externum revelationis auctoritas, si tanta sit cultuum varietas quæ nullo hominum iudicio, nulla privata auctoritate tolli ac dirimi possit; atqui &c. Ergo.

III. Revelationis necessitatem demonstrat ipsa religionis divina notio. Religionis obiectum, principium & finis est Deus ipse, nempe: ens infinitum, menti limitatæ incomprehensibile. Religio igitur multa continere debet *supra rationem*, seu mysteria rationi omnino impervia quæ ad Theologiam naturalem non pertinent. Divina attributa illorumque summa consensus altissimum sunt mysterium pullo rationis naturalis lumine cognoscendum. Non solum Deus est rerum omnium creator atque conservator; sed præter hæc duo supremi auctoris beneficia, innotescere etiam debuit an Deus pro sua infinita bonitate aliis nos cumulaverit gratiis quæ ad salutem æternam referuntur; ignorare non debuit homo quid post hanc mortalem vitam sperandum honis, quid timendum improbis. Dogma religionis primarium quo veluti fundamento nititur, est ipsa animæ immortalitas, quod quidem dogma licet in Theologia naturali demonstratum in dubium vocarunt aliqui, negarunt alii; præmiorum pœnarumque æternitas aliud est spei tremorisque, plenum religionis decretum, cuius quidem veritatem divina auctoritate hominibus certo cognitam esse oportebat. Ex hac demonstratione duabusque præcedentibus patet revelationis necessitatem duplici modo considerari posse, vel in ordine ad ipsas etiam veritates quæ ex principiis rationis colliguntur, vel in ordine ad dogmata su-
bli.

blimiora quæ intellectus finiti vix omnem longe superant & sine revelatione cognosci non poterant. Pro utroque veritarum genere revelationis necessitatem demonstravimus.

Objic. Revelationis necessitas demonstrari solet ex summa inter homines etiam cultissimos discordia circa legis naturalis præcepta; at multo obscurior est revelatio quæ eam certè non habet evidentiam quam præferunt ipsa legis naturalis principia; revelatio enim fallaci sensuum factorumque testimonio innixa est; lex autem naturalis purissimo innititur rationis lumine. Et quidem affulgente etiam revelationis luce non tamen dissipatz sunt opinionum tenebræ, atque hinc tanta sectarum varietas. Unde sic argumentari licet: minime necessaria est auctoritas illa quæ rationis legisque naturalis luci nihil addere potest, atqui &c. Ergo Resp. N. Min. Singulas objectionis partes explicabimus. Universalissima legis naturalis principia fulgentissimo quidem splendent lumine & ex hominum cordibus deleri non possunt. At conclusiones ex iisdem principiis etiam proximius eruendas, non solum concupiscentia & cupiditate sed ignorantia quoque corrumpi demonstravimus. Itaque falsum omnino est revelationis auctoritatem legis naturalis lumini nihil addere. Etenim cum evidentissima sint credibilitatis notiva, ipsa motivorum ratione evidenter credibilia fiunt remotiora legis naturalis principia quorum notio cupiditatis vel ignorantie tenebris obscuratur. Præterea religionem non sola lege naturali contineri demonstravimus, sed sublimioribus quoque mysteriis quæ intellectus limitati vires longe superant. Porro ad mysteriorum illorum fidem omnino necessariam esse revelationis auctoritatem nemo negabit.

Ita-

Itaque patet revelationis auctoritatem ipsi legi naturali vim addere, omnem obscuritatem dirimere, atque mysteriis totam fidem eamque omnino indubitam facere. Neque est quod obijciatur tanta quæ in suis erroribus confidunt, Sectarum varietas; quod enim motivorum evidentia non vincatur tot hominum pertinacia, id sit quod ad motiva non satis adverterint atque difficultatibus quas altissima religionis mysteria continent, opprimantur superba illorum ingenia. Præterea iniquis præjudiciis & inordinatis affectibus impeditur iudicii æquitas tantamque menti caliginem offundunt crimina ut fulgentissimam motivorum lucem ~~actu~~ non percipiant flagitiosi homines. Quanta autem sit motivorum credibilitatis evidentia repetendum est ex art. 3. par. 3. Log. cap. 2. Certum autem est fidem divinam majorem habere auctoritatem quam rationem ipsam, idque distat ipsamet ratio quæ jubet minus certo præferendum esse quod certius est. At certius est id quod Deus dicit verum esse, quam id quod nobis ratio persuadet, cum magis a Dei natura abhorreat ut fallat quam a nostra ut fallamur. Non tamen res ita est intelligenda, quasi fides a ratione nullatenus pendeat; nam ut jam antea observavimus cum Sancto Augustino epist. 122. *Fides rationem presupponit & numquam induci possemus ad ea quæ sunt supra rationem credenda, nisi ipsa ratio nobis persuaderet; rationi enim maxime consentaneum est divinæ nos auctoritati captivos subdere.* Quamvis ergo Apostolus jubeat, *captivare intellectum in obsequium fidei*, id tamen ut temere & sine ulla ratione faciamus non exigit; cum Deus evidentissima & omnium intelligentiæ accommodata suppeditaverit credibilitatis motiva. Porro meminisse oportet

tet quod sæpe monuimus, hic sermonem non esse de fide quatenus est gratia aut virtus divinitus infusa, sed tantum de fide quatenus est persuasio naturalis ex motivis credibilitatis oriunda.

Inst. 1. Cum Deus sit communis atque optimus omnium hominum Pater, ab ipso mundi exordio sine ullo temporum locorumque discrimine universum genus humanum revelationis lumine illustrare debuisset; æqualis enim erat apud omnes populos revelationis necessitas; atqui nec ab ipso mundi exordio locum habuit revelatio; neque deinde beneficium illud ad omnes gentes manavit; ergo &c.

Respondeo totum illud argumentum ambiguitate laborare. Dum revelationis necessitas demonstratur, illa quidem necessitas se tenet ex parte creaturæ, non autem ex parte Dei. Quod vero immediata revelatione gentes plurimæ caruerint, respondendum est cum S. Augustino: *Dei judicia occulta sunt multa, injusta nulla*: de civ. Dei lib. 18. c. 18. Et quidem jam demonstravimus altissima esse divinæ providentiæ arcana & finitis mentibus longe impervia; revelationis necessitatem ex parte hominis demonstrasse satis sit. Hæc objectio conjuncta est cum Theologica questione: *utrum Deus auxilia ad salutem sufficientia infidelibus conferat?* verum hanc disputationem Philosophis attingere non licet; breviter tantum observabimus varias a Theologis huic objectioni responsiones adhiberi. Alii respondent nullam in Deo esse injustitiam quod infidelibus non conferat saltem immediatam revelationis gratiam; injustitiam enim locum dumtaxat habere dicunt in iis qui digni sunt, non autem in indignis; at infideles omnes tum propter peccatum originale, tum propter peccata actualia indigni sunt gratia qua ad fidem venire possint. Illi au-
tem

tem Theologi utuntur rationatione & auctoritate S. Augustini in epist. ad Sixtum Pelagianos refellentis: *Parum attendant*, inquit S. Doct. quod debita reddatur poena *damnationis*, indebita gratia liberato ut *nec ille se indignum queratur*, nec dignum se iste gloriatur *namque ibi potius nullam fieri acceptionem personarum; ubi una eademque massa damnationis & offensionis involvit*, ut liberatus de non liberato discat quod etiam sibi supplicium conveniat, nisi *gratia* subveniret. Respondent Theologi alii neminem in locis tam diffinis morari; *aut cum gentibus ita barbaris conversari quem Deus non pertrahat sufficientibus auxiliis ad sui cognitionem qualem esse oporteat ut hinc Deus moveatur ad impertinendam huic homini vel per se, vel per angelum, vel per hominem ad id delegatum, revelacionem veræ fidei in Christum per quem salvabitur.* Hæc est expressissima S. Thomæ doctrina art. 11. quæ *de veritate* *ut aliquis taliter* *naturæ in syllogis ductum rationis naturalis sequeretur in appetitu boni & fuga mali; certissimo est tenendum quod et Deus vel per internam inspirationem revelaret ea quæ sunt ad credendum necessaria; vel aliquem fidei prædicatorem ad eum dirigeret, sicut misit Petrum ad Cornelium.* . . . Quamvis non sit in nostra potestate cognoscere ea quæ sunt fidei ex nobis ipsis; tamen si feterimus quod in nobis est, scilicet ductum naturalis rationis sequamur; Deus non deficiet nobis ab eo quod nobis est necessarium. Hæc pauca dicta sunt ex quibus patet non deesse Theologicas rationes quæ propositæ objectioni satisfaciant; verum quia hic Philosophos non Theologos agere debemus, satis erit advertere objectionem hanc eandem omnino esse cum vulgari argumento quod ex mali moralis permissione ad *impugnandam* divinam providentiam de-

desumere solent religionis hostes . Igitur ne a-
 ctum agamus, legantur quæ jam explicata sunt
 de providentia divina .

Quod spectat revelationis antiquitatem, eam-
 dem cum ipso mundo ætatem habet, ita ut nul-
 lo tempore defuerit cognitio veræ illius religio-
 nis quam Deus pro temporum varietate & con-
 venientia hominibus sancte, & inviolate præ-
 scripsit . Revelationis veritatem non solum in le-
 ge mosaica atque evangelica sed etiam in lege
 naturæ demonstrant Theologi ; at Philosophis de-
 monstrasse satis sit revelationis necessitatem ; u-
 berior responsio. repeti debet ex Sacra Theolo-
 gia, divina omnino scientia .

Inst. 2. Ad definiendum aliquem cultum exter-
 num & ad credenda religionis mysteria necessa-
 riam esse revelationis auctoritatem demonstra-
 tum quidem est . At cultus externus indifferens
 omnino videtur ; cum enim Deus perspectas in-
 time habeat hominum mentes, de cultu exter-
 no, de modo colendi parum curat, dummodo co-
 latur, atque adoretur in spiritu & veritate . Tan-
 dem necessario credenda esse religionis mysteria
 constare non potest nisi revelationis auctoritate,
 ac proinde id ponitur quod est in questione, &
 demonstratio in hac parte est manifesta petitio
 principii . Sic ergo argumentari licet . Revela-
 tionis necessitas non demonstratur, nisi ipsa quo-
 que demonstretur objecti revelationis necessitas, &
 qui externi cultus & mysteriorum necessitas non
 demonstratur . Ergo Resp. C. M. N. M. Et
 primo quidem necessarium esse cultum etiam ex-
 ternum jam demonstravimus variis rationibus
 quibus hæc aliæ adjungi possunt . Cum omnes a-
 ctiones ad nostram aliorumque perfectionem di-
 rigere teneamur, pietatis & religionis exempla
 aliis præbere debemus ; hæc autem exempla per
 cultum externum manifestari possunt ; cultus pro-

re internus satis non esset ad religionem pietatemque in plurimis hominibus excitandam. Singulis præsertimque rudioribus hominibus æqualiter datum non est cognoscere quid Deo debeant, quem cultum etiam internum debeant exercere; eos ergo aliorum hominum exemplo erudiri oportuit. Eadem vero argumenta quæ cultus externi necessitatem ostendunt, probant quoque cultum aliquem divina revelatione acceptum fuisse. Etenim si uniuscujusque arbitrio permisus fuisset divinus cultus, illa cultus indifferentia non solum discordiam confusionemque maximam, sed & superstitionem induceret varique pareret errorum monstra quibus infectas fuisse demonstravimus cultissimas etiam gentes revelationis lumine destitutas. Ecquis autem crediderit Deum optimum qui vilissimorum quoque animalculorum actiones providentia sua gubernat, in re maximi momenti genus humanum neglexisse, divinumque cultum uniuscujusque levitati & inconstantia reliquisse? Tandem quod spectat ultimam objectionis partem, jam demonstravimus Deum, pro hominum officio, coli non posse si divina ignoremus beneficia; si nesciamus quid sperandum, quid timendum; si alia multa ignoremus dogmata quæ sine divinæ revelationis beneficio cognosci non possunt. Porro sola ratione hic contra incredulos pugnamus; cum autem fidei dogma sit, fidem ac proinde & revelationem esse necessariam ad salutem, quæstio tota statim per ipsam revelationem dirimi potuisset; sed maxime inculcandum est Ecclesiasticis viris & iis præsertim quibus fidem tueri atque propagare incumbit ex vitæ ratione & instituto, ut nullis utantur argumentis nisi ab adversariis vel sponte, vel probationum vi fuerint concessa.

Antequam hanc disputationem absolvam, a
Theo-

Theologia naturali alienum non est genuinos
 saltem præcipuos revelationis characteres expo-
 nere. 1. Quamvis revelatio plurima contineat
 mysteria quæ supra rationem longe eminent,
 nihil tamen contra rationem potest continere.
 Hujus characteris abusus est non satis deplo-
 randus apud superbos impiosque homines qui
 sibi facile persuadent rationi id esse contrarium
 quod ipsi non intelligunt. Itaque ad reprimen-
 dam ingeniorum proterviam ipsa revelationis
 auctoritate constare omnino debuit supremus
 & infallibilis iudex; alioquin perpetuæ fo-
 rent controversiæ nulla auctoritate finiendæ,
 ac proinde nulla esset revelationis utilitas.
 Hanc autem auctoritatem ad Ecclesiam per-
 tinere in Theologia demonstratur 2. Li-
 cet revelatio veritatibus necessariis quarum fal-
 sitas contradictionem involvit, repugnare non
 possit; contraria tamen esse potest veritatibus
 contingentibus quæ non sunt absolute necessa-
 riæ. Exempli causa: Divina revelatio docet
 Virginem concepisse sine commercio cum vi-
 ro: Hæc veritas contradictionem involveret,
 nisi apponeretur conditio quod nempe conce-
 ptio non fiat naturaliter. Porro divina revela-
 tio docet hanc conceptionem supernaturaliter
 seu per miraculum factam esse, ac proinde
 contradictio est tantummodo apparens. Ex præ-
 cedenti ratiocinatione evidens est iudicium de
 veritatum necessitate & contingentia ad nullam
 auctoritatem privatam pertinere . . . 3. Reve-
 latio nihil continere debet Theologiæ naturali
 contrarium. Etenim in Theologia naturali tra-
 ctatur de divinis attributis, quæ sunt verita-
 tes æternæ & necessariæ, quibus proinde repu-
 gnare non potest revelatio. Præterea Theolo-
 gia naturalis generatim demonstrat officia homi-
 nis erga Deum, erga seipsum & proximum. Cum

autem officia illa ex infinita Dei perfectione, ex illius infinita bonitate atque ex supremo Dei in creaturas dominio profluere demonstrantur, patet revelationem nihil docere posse quod sit his officiis contrarium. Tandem cum officia hominis erga Deum præcipiant ut singulas actiones ad perfectionem dirigamus, revelatio nihil potest præcipere quod morum sanctitati atque perfectioni adversetur; imo cum ex legis naturalis in hominum mentibus corruptione demonstrata sit revelationis necessitas, legis naturalis lumen in nobis accendere debuit revelatio, corruptos homines ad castam morum doctrinam revocare, generi humano suam originem demonstrare, ultimumque finem, supremum nempe bonum ostendere 4. Revelatio divina sibi ipsi contradicere non potest, hoc est, modo aliquid tamquam verum docere non potest, modo tamquam falsum rejicere; id enim divinæ veracitati repugnat. Quamvis autem revelatio divina sibi ipsi contradicere non possit, obscura tamen revelationis dogmata nondum definita ecclesiæ auctoritate illustrari possunt & definiri, numquam vero immutari. Nec tamen perpetuæ revelationis veracitati contrarium est quod Deus pro temporum & circumstantiarum varietate leges abrogare, aliasque substituere possit; talis enim variatio ad *œconomiam* dumtaxat pro vario hominum statu pertinet. Ita lex vetus fuit bona: *Lex quidem sancta & mandatum sanctum & iustum & bonum*; inquit Apostolus ad Rom. 7. Lex autem nova non differt a veteri quantum ad finem ultimum, sed tantum quoad modum 5. Recensitos revelationis characteres *negativos* appellare licet; at *positivum* & luculentissimum divinæ revelationis testimonium præbent miracula & prophetiæ de quibus cum antea jam plura dicta fue-

fuerint, superest ut varia quæ in his institutionibus dispersa leguntur ad demonstrandam religionem argumenta hic brevissime colligam, & sub uno veluti aspectu exhibeam.

Absurdissimum est ex fortuita partium congerie tumultuarioque conflictu pulcherrimum hunc mundum, universumque rerum ordinem prodiisse. Rerum omnium Auctorem esse demonstratur ens a se, infinite perfectum, infinita intelligentia præditum. Ecquis autem sibi persuadere poterit, Ens illud sapientissimum quod creaturas e nihilo eduxit, illas deinde cæco facto relinquere, illas nihil curare, & omnia ad ultimum finem non dirigere? Igitur supremus rerum omnium Auctor res omnes sapientissime regit atque gubernat.

Nemo sane nisi sensui intimo renuntiaverit, sibi in animum poterit inducere erroneam & fallacem esse propriæ libertatis conscientiam, nos esse pura putaque automata sine ulla potestate. Quis sibi persuadebit, bona vel mala actione perpetrata, se non potuisse hanc committere, illam omittere? Igitur homo liber est.

Nemo nisi barbarus crediderit inter morales hominum actiones nullum esse discrimen sed actiones omnes esse indifferentes, ita ut amico nobis beneficio vel crudeli manu mortem intentare, vel gratum animum significare æqualis reputari debeat. Sunt igitur actiones morales intrinsece bonæ, justæ, honestæ, ac proinde existit lex naturalis. Repugnat autem perfectissimi creatoris bonitati & justitiæ ut bonum sine præmio, malum autem sine pœna maneat. Absurdum ergo est cogitare hominem a Deo in hac vita ad breve tempus fuisse constitutum tamquam fortunæ casusque ludibrium sine ulla spe, sine timore ullo. Igitur altera

vita bonis speranda, malis autem pertimescenda. His fere gradibus ad religionem naturalem perducendi sunt increduli homines qui dum magnum & singulare ingenium ostentare volunt, suam imbecillitatem atque impietatem demonstrant. Jam ad religionem revelatam gradum faciamus.

Lege naturali tamquam basi fundata est religio revelata. Per diversas revelationes minime tamen sibi contrarias Deus voluntatem suam hominibus manifestavit, ipsumque proprium filium humanæ salutis reparatorem & religionis *lapidem angularem* constituit. Hæc dogmata continentur in libris quorum veritas non solum testimoniis fide dignis, sed etiam splendidioribus miraculis fuit confirmata.

Quis sanæ mentis sibi persuadebit Judæos quibus commissum fuit divinarum promissionum depositum, dolis fraudibusque fuisse seductos, atque in eam inductos falsam opinionem se nempe liberatos fuisse ex Ægypto *in manu forti & brachio extenso*, insensissimos illorum hostes Ægyptios variis flagellis fuisse oppressos, Cananæos fuisse exterminatos ut Judæi possiderent terram *fluentem lac & mel*, atque in toto hoc tempore Deum populo Hæbreo suæ præsentis & protectionis illustria atque perpetua argumenta dedisse? Quis crediderit Judæos hæc omnia sine ullo fundamento facile credidisse cultumque onerosum sine ulla ratione sibi imposuisse?

Divinum certe opus esse necessum est longam Prophetiarum seriem quæ non interrupto multorum sæculorum cursu exitum habuere. Oracula illa eventus humanæ cognitioni longe impervios præuntiabant, Messiam clare designabant, in Christo adimpleta fuere, Christo conveniebant omnes Prophetiarum characteres, suam

suam cælestem missionem factis in omnibus fere naturæ partibus miraculis comprobavit quæ nec ab ipsis crudelissimis hostibus negari potuere. Nulla certe fraudis suspicio esse potest. Ecquis crediderit statim appositos fuisse falsos testes qui supplicia mortemque ipsam promendaciis subire non dubitaverint? Nemo sibi persuadebit humanam esse religionem ab imperitis hominibus omni humano auxilio destitutis propagatam, a potentissimis regibus impugnata, humanis inordinatisque affectibus contrariam, brevi tamen temporis intervallo longe lateque constitutam. Ita pedetentim ad religionis revelatæ doctrinam progrediendum est atque tandem ad infallibilem revelationis interpretem sanctam Catholicam Apostolicam & Romanam Ecclesiam extra quam nulla salus esse potest, Deo dante, incredulos adducere non erit difficile; sed alia dogmata tractare ad Theologos pertinet; brevem doctrinæ seriem ex ordine exposuisse satis sit.

A P P E N D I X

De erroribus Theologiæ naturali adversis.

I. **E**Xistentiam Dei vel ex contemplatione hujus universi, vel ex animæ nostræ consideratione aliisque argumentis plurimis evidenter demonstravimus. Si tamen aliquis inveniri possit luminis naturalis usu ita destitutus vel cupiditatum tenebris ita immersus ut supremum naturæ auctorem non agnoscat, is *Atheus* dicitur. Quæ obijciunt Athei ex malis physicis & moralibus contra existentiam Dei rerum omnium auctoris, conservatoris & Domini, jam a nobis plene soluta ac dissipata fuere invictis rationum momentis per quæ confutari ac tandem convin-

ci

ci possunt Athei, adjuvante Deo. *Deista* five *Teista* vel etiam *Naturalista* appellatur qui Deum existere quidem concedit, sed religionem nullam, cultum nullum profitetur. Religionem omnem divinamque revelationem tanquam meras fabulas fastidiosè traducunt *Deista*, satisque esse garriunt, si Deus in naturæ cordisque simplicitate adoretur. Longe lateque pervagatur hæc exitiabilissima pestis omni conatu extirpanda, sed maxime imploranda est divina gratia ut tantas & perniciosissimas mentis humanæ tenebras depellat. Solius Theologiæ naturalis ope in articulo præcedenti impugnavimus terribilissimam hanc sectam Sacræ Theologiæ auctoritate omnino debellandam.

II. *Fatalista* dicitur qui absolutam rerum omnium in mundo necessitatem defendit. *Fatalismus universalis* appellatur qui absolutam rerum omnium necessitatem ad ipsas quoque actiones humanas extendit, negata libertate voluntatis humanæ. *Fatalismus particularis* vocatur qui necessitatem rerum omnium absolutam ultra mundum materiale non exrendit, concessa voluntatis humanæ libertate. Spinoza & Hobbesius fatalismum universalem propugnant; Stoici vulgo creduntur fatalismum particularem admisisse. Quia vero demonstratum est mundum a Deo liberrime creatum esse, eum esse ens contingens, nexum rerum ac ordinem naturæ a necessitate absoluta immunem esse, atque animam humanam in volendo ac nolendo esse omnino liberam, manifestum est utrumque fatalismum errorem esse absurdissimum.

III. *Antropomorphita* dicuntur qui Deo tribuunt corpus humanum; & hunc errorem *antropomorphismum crassum* appellabimus ut distinguatur ab alio errore quo Deo per modum animæ representato tacite tribuuntur limitationes & im-

& imperfectiones ; hunc errorem *antropomorphis-*
 mum subtilem vocabimus. Antropomorphismum
 crassum primis Ecclesiæ sæculis. amplexi sunt
 quidam hæretici ; eundem olim Rabbini plures,
 & hodie ex Judæis aliqui defendunt, ea scri-
 pturæ loca in quibus Deo videntur tribui or-
 gana & actiones humanis similes, proprie ac per-
 peram interpretati. Porro demonstravimus per-
 fectiones quæ animæ nostræ insunt, Deo tribuen-
 das esse in gradu absolute summo, nec ipsi tri-
 bui posse quæ defectum aliquem involvunt ;
 quare patet antropomorphismum *subtilem* cras-
 sum esse errorem. Crassissime errant materiali-
 stæ qui nulla dari entia immaterialia affir-
 mant ; demonstravimus enim & Deum & ani-
 mam humanam esse entia simplicia atque im-
 materialia, & per se liquet Deo tribui non pos-
 se corpus, quin ei tribuantur corporis defectus ;
 Deo autem nulli inesse possunt defectus ac pro-
 inde antropomorphismus crassus vanissimum est
 delirium.

IV. *Idealistæ* realem corporum existentiam
 negant ; sed Dei & animæ existentiam admit-
 tunt. Hic error antropomorphismo est omnino
 oppositus. Duplici de causa realem corporum
 existentiam negant Idealistæ, tum quia corpora
 impossibilia esse existimant, tum quia animæ
 cum corpore commercium repugnare judicant.
 Verum corpora existere demonstravimus tra-
 stantes de animæ spiritualitate. Deinde com-
 mercii animæ cum corpore possibilitas patet ex
 hypothesibus Philosophorum quas in Pnycholo-
 gia exposuimus. Præterea non solum ex constan-
 ti sensuum testimonio & ex notione attributo-
 rum Dei qui decipere non potest, demonstratur
 corporum existentia, sed ex veridica & omnino
 indubitata Mosis historia mundum materiale
 revera a Deo creatum esse ostendimus. Ideali-
 starum

starum error ita manifestus est ut universo generi humano insanire videantur.

V. *Paganismus* sive *Gentilismus* error est quo fingitur mundum a pluribus Diis pendere sive quoad existentiam & conservationem, sive quoad gubernationem. Porro demonstravimus Deum esse ens a se, mundi creatorem, conservatorem ac gubernatorem, ac proinde mundum ab unico ente pendere. *Idololatria* latiori sensu dicitur cultus omnis divinus enti quod Deus non est, exhibitus. Unde *Idololatra* est qui falsis Diis & Idolis sive simulachris eum præstat cultum qui soli Deo convenit. Quare Gentiles sunt etiam Idololatræ.

VI. *Manichæismus* error est quo fingitur mundum pendere a duobus principiis, altero quidem bono a quo sunt bona in hoc mundo, altero autem malo a quo sunt mala physica & moralia. Hic error est antiquissimus præsertim apud Persas & vulgo tribuitur Zoroastri. In Christianismum Sæculo 3. invehit a Manete & sub nomine Manichæismi propagatus. Ortum vero inde duxit quod illius auctores sibi persuaserint mala physica & moralia summæ Dei perfectioni, bonitati imprimis divinæ ac sanctitati repugnare, atque ideo finxerunt principium diversum a principio bono seu Deo. Unde mundum pendere ajunt quoad mala physica & moralia ab illo principio malo quod independens esse dixerunt a principio bono, seu Deo ente summe perfecto. Verum demonstravimus mala physica atque moralia quæ in hac rerum serie continentur summæ Dei perfectioni minime repugnare, ac proinde commentitium esse principium malum evidenter ostendimus.

VII. *Spinosismus* error est quo non admittitur nisi unica substantia infinitis attributis prædita, quorum duo sunt cogitatio & extensio infiniti.

finitæ; eorum unumquodque æternam & infinitam essentiam habet; entia vero infinita oriri finguntur ex necessaria modificatione attributorum illius substantiæ, animas scilicet ex modificatione infinitæ cogitationis, & corpora ex modificatione extensionis infinitæ. Spinosismi auctor est Benedictus Spinoza natus Amstelodami an. 1632. Philosophiæ cartesianæ principiis & methodi mathematicæ specie quadam abusus est, constitutis singillatim definitionibus, axiomatis, propositionibus ac corollariis; Sed contra Logicæ regulas multis modis peccavit affere obsecras & fallaces definitiones quæ lectori parum attento nebulas facile objiciunt. Spinoza Deum non distinguit a mundo, absolutam rerum omnium necessitatem inducit, Deum facit mutabilem, extensum, & tamen intelligentem, ac proinde atheismum cum fatalismo universali & cum aliis erroribus quos jam confutavimus conjungit. Præterea impiæ hypotheseos basim & fundamentum assumit Spinoza non posse dari duas substantias ejusdem essentiz; quia si eandem habeant essentiam, inquit, sunt una & eadem substantia. Nullus autem est Logicæ Tyro qui statim non videat sic esse distinguendum; duæ substantiæ non possunt habere eandem essentiam identitate numerica *Concedo*. Identitate vel generica vel specifica *Nego*. Nullus quoque est homo sensu communi præditus qui ex eo quod Petrus & Paulus sint homines, ideoque habeant eandem essentiam, sive similes sint ratione humanitatis, concludat Petrum & Paulum esse unum & eundem hominem numerice seu esse unicum individuum. Itaque patet Spinosismum ineptissimis deliramentis absurdissimisque erroribus scatere.

VIII. *Epicureismus* falsa est & obscura opinio qua negatur intrinseca actionum honestas & tur-

turpitudinis atque obligatio divina ad alias actiones committendas, alias vero omittendas. Nomen sumptum est ab Epicuro Philosopho græco qui providentiam divinam negasse fatalemque necessitatem statuisse dicitur. Unde per legitimam consequentiam periculosissimus error ipsi tribuitur, homini nempe licere vivere prout libet. Deum parum curare quid faciat homo, & summum bonum in corporis voluptate consistere. Epicurum vindicavit Gassendus lib. 1. Ethic. cap. 2. ostendens eum non de voluptate corporis, sed animi fuisse locutum, & ipsummet temperanter vixisse. Verum quidquid sit de Epicuri mente, Epicureismus qualem modo definivimus hac primaria turpissimaque lege nritur quod lubet, licet. Cum enim omnem tollat divinam obligationem omnemque intrinsecam actionum honestatem ac turpitudinem, omnes actiones tanquam indifferentes statuit, donec lege civili quædam præcipiantur, quædam prohibeantur. Itaque si a vitiosis actionibus abstineant Epicurei, id faciunt non legis reverentia sed metu pænæ, atque ita officium boni hominis & boni civis parum curant, nisi quatenus coacti sunt; Deum vero sibi repræsentant tanquam Dominum indulgentissimum qui saltem non utitur jure suo, nullamque hominibus obligationem imponit. Hunc vero fædissimum errorem jam confutavimus, ubi demonstratum est hominem teneri actiones suas juxta divinam voluntatem ordinare atque determinare; quod quidem ut in hac mortali vita faciamus, DET NOBIS DEUS OPTIMUS MAXIMUS, atque tandem divina attributa non in speculo & ænigmate, sed, ut vident Beati, in æternum intueamur.

FINIS METAPHYSICÆ.



99 266255





